


Plaids des cours féodales  
de Piètre & Pummereaulx  
à Aubers au XVIème siècle



A partir d'un manuscrit issu des archives  
de la Maison d'Hangouart



Lucette Luczkow-Lebrun & Bernard Deleplanque  
Lille MM VII

# Introduction

Depuis le XX<sup>ème</sup> siècle nombreux sont les chercheurs ayant étudié l'histoire des seigneuries de Piètre et Pommereau à Aubers, tous ont utilisé les nombreux documents fonciers de type terriers, briefs, dénombremments, ventes ainsi que les coutumes seigneuriales. Nul ne semble par contre avoir été curieux d'un registre du XVI<sup>ème</sup> siècle provenant des archives familiales de la maison d'Hangouart<sup>1</sup>, et sur lequel ont été copié un certain nombre de procès intentés par Guillaume Hangouart<sup>2</sup> (1529-1600) seigneur de Piètre, Pommereau de la Mayrie de Gondécourt et du fief de Mézedon.

Ce manuscrit qui de prime abord peut paraître difficile à étudier contient en fait de nombreux renseignements sur les rapports entre le seigneur et les habitants de ses seigneuries. Tous ces textes peuvent en effet se révéler très utiles pour les chercheurs, d'un point de vue juridique bien sûr, mais aussi pour l'étude toponymique, généalogique ou tout simplement pour découvrir les relations entre le seigneur et ses sujets.

Seuls les textes concernant les seigneuries de Piètre et Pommereau à Aubers dépendantes de la province d'Artois ont été transcrits, ce qui représente les deux tiers du manuscrit. Nous nous sommes efforcés de respecter au mieux l'orthographe du document. La ponctuation y est pratiquement inexistante mises à part les barres (/)<sup>3</sup> qui représentent plus les pauses à la lecture qu'une ponctuation au sens grammatical du terme. Les lettres majuscules, présentes à n'importe quel endroit du texte, accroissent aussi la difficulté de compréhension, c'est pourquoi certaines ont été remplacées volontairement par des minuscules. L'initiale des noms propres a été systématiquement écrite en majuscule lors de la transcription.

Les mots d'ancien français ou propres au terroir ont été dans la majorité des cas définis en notes mais quelques uns d'entre eux n'ont pu être retrouvés dans les dictionnaires à notre disposition<sup>4</sup>.

Les soulignements de mots ne figurent pas dans le manuscrit original mais ont été ajoutés de manière à lever le doute du lecteur quant à l'orthographe, en effet cette dernière peut changer d'une ligne à l'autre, aussi bien sur les mots communs que sur les noms propres<sup>5</sup>.

La police de caractères utilisée correspond aux caractères d'imprimerie du milieu du XVI<sup>ème</sup> siècle. La lettre « j » majuscule étant représentée à cette époque par le caractère « I » a cependant été remplacée par un « j » minuscule de manière à rendre la lecture plus aisée.

Avertissement : Cet ouvrage reste néanmoins une transcription la plus fidèle possible du manuscrit original mais n'est en aucun cas une étude de contenu, il laisse au lecteur, selon ses compétences l'interprétation de ces textes.

Remerciements à Alexis Cordonnier et au personnel des Archives Départementales du Nord pour leur aide précieuse.

*Illustration de couverture : Le château de Piètre au début XVII<sup>ème</sup> (ADN Cumulus 19264).*

---

<sup>1</sup> Actuellement aux Archives départementales du Nord sous la cote E732.

<sup>2</sup> Fils de Guillaume seigneur de Piètre et Pommereau et de Catherine Lecocq.

<sup>3</sup> Les doubles barres (//) présentes sur l'original et qui accompagnent une coupure du mot entre la fin de ligne et le début de la ligne suivante ont bien sûr été ignorées sur cette transcription.

<sup>4</sup> Les définitions sont issues du dictionnaire d'ancien français de Frédéric Godefroy, sauf précision en note.

<sup>5</sup> Exemple : Sablonnières et savelonnières.

## **GUILLAUME D'HANGOUART III (1529-1600) SEIGNEUR DE PIETRE ET POMMEREAU<sup>6</sup>**

Guillaume d'Hangouart III, fils de Guillaume (*président du conseil d'Artois*) et de Catherine Le Cocq, vit le jour à Lille le 9 septembre 1529, avant 6 heures du matin, et fut baptisé en l'église St Etienne à Lille, ayant comme parrains, Maître Guillaume Le Blancq et Maître Nicolas Fainiel, comme marraine Madame de Haubourdin.

Agé de dix sept ans au décès de son père, sa mère est chargée de sa tutelle par acte daté du 30 mai 1547, et il l'accompagne à Lille où il est nommé échevin quelques années plus tard. Bien qu'ayant ce titre il ne paraît pas avoir exercé aucune fonction avant la date tardive où il succède à Philippe, son oncle comme conseiller de l'Empereur et receveur général des aides pour les villes et châtelainies de Lille, Douai et Orchies, charge à laquelle il fut nommé par lettres patentes du 22 février 1582.

Les seigneuries de Piètre et de Pommereau appartenaient à sa famille par l'alliance de Jehanne Desplanques et Guillaume Hangouart (*son grand père*) en 1471. Son arrière grand père maternel, Mahieu Desplanques avait acheté la seigneurie de Piètre en 1478 à Jehan Delehayé et celle de Pommereau en 1485 à Huguenot des Pumereault dit "de Pornille".

Après avoir été reçu bourgeois de Lille le 22 juillet 1555, il se fiança le mardi 6 août de la même année, en l'église St Maurice à Lille, à Antoinette De Croix, fille de Pierre, écuyer, Sgr de la Fresnoye et de Marie Ruwel. Le contrat de mariage fut signé devant Maître Jehan Eve, Guillaume apportait les seigneuries susdites, les fiefs des Mottes et de Mez-Ransard à Piètre, ainsi que des maisons, terres et bois, avec le revenu du moulin, le fief de la dîme de Fournes et toutes les terres et bois de Gondecourt, sa mère lui donna la somme de 700 florins carolus en argent, sa future épouse apportait la cense de Dordreuil à Marcq en Baroeul avec des terres et 2000 florins carolus. Le mariage fut célébré le 12 août de cet an 1555.

La mort de son beau père en 1570 ne lui apporta rien, car par son contrat, sa femme avait reçu sa part entière, cependant, les décès successifs de Madeleine, Michelle et Jehan de Croix, laissèrent sa femme, comme aînée des filles, et héritière après le fils aîné, François. Comme telle, elle hérita de la seigneurie d'Elcourt à Lincelles, du fief de Lompret à Wavrin, et d'un fief à Attiches. La part d'Antoinette de Croix, en dehors de châteaux et fermes, droits seigneuriaux et rentes, représentait alors environ 69 hectares.


Vers la fin de sa vie, Guillaume paraît avoir versé ou tenté de verser dans l'hérésie. Il fut accusé d'incliner vers le protestantisme, et le 29 octobre 1593, les échevins le condamnèrent à avoir ses livres, au nombre de 62, brûlés sur un échafaud, à payer une amende de 300 livres "pour offense", à rester en prison jusqu'au complet paiement de cette amende, et à apporter tous les six mois, un certificat de son curé.

---

<sup>6</sup> Généalogie Hangouart (Crapet-Hangouart) ADN Bibliothèque 5069.


Il trépassa, paroisse St Pierre à Lille, le 19 décembre 1600 et fut inhumé dans l'église St Etienne, près de ses parents, devant la chapelle St Georges. Sa femme vécut encore quelques années et en 1601 elle fit un accord avec son fils pour son douaire, "se réservant la demeure seigneuriale de Piètre et son chariot". Elle assista au mariage de son fils le 19 janvier 1604 et mourut le 1er juillet de la même année. Inhumée près de son mari, leur épitaphe indiquait:

CHY GISENT NOBLES PERSONNES GUILLAUME DE HANGOUART EN SON  
VIVANT ECUYER SR DE PIETRE POMMEREAU ET DAMLE ANTHOINETTE DE  
CROIX SESPEUSE QUI TREPASSERENT ASSR LEDICT SR LE XIXE DE  
DECEMBRE MDC ET LA DTE DAMLE LE PREMIER DE JULLET MDCIIII. PRIES  
DIEU POUR LEURS AMES.




Registre aux plaids des seigneuries  
de Guillaume Hangouart


# Les différentes graphies du registre



La graphie des premières pages du manuscrit, ressemble assez à celle des années 1540, bien que l'écriture soit postérieure à 1579.



Elle est très vite remplacée par ce style fréquent à la fin du XVIème, et qui constitue 90% du manuscrit.



A partir du folio 417, l'écriture est nettement plus cursive, annonçant le début du XVIIème.

## Transcription du manuscrit

<sup>7</sup>Constitution de responsables hommes de fiefz et masuriers faicte par ~~jehenne Becque~~ <sup>8</sup>le Seigneur de Pietre pour en son nom servir a la justice dudict Pietre pour aucuns fiefz et mesures a luy appertenans et tenus dicelle seignourie

A tous ceulx quy ces presentes lettres verront Guillaume Hangouart escuier Seigneur de Pietre des Pummereaulx etc Scavoir fais que moy confiant es sens et preudhommie<sup>9</sup> de Grard le Roy Mahieu Carpentier Henry le Turcq filz de feu jehan jacques Barbet et Pierre Malbrancque filz de feu jehan je ay iceulx Grard le Roy Mahieu Carpentier Henry le Turcq Pierre Malbrancque et jacques Barbet commis et institue et par ces presentes lettres commectz et institue responsables et desservans Asscavoir ledict Henry le Turcq dung fief que jay a moy appertenant seant au villaige dudict Pietre contenant six bonniers ou environ sauf quelque portion quy en a este arrentee par mes predicesseurs / habordans lesdicts six bonniers de long en long la ruielle du mollin dudict Pietre daultre coste a mon fief des motte allant jusques aux fossez des <sup>10</sup>Lays parcidavant lesdicts six bonniers acquis par Mahieu Desplancques mon bisaieul Seigneur de Pietre a jehan Denglos Item de lune des deux mesures seans audict Pietre acquis par feu mon pere cui Dieu absoilve de Michiel Morel filz de feu Collard Lequel les avoit acquis des hoirs jacquet Fournier / haboutans au chemin dudict Pietre tenant a lheritz de la motte Fricquart aussy a moy appertenant et a la mesure qui fut a jehan le Bouchier a cause de Marguerite Haneron sa femme depuis a Quenot Catricque laveugle et en apres a Marguerite du Bacquelerot par achat que icelle en a faict des hoirs jehan jores et de present a moy appertenant Lesdicts Grard le Roy et Mahieu Carpentier responsables des deux fiefz que jay achete en vertu de lettres dauctorisation du Roy nostre Sire / des curateurs de feu josse le Noir / tenus en cense par ledict Grard le Roy tenant a mes heritaiges daultre sens aux heritaiges des vefve et hoirs de Melchior du Hamel et aux heritaiges jehan Berteau par luy acquis de Pierre Segon Lesdicts jacques Barbet et Pierre Malbrancque responsables de deux fiefs par moy acquis de Pierre Cuvelier heritier de feu Grard Duhot dict la Cense et fiefz des Bruslos Abordans au chemin menant du riet de Pietre au Belloy Daultre a la Sgrie de le Neufve Cappelle Daultre au fosse des Laies Et ledict jacques Barbet responsable de laultre mesure ci-dessus mentionnee acquise par mondict feu pere de Nicollas Morel Ausquelz Grard le Roy Mahieu Carpentier Henry le Turcq filz de feu jehan, Pierre Malbrancque et jacques Barbet je ay donne et par ces presentes je donne a chascun respectivement comme dessus est dict plain povoir de a cause des fiefz et mesures dessus declarez sevir en mon lieu en la court de madicte terre et seignourie de Pietre et illecq avecq mes aultres hommes feodaulx, masuriers et tenant de moy a cause dicelle ma terre de Pietre tenir les plaiez a la coniuere de mon bailly ou lieutenant pour <sup>11</sup>faire et recepvoir toutes dessaisines baillier saisines clains<sup>12</sup> empeschemens arrestz jugemens et tous

---

<sup>7</sup> Folio 3r°.

<sup>8</sup> Barré dans le texte.

<sup>9</sup> Preudhommie : Probité, sagesse, honneur.

<sup>10</sup> Folio 3v°.

<sup>11</sup> Folio 4r°.

<sup>12</sup> clains : plaintes, et demandes en justice.

autres exploictz et actes qui se feront et despescheront en madicte justice terre et Sgrie de Pietre Et generalmente tout tel est samblable povoir que a hommes de fiefz et masuriers deservans peult et doibt respectivement appertenir Sy donne en mandement a mondict bailly dudict Pietre ou son lieutenant de recepvoir desdictz Grard le Roy Mahieu Carpentier Henry le Turcq jacques Barbet et Pierre Malbrancque le serment ad ce pertinent et en apres les seuffrent et laissent joyr du povoir dessusdict par moy a eulx donne jusques a mon rappel En tesmoing de quoy jay ces presentes signe de mon seing manuel et seelle de mon seel icy mis en placcart le Xe jour de may an XVc soixante dix noeuf



je Guillaume Hangouart escuier Seigneur de Pietre congnoy et certiffie a tous quil appertiendra que sur aucunes excuses faictes par jacques Barbet pour ne estre responsable du fief a moy appertenant comprins en ma cense des Brullos dont le avoie commis par les lettres que dessus / et aussy pour la mesure a moy appertenant pour laquelle je le avoie pareillement institue responsable Considerant aussy par moy certaines raisons je ay revocquie et revocque par ceste tout le povoir que jay par lesdictes lettres donne a iceluy Barbet et au lieu diceluy je ay commis et institue, et par ces presentes commais et institue jehan de le Herre censier dicelle mienne cense des Brullos mon responsable et es servans desdicts fief et mesure pour lesquelz je avoie commis ledict jacques Barbet comme aussy pour accroissement des hommes de fiefz deservans a la justice de ladicte seignourie de Pietre et meilleure commodite dicelle je ay commis et institue commais et institue par ceste Mahieu de Dours et jacques Laigniel laboueurs dems audict Pietre responsables de mes fiefz qui se servent a moy appertenans gisans audict Pietre et en tenus Ascavoir ledict de Dours de ung fief par moy acquis puis aucuns ans de Anthoine Fruleux a present comprins en ladicte cense des Bruslos et tenant aux heritaiges et fief des Brullos par moy achete de Pierre Cuvellier Et ledict jacques Laigniel responsable dung fief que jay a moy appertenant lequel est comprins au lieu et jardin tenu en coste<sup>13</sup> de moy par jene le Boidin vefve de feu jehan le Turcq et lequel fief estoit ung demy quind portant deux mencaudees ung cent et LIX verghes dheritz qui fut a jehene Becque fille de Martin femme de Nicolas Morel / et par elle et sondict mary vendus a feu mon pere cui Dieu absolve tenant ledict lieu et jardin aux fossez de la maison seignouriale de Pietre et a lheritz de Maroie Bocquette sœur et heritiere de feu Marguerite Bocquette Ausquelz jehan de le Herre Mahieu de Dours et jacques Laigniel jay donne et donne par ceste tout tel povoir de responsables que jay cydessus donne a Grarg le Roy Mahieu Carpentier Henry le Turcq et Pierre Malbrancque / Et tout samblable povoir que a hommes de fiefz et masuriers desservantz peult et doibt competer et appertenir donnant en mandement a mon bailly ou lieutenant dudict Pietre de recepvoir desdicts jehan de le Herre Mathieu de Dours et jacques Laigniel le serment ad ce pertinent Et en apres les seuffrent et laissent jouyr du povoir dessusdict par moy a eulx donne En tesmoing de ce jay ceste fait seeller en placquart de mon seel armore de mes armes / et le ay signe de mon seing ce fut faicte et donnee le treiziesme jour de juing an XVc soixante dix neuf

---

<sup>13</sup> En cotterie.

*En marge* : Le .....<sup>14</sup> jour de an XVc LXXIX jehan de le Herre Mahieu de Dours et jacques Laigniel denommez cy dessus ont fait serment pertinent chascun respectivement selon quilz sont commis et responsables par et ou nom du Seigneur de Pietre et ad ce ont es mains de moy Leurens Hennart lieutenant de ladicte terre et seignourie en la presence de Grard le Roy Mahieu Carpentier Pierre Malbrancque Henry le Turcq filz de feu jehan et Ansel de Mars hommes juges dicelle seignourie de Pietre<sup>15</sup> en tesmoing de ce avons icy mis noz seings manuelz



Le Vile jour de juing XV c soixante dix noeuf Grard le Roy Mahieu Carpentier Henry le Turcq filz de feu jehan ~~jacques Barbet~~<sup>16</sup> et Pierre Malbrancque denommez au blancq<sup>17</sup> de cestes ont fait serment pertinent chascun respectivement<sup>18</sup> selon quilz sont estably responsables par lesdictes lettres par et ou nom du Seigneur de Pietre et ad ce ont este receuz es mains de moy Laurens Hennart lieutenant de bailly de la terre et seignourie de Pietre en la presence de Mahieu de Dours jacques Laigniel et Anselot de Mars hommes juges masuries dicelle seignourie En tesmoing de quoy avons icy mis nos seings manuelz les jours et an dessusdict



Denomination de responsable de masurier faicte par jehenne Becque vefve de Noel Vignoble de Pierre Malbrancque son beau filz Et par Pelonne de Raie vefve de jehan Soier /de Ansel de Mars son fils

Comparut en sa personne jehenne Becque vefve de feu Noel Vignoble demourant a Pietre Laquelle comparante a commis et institue commect et institue Pierre Malbrancque son beau filz responsable de la mesure ou telle portion et droict de mesure que a ladicte comparante compete et appertient en la maison et heritz que elle comparante et sondict feu mary avoient a eulx appartenant tant a tiltre de patrimoine et hoirie que par acquest Confrontant au grand chemin de Pietre Tenant dung sens a la maison et heritz de Marie Bocquette sœur et heritiere de feue Marguerite Bocquette et daultre sens au lieu maison et heritz de jehan Warenbourg Luy donnant pouvoir de en son lieu seoir et servir a la court et justice de ladicte seignourie de Pietre avecq aultres masuriers et illecq tenir les plaiez a la coniuere<sup>19</sup> des bailly ou lieutenant pour faire et recepvoir toutes dessaissines baillier adheritemens clains empeschemens arrestz jugemens et tous aultres exploictz et actes quy se ferons et despeschent en ladicte justice terre et seignourie de Pietre Et generalmente tout tel et samblable pouvoir que a hommes masuriers desservans peult et doibt competer et appartenir Aquoy ledict Malbrancque<sup>20</sup> a este receu tant en ladicte quallite de responsable que a raison de tout tel droict de propriete quy luy peult competer et appartenir en tout ou en partie en ladicte mesure a cause de Thonnette Vignoble sa femme fille unique dudict feu Noel et de ladicte jehenne

---

<sup>14</sup> Blanc dans le texte.

<sup>15</sup> Pietre ( ?)

<sup>16</sup> Barré dans le texte.

<sup>17</sup> denommez au blancq : nommés au bas .

<sup>18</sup> Folio 4v°

<sup>19</sup> Conjure.

<sup>20</sup> Folio 5r°.



Becque Apres avoir fait serment pertinent es mains de nous lieutenant de bailly et hommes juges masuriers de ladicte seignourie cy apres nommez de soy leallement conduire et acquicter audict office de homme juge masurier de ladicte seignourie Ce fut ainsy fait en ladicte seignourie de Pietre pardevant moy Laurens Hennart lieutenant de bailly en la presence de Grard le Roy Mahieu de Dours Mahieu Carpentier et jacques Laigniel hommes juges masuriers de ladicte terre et seignourie Lesquelz sur ce par moy lieutenant semons et coniuerez ont dict les debvoirs ad ce requis estre deuemens faitz et accomplis que pour souffrir En tesmoing et approbation de quoy Nous lieutenant et hommes juges masuriers avons icy mis noz seings manuelz le .....jour de .....<sup>21</sup> quinze cens soixante dixneuf

Comme aussy lesdictz jour et an / comparant par devant nous lieutenant et hommes juges masuriers susdicts et sousignez Pelonne de Raie icelle a commis Ansel de Mars son filz responsable de la mesure a elle esceue et appertenant tant par le dechez de feu Pierre de Raie son pere que par le dechez des enfans de feu Calinne de Raie sa sœur seant sur le riet de Pietre tenant daultre sens a lheritz des hoirs Pierre Henart Luy donnant tout tel pouvoir de masuriers que dessus et que a responsable peult et doit appertener Et ce pour autant que elle a droict en ladicte mesure Lequel Ansel pour ce aussy present et comparant pardevant nous a fait serment pertinent de homme masurier tant comme responsable de sadicte mere que entant quil avoit droict fonsier en icelle mesure



<sup>22</sup>Aggregation et constitution faite par le Seigneur de Pietre de Laurens Hennart pour lieutenant de bailly de ladicte seignourie Et denomination de responsables dhombres de fiez et masuriers pour servir a la justice dicelle seignourie au nom des fiez et mesures appertens audict Seigneur de Pietre dont le pouvoir desdictz responsables est cy devant transcript separement

A tous ceulx quy ces presentes lettres verront Guillaume Hangouart escuier Seigneur de Pietre des Pummereaulx de la mairie de Gondécourt Hauteval etc Scavoir fais comme Martin le Wattier bailly par moy commis de mesdictes deux seignouries de Pietre et Pummereaulx est depuis ladicte commission devenu greffier de la ville de le Bassee et y resident estant a raison dudict estat de greffier le plus du temps fort occupe aux affaires dicelle ville de la Bassee et a ceste cause il auroit commis pour son lieutenant audict Pietre et Pummereaulx Laurens Hennart censier de ma cense de Pietre Considerant aussy que lon est aucuneffois en difficulte de reconvier ledict bailly et hommes de fiez et masuriers dicelle seignourie de Pietre pour servir aux affaires survenans en la justice a cause des empeschemens absence diverses et eslongees Residence desdictz bailly hommes de fiez et juges masuriers et de ceux quy sont heritiers desdicts fiez et mesures submises a service de justice Parreillement que aucuneffois lesdicts heritiers et leurs responsables trespasent et sont pour leurs affaires absens de ladicte seignourie lors que les affaires surviennent / joint que lesdicts fiez et mesures tombent bien souvent en possession de femmes vefves orphelins et gens non capables de servir Aussy que plusieurs fiez et mesures

---

<sup>21</sup> Blanc dans le texte.

<sup>22</sup> Folio 5v°.

tenus de ladicte seignourie de Pietre sont par tiltre dachat venus en sa possession hereditement de mes predicesseurs et de moy et par tel moien este diminue le nombre des hommes de fiefz et masuriers meismes de manans et habitans en icelle seignourie Pour ces causes et aultres bonnes considerations pour le bien commodite et soulagement de ladicte justice<sup>23</sup> et seignourie de Pietre et de ceulx quy y polroient audictes affaires de sorte que icelle puist tant mieulx et juridiquement estre administree tant pour la necessite presente que a ladvenir Et me confiant es sens souffissances et preudhomme dudict Laurens Hennart et de Grard le Roy Mahieu Carpentier Henry le Turcq filz de feu jehan jacques Barbet et Pierre Malbrancque je ay auctorise et approuve et par ces presentes auctorise et approuve la denomination et establissement que ledict le Wattier a faict de son lieutenant audict Pietre et Pummereaulx de la personne dudict Laurens Hennart Lequel Laurens pour abondante sceurete et entant que besoing fut je establis moy meismes par cestes lieutenant en icelles mes seignouries de Pietre et des Pummereaulx sans deroghier neantmoins a lestat de bailly dudict le Wattiers et a lestat de lieutenant de Pierre Screve parcidavant par moy commis en ma seignourie des Pummereaulx a raison de la residence dudict Screve en ladicte seignourie des Pummereaulx quy demeurent en leur entier et estat pour cant<sup>24</sup> milleure<sup>25</sup> commodite desdictes seignouries ensievant neantmoins les limitations et conditions contenus es escriptz sur ce faictz et signez entre moy et lesdictz Screve et Hennart Meismement je veue et ordonne que se advenoit que ledict Martin le Wattier a present bailly allast de vie a trespas avant ledict Laurens ou que par son deportement volluntaire ou ma revocation ou aultre cause il advint que il ne fut plus bailly dicelles seignouries Que ledict Laurens Hennart demeure lieutenant dicelles seignouries de Pietre et des Pummereaulx et quil continue et excerche icelluy estat meismes de bailly Auquel Laurens jay donne et donne par cestes plain povoir auctorite et mandement especial de recepvoir tous werps transportz desheritemens rapportz de faire tous adheritemens hostigemens<sup>26</sup> bonnaiges<sup>27</sup> et cercquemennaiges<sup>28</sup> de tous les fiefz et heritaiges tenus de mesdicts deux fiefz et seignouries de ouvrir la court dicelles<sup>29</sup> seignouries et y tenir les plaiez Requerre Renvoy et Retour de court des hostes et tenans dicelles de semonce et coniuere<sup>30</sup> la loy et ceulx quil appertiendra de prendre tous malfaicteurs tant de gens que de bestes quil trouvera audmesprins<sup>31</sup> en mesdicts deux fiefz et seignouries Les mectre a la connoissance desdicts hommes de fiefz masuriers juges et tenans leurs sentences mectre a execution de faire plainctes a loy arrestz rapportz relations saisines sieultes adiournemens et executions de justices et aultres actes judiciaires selon la coustume desdictes seignouries De commectre lieutenant sergeans et officiers et iceulx chambgier et remectre aultres quand bon luy samblera aiant ledict lieutenant en labsence de mondect bailly tel povoir que icelluy Et generalmente et especiallement de faire et excercher tous exploitz de justice telz que a office de bon bailly et lieutenant deument cree doibt competer et appertener Saulf en tout et partout lalienation desdictes seignouries Sy donne en mandemens a tous hommes de fiefz juges

---

<sup>23</sup> Folio 6r°.

<sup>24</sup> Quand.

<sup>25</sup> Meilleure.

<sup>26</sup> Hostigement : Déclaration officielle de possession d'un fief.

<sup>27</sup> Bonnaiges : Droit sur le placement des bornes.

<sup>28</sup> Cercquemennaiges : du verbe cercquemaner = borner et mesurer, établir les limites.

<sup>29</sup> Folio 6v°.

<sup>30</sup> Conjurere.

<sup>31</sup> au mépris.

masuriers hostes tenans et subiectz desdictes seignourie que audict Laurens lesdictes offices excerchant ilz obeissent et entendent diligemment /fachent et dient a loy a sa semonce et coniuere et luy prestent et baillent conseil confort et ayde se mestier est avecq prison sil le requiert Requerrant tous aultres quil appertiendra donner en ce tout confort ayde et assistance Ce present povoir durant jusques a mon rappel Et lesdicts Grard le Roy Mahieu Carpentier Henry le Turcq Pierre Malbrancque et jacques Barbet je ay commis et institue et par ces presentes commectz et institue responsables et deservans Asscavoir ledict Henry le Turcq dung fief que jay a moy appertenant seant au villaige dudict Pietre contenant six bonniers ou environ saulf quelque portion quy en a este arrente par mes predicesseurs / habordans lesdicts six bonniers de long en long la ruielle du mollin dudict Pietre Daultre coste a mon fief des Mottes allant jusques aux fossez des Lays parcidevant lesdicts six bonniers acquis par Mahieu Desplancques mon bisaieul Seigneur de Pietre a jehan Denglos Item de lune<sup>32</sup> des deux mesures seans audict Pietre acquis par mon feu pere cui dieu absoilve de Michiel Morel filz de feu Collard Lequel les avoit acquis des hoirs jacquet Fournier haboutans au chemin dudict Pietre Tenant a lheritz de la motte Fricquart aussy a moy appertenant et a la mesure quy fut a jehan le Bouchier a cause de Marguerite Hanneron sa femme depuis a Quenot Catricque laveugle et en apres a Marguerite du Bacquelerot par achat que icelle en a fait des hoirs jehan jores et de present a moy appertenant Lesdicts Grard le Roy et Mahieu Carpentier responsables des deux fiefz que jay achete en vertu des lettres de auctorisation du Roy nostre Sire des curateurs de feu josse le Noir / tenus en cense par ledict Grard le Roy Tenans a mes heritz Daultre sens aux heritaiges des vefve et hoirs de Melcior du Hamel et aux heritaiges jehan Berteau par luy acquis de Pierre Segon Lesdicts jacques Barbet et Pierre Malbrancque responsables des deux fiefz par moy acquis de Pierre Cuvellier heritier de feu Grard du Hot dict la cense et fiefz des Bruslos Abordans au chemin menant du riet de Pietre au Belloy Daultre a la seignourie de le Neufve Capelle Daultre au fosse des Laies Et ledict jacques Barbet responsable de laultre mesure cy dessus mentionnee acquise par mondict feu pere de Nicollas Morel Ausquelz Grard le Roy Mahieu Carpentier Henry le Turcq filz de feu jehan Pierre Malbrancque et jacques Barbet je ay donne et par ces presentes je donne a chascun respectivement comme dessus est dict plain povoir de a cause des fiefz et mesures dessus declarez servir en mon lieu en la court de madicte terre et seignourie de Pietre Et illecq avecq mes aultres hommes feodaulx masuriers et tenans de moy a cause dicelle ma terre de Pietre tenir les plaiez a la coniuere de mon bailly ou lieutenant pour faire et recepvoir toutes dessaisines baillier<sup>33</sup> saisines clains empeschemens arrestz jugemens et tous aultres exploictz et actes quy se feront et despescheront en madicte justice terre et seignourie de Pietre et generalmente tout tel et samblable povoir que a hommes de fiefz et masuriers deservans peult et doit respectivement appertener Sy donne en mandement a mondict bailly dudict Pietre ou son lieutenant de recepvoir desdicts Grard le Roy Mahieu Carpentier Henry le Turcq jacques Barbet et Pierre Malbrancque le serment pertinent et en apres les seuffrent et laissent joyr du povoir dessusdict par moy a eulx donne jusques a mon rappel et que lesdicts Laurens Hennart Grard le Roy et Mahieu Carpentier ont este parcidevant commis et establis esdicts offices Asscavoir ledict Laurens de lieutenant comme dict est et Grard le Roy et Mahieu Carpentier de responsables /et apres serment par eulx fait besongnie en ladicte justice et seignourie de Pietre tant en vertu des povoir de responsables que pour les mesures dont ilz sont heritiers

---

<sup>32</sup> Folio 7r°.

<sup>33</sup> Folio 7v°.

connoissant ce estre veritable je ay agreee ratiffie et auctorise appreuve ratiffie et auctorise par cestes tous actes judiciaires exploictz sentences werps passaiges desheritemens adheritemens et œuvres de loy et de justice par eulx parcidivant faictz esdictes quallitez En tesmoing de quoy jay ces presentes signe de mon signe manuel et seelle de mon seel icy mis en placcar le dixiesme jour de may an quinze cens soixante dix neuf



Le ..... jour de .....<sup>34</sup> X<sup>v</sup>c soixante dix neuf Grard le Roy Mahieu Carpentier Henry le Turcq filz de feu jehan jacques Barbet et Pierre Malbrancque denommez cy dessus ont faict serment pertinent chascun respectivement selon quilz sont establis responsables par lesdictes lettres par et ou nom du Seigneur de Pietre / et ad ce ont este receu es mains de moy Laurens Hennart lieutenant de baillly de la terre et seigneurie de Pietre / En la presence de Mahieu de Dours jacques Laigniel et Anselot de Mars hommes juges masuriers dicelle seigneurie / En tesmoing dequoy avons icy mis noz seings manuelz les jours et an dessusdicts



L'an 1579, devant notaires d'Artois a La Bassee : Philippe le Fer meunier de Pietre et Françoise de Beaussart sa femme, reconnaissent devoir a Guillaume Hangouart Seigneur de Pietre, la somme de 44 florins et 6 deniers tournois pour le non paiement d'une annee de rente heritiere et le non paiement de la rente seigneuriale du moulin de Pietre avec motte, maison et jardin pour l'annee 1578.<sup>35</sup>

Comparurent en leurs personnes Philippe le Fer laboureur et mosnier et Franchoise de Beusart sa femme dems au villaige de Pietre. Lesquels comparans la dicte Franchoise deument auctorisee dudict Philippe le Fer son mary Laquelle auctorisation elle olt pour agreable Recongnurent bien et leallement debvoir chascun pour le tout sans division ny discussion de droict a Guillaume Hangouart escuier Seigneur de Pietre et des Pummereaux etc par une partie la somme de vingt huict florins carolus deux patars six deniers tournois de vingt patars flandres le florin pour une annee de rente heritiere que lesdictz comparans doibvent audict Seigneur de Pietre escheu le deuxiesme jour de novembre an quinze cens soixante dix huict En laquelle rente lesdictz comparans se obligerent pardevant auditeurs et soubz le seel du souverain baillage de Lille au prouffit de Antoine Fruleux, le deuxiesme jour de novembre an quinze cens soixante dix sept Lequel Fruleux ledict jour de la constitution dicelle rente le a cede et transporte audict Sr de Pietre comme lesdictz comparans le connoissent par cestes Et sy ont lesdictz conjointz comparans congneu et connoissent debvoir audict Seigneur de Pietre par deuxiesme partie la somme de quinze florins carolus et dix huict patars pour une annee de rente fonsiere seigneuriale et arrentement perpetuel et sans rachat dung mollin, motte, maison et

---

<sup>34</sup> Blanc dans le texte.

<sup>35</sup> Folio 13r<sup>o</sup>.

jardin contenant huict cens dheritaige que lesdictz comparans ont a eulx appertenans gisant audict Pietre et en tenus que lesdictz comparans congnoissent estre charge vers ledict Sr de Pietre chascun an au jour de le Saint Remy de six razieres de bled deux razieres davaine et ung chapon, mesure de le Bassee tel bled et avaine que doibvent les aultres rentiers de ladicte seignourie de Pietre Tenant lesdictz mollin lieu et jardin dun sens a la ruyelle du mollin de Pietre daultre au lieu et jardin de Pierre Leroy et Tonnette Lebrun sa femme heritiers de feu de Pierre Toucry daultre aux terres dudict Seigneur de Pietre, Portans lesdictes deux parties ensamble la somme de quarante quatre florins carolus et six deniers tournois que lesdictz comparans ont promis et <sup>36</sup>promectent bien et leallement paier chascun pour le tout sans division ny discution de droict audict Seigneur de Pietre aux Pasques prochainement venant que lon dict quinze cens soixante dix noeuf et sy ont lesdictz conjointz comparans ladicte femme auctorizee comme dessus promis et promectent par ceste de bien et leallement paier et livrer a ladvenir chascun pour le tout sans division audict Seigneur de Pietre ses hoirs et aians cause chascun an en la ville de Lille en lieu saulf et sceur aux despends deulx comparans lesdictz vingt huict florins carolus deux patars six deniers tournois de rente heritiere a deux termes et paiemens en lan telz que aux deuxiesmes jours de May et Novembre jusque au plain rachat du principal dicelle portant a la somme de quatre cens cinquante florins carolus / Comme aussy ont promis et promectent de bien et leallement paier et livrer chascun an perpetuellement et a tousiours audict Seigneur de Pietre ses hoirs et aians cause audict jour de Saint Remy lesdictes six razieres de bled six razieres davaine et ung chapon que ilz luy doibvent et congnoissent devoir de rente fonsiere seignouriale et arrentement perpetuel et sans rachat a cause desdictz mollin motte lieu manoir et jardin Sy ont lesdictz comparans accorde promis et consenty accordent consentent et promectent par cestes que silz estoient en faulte de paier et livrer chascun an en nature audict terme de le St Remy tout ledict bled avaine et chapon du moings quil ne les eussent livre au jour du siege que ledict Sr de Pietre ses hoirs ou aians cause feront a ladvenir tenir pour recepvoir leurs rentes seignourialles de ladicte seignourie de Pietre que lesdictz comparans leurs hoirs et aians cause seront tenus et promectent de paier et satisfaire audit Seigneur de Pietre sy ainsy bon luy samble Lesdictes six razieres de bled deux razieres davaine et ung chapon en argent a tel pris et selon la priserie et assiette qui se fera par chascun an pour toutes les rentes fonsieres et seignourialles dicelle Seignourie / Si ont consenty et accorde consentent et accordent lesdictz comparans que tous les deniers et sommes qui se seroient deubz a <sup>37</sup>ladvenir par chascun an audict Seigneur de Pietre ses hoirs et aians cause pour lesdictes six razieres de bled deux razieres davaine et ung chapon selon les priseries et assiettes des sieges des rentes seignourialles dudict Pietre Ensamble les sommes a quoy porteront les rachatz ou rachat que lesdictz comparans polroient cy apres faire desdictes six razieres de bled deux razieres davaine et ung chapon dicelluy Seigneur de Pietre ses hoirs ou aians cause seront executoires contre lesdictz comparans et chascun deulx seul et pour le tout sans division ny discution de droict et que desdictes priseries et assiettes pris dicelles jours des sieges reventes et rachatz sommes et deniers a quoy lesdictz six razieres de bled deux razieres davaine et ung chapon porteront et en sera deu selon icelles priseries ou selon les rachapts que lesdictz comparans en polroient faire a ladvenir Ledict Seigneur de Pietre sesdicts hoirs et aians cause seront creu et attendu sur leur simple dict et affirmation sans estre tenu

---

<sup>36</sup> Folio 13v°.

<sup>37</sup> Folio 14r°.

aultrement le prouver ny en faire apparoir Et en cas que ledict Seigneur de Pietre soit hors de la ville ou il luy commendroir faire pour ce sadicte simple affirmation en ce cas ledict Sr de Pietre sera creu et attendu de ce que dessus en laffirmant par son escript et saing manuel en faisant prouver et verifier veriffier sondict escript par deux tesmoings dignes de foy a quoy polront estre receus ceulx qui seront a son conseil de advocatz et procureurs Accordans lesdicts comparans pour sceurete de tout ce que dessus main assize et mise de faict et rapport dheritaige estre faict a leurs despens tant en droictz seignouriaux que aultrement sur tous leurs biens fiefz mollins terres et heritaiges touteffois qui plaisra audict Seigneur de Pietre et les despences et aultres debours de justice ad ce requis estre fays en la maniere accoustumee consentans aussy par iceulx comparans que icelluy Seigneur de Pietre ses hoirs et aians cause puissent pour les paiementz et livraisons desdictz bled avaine grains et chappons<sup>38</sup> en nature ou en vertu des pris et assietes des priseries desditz sieges ou rachatz comme dict est recouvrements et satisfactions de ladicte rente heritiere et de tout ce que en deppend adressera de prime fache sur leurs biens immeubles et mollin sans preallablement estre tenus adresser aux meubles, nonobstant droict loy stil ou coustume de pays ad ce contraire A quoy lesdictz comparans ont derogue et deroghent par ces presentes Elisantz leur domicile pour eulx et leurs hoirs Asscavoir en la ville d'Arras a la Vignette en la ville de Lille a trois Roix et audict Pietre au lieu et manoir susdicts appertenans auxditz comparans haboutant audict mollin de Pietre Consentant que toutes les significacions adjournemens et tous aultres debvoirs et exploictz de justice que illecq seront faitz par pour eux et leursdictz hoirs tant pour lesdictz paiemens livraisons recouvrements et satisfactions accordz dhypotecques et aultres accordz consentemens reconnoissances et choses quelzconcques de ces presentes soient de tel effect vateur et vertu comme sy faitz estoient a leurs propres personnes et vray domicile et de leursdicts hoirs Promectant cestes reconnoissent mesmes passer de nouveau sy mestier est le contenu cy dessus et de tout ces presentes pardevant Messieurs les president et gens des consaulx de Flandres et d'Artois le gouvernement de Lille et ses lieutenans et par tout aillieurs ou il appertiendra et requis seront Et illecq accorder les hypotecques sceuretez susdites et aultres selon la coustume des loix a la sceurete et conservation de ce que dessus le tout a leurs depens tant en droictz seignouriaux que aultrement Si ont lesdictz comparans conjointz consenty promis et accorde irrevocablement par cestes que leurs censiers fermiers et occupeurs presens et futurs de leursdictes maison mollin et heritaiges gisans a Pietre et en tenus aient a paier chascun an audict Seigneur de Pietre ses hoirs et aians cause pour tout le temps quilz seront censiers fermiers et occupeurs lesdictz six razieres de bled deux rasieres davaine et ung chapon de rente fonsiere<sup>39</sup> seignourialles et arrentement / et le cours annuel de ladicte rente heritiere de vingt huit florins deux patars six deniers tournois aux termes et en la mesme forme sortes conditions devises et manieres que lesdictz comparans ont cy dessus promis et accorde de les paier et satisfaire/ Promectant a ces fins faire obliger aux despens deulx comparans tous les dictz censiers fermiers et occupeurs presens et advenir pour le temps de leurs occupations et censes en leurs noms privez Consentans lesditz comparans que les paiemens que lesdictz censiers fermiers et occupeurs feront leur vaudront acquit et descharge vers eulx comparans et leurs hoirs sur et a tesmoings de leurs rendaiges moiennant quictance quilz seront tenu en rapporter dudict Seigneur de Pietre ses hoirs et aians cause Tout ce que dessus ont lesdictz conjointz

---

<sup>38</sup> Folio 14v°.

<sup>39</sup> Folio 15r°.

comparans promis paier entretenir furnir et accomplir sans jamais aller au contraire. Soubz l'obligation de leurs corps biens meubles et immeubles et ceulx de leurs hoirs presens et futurs quilz ont ad ce soumis et oblige submectent et obligent vers tous Seigneurs et justices reconchans a toutes choses contraires a cestes mesmes audroict disant generale Renonchiation ne valloir sy lespecialle ne precede Ce fut ainsy faict et passe a la Bassee pardevant notaires royaulx du Comte d'Artois le <sup>40</sup> an XVc soixante dix noeuf.



Coppie de quictance de reliefz de aucuns fiefz tenus de la Seignourie de Pietre escheuz a florens Becque filz de feu Nicollas qui fut filz de jacques.<sup>41</sup>

Receu par Moy Guillaume Hangouart escuier Seigneur de Pietre de jehan Pinchon procureur et notaire roial demourant a Bethune et aultres tutteurs de Florens Becque filz mineur dans de feu Nicollas en son vivant bourgeois demourant a Bethune la somme de treize livres dix solz<sup>42</sup> de vingt gros monnoye de Flandres la livre pour le relief de deux fiefz escheuz audict Florens par le trespas de sondict feu pere tenus de madicte seignourie de Pietre et y gisans redevables Asscavoir lung gisant du coste du fosse des Lays et des heritages de moy Seigneur de Pietre soixante solz parisis et le tierch de cambrelaige de relief et laultre gisant au coste dudict chemin vers les bois du Biez et le coste de la seignourie des Pummereaulx Redevable trente solz parisis et le tierch de cambrelaige pour relief Le tout de XXVII deniers flandres le solz parisis Et le quind denier a la vente don ou transport Et par aultre partie ay receu XXXII gros flandres pour le relief de certain front de chemin accorde par feu mon pere cui Dieu absolve<sup>43</sup> a feu jacques Becque grand pere dudict Florens en don seignourial et fief pour pouvoir planter sur ledict front comme vuis ausdicts deux fiefs a la charge de deux chappons de rente fonssiere seignouriale et deux chappons de relief Tesmoing mon saing cy mis le dernier jour de juillet XV<sup>c</sup> LXXVII



Quictance du relief du fief delaisse par le trespas de Melchior du Hamel a Pietre.<sup>44</sup>

Receu par moy Guillaume Hangouart escuier Seigneur de Pietre de Demiselle Agnes Labbe vefve de feu Melchior du Hamel en son vivant bourgeois et marchand de la ville de Lille pour et au nom de Baltazart du Hamel son filz la somme de noeuf livres flandres pour le relief dung fief renteux contenant deux bonniers trois cens ou environ tenu de madicte seignourie de Pietre et y gisant escheu audict Baltazart par le trespas dicelluy Melchior son pere Redevable ledict fief soixante solz parisis monnoye royalle

---

<sup>40</sup> Blanc dans le texte.

<sup>41</sup> Folio 21r<sup>o</sup>.

<sup>42</sup> Folio 21v<sup>o</sup>.

<sup>43</sup> Cui Dieu absolve : Que Dieu pardonne.

<sup>44</sup> Folio 21v<sup>o</sup>.

darthois de XXVII deniers flandres le solt<sup>45</sup> et le tierch de cambrelaige de relief a la mort et le Ve a la vente don ou transport duquel relief pour et comme dessusdict je men tiens paiee et constant tesmoing mon saing cy mis le <sup>46</sup> Lan XV<sup>c</sup> LXXVIII



Quittance du relief des deux fiefz delaissiez par le trespas de Nicollas du Bron tenus de Pietre sans preiudice du droict seignourial me competant en et sur iceux par la mors de bastard a raison du trespas de feu Marguerite du Bron fille illegitime dudict Nicollas trespasse en ladicte seignourie<sup>47</sup>

je Guillaume Hangouart escuier Seigneur de Pietre congnoy avoir receu de Pelonne du Bron fille a marier de feu Nicollas, la somme de XIII livres parisis X sols de XX deniers monnoye de flandres la livre pour le relief de deux fiefs quy ont appartenu audict feu Nicollas du Bron tenus de madicte seignourie de Pietre et y gisans parci devant esclisiez par le gre et consentement de feu mon pere cui Dieu absolve en son vivant Seigneur dudict Pietre des deux fiefz qui furent a feu jacques Becque appartenantz de presens a Florens Becque filz de Nicollas qui fut filz dudict jacques Asscavoir lun desditz fief delaisse par ledict du Bron contenant vingt six cens ~~cinquante trois verges~~ dheritaige prins comme dict est au fief dudict Becque et gisant du coste du fosse des Lays et de mes heritaiges Redebvable soixante solz parisis et le tierch de cambrelaige de relief Et laultre fief delaisse par ledict du Bron gisant a laultre coste du chemin vers le boys du Biez et la seignourie des Pummereaux Redebvable trente solz parisis et le tierch de cambrelaige pour relief Le tout solz parisis monnoye royalle dartois faisant ledict solz parisis vingt sept deniers flandres Et devant le quint denier a la vente don ou transport Ce entendu que ledict receu et ce que dessus a este et est fait par moy et ladicte Pelonne avecq pour protestation et comme je proteste par ceste que cest sans preiudice du droit que me compete ausdictz deux fiefz qui ont appartenu audict du Bron par le trespas de feu Marguerite du Bron bastarde dudict Nicollas trespassee en madicte seignourie en laquelle jay toute justice haulte moienne et basse avoir de bastard et aultres droictz appartenans a haulte justice<sup>48</sup> tant a raison de la donation de sept cens cinquante florins carolus faite a ladicte Marguerite par ledict Nicollas et jeanne Toulouse sa premiere femme sur tous leurs biens meubles fiefz et heritaiges pour laquelle donation ladicte Marguerite avoit este realizee de son vivant sur lesdicts deux fiefz par mise de fait obtenue du conseil darthois, que pour les aultres droictz raisons et actions me competans en et sur lesdicts deux fiefz pour ce et aultres causes que ce puist estre En tesmoing de quoy jay ceste signe de mon saing manuel le treizieme jour de juing XV<sup>c</sup> soixante dix huit.

*Note en bas de l'acte :* Receu par moy Guillaume Hangouart Seigneur de Pietre de jacques du Retz a present bail et mary de Pelonne du Bron fille de feu Nicolas la somme de 10 livres 2 sols 5 deniers flandres pour le relief de bail a moy deu par ledit jacques du Retz a cause des 2 fiefz

---

<sup>45</sup> Solt : paiement.

<sup>46</sup> Blanc dans le texte.

<sup>47</sup> Folio 22r<sup>o</sup>.

<sup>48</sup> Folio 22v<sup>o</sup>.





<sup>49</sup>Saisine de biens faicte par ung huissier du conseil Darthois en vertu de commission executoire et pouvoir sur quelques sequestre commis au gouvernement desdictz biens pour les vendre

Ce jourdhuy quatriesme de novembre XV<sup>c</sup> soixante dix sept <sup>50</sup> en procedant par jehan Pammart huissier du conseil dartois par voie dexecution allencontre de Guillaume Cousin laboureur demourant a Pummereaulx paroisse Doberch A la requeste de Adrien de Beusart tavernier demourant a Esterre en la vertu de la commission a luy presentee de la part dudict Beusart en datte du cinquiesme de novembre audict an affin destre paie de la somme de vingt et six livres de gros et par faulte de biens non trouvez en la possession dudict Cousin pour furnir a ladicte somme a este par moy soubsigne prins saisy et mis es mains du Roy notre Sire les grains et biens tant meubles que immeubles trouvez en la maison dudict Guillaume Cousin et au gouvernement diceulx biens a este par moy commis pour sequestre Anthoine Noielle demourant a Oberch pour par luy les faire amoeublir vendre recepvoir et baillier quictance apres quil a faict serment en mes mains que au gouvernement diceulx biens de soy bien et deument gouverner et en rendre compte a cuy quil appertiendra priant a tous seigneurs justiciers et officiers de justice ne luy donner aucun empeschement en ladicte sequestration avis toute faveur ayde et assistance tant et jusques a ce quil soit faict paiement audict de Beusart de la somme susdicte Tesmoing mon saing manuel cy mis le jour et an que dessus.



<sup>51</sup>Promesse Grard le Roy, Marguerite Morel, Pelonne de Raie, Jeanne Becque vefve Noel Vignoble, Pierre Malbrancque Thonnette Vignoble sa femme, Catherine Pichonniere vefve de Jacques Barbet laisne, Catherine de Noue vefve Jacques Cousin, Antonnette Segar vefve de Jan Alescaches, Ansel de Mars et Jenne de Baillieul sa femme Que iceulx et leurs hoirs et aians cause de mesures Lesquelles peuvent presentement appartenir et qui escheront a ladvenir a iceulx comparans ne seront et ne polront pour raison dicelles mesures faire pasturer leurs brebis et moutons en et sur ladicte seignourie de Pietre nest quilz soient actuellement et par domicile fix demourantz en ladicte seignourie.

Aussy la reconnoissance desdictz Grard Leroy et sa femme quilz nont a Pietre nulles mesures sinon deux cens tenans a lheritaige de ladicte Catherine Pichonniere et du front et plantins contre lesdicts II<sup>c</sup>

---

<sup>49</sup> Folio 28v<sup>o</sup>.

<sup>50</sup> Folio 29r<sup>o</sup>.

<sup>51</sup> Folio 31v<sup>o</sup>.

A tous ceulx qui ces presentes lettres verront Laurens Hennart lieutenant de Martin le Wattier bailly de la terre et seigneurie de Pietre commis par noble homme Guillaume Hangouart escuier Seigneur dudict Pietre des Pummereaulx Salut Scavoir faisons que pardevant moy lieutenant de bailly dessusnomme et en la presence de Mahieu de Dours jehan le Turcq et Mahieu Carpentier hommes juges masuriers de ladicte seigneurie de Pietre comparurent en leurs personnes Grard le Roy et Marguerite Morel sa femme tant en leurs noms que au nom et eulx faisant fortz chacun respectivement des enfans quilz ont de leurs premiers et secondz mariaiges, Pelonne de Raie vefve de feu jan Sohier, jenne Becque vefve de feu Noel Vignoble, Pierre Malbrancque et Thonette Vignoble sa femme fille desdictz Noel et jennette Becque , Catherine Pichonniere vefve de feu jacques Barbet laisne, Catherine de Noue vefve de jacques Cousin, Antoinette Segar vefve de jan Asechache et Ansel de Mars filz de Pierre et jenne de Baillieu sa femme tous demourans en ladicte terre et seigneurie de Pietre sauf ladicte Pelonne de Raie laquelle demeure a Mauqhissart, tous lesquels comparans et chacun deulx recongnurent lesdictes femmes deument auctorizees de leurs susdictz maris quelles ont prins pour agreables Que pour et en consideration des plaisirs et amities que eulx et leurs predecesseurs ont autrefois eu et receu tant dudict Seigneur de Pietre que de ses predecesseurs et aultres bonnes considerations ad ce les mouvans ilz ont de leur pure libre et franche vollonte consenty et accorde et par ces presentes promectent consentent et accordent irrevocablement et pour a tousiours audict Seigneur de Pietre que eulx comparans et leurs hoirs et aians cause des mesures quilz et chacun deulx ont ou polront avoir presentement a eulx appertenus tenues de ladicte seigneurie de Pietre ne polront a raison dicelles mesures ny a raison daultres mesures que eulx comparans et chacun deulx polroit a ladvenir acquerir avoir joyr et posséder<sup>52</sup> et leur polroient succeder a quelque tiltre que ce soit envoyer faire ne souffrir leurs blancqz bestiaux brebis et moutons pasturer en et sur ladicte terre et seigneurie de Pietre riez chemins Sablonnieres flegardz terres et heritaiges tenus de ladicte seigneurie nest que lesdictz comparans leurs hoirs et aians cause soient actuellement par domicile fix et sans fraudre residens et demourans sur ladicte terre et seigneurie de Pietre Et comme ledict Grard le Roy avoit parci devant achete par divers achatz plusieurs parties dheritaiges quy avoient en temps passe appartenu a feu Henry le Turcq haboutans au grand chemin menant des bancqz seigneuriaux aux Sablonnieres de Pietre, tenans a lheritaige de Catherine Poissonniere vefve en dernieres noepces de jacques Barbet laisne, daultre a lheritaige des hoirs et aians cause des filles Nicollas de Guery desquelles parties ledict Grard le Roy doubtoit y avoir environ deux cens de terre estant mesure haboutans iceulx deux cens audict chemin tenans daultre sens a le terre de ladicte Catherine Pichonniere daultre a le terre dudict Grard combien touteffois que lon ne fut sceur sy iceulx deux cens estoient mesure ou se ilz lavoient autrefois este et que par apres pour certaines raisons auroient este desfraichis de masurage / Parquoy ledict Seigneur de Pietre en consideration de la bonne amitye quil porte audict Grard on censier des Mottes audict Pietre et sa femme et iceulx Grard et sa femme en respect des plaisirs a eulx faitz par ledict Seigneur leur maistre sen sont accorde et accordent par cestes en la maniere quy sensieult Asscavoir que lesdictz deux cens et toute ladicte masse que icelluy Grard a parci devant achete des hoirs et aians cause de Henry le Turcq ou des hoirs et aians cause de feu Nicollas<sup>53</sup>

---

<sup>52</sup> Folio 32v°.

<sup>53</sup> Folio 33r°.

de Guery et les enfans nepveux ou niepces ou aultres personnes quelzconques et aussy tous aultres heritaiges appertensans ausdictz Grard sa femme et leurs enfans ne sont et ne seront repute mesure et entant que besoing fut les desfranchissent dudict droict de mesure Saulf que ledict Seigneur de Pietre en consideration que dessus a accorde et accorde par cestes au prouffict dudict Grard ses hoirs et aians cause que lesdicts deux cens tenans a lheritaige de Catherine Pichonniere demeureront et seront tenus et reputez mesure et entant que besoing fut icelluy Seigneur de Pietre les cree et erige de nouvel en mesure a tous droictz privileges charges et coustumes competans aux aultres masuriers Tant saulf que ledict Grard ses hoirs et aians cause diceulx deux cens de mesure ne polront avoir ne pretendre front et droict de planter audict chemin audevant diceulx deux cens plusavant que ilz ne sont a present plante et que les hayes et arbres que ilz y ont croissans et assis demeurans les rentes desdictz heritaiges deues comme elles sont pour le present A condition aussy que ledict Grard ses hoirs et aians cause ne polront a raison dicelle mesure ny aultres mesures que ilz polroient avoir presentement ou a ladvenir a eulx appertensans a tiltre dachat transport hoirie ou aultre tiltre que fut faire ne souffrir leurs brebis et moutons pasturer en et sur ladicte terre et seignourie de Pietre rietz chemins Sablonnieres terres et heritaiges en tenus nost que ilz soient actuellement par domicile fix et sans fraudre residens et demeurans sur icelles mesures ou ailleurs en ladicte seignourie Promectant lesdictz Grard le Roy et sa femme quilz ont accepte et acceptent ce que dessus le tout entretenir furnir et accomplir sans jamais aller au contraire tout ce que dessus tous lesdictz comparans et chascun deulx lesdictes femmes auctorizees comme dessus ont chascun en leur regard<sup>54</sup> promis et promectent a tousiours entretenir furnir et accomplir et estre entretenu par eulx et leursdictz hoirs et aians cause sans jamais aller au contraire Soubz lobligation de leurs biens et heritaiges et ceulx de leurs hoirs presens et futurs quilz ont quand ad ce soumis et oblige submectent et obligent vers tous Seigneurs et justices Le tout nonobstant droict loy voz stil coustumes et privilege et toutes choses qui leur polroient valloir au contraire a quoy ilz et chascun deulx ont derogie et renonchie et derogent et renonchent par cestes Renonchans meismes au droict disant generale Renonchiation non valloir sy lespecialle ne precede Promectantz recongnoistre cestes par tout ou requis seront Et de ce en estre fait notte et memoire conformement ad ce que dessus es lettres de vendition eschambges partaiges et aultres tiltres que eulx comparans et leurs hoirs et aians cause polroient cy apres faire touchant icelles mesures Surquoy lesdictz hommes juges masuriers semons ont dict tous debvoir en ce que dessus estre sy souffissamment faitz que pour souffir en tesmoing de ce nous avons mis a ces presentes chascun nostre seel Qui furent faictes accordees congnes et passees en ladicte seignourie de Pietre le dixiesme jour de janvier an quinze cens soixante dix noeuf



<sup>55</sup>Commission executoire pour estre paie de jehan Grenu et Pierre Morel son pleigie<sup>56</sup> de une annee de cense de V bonniers de fief que ledict Grenu tient du Seigneur de Pietre

---

<sup>54</sup> Folio 33v°.

<sup>55</sup> Folio 37r°.

<sup>56</sup> pleigie : personne qui se porte caution.

jehan Viron ... nous avons veu vues lettres de baillie en date du VII<sup>e</sup> jour d'apvril an XV<sup>c</sup> LXXVII par lesquelles appert jehan Grenu et Pelonne Charlet sa feme avoir chacun tenu a tilre de cense de Guillaume Hangouart escuier Sr de Pietre des Pummereaulx contenant le nombre de V bonniers<sup>57</sup> de fief gisans audit Pietre le terme de sept ans continuelz quy commencherent le premier jour de mars quinze cens LXXIII parmy rendant chascun an audict Sr de Pietre la somme de soixante livres parisis a deux termes et paiemens en lan a chascun terme la moictie si comme St Remy et Pasques dont le premier paiement pour la premiere demie annee eschoit a le St Remy XV<sup>c</sup> LXXV portant trente livres parisis et au surplus a aultres devises et conditions contenues esdictes lettres Lesquels rendaiges charges devises et conditions ledicts preneurs et avecq eulx Pierre Morel laboureur demourant a Fromelles ont promis et chascun pour le tout sans division paier furnir et accomplir soubz lobligation de tous leurs biens et heritaiges et pour autant que lon est en faulte de paier la somme de soixante livres parisis pour une plaine annee de rendaige desdictz v bonniers de fief escheue au Pasques dernieres si comme dict ledict Sr de Pietre Requerrant pour en avoir paiement une provision Par quoy nous vous mandons que les susdicts Grenu et sa femme et Pierre Morel leur pleigie et chascun pour le tout vous constraintes de paier ladicte somme de LX livres de rente par la prinse et vendue de leurs biens meubles catheulx et heritaiges et par aultres voies et manieres de constraintes deues et raisonnables Et en cas dopposition proisime<sup>58</sup> vous nampty dudict deu assigne pour aux oppositions a comparoir pardevant nous en la Salle audict Lille a certain et competent jour pour sur ladicte opposition respondre selon raison en rescripvant de ce que fait en aurez de ce faire vous donnons pouvoir donne soubz notre seel le XXVIII<sup>e</sup> d'apvril XV<sup>c</sup> LXXVIII



Commision executoire contre jehan Grenu et Charles Charlet son pleige pour estre paie des rendaiges a l'argent de la cense des lieu et IX bonniers VI cens de la cense des Bruslos a Pietre tenu du Sgr dudit Pietre et faire apparoir d'avoit mis en œuvre de neuf oeuvraige des gluy<sup>59</sup> quil est tenu livrer chascun an

jehan Viron Nous avons veu une lettres de baille par lesquelles appert jehan Grenu et Pelonne Charlet sa femme avoir congnu et promis tenir a tilre de cense de Guillaume Hangouart escuier Sgr de Pietre des Pummereaulx ung lieu manoir nomme le cense des Bruslos gisant a Pietre se comprenant en IX bonniers VI c dheritaiges le terme de XII ans continuelz quy commencherent au my may XV<sup>c</sup> LXX / parmy paient et rendant chascun an audit Sgr de Pietre en la ville de Lille la somme de cent IIII livres parisis a deux termes et paiemens en lan a chacun terme la moictie sicomme St Remy et Pasques dont le premier paiement pour la premiere demie annee escheu a le St Remy XV<sup>c</sup> LXX / portant LII livres parisis et davantaige sont tenus et ont promis lesdits preneurs de acheter et mettre en euvre le tout a leurs despens chascun an sur les couvertures des edifices desdits lieu et cense ung demy cent de bons gluy<sup>59</sup> de seize par aulnes de tous chacun gluy de neuf ouvraige / et en faire chascun an apparoir audict Sgr de Pietre et ausurplus a aultres charges devises

---

<sup>57</sup> Folio 37v<sup>o</sup>.

<sup>58</sup> Proisime : prochaine, proche.

<sup>59</sup> Gluy<sup>s</sup>: Paille.

et conditions contenues ausdites lettres / Lesquels rendaiges charges devises et conditions lesdicts predeurs et avecq eulx Charles Charlet labourier demourant au Maisnil ont promis chacun pour le tout paier et accomplir chacun an soubz lobligation de leurs biens et hiretaiges et pour ce que lon est en faulte de paier la somme de LII livres parisis / pour ung demy dudit rendaige esceu aux Pasques dernieres Et aussy de avoir achete et mis en euvre a leurs despens sur lesdits edifices / deux <sup>60</sup>cent cinquante gluys telz que dessus / pour les annees XV<sup>c</sup> LXXIII / LXXIII / LXXV /LXXVI et soixante dix sept / sicomme dict ledict Seigneur de Pietre requerant pour en avoir paiement et satisfaction notre provision pourquoy nous vous mandons que lesdits predeurs et pleige et chacun pour le tout vous contraindez de paier ladicte somme de LII livres parisis sauf VI livres que ledict Sr de Pietre se tient pour paier sur icelle / et aussy de faire apparoir avoir achete et mis en euvre lesdits deux cens L gluys sur lesdits edifices pour lesdites annees ou les acheter et y faire mectre promptement en euvre aux despens desdits predeurs et pleige ou du moings ce quil en reste a mectre et quilz ne feront deuement apparoir y avoir mis pour lesdites annees et ce par la prinse et vendue de leurs biens meubles cateulx et hiretaiges et par toutes aultres voies et manieres de constraintes deues et raisonnables Et en cas dopposition prisme<sup>61</sup> vous nampty dudit deu / assignez jour aux opposans a comparoir par devant nous en la salle audit Lille a certain et competent jour / pour sur ladite opposition respondre selon raison en rescripvant de ce que fait en aurez de ce faire vous donnons povoir donne soubz notre seel le XXVIII<sup>e</sup> dapvril XV<sup>c</sup> LXXVIII /



<sup>62</sup>Commission de commandemens contre lesdicts Grenu et Charlet pour refection des edifices de ladicte cense des Brulos faire voitures et convoiees par luy deues planter entes et anneaux relever fossez et acomplir plusieurs aultres charges et conditions de sondict bail Et paier les interestz de ny avoir furny

jehan Viron escuier de la partie de Guillaume Hangouart escuier Sgr de Pietre Des Pummereaulx etc expose nous a este<sup>63</sup> que le IIII<sup>e</sup> jour de janvier XV<sup>c</sup> LXIX / Il a par devant auditeurs et soubz le seel du souverain bailliaige de Lille accorde en cense a jehan Grenu et Pelonne Charlet sa femme / quy le coignurent avoir prins audict tiltre ung lieu manoir contenant parmy jardins bois et terres a labour le nombre de IX bonniers six cens dheritz ainsy quilz se comprennent et sans aultrement livrer par mesure gisans audict Pietre et en tenu / Pour en joyr le terme et espasse de douze ans continuelz commenchiez au may XV<sup>c</sup> LXX / Parmy paiant et rendant chacun an la somme de LII florins carolus de vingt patars flandres le florin A deux termes et paiemens en lan telz que St Remy et Pasques a chacun terme la moictie A condition que lesdicts predeurs estoient tenus et avoient promis de bien entretenir ladicte maison cense edifices et hosteulx dicelle cense bien estaintz de pluye et de solleil de soulemens placquemens pailleux huys fenestres et aultres choses a leurs despens et en tel bon estat les relivrer et laissier en fin de cense Item de regler et

---

<sup>60</sup> Folio 38r°.

<sup>61</sup> Prisme : prochaine.

<sup>62</sup> Folio 38v°.

<sup>63</sup> Folio 39r°.

entretenir les terres a labour a trois royes<sup>64</sup> egalles Asscavoir ung bled ung march<sup>65</sup> et une ghesquier<sup>66</sup> sans les povoir durant ladicte cense froisser<sup>67</sup> descrier ne desrigler<sup>68</sup> et ne y semer es deux dernieres annees que une mencaudee de lin pour march / Item de renclore chacun an en ladicte cense tous feves et estrains procedans desdits hiretaiges et illecq les convertir en fiens et iceulx fiens mener chacun an sur lesdits heritaiges aussy bien sur les plus loingtains que prochains Sans durant ladicte cense ne en fin dicelle povoir vendre donner ardoir<sup>69</sup> ne aulcunement alier ny transporter nulz desdictes feves<sup>70</sup> estrains et fiens Item mectre en mote et laisser en ladicte cense au prouffit dudict Seigneur bailleur tous lesdits estrains et fiens Item<sup>71</sup> Estoiient tenus lesdits predeurs de faire chacun an audict bailleur une voiture et convoiiee de car et deux chevaulx de Lille a Pietre ou aultre part et pour quelque cause que il luy plaira / Aussy de relever et entretenir tous les fosses desdictes terres bien et a vyf fons et les relivrer en fin de cense en bon estat / Touttes lesquelles charges rendaiges devises et conditions lesdits censiers et avecq eulx Charles Charlet laboureur dmt au Maisnil pour ce aussy present et comparant et quy sest constitue pleige et respondant desdictz predeurs pardevant lesdits auditeurs du souverain bailliaige de Lille / ledict IIII<sup>e</sup> jour de janvier audict an XV<sup>c</sup> LXIX / ont promis bien paier entretenir furnir et accomplir chacun pour le tout sans division ny discussion de droict soubz lobligation de tous leurs biens meubles et immeubles / Et jai soit que iceulx censiers deussent avoir bien et deument entretenu ladicte maison et cense couvertures et edifices estaintz de pluie et de solleil soulemens placquemens pailleux huys fenestres et aultres choses Ce neantmoins ilz ont este delaians<sup>72</sup> ce faire A raison de quoy lesdits edifices en sont grandement empirez et par ce este cause par lesdits censiers interest audict Seigneur de Pietre de la somme de vingt cinq florins carolus / Sy avoient aussy froisse et descrier(?) durant lesdits neuf ans de le cense desdits neuf bonniers / six cens / plusieurs pieches de terre a labour du moings a ladvenant de ung bonnier par an desdits six bonniers de labour / et icelles terres non rigle et advesty comme ilz estoient tenu et que dessus est dict / causant en ce interest audict Seigneur de Pietre de la somme de quarante florins carolus / Comme aussy auroient vendu brusle ou transporte<sup>73</sup> durant ladicte cense plusieurs estrains et fiens procedans desdictes terres / et en ce cause audict remonstrant interest de seize florins carolus

Et sy ne ont lesdits censiers furny et satisfait le nombre de neuf voitures privees et convoiiees de car et deux chevaulx / pour raison de quoy ilz soient redevables audict Seigneur de Pietre la somme de treize florins carolus et dix patars Lequel exposant pour en avoir la raison nous a requis de provision Parquoy nous vous mandons que a la requeste dudict Seigneur exposant vous faictes expres commandemens de par le Roy nostre Sire ausdits predeurs et Charles Charlet demeurant au Maisnil leur pleige soubz paine de II<sup>c</sup> florins carolus applicables au

---

<sup>64</sup>Trois royes : trois récoltes.

<sup>65</sup> March: céréales de printemps.

<sup>66</sup> Ghesquier: jachère.

<sup>67</sup> Froisser: terme d'agriculture. Changer l'ordre établi par l'usage ou la condition du bail dans l'espèce de grains qu'on doit semer (Dictionnaire du Rouchi).

<sup>68</sup> Desrigler : sortir de la règle

<sup>69</sup> Ardoir: brûler

<sup>70</sup> Feves ?

<sup>71</sup> Folio 39v<sup>o</sup>.

<sup>72</sup> Delaians: retardant, en retard.

<sup>73</sup> Folio 40r<sup>o</sup>.

prouffict de sa Majeste incontinent et sans delay ilz aient et chacun pour le tout sans division ny discussion de droict a faire bien et deuement ouvrer et refectionner ladicte maison couvertures cense et edifices quelzconques dicelle estaintz de pluye et de solleil de soulemens placquemens pailleux huys fenestres et aultres choses ou en faulte de ce paier audict Seigneur de Pietre ladicte somme de 25 florins . Parreillement de pour lesdicts froisses et de non avoir rigle et seme lesdictes terres ainsy et comme dessus est dict paier lesdicts quarante florins samblablement de paier seize florins pour avoir brusle vendu aliene et transporte plusieurs desdicts estrains et fiens et de faire avecq ung car et deux chevaulx lesdites neuf convoies ou journees de Pietre a Lille ou pour ce paier lesdicts treize florins carolus et dix patars Et aussy que ilz aient a relever promptement bien et deuement que dict est tous les fossez estant allentour lesdicts lieu et neuf bonniers six cens / ou a faulte de ce paier audict Seigneur exposant la somme de vingt florins pour linterest de ny avoir furny<sup>74</sup> Et en cas dopposition reffus ou delay adiournez les opposans ou delaians a comparoir pardevant mondict Seigneur le gouverneur ou son lieutenant en la salle audict Lille a certain et brief jour actendu la nature de la matiere allencontre dudict exposant ou de son procureur pour lesdicts commandemens veyr et decreter et pour au jour servant veoir prendre par ledict exposant telles conclusions provisionelles ad ce que lesdicts commandemens tiennent lieu pendant le litige entant quil touche de faire ouvrer et refectionner lesdits cense lieu et edifices / ou y contredire et en outre proceder comme il appertendra en rescripvant de ce que fait en auez de ce faire voir donnons pouvoir donne soubz nostre seel Le XVI<sup>e</sup> jour de juing XV<sup>c</sup> soixante dix neuf /



<sup>75</sup> Certiffication de saisine faite par les lieutenant de bailly et hommes juges masuriers de la seigneurie de Pietre a la requeste du Seigneur de Pietre et de Maroie Bocqueste Pour par ledict Seigneur de Pietre estre <sup>76</sup>paie des rentes heritieres et fonssieres sur les rendaiges de cense des heritaiges tenus en cense dicelle Marye par Martin Malbrancque et par ladicte Marie estre paie du surplus dedicts rendaiges dicelluy Malbrancque son censier

Nous Laurens Hennart lieutenant de bailly / Grard Le Roy Mahieu De Dours Mahieu Carpentier et jacques Laigniel / hommes juges masuriers de la terre et Srie de Pietre Certiffions a tous quil appertendra que sur la remonstrance faite tant de la part de Guillaume Hangouart escuier Seigneur de Pietre que de la part de Marie Bocquette vefve de feu jan De Le Ruielle sœur et heritiere de feu Marguertie Bocquette et de Nicollas De Le Ruielle filz et entremecteur des affaires de ladicte Marie Que Martin Malbrancque et Marguerite Cochet sa femme tiennent et occupent a tiltre de cense ung lieu manoir jardin aucquie et plante et aucunes terres a labour contenans environ deux bonniers dherits gisans audict Pietre et en tenus appertenans et estans eschieuz a ladicte Marie Bocquette par le deches dicelle Marguerite sa sœur Rendant chacun an la somme de cinquante six livres flandres a deux termes et paiemens egaulx telz que St jehan Baptiste et Noël dont ledict Martin en debvra la somme de LVI livres flandres pour deux termes escheuz a le St jean Baptiste et Noël

---

<sup>74</sup> Folio 40v<sup>o</sup>.

<sup>75</sup> Folio 64r<sup>o</sup>.

<sup>76</sup> Folio 64v<sup>o</sup>.

de lan XV<sup>c</sup> soixante dix huict Et que sur lesdicts lieux jardin et deux bonniers ledict Seigneur de Pietre a droict de prendre et avoir chacun an les cinq rentes héritières quil sensuit Asscavoir une rente de douze livres dix solz flandres par an escheant le XIII<sup>e</sup> jour de janvier de laquelle luy en est deu douze livres dix solz pour une annee esceue le XIII<sup>e</sup> de janvier XV<sup>c</sup> LXXIX : Item une aultre<sup>77</sup> rente de cinq livres monnoie dicte par an escheant au premier de mars dont en est deue une annee esceue le premier jour de mars audict an XV<sup>c</sup> LXXIX / Item une rente de soixante deux solz six deniers par an escheant au Noël de laquelle en est deue la somme de quarante et ung solz de reste pour une annee esceue au Noël XV<sup>c</sup> LXXVIII / Item une rente de quarante six solz par an escheant le quatorziesme de febvrier an XV<sup>c</sup> LXXIX Et une rente de XXV solz par an prinse en une rente de cinquante solz par an allencontre de Marie Le Clercq fille de feu<sup>78</sup> .....et de Mariette Rogeau niepce de ladicte Marie Bocquette escheant le XXV<sup>e</sup> de may de laquelle en est deu la somme de XII solz VI deniers pour une demie annee escheue le XXV<sup>e</sup> de novembre an XV<sup>c</sup> LXXVIII Et que outre ce que dessus est encoires deu audict Seigneur de Pietre pour les rentes seigneurialles desdicts lieu jardins et deux bonniers dheritz pour lan XV<sup>c</sup> LXXVIII / en argent / XXVIII solz VI deniers flandres une poulle ung demy cocq quatre chappons et cinq havotz davaine portant selon les priseriez du siege des rentes Seignourialles de ladicte Seignourie de Pietre tenu le IX<sup>e</sup> de janvier an XV<sup>c</sup> LXXIX a la somme de huit livres trois solz monnoie dicte Le tout a declarer et prouver plus a plain en temps et lieu Nous avons a la requeste et sur ladicte remonstrance diceulx Seigneur de Pietre Marie Bocquette et Nicollas De Le Ruelle son filz et adfin de par eulx avoir prendre at consequir chacun respectivement leur deu desdicts cinquante six livres Asscavoir par ledict Seigneur de Pietre les arrieraiges des rentes heritieres et rentes seigneurialles cy dessus mentionnees et lesdicts Marie Bocquette et son filz le surplus quil restera diceulx / LVI livres apres le paiement du deu<sup>79</sup> dudict Sr de Pietre saisy et mis ce jourdhuy XXIII<sup>e</sup> jour dapvril an XV<sup>c</sup> LXXIX / en main de justice en la forme et maniere acoustumee et selon les uz stil et coustumes de ladicte Seignourie de Pietre lesdicts lieu manoir edifices jardins bois montans a teste et a fruct haies seves et terres a labour occupez par lesdicts Malbrancque et sa femme contenant comme dict est environ deux bonniers dheritaiges haboutant tant au grand chemin de Pietre menant des bancqs au riet que a lheritaige dudict Seigneur dudict Pietre a lheritaige des vefve et hoirs Noël Vignoble a le terre de Mahieu Vignoble et daultres sens a le terre de Fredric Brunel et de jacques Laigniel Ensamble tous meubles cateulx labeurs et semences foins immeubles prouffitz rendaiges et revenus desdicts lieu et hiretaiges et desdicts censiers et occupez en faisant laquelle saisine nous avons fait desfenses et commandemens par justice a tous meismes ausdicts Malbrancque et sa femme de ne riens prendre emporter ne transporter demolir abbatre ne faire abbatre copper espinchier ne faire espinchier labourer fouir picquier et hauwer Le tout sur paine de LX sols parisis monnoie Roiale Darthois quy est de XXVII deniers de monnoie de flandres le solt et faisant six livres XV sols flandre damende et de reparer le lieu en faisant laquelle saisine nous avons assigne jour en especial ausdicts Malbrancque et Marguerite Cochet sa femme a comparoir pardevant les bailly ou lieutenant et hommes juges masuriers de ladicte Seignourie de Pietre aux bancqz plaidoiables de ladicte Seignourie au samedy II<sup>e</sup> jour de may XV<sup>c</sup> LXXIX a presenter endedans heure de nonne allencontre desdicts Seigneur de Pietre Marie Bocquette et Nicollas De Le

---

<sup>77</sup> Folio 65r<sup>o</sup>.

<sup>78</sup> Blanc dans le texte.

<sup>79</sup> Folio 65v<sup>o</sup>.



Ruielle<sup>80</sup> et de chacun deulx ou de leur procureur ainsy et comme il appertendra de laquelle saisine deffences et commandemens et jour assigne nous avons fait nous meismes et aussy fait faire par jacques Barbet sergeant de ladicte terre et Seignourie de Pietre la sceulte<sup>81</sup> ausdicts Martin Malbrancque et Marguerite Cochet sa femme parlant a leurs personnes en ladicte Seignourie en tesmoing dequoy nous lieutenant de bailly hommes masuriers et jacques Barbet sergeand avons icy mis nos seings manuelz le XXIII<sup>e</sup> jour de avril an XV<sup>c</sup> soixante dix neuf



<sup>82</sup>Reconnoissant Mahieu de Dours que le puich estant au jardin qui fut a feu Pelonne Bocquette contenant III<sup>c</sup> et demy par luy achete haboutant au riet de Pietre est commungs aux manans dicelle seignourie Et promesse dudict de Dours acheteur de remettre le burg et grez ostez pardevant audict puich par icelle Pelonne en leur premier estat Aussy de ne pouvoir faire pasturer leurs moutons sur Pietre nest en resident sur ladicte seignourie

Comparut en sa personne Mahieu de Dours brasseur et laboureur demourant au villaige de Pietre Lequel comparant recongnut tant en son nom que au nom et soy faisant fort de Marie joye sa femme comment ilz avoient puis peu de temps achete des hoirs de feu Pelonne Bocquette a son trespas vefve de Mahieu de Guery tel droict part et action que lesdictz hoirs avoient en ung jardin mesure et heritaige contenant environ trois cens et demy tenus de la seignourie de Pietre confrontant sur le riet de ladicte seignourie de Pietre prins en sept cens contre ledict Mahieu de Dours et tenant daultre sens a lheritaige de Pelonne de Raye fille de feu Pierre vefve de feu jehan Sohier et heritiere des enfans de feu Hellin Delelacherie ses nepveux Sur lesquelz trois cens et demy il y a ung puich machonne que feuz les Seigneurs de Pietre avoient fait faire pour la commodite et<sup>83</sup> communaulte de ladicte seignourie le burg duquel puich quy estoit de grandes haultes et larges pierres de gretz avoit este puis treize a quatorze ans donne par ladicte Pelonne Bocquette a louvraige du nouveau clochie de leglise Dauberch Sy que pour ce elle auroit commis emprinses et fourfaictures damendes vers ledict Seigneur de Pietre que elle avoit recongnu et promis paier lesdictes amendes reparer remettre et restablir lesdictes pierres gretz et bourg touteffois que il plaisroit audict Seigneur de Pietre comme de ce a apparu par lettres passees pardevant bailly et hommes de ladicte seignourie de Pietre en datte de lonziesme jour de may quinze cens soixante six monstrees et leues audict comparant Lequel comparant ne veullant comprendre sur les droictz et auctoritez dudict Sr de Pietre et de ladicte seignourie a congnu et congnoist par cestes tant en son nom que au nom et soy faisant fort de sadicte femme que ledict puich est commun et publique Promectant de ne lemplir demolir ne oster les gretz et ouvraiges dicelluy ains quilz le tiendront en bon estat Mesmes congnoit ledict comparant estre tenu et avoir promis ausdictz heritiers et par ces presentes leur promect ensamble audict Seigneur de Pietre que luy et sadicte femme remectront et restabliront lors quil plaira audict

---

<sup>80</sup> Folio 66r<sup>o</sup>.

<sup>81</sup> Sceute (?) :commandement de payer les dettes echues.

<sup>82</sup> Folio 68r<sup>o</sup>.

<sup>83</sup> Folio 68v<sup>o</sup>.

Seigneur de Pietre et ses successeurs ledict burg et gretz que ladicte feu Pelonne Bocquette avoit donne et permis ausdicts gliseurs de leglise Dauberch de oster pour applicquer audict clochie Et sy le dict comparant tant en son nom quau nom et soy faisant fort de sadict femme consenty promis et accorde consent promect et accorde par cestes irrevocablement et pour tousiours audict Seigneur de Pietre que pour raison dudict heritaige par eulx achete et toutes aultres mesures et heritaiges quelconques que ilz ont presentement a eulx appartenant a quelque tiltre que ce soit tenus de ladicte seigneurie de Pietre tant comprinses gisans et haboutans au lieu et heritaiges de la brasserie de Pietre ou que lesdictz comparans sont demourans contre le riet de Pietre que en aultres endroitz dudict riet et seigneurie ne aussy pour raison de aultres mesures et heritaiges que lui et sa dicte femme polroient cy apres acheter ou leur polroient eschoir<sup>84</sup> et appartenir a quelque tiltre que ce puist estre eulx ne leurs hoirs et aians cause dicelles mesures et heritaiges ne polront envoyer faire ne souffrir leur blancqs bestiaux brebis et moutons pasturer en et sur ladicte seigneurie de Pietre chemins flegardz riet Sablonnieres terres voiries et heritaiges en tenus Nest que ledict comparant et sa femme leurs hoirs et aians cause dicelles mesures soient actuellement par domicile fix et sans fraude demourans en la dicte seigneurie de Pietre Et ce non obstant droict loy stil privileges coutumes usaiges et choses quelzconques generalles locales et particulieres a ce contraire A quoy il a tant en son nom que au nom et soy faisant fort que dessus par expres et de certaine science pre advertence renonchie et deroghie renonche et deroghe par cestes mesmes au droict disant generale Renonciation ne valloir sy lespecialle ne precede Promectant par ledict comparant tout ce que dessus est dict tenir et entretenir et estre entretenu par sadicte femme sans jamais aller au contraire Soubz lobligation de tous leurs biens et heritaiges et ceux de leurs hoirs presens et futurs quil a quant ad ce soumis et oblige submect et obliges vers tous Seigneurs et justices Meismes reconnoistre ces presentes et les faire reconnoistre ratiffier et agreer mesmes passer de nouvel par luy et sa dicte femme pardevant tous Seigneurs et justices quil appertiendra et requis seront et den faire faire et souffrir notte et mention estre faite aux lettres de venditions ou aultres tiltres quilz ou leurs hoirs et aians cause polroient cy apres faire et obtenir dicelles mesures Le tout a leurs despens renonchans a toutes choses contraires ad ces presentes.

Ladicte reconnoissance a este passee par lesdits de Dours et sa femme pardevant notaires roiaux dartois le XXVII<sup>e</sup> daoust XV<sup>c</sup> LXXIX



<sup>85</sup>Commission du conseil Darthois en cas de saisine et de nouvelleite contre Rolland Cousturier lequel avoit achete du Seigneur Daubers le petites Sablonnieres estant tenus et de la comprehension de ladicte seigneurie de Pietre et sieuvant sondict achat comenchie a les labourer apprehender a luy et tenir de ladicte seigneurie Dauberch

Les President et gens du conseil provincial Darthois Au premier huissier dudict conseil sur ce requis Salut de la partie de Guillaume Hangouart escuier Seigneur de Pietre nous a este expose en soy complainant tout affin de saisine de nouvelleite

---

<sup>84</sup> Folio 69r<sup>o</sup>.

<sup>85</sup> Folio 150v<sup>o</sup>.

disant que a vray et juste tiltre a declare plus a plain quand mestier<sup>86</sup> sera luy competer et appertient ladicte terre et seigneurie de Pietre en laquelle il a toute justice haulte moienne et basse et tous droix appertenant a icelle amendes de soixante solz parisis et aultres a icelle justice appertenant Et pour icelle maintenir exercer et garder a bailly lieutenant hommes sergears et officiers Sy sont tenus de luy plusieurs manoirs terres et heritaiges commune et rietz tenans tant a sadicte seigneurie comme autrement et entre aultre certaine portion de commune et riet que on appelle les <sup>87</sup>petittes savelonnières<sup>88</sup> Esquelles communes et rietz des dictes petittes savelonnières luy loist<sup>89</sup> et a ses subiectz et a nulz aultres faire paistre leurs moutons et aultres bestiaux Et sy ne peut lon en icelles sans son gre congie et licence tant par la coustume de ce pays Darthois comme autrement fouir et picquier ny faire aucune labour a paine de soixante solz parisis damende a luy a applicquer pour chacune foys que lon se seroit jugere envoyer paistre moutons ou aultres bestiaux et y picquier fouyr et faire aucune labour Et de ce joyr user et posséder et avoir este paie desdictes amendes et estre repare des troubles et empeschemens est en toutes bonnes possessions et saisines affirmatives negatives et mixtes desquelles et de toutes aultres possessions pertinentes a ladicte matiere a declarer comme dessus Il a joy et possesse par temps souffissament et vaillable pour bonne possession et saisine avoir acquis garder et maintenir paisiblement publicquement et par les derniers ans et exploictz Au veu et sceu de Rolland Cousturier demourant au pays de Lalleuwe et de tous aultres qui ce ont vullu veoir et scavoit ce nonobstant ledict Rolland ou aultres a son adveu sest jugere et advanche de son auctorite privee indeue et desraisonable et sans le gre congie et licence dudict complaignant depuis trois mois signamment<sup>90</sup> depuis an et jour encheu en regard a la datte de ceste complaincte par trois divers jours de fouir au louchet picquier et haner esdictes petittes savelonnières et par aultres trois jours fait ahanner<sup>91</sup> et labourer partie dicelles le tout du lez et coste du tenement et abordement de sadicte seigneurie de Pietre En comectant par luy plusieurs amendes jusques a la somme de quatre vingtz livres parisis monnoye de flandres et luy faisant domaige et interest de pareille somme sauf en toute juste estimation en le troublant et empeschant en sesdicts droictz possessions et saisines Lesquels troubles et empeschemens il na vullu reparer reintegrer ny restablir ne paier lesdictes amendes et insterestz A tort sans cause indeuement et de nouvel Requerant sur ce nostre provision Pourquoy nous vous mandons et comectons que se il vous appert de ce que dict est ou de tant que pour souffir<sup>92</sup> en ce cas a la requeste dudict complaignant ou de son procureur adjournez<sup>93</sup> a certain brief jour et heure que declairerez ledict turbateur<sup>94</sup> et aultres quil appertiendra et dont requis serez a estre et comparoir pardevant nous sur et au plus prez desdictes petittes savelonnières pour tous lieux contentieux et illecq tenez maintenez et gardes de par le Roy ntre Sire et nous pour justice Ledict complaignant ou procureur pour luy en sesdicts droix possessions et saisines et diceulx le faites joir et user a pur et a plain en ostant tous troubles et empeschemens faitz mis ou

---

<sup>86</sup> Mestier : service rendu.

<sup>87</sup> Folio 151r°.

<sup>88</sup> Le texte d'introduction site « les petites sablonnières » mais le même lieu est appelle « les petites savelonnières » dans le corps du texte.

<sup>89</sup> loist (?)

<sup>90</sup> Signamment : notamment.

<sup>91</sup> Ahanner, hanner : travailler.

<sup>92</sup> Folio 151v°.

<sup>93</sup> Adjournier : ajouter.

<sup>94</sup> Turbateur : fauteur de troubles .

donnez au contraire en faisant commandement audict turbateur<sup>37</sup> et aultres que requis serez que incontinent il restablisse les troubles dessus dictz paie et gaige lesdictes amendes de cesse de plus faire de samblable Et en cas dopposition la nouvellite ostee et la chose contensieuse prinse et mise en la main du Roy ntre Sire comme souverain restablisement fait deuement preallablement donnez et assignez jour competent ausdictes parties lune contre lautre a estre et comparoir pardeuant nous oudict conseil pour tant sur le principal que sur la recredence de la matiere respondre et proceder comme de raison Et sy lesdictz adiournez ou aucuns deulx ne comparoient pardeuant vous aux jour lieu et heure que leur aurez assignez ou fussent defaillantz de a vosdictz commandemens obeir et que par ce desfault fut par vous contre eulx donne readjournez lesdictz defaillans a comparoir comme dessus pardeuant nous pour ledict desfault veoir confirmer et ledict complaignant ou procureur pour luy plus amplement maintenir et garder en ses dictz droix possessions et saisines Et proceder en oultre selon raison en rescripvant de ce que fait en aurez De ce faire vous donnons pouuoir donne soubz le constreseel dudict conseil le huictiesme jour de juillet mil cincq cens cinquante noeuf



Sentence a mon prouffict de Messieurs du conseil Darthois touchant  
les petites Sablonnieres de Pietre

Les Gouverneur President et gens du conseil Dartois A tous ceulx qui ces presentes lettres verront Salut<sup>95</sup> Comme proces se soit meu pardeuant nous entre Guillaume Hangouart escuier Seigneur de Pietre demandeur sur complainte en cas de saisine et de nouvellite dune part Rolland Cousturier deffendeur original et Mr Robert de Wignacourt licencie es loix advocat postulant audict conseil curateur par nous commis aux personnes et biens de Philippe de Noyelle Seigneur Dauberch jointct avecq luy daultre pour duquel proces donner intelligence disoit ledict demandeur entre aultres ses biens luy competer et appertenir ladicte terre et seignourie de Pietre en laquelle il avoit toute justice et seignourie haulte moienne et basse et pour icelle exercer maintenir et garder bailly et lieutenant hommes de fiezf sergears et aultres officiers Sy estoient tenus de luy plusieurs manoirs terres et heritaiges communes et riez tenans tant a sa dicte seignourie comme aultrement et entre aultres certaine portion de commune et riez appelez les petites Sablonnieres contenant quatre mesures de terres ou environ aboutans dung coste aux heritaiges de la cense des Mottes qui est portion du gros de ladicte seignourie de Pietre daultre aux terres cottieres des hoirs Anthoine Descamps tenues dicelle seignourie et au courant deauwe et fosse faisant separation des grandes et petites Sablonnieres Lesquelles communes et petites Sablonnieres estoit loisible<sup>96</sup> audict demandeur et ses subiectz et a nulz aultres faire paistre leurs moutons et aultres bestiaux Sy ne pouvoit on en icelles tant par la coustume generale Darthois comme aultrement picquier fouyr ny faire aucune labour sans son gre congie ou licence A paine de soixante solz parisis damende a luy applicquer et de ce ainsy joyr et posseder estoit ledict demandeur en toutes bonnes possessions et saisines affirmatives negatives et mixtes par tel et sy long temps que nestoit memoire du contraire meismement par les derniers ans et exploictz Au veu et sceu dudict deffendeur et de tous aultres Ce non obstant ledict deffendeur sestoit

---

<sup>95</sup> Folio 152r°.

<sup>96</sup> Loisiblete : s.f., permission.

juger et advanchier de son auctorite privee indeue et desraisonnable et oulte le gre et volonte dudict demandeur depuis trois mois dumoings ung an en regard au VIII<sup>e</sup> de juillet cinquante noeu de fouyr par trois jours au loucher picquer et hauwer<sup>97</sup> esdictes petites Sablonnieres et par aultres trois divers iours fit ahenner et labourer partie dicelles le tout du lez et coste des tenemens de ladicte seigneurie de Pietre En troublant<sup>98</sup> et empeschant partant ledict demandeur en sesdictz droix possessions et saisines et escheant vers luy en plusieurs amendes et jusques au nombre de six et plus quil naueroit volu paier ny reparer ledict trouble A raison de quoy icelluy demandeur eust obtenu notre commission en forme de complainte oudict cas de nouvellite et icelle faict mettre a execution selon ses termes allencontre dudict deffendeur auquel pour son opposition eust este assigne jour oudict conseil aux plais y tenus Le v<sup>e</sup> de septembre oudict an cinquante noeu que lors par Me Jacques Dubois advocat pour Mahieu du Crocq procureur dudict demandeur fut prinse conclusion affin destre maintenu et garde en sesdictz droix possessions et saisines tant pour le principal que amendes de restablissement reel dudict trouble Requerant la recredence du litigieux en cas de proces demandant despens domaiges et interestz Surquoy apres aucunes procedures et en appellant de la cause au plais du xvi<sup>e</sup> de janvier oudict an Lix ledict de Wingnacourt comme curateur dudict Philippe de Noielles Seigneur Dauberch se seroit par Robert de Penin son procureur joint avecq ledict Rolland desfendeur le promectant deschergier et acquiter et au surplus par Mre Jacques Doresmieux advocat pour ledict Penin oudict nom fut tendu et conclut ad ce que en ceste pour sieulte complainte ny escheut sy elle y escheoit que non a tort avoit ledict demandeur icelle intente ne seroit maintenu garde ains en redoubtant linterdit seroit ledict adjoint oudict nom, maintenu et garde en possession contraire et triennale faisant aussy demande de despens demant les droix et possessions et saisines maintenues par ledict demandeur signamment que lesdictes petites Sablonnieres fussent tenues de la dicte seigneurie de Pietre, ny que a luy et nulz aultres fut loisible pasturer lesdictes Sablonnieres Au contraire seroit veriffie que icelles Sablonnieres et communes ainsy quelles se comprendoient et estendoient estoient et sont scituees es mectes de la seigneurie Dauberch appertenant audict Philippe de Noyelles et se appellent petites Sablonnieres pour diminutif en consideration quil y a aultres communes en ladicte seigneurie Dauberch jointans et adjacentes appellees les grandes Sablonnieres et communes de ladicte seigneurie Dauberch en laquelle a toute justice<sup>99</sup> et seigneurie viscontiere avecq bailly lieutenant sergeans et aultres officiers Et pour plus plainement demoustrer que icelles Sablonnieres sont de la comprehension de ladicte seigneurie tiennent dung coste ausdictes grandes Sablonnieres daultre a Henry du Bacquelerot et de boult au camp Noel de le Barre quy sont les trois principaux haboultz le tout tenus dicelle seigneurie Dauberch et quand au quatriesme aboutt est certain fosse par ou leauwe venant du bois Dauberch passe er flue quy fait la separation des deux seignouries Dauberch et Pietre Esquelles petites Sablonnieres les Seigneurs dudict Auberch avoient de temps immemorial faict tous actes de justice meismes par les habitans dudict lieu y pasture les bestiaux et non ceulx dudict Pietre tellement que ledict Seigneur Dauberch et habitans dudict lieu sen povoient dire estre en toutes bonnes possessions et saisines contraires a celle baptisee par ledict demandeur lequel neantmoins eust pour replicques faict persister en ses fins et conclusions mectant en denegation les moiens desdictz deffendeur et joint et suppose que lesdictes grandes Sablonnieres fussent

---

<sup>97</sup> Hauwer: travailler à la houe.

<sup>98</sup> Folio 152v°.

<sup>99</sup> Folio 153r°.

du tenement dudict Auberch Toutefois y avoit un grand fosse entre icelles et les petites Sablonnieres faisant ledict fosse la separation des seignouries et navoit ledict Seigneur Dauberch aucuns tennement audecha dudict fosse Sy nestoit lheritaige dudict Bacquelerot haboutant ausdictes communes ains au chemin dudict Pietre a Auberch et encoires entre ledict chemin et Sablonnieres un fosse lequel chemin est de la comprehension de ladicte seignourie de Pietre En effect lesdictes Sablonnieres estoient de tous lez enclavees es mettes dicelle seignourie de Pietre saulf du lez des grandz Sablonnieres ou est le fosse faisant ladicte separation Que sy de ce costee ledict Seigneur Dauberch avoit aucuns tennement ne doibvoient ou povoient estre prins pour haboutz puis que comme dict est ils estoient separez par ledict courant deauve et ne se povoit insere que lesdictes petites Sablonnieres pour la diminution Les grandes fussent du meisme tennement mais plustost le contraire pour monstrier que cestoient deux seignouries car sy le tout eust este dung tenement lon ne leust<sup>100</sup> distinguie ains simplement appelle les grandes Sablonnieres Dauberch Quoy que soit ledict Seigneur demandeur feroit sy quil disoit suffissamment apparoir de ses droix possessions et saisines et en icelles avoir continue au veu et sceu des Seigneurs et habitans dudict Auberch sans quelque contre dict Meismes que feu le Seigneur de Marles pere dudict Philippe jointct avoit parci devant fait mesurer lesdictes grandes Sablonnieres sans y comprendre lesdictes petites Sablonnieres Sy y avoit patemment et publicquement veu pasturer les bestiaux des habitans dudict Pietre sans y avoir donne empeschement congnoissant que icelles petites Sablonnieres nestoient de son tenement ains dudict Pietre deduisant chacune desdictes parties plusieurs aultres faitz et moiens dont apres dupplicques sur ce proposees elles aueroient respectivement servy par escript en forme de memoires et jointct chacune a sa justification ce que bon leur aueroit samble Et le tout par nous veu euissions par notre sentence interlocutoire de XIII de febvrier soixante declare lesdictes parties contraires leur ordonne servir dadditions et en apres veriffier et instruire le proces comme de raison et en faisant droict sur le restablissement requis par forme de provision dict et appointie que ledict deffendeur cesseroit de fouyr ou faire aucunes laboeurs sur lesdictes petites Sablonnieres et les laisser en tel estat quelles estoient paravant le trouble en baillant par icelluy demandeur caution de rendre tous despens domaiges et interestz sil estoit dict du contraire Reservant despens en diffinitive Suyvant quoy icelles parties aueroient respectivement servy dadditions aux memoires lune de lautre et sur tout pardevant commis de la court fait telles enquestes et productions que bon leur aueroit samble contraire Icelles servy de reproches et de salvations<sup>101</sup> au contraires Eulx concluans finablement le XII de may soixante deux en droict oudict proces Accordans icelluy estre par nous veu pour en appointier comme de raison Selon que es exploix actes et procedures de la court estoit et est plus a plain contenu **Scavoir faisons** que veu ledict proces et tout considere Nous a grande et <sup>102</sup>moere deliberation avons ledict demandeur maintenu et garde maintenons et gardons es droix possessions et saisines declairez esdictz exploix tant pour le droict que deux amendes coustumieres de soixante solz parisis chascune et en levant la main de justice mise a la chose contensieuse au prouffict dudict demandeur Avons condempne et condampnons lesdictz deffendeur et jointct a reparer le trouble en question en extimation telle que de raison Compensant neantmoingz les despens encourus entre lesdictes parties et pour cause En

---

<sup>100</sup> Folio 153v°.

<sup>101</sup> Salvations : Se dit des dernières écritures fournies dans un procès pour répondre aux contredits et objections de la partie adverse.

<sup>102</sup> Folio 154r°.

tesmoins de ce nous avons faict mettre le seel dudict conseil a ces presentes Qui furent faictes et pronunchies en jugement le unziesme jour de febvrier quinze cens soixante deux.



Ausquelles lettres de sentence est infixee<sup>103</sup> la commission executoire quy sensieult

Les Gouverneur President et gens du conseil Darthois Au premier huissier dudict conseil sur ce requis salut Nous vous mandons et commectons que les lettres de sentence de nous donnees parmy lesquelles ces presentes sont infixees et interinez et mettez a execution deue de point en point selon leur forme et teneur En constraintant au furnissement dicelles ceulx qui ce feront a constraintre par toutes voyes et manieres de justice deues et raisonnables ce faict que deffault ny ayt de ce faire nous vous donnons pouvoir donne soubz le contre seel dudict conseil le treiziesme jour de mars quinze cens soixante deux

Et sur le doz de ladicte Sentence est escript ce quil sensieult

je Noel Creton huissier extraordinaire du conseil provincial Darthois soubz signe Certiffie a tous quil appertiendra que le douziesme jour dapvril quinze cens soixante trois auroie a la requeste de Guillaume Hangouart Escuier Seigneur de Pietre impetrant de ceste sentence mis icelle a execution en tous ses pointz Et constraint au furnissement dicelle ceulx quy pour ce faisoient a constraintre comme en tel cas est requis et accoustume Et duquel devoir ledict Sr de Pietre en a requis avoir notte fait soubz mon seing le jour et an que dessus



<sup>104</sup>Premiere attestation tenue par notaires Roiaux touchant lesdictes petites Sablonnieres de Pietre pour obtenir par le Seigneur de Pietre comme il a faict la recedence durant le proces auquel il obtint apres diffinitivement tant pour le principal que amendes

Comparurent en leurs personnes Mahieu le Grand eaigie de cinquante noef ans / Barnabe le Grand eaigie de cinquante sept ans / Nicollas Bourel eaigie de soixante trois ans / Henry du Bacquerot eaigie de cinquante cinq ans / Gerard le Roy eaigie de quarante ans / Martin Hennart eaigie de vingt cinq ans jehan le Turcq eaigie de quarante trois ans et jehan Widebien eaigie de trente trois ans Le tout ou environ Tous labouriers demourans en la paroisse Doberchs / Sauf lesdicts le Grand en la paroisse de le Venthie et ledict Martin au Maisnil de presens estantz au villaige de Pietre Lesquelz et chascun deulx interroguiez separement sur linterrogatoire exhibe aux notaires roiaux sousignez de la part de Guillaume Hangouart escuier Seigneur dudict Pietre Et apres serment solempnel par eulx faict es mains desdictz notaires Ont dict jure et pour verite affirme que de tout le temps de leur memoire Ilz ont

---

<sup>103</sup> Infixees: insérées.

<sup>104</sup> Folio 154v°.

entendu que audict Guillaume Hangouart et ses predicesseurs compete et appertient icelle terre et seigneurie de Pietre en laquelle y a toute justice haulte moienne et basse et tous droix et amendes de soixante solz parisis et aultres a telle justice appartenant Et pour icelle maintenir exercer et garder a bailly lieutenant hommes sergents et officiers de justice Sy sont tenus de luy plusieurs manoirs terres et heritaiges communes et riez\_ tenans a sadicte seigneurie comme aultrement Et entre aultres certaine portion de commune et riez\_ que on appelle les petites Sablonnieres contigues et tenans aux grandes Sablonnieres Doberchs Entre lesquelles grandes et petites Sablonnieres y a eu de tout temps ung fosse <sup>105</sup> et cours deauwe / quilz ont tousiours oyr maintenir quil faisoit la separation desdictes seignouries Doberchs et de Pietre / et que icelles petites Sablonnieres estoient du tout tenues et comprises en icelle seigourie de Pietre Esquelles petites Sablonnieres est loisible audict Seigneur et a ses subgetz et a nulz aultres faire paistre leurs moutons et aultres bestiaux Et sy ne peult lon en icelles sans le gre congie ou licence dudict Seigneur fouyr et picquier ny faire aucune labeur a paine de soixante solz parisis damende vers ledict Seigneur de Pietre Et en ont ainsy veu user par ledict Seigneur impetrant et ses predicesseurs dont il a le droict tellement quilz en sont en toutes possessions paisibles Meismes a affirme ledict Mahieu le Grand que gardant comme bregier les moutons et blancq bestial de son pere quy estoit tenant dudict Oberchs et non dudict Pietre sur icelle grande Sablonniere luy estoit expressement deffendu de sondict pere de non laisser paistre sondict bestial sur lesdictes petites Sablonnieres pour craincte dudict Seigneur de Pietre et ses officiers quy y prenoient garde Affirmans tous par ensamble que depuis le temps de leur jeunesse ilz ont tousiours veu les sergents dudict Pietre prendre garde que aultres bestiaux neuissent a pasturer sur icelles petites Sablonnieres Et aussy ont veu les sergents dudict Auberchs faire le samblable sur les grandes Sablonnieres et prendre garde que les bestialz des petites y vinst pasturer Et estoient tous les tenans dudict Pietre paisible en la joissance desdictes petites Sablonnieres sans que ledict Seigneur Doberch ou ses officiers leur eussent baillie en ce aulcun empeschement ou destourbier<sup>106</sup> Et le auroient aussy par plusieurs foys ouy maintenir a leurs predicesseurs Affirmans outre par lesdictz Henry du Bacquerot et Guerard le Roy avoir veu depuis trois mois encha ung Rolland Cousturier demourant <sup>107</sup>en la paroisse de le Ventye fouyr et hauwer par deux divers jours sur partie desdictes petites Sablonnieres du coste des terres de la cense des Mottes aussy tenu dudict Seigneur de Pietre Ensamble y labourer de chevaux par aultre certain jours apres Sy a affirme ledict Widebien y avoir veu labourer ledict Rolland par trois divers jours du louchet et hauwe Et scevent les choses dessusdictes par les raisons que dessus Meismes lesdictz Turcq et Hennart par y avoir garde par ledict Hennart le bestial de son pere et ledict le Turcq le bestial de jehan Toulouze lors son maistre Dont et desquelles attestations affirmations et choses dictes de la part dudict Seigneur de Pietre nous a este requis lettres Asscavoir ces presentes pour luy servir et valloir par tout ou il appertindra ce que de raison Ainsy faict et atteste audict Pietre le XIIIle jour d'aoust lan mil cinq cens cinquante noef pardevant nottaires royaulx soubzsignez Ainsy signe j Caudron et N.Creton



---

<sup>105</sup> Folio 155r°.

<sup>106</sup> Destourbier : s.m. trouble.

<sup>107</sup> Folio 155v°.



Deuxiesme attestation tenue pour le proces des petites Sablonnieres de Pietre contre Rolland Cousturier et le Seigneur Dauberch Laquelle sert aussy pour le courant deauwe

Comparurent en leurs personnes jacques Wasselin bailly de la terre et seigneurie de Fauquisart eaigie de quarante cinq ans jehan Castricque labourier demourant audict Fauquisart eaigie de soixante noef ans Gilles Mortreul chirurgien eaigie de trente sept ans Michel de Guery eaigie de trente deux ans Pasquier du Pond eaigie de quarante huit ans Melchior du Pont frere audict Pasquier eaigie de vingt noef ans Andrieu le Grand eaigie de soixante quinze ans Loys Hennart labourier eaigie de trente et ung ans Nicollas Bourel eaigie de soixante<sup>108</sup> quatre ans jehan Widebien eaigie de trente trois ans Anthoine Binault eaigie de trente cinq ans demourant en la paroise de le Noeuf Chappelle Blaise de le Plancque eaigie de cinquante cinq ans jehan Barbet eaigie de soixante cinq ans Michiel Castirque eaigie de cinquante ans et Pierre de Neufglise laisne escuier demourant a le Venhie eaigie de soixante quinze ans le tout ou environ Lesquelz et chascun deulx interroguiez separement sur linterrogatoire exhibee aux nottaires royaulx soubzsignez de la part de Guillaume Hangouart escuier Seigneur de Pietre Pummeraulx Et apres serment par eulx fait ont concordablement et par ensamble dict jure et pour verite afferme que de tout le temps de leur eage ilz ont tousiours tenu et oys maintenir que les petites Sablonnieres sont dependantes tenues et mouvantes de ladicte seigneurie de Pietre / en laquelle ledict Seigneur a toutes justice haulte moienne et basse Et en laquelle petite Sablonniere ledict Seigneur ses predicesseurs et subjectz sont toute bonne et paisible possession de tout temps immemorial de y faire paistre leurs bestiaux comme ceulx de leurs subjectz sans aulcun contredict et sans que les subjectz dicelle seigneurie Doberchs aient peu chassier leurs bestes sur lesdictes petites Sablonnieres sans le congie ou licence dudict Seigneur de Pietre ou de ses officiers Affermans outre quilz ont de tout temps veu ung vray courant deauwe estant entre les grandes Sablonnieres Doberchs et lesdictes petites Sablonnieres dudict Seigneur de Pietre par ou les eauwes descendans dudict Oberchs sescoullent jus dicelle seigneurie de Pietre sur le pays de Laleue et lequel couurant fait la division et separation desdictes seignouries de Pietre et Doberchs Ou de tout temps ilz ont veu une plancke pardeseure ledict fosse par dessoubz laquelle passoit ladicte eauwe en sorte que le cours et fille deauwe quy descend coustumierement dudict Oberchs a de tout temps eu son cours au travers desdictes Sablonnieres pour illecq passer a Fauquisart et au pays de Laleue sans prendre par ailleurs son cours Sauf que depuis le proces que ledict Seigneur de Pietre<sup>109</sup> a pour raison desdictes Sablonnieres icelluy fosse auroit est en partie remply de sorte que les eauwes sont contraintes retourner et du tout prendre leur cours par le travers dudict chemin de Pietre / quy ne poeult estre sans le grand detrimet des manans et habitans dudict Pietre Et par especial de la cense et place des Mottes appertenans audict Seigneur obstant quelle se reiecte contre les fosses dicelle place / ou auparavant elle prenoit cours au chemin devant icelle place Sy auroient iceulx Doberchs aplicquiet icelle voye a passer les chariotz entierement sur les petites Sablonniers ou auparavant iceulx chariotz prenoient chemin aussy bien sur les grandes Sablonnieres que sur les petites Affirmant par ledict le Grand et jacques

---

<sup>108</sup> Folio 156r°.

<sup>109</sup> Folio 156v°.

Wasselin se avoir trouue avecq plusieurs manans et habitans dudict Fauquisart ses voisins pour communicquier ensamble adfin de avancher les eauwes descendans dudict Oberchs audict Pietre et dilecq audict Fauquisart Iceulx adviserent que estoit licite de demander le congie ausditz Seigneurs Doberchs et Pietre ou a leurs offices adfin de povoir relever ledict courant et fosse estant entre icelles grandes et petites Sablonnieres pour tant plus facilement povoir joyr desdictes eauwes comme scachans par eulx que cestoit le vray courant et droict fil des cours deauwes descendans dudict Oberchs en Laleuwe Et combien quilz euissent congie dudict bailly Doberch et quilz scavoient estre requis davoit samblablement congie dudict Seigneur de Pietre obstant quilz navoient icelluy differerent releve ledict fosse dient<sup>110</sup> oultre iceulx attestans quilz ont plusieurs foys oy dire et maintenir a leurs anciens predicesseurs meismement icelluy Wasselin a son pere en son vivant bailly dudict Fauquisart quy seroit termine eagie de IIII<sup>xx</sup> ans ou plus et a aultres que ledict fosse et courant deauwe faisoit la separation des dictes seignouries de Pietre et Doberchs et quil nestoit loisible a aucuns sans le gre ou congie dudict Seigneur ou ses officiers<sup>111</sup> de povoir chasser leurs bestiaux sur lesdictes petites Sablonnieres / et que a ses fins y avoit ledict Seigneur commis son sergeant et officiers Asscavoir ung grand Pierre et depuis son trespas ung Pierre du Bacquerot Dient oultre lesdictz Pasquier et Melchior du Pond freres qui leur auroit este expressement deffendu par leur pere quy seroit termine eagie de soixante quinze ans tenant dudict Oberchs et non dudict Pietre de ne mener pasturer les brebis moutons ou aultres besteaulx de leurdict pere sur lesdictes petites Sablonnieres et leur disoit leurdict pere que icelle petite Sablonnieres estoient de la seignourie dudict Pietre / et que ledict courant estant au milieu faisoit la separation et desreng<sup>112</sup> dicelle seignourie Doberchs et Pietre et quant audict Michiel dist avoir tousiours oy dire a ses predicesseurs et aultres que les bestiaux des manans dudict Seigneur de Pietre ont tousiours librement pasture sur lesdictes petites Sablonnieres / et que lors quilz estoient trouue sur les grandes se tiroient sur les petites ou ilz estoient bien sans que aucun leur eust baillie aucun empeschement Dient aussy lesdictz Widebien et Michiel de Guery avoir veu leste passe ung Rolland Cousturier par trois divers jours fouyr et hauwer sur partie desdictes petites Sablonnieres alendroit des heritaiges dicelle place des Mottes Sy a davantaige affirme ledict Nicollas Bourel que auroit veu environ a vingt ans ou plus feu Sire Guillaume Hangouart Chlr Seigneur dudict Pietre pere dudict Seigneur en son vivant President du conseil Darthois faire planter plusieurs flegardz en sadicte seignourie / delaissant lors a planter aucuns flegardz vers ledict Pummereaulx du coste de la brasserie et vers le bois du Biez quy sont tenus dicelle seignourie / et ausquelz les flegardz luy appartenoient<sup>113</sup> Et scevent les choses dessusdictes par les raisons cy dessus Meismes ledict Loys par avoir mener et veu mener les moutons de feu Pierre Hennart son pere en icelle petite Sablonnieres paisiblement et sans aucun contredict dudict Seigneur Doberchs ou de ses officiers Combien que cestoit au veu et sceu du bailly dudict Oberchs quy le auroit pluisieurs foys veu comme des habitans dudict lieu et jusques au trouble en question Sy auroit veu faire le samblable a plusieurs manans dudict Pietre le aiant aussy oy dire a sondict feu pere declarant par ledict Castricque avoir plusieurs foys oy declare a feu Benoit Henniart eagie de IIII<sup>xx</sup> VI ans a ung Antoine Prevost dit le viels brasseur en son vivant brasseur dudict Pietre aussy homme de grand eaige et a ung Noulet Montaigne/ Estienne duquel il ne scet

---

<sup>110</sup> “disent” ?

<sup>111</sup> Folio 157r°.

<sup>112</sup> Desreng / Desrenc : s.m séparation de terre faite par sillon, une raie ou un bornage.

<sup>113</sup> Folio 157v°.

le surnom et aultres tous de grand eaige que icelle petite Sablonnieres estoient de ladicte seignourie de Pietre Et ledict de Guery le aiant oy dire a son pere / meismes par y avoir garde les vaches et aultres bestiaux de sondict pere sans contredict / Dont et desquelles attestations et choses dictes de la part dudict Seigneur de Pietre nous a este requis lettres Asscavoir ces presentes pour luy servir et valloir ce que de raison Ainsy faict et atteste audict Pietre le vingtroisiesme jour daoust quinze cens soixante pardevant notaires royaulx soubzsignez Ainsy signe j.Caudron et N.Creton.



*L'entête de texte suivant est entièrement barré sur le manuscrit original*

Commission de simple saisine obtenue par le Seigneur de Pietre contre Michiel Mesurolles demeurant a Auberch aiant achete les grandes Sablonnieres Dauberch Pour le courrant deauwe estant entre les petites Sablonnieres de Pietre et lesdictes grandes Sablonnieres Dauberch Lequel courrant est du tout de la seignourie de Pietre



<sup>114</sup>Sensieult la Relation de lhuissier aiant mis a execution la commission de nouvellite cy dessus Reprinse contre Rolland Cousturier touchant les petites Sablonnieres de Pietre

A mes treshonnorez et doubtez Seigneurs Messieurs les president et gens du conseil Darthois Noel Creton huissier dudict conseil le vostre en tout Plaise vous scavoir que a la requeste de Guillaume Hangouart escuier Seigneur de Pietre impetrant de la commission de complaincte de vous donnee en marge de laquelle ceste ma rellation est attachie le quatorziesme jour daoust XV<sup>c</sup> cinquante noeuf me suis transporte en la paroisse de le Venthie au domicile et pardevers la personne de Rolland Cousturier labourier lequel apres assistement par moy requise jay adjourne a comparoir pardevant moy au joeudy enssieuvant dix septiesme jour dudict mois a heure de huict du matin atendant noeuf Sur et au plus pres de la commune et riez appelle la petite Sablonnieres de Pietre pour tous lieux contempcieulx Pour veir mettre a execution madicte commission selon sa forme et teneur Auquel jour lieu et heure dessusdictz apres des possession et saisines baptizees par madicte commisson avecq du trouble y mentionne me fut aparut tant que pour souffir Seroient comparus pardevant moy ledict Seigneur de Pietre en personne ensamble Ledict Rolland lequel se seroit tenu pour content du jour et heure a luy assigne Sieuvant quoy en la presence de jehan Caudron nottaire roial Andrieu Parquet et jehan Fascon / tesmoingz a ce par moy evocquiez<sup>115</sup> lecture prealablement faicte dicelle commission je tins maintins et garday de par le Roy notre Sire et vous mesdictz Seigneurs pour justice icelluy Seigneur de Pietre es droix et possessions portez par icelle desquelz le feis joir et user a pure et a plain ostant tous empeschemens fays au contraire faisant expres commandemens audict Rolland que incontinent il restablisse les tourbles mentionnez par icelle complaincte paie et gaigne les amendes et cesse de plus faire le samblable Lequel se

---

<sup>114</sup> Folio 158r°.

<sup>115</sup> Evocquier, evochier. v.a. appeler, faire venir.

<sup>116</sup> seroit oppose ausdicts commandemens Restablissant par signe dun petit baston du bois et comme constraint sy quil disoit Au moien de quoy la nouvellite ostee et la chose contempcieuse et debat des parties par moy prinse et mis en la main dudict Seigneur Roy comme souverainne Auroie adjourne donne et assigne jour audict Rolland a comparoir au conseil provincial Darthois Aux plaix du mardy cincquiesme jour de septembre enssieuvant oudict an Pour sur tout proceder comme de raison Messieurs Seigneurs ce dessusdict certiffie estre vray soubz mon saing cy mis le jour et an dessusdictz



Sentence interlocutoire de recedence Rendue au prouffict du Seigneur de Pietre demandeur en cas de nouvellite touchant lesdictes petites Sablonnieres de Pietre contre le Seigneur Dauberch et ledict Rolland Cousturier

Extrait du registre aux dictions du conseil provincial Darthois

Veue le proces dentre Guillaume Hangouart escuier Seigneur de Pietre demandeur et complainant en cas de nouvellite dune part Rolland Cousturier laboureur demourant en la paroisse de le Venthie deffendeur et opposant jointct avecq luy Maistre Robert de Wignacourt curateur du Seigneur Dauberch daultres Les memoires servies par les parties Avecq ce que elles on vullu joindre et tout considere Nous a meure deliberation avons ausdictes parties comme contraires es faitz par elles posez ordonne et ordonnons veriffier iceulx pardevant commis de la court apres quelles auront eu vision des memoires lune de lautre et y servy dadditions quy faire le vouldra a la XV<sup>e</sup> et par instruire ledict proces comme elles trouveront au cas appertenir Et faisans droict sur le restablissant requis et recedence Nous par forme de deprovision durant le proces et tant que aultrement en <sup>117</sup>sera ordonne Avons appointie et appointons que ledict deffendeur cessera fouir ou faire aucunes labeurs sur les petites Sablonnieres lieux litigieulx entre icelles parties et les laisser en tel estat quilz estoient auparavant le trouble pretendu a la charge neantmoins que ledict demandeur sera tenu bailler caution de rendre les dhomaiges et interestz que ledict deffendeur polroit avoir en cas que fut du contraire despens reservez jusques en diffinitive prononchie en jugement le treisiesme de febvrier quinze cens soixante



Caution bailliee par le Seigneur de Pietre pour proufficter de ladicte recedence obtenue des petites Sablonnieres de Pietre contre le Seigneur Dauberch et Rolland Cousturier

Veue au Conseil provincial Darthois par nous gouverneur President et gens dudict conseil la requeste y presentee de la part de Guillaume Hangouart Escuier Seigneur de Pietre / Contenant que au proces par luy intentee en matiere de complaincte en cas de saisine et de nouvellite allencontre de Rolland Cousturier avecq lequel seroit

---

<sup>116</sup> Folio 158v°

<sup>117</sup> Folio 159r°.

depuis joint Maistre Robert de Wignacourt curateur du Seigneur Dauberch / tant avoit este procede que par nostre sentence interlocutoire du XIII<sup>e</sup> de febvrier de lan soixante En faisant droict sur le restablissement et recredence eussions appoinctie par forme de provision Durant le proces et tant que aultrement en seroit ordonne que ledict Cousturier deffendeur cesseroit de fourir ou faire aucunes laboeurs sur les petites Sablonnieres lieux litigieux entre lesdictes parties et les laisser en tel estat quilz estoient auparavant le trouble pretendu A la charge neantmoins que ledict Seigneur de Pietre en seroit tenu baillier bonne et sceure <sup>118</sup>caution de rendre les domaiges et interestz que icelluy Cousturier polroit avoir en cas que fut dict de contraire Suyvant laquelle sentence et pour icelle effectuer nous requeroit ledict demandeur luy octroier commission executoire pertinente A la caution de Maistre jacques le Mieure docteur en medecine resident a Arras quil offroit baillier pour sceurete que dessus Et icelle requeste communicquee audict de Wignacourt et Robert de Penin procureur dicelluy deffendeur quy aueroient consenty la dicte caution estre receue eussions ordonne et ordonnons que ladicte caution sera receue et moienant ce despeschie audict demandeur la commission par luy requise Ainsy faict et ordonne audict conseil le XXI<sup>e</sup> dapvril quinze cens soixante et ung apres pasques



Le vingtcincquiesme jour de febvrier quinze cens soixante Maistre jacques le Mieure comparant au greffe dudict conseil se seroit et est constitué caution dudict Hangouart pour seurete du contenu en ladicte sentence interlocutoire en cas quil fut ad ce receu / Obligeant pour rendre ce que polroit estre dict en fin de cause tous ses biens et heritaiges et ceulx de ses hoirs presens et advenir faict les jour et an susdictz



Commision pour mettre ladicte sentence de recredence a execution

Les Gouverneur President et gens du conseil Darthois Au premier huissier dudict conseil sur ce requis salut Nous vous mandons et commectons que les lettres de sentence interlocutoire de nous donnees parmy lesquelles et de certain acte de caution Receue ces presentes sont infixees interniez et mettez a execution deue de point en point selon leur forme et teneur En constraintant <sup>119</sup> au furnissement dicelluy tous ceulx quy pour ce seront a contraindre par toutes voyes et maniere de justice deues et raisonnables Ce faictes que deffault ny ayt de ce faire vous donnons pouvoir donne soubz le contreseel dudict conseil le vingt deuxiesme jour dapvril XV<sup>c</sup> soixante et ung apres pasques



---

<sup>118</sup> Folio 159v<sup>o</sup>.

<sup>119</sup> Folio 160r<sup>o</sup>.

Rellation de lhuissier aiant mis a execution ladicte  
sentence de recredence des petite Sablonnieres de  
Pietre

A mes treshonorez Seigneurs messieurs les Gouverneur President et gens du conseil Darthois Noel Creton huissier dudict Conseil Resident a le Gorgue le vostre en tout obeissant Mesdictz Seigneur plaise vous scavoir que en vertu de linterlocutoire de vous donne et a moy presentees de la part de Guillaume Hangouart escuier Seigneur de Pietre le sixiesme jour de may quinze cens soixante et ung me suis transporte en la paroische de le Venthie Au domicile de Rolland Cousturier labourier auquel apres assistance requise et en la presence de jehan Belle sergeant de la ville de le Gorgue et jehan Prevost tesmoingz par moy evocquiez parlant a sa femme feis espres commandemens et deffence de par le Roy nostre Sire et vous mesdictz Seigneurs pour justice sur paine de cent florins a luy applicquier Quil ayt a cesser fouyr et faire aulcunes laboeurs sur les petites Sablonnieres de Pietre estans litigeulx et les remectre en tel estat quilz estoient auparavant la complaincte intemptee par ledict Seigneur impetrant A quoy la femme dudict Cousturier me fait response que sondict mary se garderoit de faire aucune emprinse audehors desdictz commandemens et quil navoit fait aucune labour sur icelle terre depuis lcelle complaincte intemptee mesdictz tres honnorez Seigneurs ce que dessus certiffie estre vray soubz mon seing cy mis les jours et an dessudictz



<sup>120</sup>Commission de simple saisine obtenue par le Seigneur de Pietre contre Michiel Mesurolle demourant a Auberch aiant achete les grandes Sablonnieres Dauberch Pour le courant deaue estant entre les petites Sablonnieres de Pietre et lesdictes grandes Sablonnieres Dauberch Lequel courant est du tout de la seignourie de Pietre

Les Gouverneur President et gens du Conseil Darthois Au premier huissier dudict conseil sur ce requis salut Expose nous a Guillaume Hangouart escuier Seigneur de Pietre en soy griefvement complaignant tout affin de simple saisine Que a vray et juste tiltre a declare plus a plain en temps et lieu luy compete et appertient ladicte terre et seignourie de Pietre ou il a toute justice haulte moienne et basse et a laquelle sont appendans certaines Sablonnieres nommees les petites Sablonnieres de Pietre Entre lesquelles petites Sablonnieres et les grandes Sablonnieres estans de la Seignourie Dauberch y aueroient tousiours eu certain fosse et courant deauwe faisant la separation desdictes Sablonnieres et desdictes seignouries de Pietre et Dauberch Contenant ledict courant deaue en longueur trois a quatre cens piedz ou environ appertenant dumoing pour la moictie audict exposant Auquel fosse et courant deauwe nest loisible a aulcun picquier fouir et hauwer icelluy restoupper<sup>121</sup> eslargir ny raprofondir sans le gre congie ou licence dudict exposant a payne de soixante patars parisis damende a luy applicable Et de ce ainsy joyr et user est ledict exposant tant par luy que ses predicesseurs en toutes bonnes possessions et saisines affirmatives negatives et mixtes partel et sy loing temps quil nest memoire du contraire Aumoings par temps souffissant et vaillable pour bonne possession et saisine avoir acquis garder et retenir paisiblement et publicquement et signamment depuis dix ans encha

---

<sup>120</sup> Folio 160v°.

<sup>121</sup> Restoupper: reboucher.

Au veu et sceu de Michiel Mesurrolles et de tous aultres quy le ont vollen veoir et scavoit Ce nonobstant ledict Mesurrolles ou aultre a son <sup>122</sup>adveu et dont il a eu le fait pour agreable sest ingere et avanchie depuis trois ou quatre ans au moins depuis ledict temps de dix ans encha eu regard a la datte de ceste complaincte De son auctorite privee indeue et oultre le gre et volente dudict exposant de restouper ledict fosse et courant deauwe faisant separation desdictes petites et grandes Sablonnieres et ce de quarante a cinquante piedz de longueur Et la reste dudict fosse et courant raprofundy de environ trois ou quatre espois<sup>123</sup> sur et du lez et coste desdictes petites Sablonnieres ensamble le eslargy de environ quatre ou cincq piedz Sy aueroit aussy emprins quelque portion dudict courant et le adioinct et appicquiez a son heritaige Et par ce moien fait que tous chariotz chevaux et passans prennent ad present necessairement leur chemin pour aller au pays de Laleue sur lesdictes petites Sablonnieres ou auparavant ilz prenoient tousiours leursdict chemin indifferament aussy bien sur lesdictes grandes Sablonnieres que sur les petites Sy aueroit par ledict restouppement fait divertir<sup>124</sup> sur et a travers de deux divers chemins de ladicte seignourie de Pietre toutes les eauwes filz et courans quy solloient passer directement par lesdictz deux Sablonnieres au ponchel du petit Tricquenel et dillecq audict pays de Lalleuwe au grand degast et empirement desdictz chemins en troublant et empeschant partant ledict exposant en sesdictz droix possessions et saisines et comectant vers luy amende de soixante patars parisis A tort sans cause requerant sur ce notre provision Pourquoi nous vous mandons et comectons que a la requeste dudict exposant ou de son procureur faites expres commandemens de par le Roy notre Sire et nous pour justice audict turbateur et aultres quil appertendra et dont requis serez que incontinent ilz ayent a remectre et garder ledict exposant en sesdictz droix possessions et saisines Meismes quil reparent les troubles dessusdictz paient et gaigent les amendes Se cessent de plus faire le samblable ne plus troubler ledict complaindant en aucune maniere Et en cas dopposition donnez et assignez jour competent aux <sup>125</sup>opposans a estre et comparoir pardevant nous oudict conseil pour dire leurs causes dopposition et en oultre respondre et proceder comme de raison Et pour ce que lon dict aucuns quil est besoing adjourner en ceste partie estre demourans hors des mectes de nostre jurisdiction / Prions et requerons en ayde de droict a tous Seigneurs juges justiciers et officiers quil appertendra que lesdictz adiournemens et exploictz il leur plaise faire ferre ou souffrir par vous estre faitz / et en ce tant faire pour nous quilz voudroient que feissions pour eulx Et en cas quilz soient de ce faire reffusans faites les adjournemens dessusdictz en parlant a leurs personnes se trouvez et apprehendez poeuvent estre es mectes de nostre jurisdiction sinon en parlant a leurs procureurs parens amys facteurs negociateurs et entremetteurs de leurs besongnes et affaires ou par cry publicque a la bretecque de la plus prochaine bonne ville du lieu de leur residence estant de nostre jurisdiction Assignyant aux portaulx de leglise copie de ceste commission et de vostre exploict Pardessus ce leur insignant par samblable coppie et vostre missive affin quil nen pretendent cause dignorance tellement quil soit vray samblable que lesdictz adjournemens et exploictz soient venus a leur notice et congnoissance Et lesquelz exploictz faitz par la maniere que dict est sera daultel effect et valleur comme se faitz estoient a leurs personnes ou vrais domicile et pour telz ou cas dessusdict les avons auctorisez et auctorisons En rescripvant de ce que

---

<sup>122</sup> Folio 161r°.

<sup>123</sup> Trois ou quatre espois : sans doute « Trois ou quatre epaisseurs de louchet ».

<sup>124</sup> Divertir : tourner, contourner.

<sup>125</sup> Folio 161v°.

faict en auez de ce faire vous donnons povoir donne soubz le contreseel dudict conseil le vingt quatriesme jour de novembre quinze cens soixante deux



### Relation de lhuissier sur la commission susdicte

A mes treshonnorez Seigneurs messieurs les gouverneur President et gens du conseil Darthois Noel Creton huissier dudict conseil le vostre en tout obeissant messieurs Seigneurs plaise vous scavoir que a la requeste de Guillaume Hangouart<sup>126</sup> escuier Seigneur de Pietre impetrant de la commission de vous donnee au marge de laquelle ceste ma relation est atachee le quatriesme jour de novembre quinze cens soixante trois me suis transporte en la paroisse Dauberch pardevers la personne de jehan Fascon bailly dudict lieu auquel auroie requis mettre madicte commission a execution sur Michiel Mesurolle y denomme demourant en icelle paroische resort de Warneton pays de Flandres ou sinon souffrir que meisse icelle a excution<sup>127</sup> sur icelluy Mesurolle luy declarant la teneur dicelle commission Lequel me declara quil ne feroit icelluy sy ne me accorderoit assistance pour ce faire Suyvant quoy me suis transporte au domicile dudict Michiel Mesurolle auquel parlant a sa personne present Henry Meurin et jehan Belle aueroie declare le refus que mavoit fait le bailly dudict lieu de mectre ladicte commission a execution sur sa personne luy declarant outre que le samedy enssuivant jour de marchie de le Venthie a la bretecque dudict lieu feroie lesdictz exploix et le adiourneroie Illecq a la requeste dudict Seigneur a comparoir au conseil Darthois au mardy seiziesme jour dudict mois Lequel me fait responce que le tourble par luy fait avoit este a la requeste des margliseurs dudict Auberch et pour lutilite de leglise dudict lieu Et ledict samedy jour de marchie me transportay a la bretecque dudict Venthie au lieu accoustume faire publication et present ledict jan Belle Pierre Baiart et le commun poeuple y a samblablement feis audict Mesurolle a haute voix et cry publicque tous les commandemens portez par icelle luy assignant jour pardevant vous mesdictz Seigneurs audict seiziesme dudict mois declarant sy aucun le anvoit<sup>128</sup> luy pavoit faire scavoir Lequel commandement luy insignuay par lettres missives que luy ay fait tenir par jehan Prevost de le Venthie tellement que certiffie ledict ad journement estre venu a sa congnoissance mesdictz Seigneurs ce que dessus certiffie estre vray Tesmoing mon saing cy mis le jour et an dessusdictz



<sup>129</sup> Sentence a mon prouffict touchant le courrant estant entre les petites Sablonnieres de Pietre et celles de Auberch lequel courrant est du tout de la seigneurie de Pietre rendue contre ledict Michiel Mesurolle

---

<sup>126</sup> Folio 162r°.

<sup>127</sup> Execution, il manque un "e" dans le manuscrit.

<sup>128</sup> Envoie (?)

<sup>129</sup> Folio 162v°.



Les Gouverneur President et gens du conseil Dartois A tous ceulx quy ces presentes lettres verront salut Comme Guillaume Hangouart escuier Seigneur de Pietre ay piecha<sup>130</sup> obtenu nostre commission en forme de simple saisine narree que entre aultres ses biens et heritaiges luy competoit et appartenoit ladicte terre et seigneurie de Pietre ou il avoit toute justice haulte moienne et basse a laquelle estoient appendans certaines Sablonnieres nommees les petittes Sablonnieres de Pietre Entre lesquelles petittes Sablonnieres et les grandes estans de la seigneurie de Auberch y avoit tousiours eu certain fosse et courant deauwe faisant la separation desdictes Sablonnieres et desdictes seignouries de Pietre et Dauberch contenant ledict courant deauwe en longueur trois a quatre cens piedz ou environ appartenant dumoings pour la moictie audict impetrant Auquel fosse et courant deauwe nestoit loisible a aucun picquier fouyr ny hauwer icelluy restoupper eslargir ny raprofundir sans le gre congie ou licence dudict exposant a paine de soixante solz parisis damende a luy applicable Et de ce ainsy jouyr user et posséder estoit ledict impetrant tant par luy que ses predicesseurs en toutes bonnes possessions et saisines affirmatives negatives et mixtes par tel et sy long temps quil nestoit memoire du contraire Aumoings par temps suffisant et vaillable pour bonne possession et saisine avoir acquis garder et retenir paisiblement et publicquement et signament depuis dix ans encha Au veu et sceu de Michiel Mesurolles et de tous quy ce avoient vollu veoir et scavoir Ce nonobstant ledict Mesurolle ou aultre a son adveu et dont il avoit eu le <sup>131</sup>faict pour agreable sestoit ingere et advanche depuis trois a quatre ans aumoings depuis lesdictz dix ans eu regard a lintroduction de ceste poursieulte de son auctorite prive indeue et oultre le gre et voluncte dudict impetrant de restoupper ledict fosse et courant deauwe et ce de quarante a cinquante piedz de longueur Et la reste dudict fosse et courant raprofundir de environ trois a quatre espois sur et du lez et coste des dictes petites Sablonnieres Ensamble le eslargy de environ quatre a cinq piedz Sy aueroit aussy emprins quelque portion dudict courant et le adjoint et applique a son heritaige Et par ce moien fait que tout chariotz chevaulx et passans prenent a present necessairement leur chemin pour alle au pays de Laleuwe sur lesdictes petites Sablonnieres ou auparavant ilz prenoient tousiours leurdict chemin indifferamment aussy bien sur lesdictes grandes Sablonnieres que sur les petites Sy avoit par ledict restouppement fait divertir sur et a travers de deux divers chemins de ladicte seigneurie de Pietre toutes les eauwes et courrans quy solloient passer directement par lesdictes deux Sablonnieres au ponchel du petit Tricquenel et dillecq audict pays de Laleuwe au grand degast et empirement desdictz chemins En troublant et Empeschant ledict impetrant en sesdictz droix possessions et saisines et commectant vers luy amende de soixante solz parisis a tort et sans cause Pour ces causes ledict impetrant aueroit fait mestre a execution ladicte complaincte selon ses termes allencontre dudict Mesurolle turbateur Auquel pour lopposition par luy cree jour luy avoit este assigne a comparoir pardevant nous oudict conseil aux plais y tenus le seiziesme de novembre quinze cens soixante trois Que lors par Maistre jacques Dubois advocat pour Mahieu du Crocq procureur dudict impetrant fut conclud affin destre remis maintenu et garde en sesdictz droix possessions et saisines tant pour le droict que amende Et le dict deffendeur condempne raiparer les troubles susdictz et tout pertinament en tel cas demandant despens dommaiges et interestz Surquoy ledict adjonaie<sup>132</sup> averoit fait obtenir quelque delay et depuis soy laisse couller es deffaulx premier et second par vertu desquelz aueroit este ordonne audict demandeur

---

<sup>130</sup> Piecha, pieca: naguère.

<sup>131</sup> Folio 163r°.

<sup>132</sup> Adjourné.

veriffier son <sup>133</sup>intention sur intendit<sup>134</sup> Mais ladicte cause presentee au plais du jourdhuy datte de ceste icelluy deffendeur personnellement comparant audict conseil aueroit recongnu lesdictz droix possessions et saisines consenty et accorde Le dict demandeur y estre remis maintenu et garde et luÿ deffendeur condempne reparer ledict trouble et de paier ladicte amende saulf la grace dicelluy demandeur et les despens de ceste poursieulte quil consentoit taxer saulf diminutions Ce que ledict du Crocq oudict nom aueroit accepter selon que es exploix et actes de ce faisans mention estoit et est plusaplain contenu Scavoir faisons que veues lesdictes recongnissances accord et acceptation avons ledict demandeur remis maintenu et garde remectons maintenons et gardons par le Roy nostre Sire et nous pour justice esdictz droix possessions et saisines condempnant ledict deffendeur reparer ledict trouble ensamble en la dicte amende saulf la grace dicelluy demandeur et esdictz despens a taxer comme dessus En tesmoing de ce nous avons fait mettre le seel dudict conseil a ces presentes Quy furent faictes et donnees en jugement Le ving ungiesme jour de mars quinze cens soixante et trois



Commission pour mectre ladicte sentence du  
courrant a execution

Les Gouverneur President et gens du conseil Darthois au premier huissier dudict conseil sur ce que requis salut nous vous mandons et commectons que les lettres de sentence de nous donnees parmy lesquelles ces presentes sont infixees interniez et mectes a execution deue de point en point selon leur forme et teneur En constraintant au furnissement dicelles ceulx quy pour ce seront a constraintre par toutes voyes et manieres de justice deues et raisonnables Ce faictes que deffault ny ayt de ce faire vous donnons povoir donne souz le contreseel dudict conseil le ving cincquiesme jour de may quinze cens soixante quatre



<sup>135</sup>Tax des despens dudict proces du courrant deauwe

Les gouverneur President et gens du conseil Darthois A tous ceulx qui ces presentes lettres verront salut Scavoir faisons que les despens demandes par Guillaume Hangouart escuier Seigneur de Pietre a Michiel Mesurolle demourant a Auberch sont taxez et moderez sur la declaration diceulx et apres diminution baillie par ledict Mesurolle a la somme de huit livres En ce comprins lexecutoire laquelle se deduira selever ne la convient De laquelle somme ledict Mesurolle sera tenu faire paiement et sollution audict Hangouart Et ad ce faire constraint et justicie a ses despens en toutes choses se mestier est En tesmoing de ce nous avons fait mectre le seel dudict conseil Qui furent faictes et pronunchies en jugement le dix huictiesme de may quinze cens soixante quatre

---

<sup>133</sup> Folio 163v°.

<sup>134</sup> Intendit: s.m, Acte de l'ancienne procédure par lequel le demandeur déclarait l'intention qu'il avait de fonder son droit sur faits, causes, raisons et moyens qu'il entendait prouver.

<sup>135</sup> Folio 164r°.



Commission du conseil Darthois pour mettre ladicte sentence du tax des despens touchant ledict courrant a execution Avecq auctorization de le faire par cry publicq en cas que ceulx contre lesquelz il convient adresser soient demourans hors Darthois

Les gouverneur President et gens du conseil Darthois Au premier huissier dudict conseil sur ce requis salut Nous vous mandons et commectons que les lettres de tax de despens de nous donnees parmy lesquelles ces presentes sont infixees interniez et mettez a execution deue de point en point selon leur forme et teneur En constraintant au furnissement dicelles ceulx qui pour ce seront a constraintre par toutes voies et manieres de justice deues et raisonnables Et ou pour le fait de ladicte execution vous seroit besoing exploiter hors des <sup>136</sup>mectes de nostre jurisdiction requierons tous Seigneurs et juges que en faveur de droict ils vous souffrent et permectent ce faire en leurs mectes Et sy de ce faire sont reffusans faictes les commandemens significacions et exploitz en ce regard necessaires parlant a la personne de Michiel Mesurolle condempne sy trouver les pouves es mectes de nostre jurisdiction Sinon en parlant a ses procureur parens amys facteurs negociateurs et entremetteurs de ses besoingnes et affaires ou par cry publicque a la bretecque de la plus prochaine bonne ville du lieu de sa residence estant de nostre jurisdiction Assignant aux portaul de leglise coppie de ceste commission et vostre exploit et pardessus ce luy insignuant par samblable coppie de vostre missive affin quil nen pretende cause dignoration tellement quil soit vray samblable que lesdictz exploictz soient venus a sa notice et congnoissance Lesquelz exploix faictz par la maniere que dict est seront dautel effect et valleur comme se faictz estoient a sa personne ou vray dommicille et pour telz ou cas dessusdictz les avons auctorisez et auctorisons En rescripvant de ce que faire en aures de ce faire vous donnons pouvoir donne soubz le contreseel dudict conseil le vingt cinquesme jour de may quinze cens soixante quatre



Sentence de Messieurs du Conseil de Flandres au prouffict du Seigneur de Pietre touchant les petites Sablonnieres de Pietre estans de la comprehension et tenement de ladicte seignourie de Pietre

Les gens du conseil du Roy de Castille de Leon Darragon de Navarre de Napels de Cecille de Maillorcque de Sardeine des isles Indes et terre ferme de la mer oceane Archiduc Daustrice duc de bourgoingne de lothn de brabant de lembourgh de Luxembourg <sup>137</sup>de ghere et de melanen Conte de flandres de habsbourg de bourgoingne palatin et de haynau de hollande darthois de zeelande de Namur et de zvuytphen Prince de zwane Marquis du Saint Empire Seigneur de frize de salins de Malines des cite villes et pays dutrecht doueryssel et groeninghen et dominateur

---

<sup>136</sup> Folio 164v°.

<sup>137</sup> Folio 165r°.

en Asye et en Affricque ordonne en flandres Scavoir faisons a tous Que comme pardevant nous proces estoit pendant indecis entre Philippe de Noyelle Seigneur Daubers Sire Thomas Duhem Pbre vicegerent et pasteur de leglise Dauberch enclave en la chastellenie de Lille Adrien de Bert bailly des hommes de fiefz jehan Fascon bailly dudict lieu Noel de Le Barre et Philippe du Bois eschevins ensamble Michiel Mesurolle et jehan Parcquet aussy eschevins et marglisseurs dudict Auberch demandeurs dune part Et Guillaume Hangouart Seigneur de Pietre des Pummereaulx etc deffendeur et opposant daultre part Mouvant a cause que lesdictz demandeurs avoient fait remonstrer au Roy nostre Sire en son grand conseil a Malines le vingcincquiesme jour daoust quinze cens cinquante et noeuif Comme pour laugmentation du saint service divin et de devotion Ilz avoient quasi entierement renouvelle les edifices de leglise dudict lieu de sorte quil ne restoit plus pour le parfaict dicelle que de construire et edifier une tour pour y mectre et pendre les cloches chose tres necessaire Pour furnir aux mises de laquelle leurs estoit besoing trouver grande somme de deniers quilz ne scavoient recouvrer nestoit en vendant quelques rietz communs avecq plusieurs habitans seans audict lieu Lesquelz ne leurs servoient de grand prouffict nommez les grandes et petites Sablonnieres Contenant asscavoir les grandes trois bonniers et une mesure et les petites trois a quatre mesures A raison de quoy pour proceder a la vendition desdictz riez aueroient prins le gre et consentement de la plus saine partie des habitans dudict lieu Dauberch Meismes affin que nul ne pretendist de ce ignorance et se vint opposer sil entendoit ou avoir quelque prejudice ou <sup>138</sup> interest aueroient faic anunchier en la dicte eglise a la maniere accoustumee par criees et publications par trois quinzaines ensuyvans lung lautre la vente diceulx Durant lesquelles ne seroit approche aucun pour y former contredict A tant lesdictz demandeurs aueroient procede a la vendition desdictz riez quy seroient demourez a trois personnes pour le pris de vingt et cinq livres la mesure Or estoit que quelque bonne espace de temps depuis ladicte vendition meismes apres que les achapteurs avoient commencie a labourer lesdictes terres et a payer le pris de leurs achaptz Aucuns sestoient vantez y donner empeschement mesmes eulx mis en devoir de ce faire au regret desdictz demandeurs et prejudice de ladicte eglise avecq empeschement dudict œuvre pieuse A ceste cause ensamble pour asseurer iceulx achapteurs lesdictz demandeurs sur leurdicte remonstrance avoient obtenez dicelle Majeste ses lettres patentes en forme dauctorization et octroy addressantes en la court de ce ans / Par vertu desquelles estions commis // Que appelez pardevant nous tous ceulx quy pour ce seroient a appeler / et par la dicte vente pourroient avoir interestz sil nous apparroit de ce que dessus et que la plus grande et saine partie desdictz habitans Dauberch aiant consenty a la vente desdictz riez / en ce cas souffrions et perfections ausdictz demandeurs de pouvoir faire passer et recongnoistre icelle vente ensamble en faire et passer les desheritances adheritances et aultres œuvres de loy en tel cas requises et necessaires a charge touteffois de rendre par eulx de lemploy des deniers procedans de ladicte vente bon et leal compte et reliqua la et ainsy quil appertiendroit Lesquelles vendition desheritance adheritance et aultres œuvres de loy qui se feroient en ceste partie Icelle Maieste par sesdictes patentes lettres vouloit estre bonnes et vaillables et pour telles les a ou cas dessusdict valide et auctorize valide et auctorize de grace especialle Nous commectant <sup>139</sup> aussy au cas de debat ou contredict faire aux parties Icelles oyes bon brief droict raison et justice Lesquelles lettres par nous veues avons

---

<sup>138</sup> Folio 165v°.

<sup>139</sup> Folio 166r°.

a la requeste desdictz demandeurs sur icelles faicte expedier certaines nos lettres de commission en forme dattache par vertu desquelles lettres dattache jehan Thieulaine huissier de ceste court se seroit a la requeste desdictz demandeurs transporte en ladicte paroisse Dauberch pardevant le portal de ladicte eglise (Lieu accoustume a faire telles et samblables criees et publications) sur ung jour de dimence Auquel lieu et jour incontient le grand messe aschevee et finee en presence de grande multitude de gens et apres leurs avoir faict a haulte voix ostention et lecture desdictes lettres doctroy et attache ensuyvant leurs forme et teneur Il demanda sy aucuns y avoit quy a icelles opposant se voudroient fonder tellement que pour lors que se advancha personne pour en opposition venir mais quelques jours en apres se approcha de luy huissier en la ville de Lille ledict Guillaume Hangouart Seigneur de Pietre deffendeur lequel declara que estant adverty de ladicte publication quil se opposoit a la vendition des petites Sablonnieres dessus mentionnees parquoy en ensuyvant ladicte opposition adjourna icelluy deffendeur a comparoir pardevant nous a certain et competent jour suyvant ses lettres de relation de ce expediez / auquel servant apres plusieurs contumations<sup>140</sup> le neufiesme jour de juillet quinze cens soixante et apres presentation des parties ledict deffendeur remonstrant ses causes et raisons dopposition contendoit afin de non recevoir de subreption et obreption que ladicte vente ne sortiroit effect au prejudice du droict dudict opposant ses censiers subiectz et habitans de sa seigneurie de Pietre ains demoureroit ledict opposant ses subiectz et manans en leurs preeminences droictz possessions et saisines Respectivement offrant preuve et demandant despens dommaiges et interestz alleguant pour en icelles conclusions obtenir que a luy defendeur appertenoit en propriete la terre et seigneurie de Pietre comprenant justice haulte moyenne et basse estant seigneurie franche regale du Roy<sup>141</sup> tenue des prevostz doyen et chappitre de Saint Ame en Douay et en riens subiecte a la seigneurie Dauberch a laquelle seigneurie de Pietre abordent sont contigues contenues et comprinses les petites Sablonnieres mise a vente par lesdictz demandeurs en sorte que les dictes petites Sablonnieres sont dependantes tenues et mouvantes de sadicte seigneurie de Pietre Appareroit aussy que ledict deffendeur et ses predecesseurs leurs censiers et subiectz sont en possession paisible de temps immemorial de faire paistre leurs bestiaux es dictes petites Sablonnieres et en ont joy dicelles en tous temps fruictz et prouffictz tant en pasturage que aultrement de toute anchienete Et ainsy comme un appelle Rolland Cousturier demourant en Artois achapteur dicelles petites Sablonnieres avoit encommencie a les fouir hauwer et labourer pour les approprier a luy cuidant priver ledict Seigneur de Pietre et ses subiectz et manans de leursdictz droictz possession et jouissance et fruition<sup>142</sup> ledict deffendeur auroit en son nom et de sesdictz subiectz par action de complainte actrait en jugement ledict Rolland pardevant les Seigneurs du conseil Darthois ou ladicte cause estoit en estat de y servir de additions consernant par ce ledict opposant lesdictz droictz preeminences joyssance et possession en prejudice desquelz ne de ladicte poursuyte commenchie en Artois ne se pavoit decreter ladicte auctorisation de la pretense(pretendu) vente persistant par ce ledict opposant en sesdictz fins et conclusions protestant de ne submettre a preuve non necessaire Sur lesquelz raisons dopposition lesdictz demandeurs avoient le cinquiesme de novembre quinze cens soixante servy de solutions persistans par linterinement<sup>143</sup> de la vente desdictes

---

<sup>140</sup> Contumation: non comparution.

<sup>141</sup> Folio 166v°.

<sup>142</sup> Fruition. s.f: jouissance des fruits et récoltes.

<sup>143</sup> Interminer : interdire, defendre de.

grandes et petites Sablonnieres par escript / et le dixnoeufliesme jour dudict mois ledict deffendeur serroit a court de supersolutions / et le vingtquatriesme jour de janvier audict an Lesdictz demandeurs servirent a court de contresolutions aussy par escript / Finalmente en la cause estant sy avant procede que apres plusieurs continuations icelle estoit par le consentement des ambedeux <sup>144</sup>parties concluite<sup>145</sup> en faitz contraire et enqueste Et icelle cause ainsy pendante en faitz Comparut aujourd’huy datte de cestes pardevant nous en personne Baltazart van derBeque comme procureur du deffendeur et en vertu de la procuracion especial et irrevocable a luy donnee par ledict deffendeur et icy inferee de mot a aultre A tous ceulx qui ces presentes lettres verront ou orront eschevins de la ville de Lille en flandres salut Scavoir faisons que au jourdhuy pardevant nous comparut en sa personne Guillaume Hangouart escuier Seigneur de Pietre des Pummereaulx demourant en ceste ville lequel ordonna constitua et estably et par ces presentes fait ordonne constitue et establisset ses procureurs generaux et certains messagiers especiaux de Maistre Franchois de Sauters Beltremieu van Eynde josse de Rantere Phles Doublet jacques le Brun Pierre Marotel Balthazart van der Beke Franchois van Zenecote Albert Bauwens Gilles Rains jehan Venant Raoul Gosson jehan Buisine jehan Doresmieulx Franchois du Bois Pierre Boucquiel Guy Willant Gilles van Hulse Rogier le Pers Wallerand Deslobes Anthoine Ingheluves Michiel des Mares Phles Hochart Nicollas de Saint Aubin Loys Soubly Nicollas le Grand Allard et jehan Védie pere et filz jehan de Faucompret Martin de Faucompret Martin le Wathier jehan Fascon jehan de Boury Grard le Roy jehan le Hare jehan le Turcq Anthoine Binault laisne Antoine Binault le josne Anthoine du Prêt Phles Darthois jehan le Merchier jacques Pipelart jehan du Bois jehan Bonte Quintin Martin jehan Masurel jehan Desruelles Mahieu Rassel Claude Chuyne et Maistre Gilles Bauters Ausquels procureurs dessus nommez et a chascun deulx seul et pour le tout portant ces presentes ledict etablissant a donne et donne plain pouvoir auctorite et mandement especial de luy ses besongnies causes et querelles meues et a mouvoir tant en demandant comme en deffendant requerir demander maintenir poursuivre soustenir et deffendre pardevant tous juges et en toutes cours requerir <sup>146</sup>et entreprendre garand et deffence de cause ou causes proposer baillier et servir par escript tous libelles demandes deffences fais raisons et moiens sur ce servans lceulx affirmer et ad ces fins en son nom faire tous sermens que droict requiert de respondre aux articles des parties adverses par responce de credit vel non de produire tesmoingz, lettres tiltres et enseignemens de baillier et servir de reproches et salvations conclure en cause de ouyr droict arrest et sentence interlocutoire et deffinitives / de appeler et poursievir lappel ou appeaux et y renonchier se mestier este Et generalement faire tout ce que procureur commis a lites peult et doibt faire de substituer au lieu deulx ou de lun deulx aultres procureurs ung ou plusieurs quy ayt ou aient tel pouvoir que dessus Mesmes a ledict Seigneur constituant donne et donne aususdict Maistre Baltazart van der Beke Gilles van Hulse jehan Védie Nicollas de Saint Aubin Franchois van Zenecotte Albers Bauwens et Gilles Bauters et a chascun deulx seul et pour le tout portant ces presentes plain pouvoir auctorite et mandement especial de pour luy et en son nom aller et comparoir pardevant Messieurs les President et gens du conseil de flandres et Illecq accorder au nom dudict Seigneur de Pietre lintherinement de la vente des grandes Sablonnieres gisans en la seigneurie Dauberchs contenant environ trois bonniers faite par les

---

<sup>144</sup> Folio 167r°.

<sup>145</sup> Du verbe “conclure”: conclure.

<sup>146</sup> Folio 167v°.

Seigneur Cure et margliseurs dicelle seigneurie Dauberch en vertu de lettres patentes en forme dauctorisation de vente donnees du grand conseil du Roy nostre Sire a Malines en datte du XXV<sup>e</sup> daoust quinze cens cinquante noeuf Et entant quil touche icelles grandes Sablonnieres accorder ausdictz Seigneur Cure et plus saine partie des habitans de la seigneurie dudict Auberchs Leurs fins et conclusions leur este adjugees a leurs despens Moienant et a condition que au mesmes instant de laccort susdict et par mesme acte lesdictz Seigneur Cure margliseurs et plus saine partie des habitans de ladicte seigneurie Dauberchs aient pour eulx ou leur procureur ad ces fins souffissamment fonde de lettres auctenticques accordees pareillement audict Seigneur de Pietre ses fins et <sup>147</sup>conclusions luy estre adjugees entant quil touche lopposition par luy faicte ausdictes lettres patentes dauctorisations pardevant lesdictz Seigneur President et gens du conseil en flandres pour et au regard des petites Sablonnieres contenant environ quatre mesures ou mencaudees de terre appertenant audict Seigneur de Pietre y gisans et restans de la comprehension dicelle tenans dun sens ausdictes grandes Sablonnieres le vray et anchien courant des eauwes descendans de le pierre au bois des Pummereaux des pretz Louvetz de Massel et de la Haulte rue et mont Wacquet estant entre deulx Daultre sens tenans au chemin de ladicte seigneurie de Pietre menant audict Auberch Daultre coste aux terres de Henry Bacquelerot tenues de ladicte seigneurie de Pietre par luy acquis des hoirs Bauduin Descamps et du quart sens tenans aux heritaiges et chemin de la cense des Mottes appertenant audict Seigneur de Pietre quy est du gros du fief dicelle seigneurie de Pietre et que lesdictes petites Sablonnieres appertient audict Seigneur constituant et sont de luy tenuz et mouvans Et que de tout ce que dessus en soient faictes et donnees lettres auctenticques en double dudict conseil de flandres et soubz le seel dicelluy / Lune pour lesdictz Seigneur Cure margliseurs et paroischiens Dauberchs et laultre pour ledict Seigneur de Pietre Promectant icelluy Seigneur constituant a tenir et avoir pour agreable ferme et estable<sup>148</sup> a tousiours tout ce que par lesdictz procureurs ou lung deulx sera en ce que dict est fait procure et aultrement besoingnie soubz lobligation de ses biens et heritaiges vers tous Seigneurs et justices mesme de furnir le juge se mestier est En tesmoings de ce nous avons ces presentes fait seeller du seel aux causes de ladicte ville Ce fut fait le vendredy saint vingthuictiesme jour de mars lan mil cincq cens soixante six / Dessoubz le reply estoit escript Pardevant jehan de Preudhomme Seigneur de Laoultre / eschevin et Phles Fremault voirjure / et sur le reply signe G de le Lys et seellees dung seel de chire verde sur double queue de parchemin A consenty et consente par cestes en linterinement de la vente des <sup>149</sup>grandes Sablonnieres gisans en la seigneurie Dauberch contenant environ trois bonniers faicte par les Seigneur Cure et margliseurs dicelle seigneurie Dauberch en vertu des lettres patentes en forme dauctorization de vente donnees du grand conseil du Roy nostre Sire a Malines en datte du vingtcinquesme daoust quinze cens cinquante noeuf Et entant quil touche icelles grandes Sablonnieres accorde ausdictz demandeurs et plus saine partie des habitans de la seigneurie dudict Auberch leurs fins et conclusions leur estre adjudiez a leurs despens moiennant et a condition que au meismes instant de laccord susdict et par meisme acte ledict Seigneur Cure margliseurs et plus saine partie des habitans de ladicte seigneurie Dauberch aient par eulx ou leur procureur ad ces fins souffissamment fonde de lettres auctenticque / a accorde pareillement audict Seigneur de Pietre deffendeur ses fins et conclusions luy estre adjudies entant

---

<sup>147</sup> Folio 168r.

<sup>148</sup> « Establi».

<sup>149</sup> Folio 168v<sup>o</sup>.

quil touche l'opposition par luy faicte ausdictes lettres patentes dauctorization en ceste court pour et au regard des petites Sablonnieres contenans environ quatre mesures ou mencaudees de terre appartenans audict Seigneur de Pietre y gisans et estans de la comprehension dicelle tenans dung sens ausdictes grandes Sablonnieres le vray et ancien courant des eauwes descendans de le pierre au bois des Pummeraulx des pretz Louvetz du Maisse et de la Haulte rue et mont Wacquet estant entre deulx daultre sens tenans au chemin de ladicte seignourie de Pietre menant audict Auberch Daultre coste aux terres Henry du Bacquelerot tenues de ladicte seignourie de Pietre par luy acquis des hoirs Baulduin Descamps / et du quart sens tenans aux heritaiges et chemin de la cense de Mottes appartenant audict Seigneur de Pietre quy est du gros du fief dicelle seignourie de Pietre et que lesdictes petites Sablonnieres appertienent audict Seigneur de Pietre et sont de luy tenus et mouvans Et que de tout ce que dessus en soient faictes et donnees lettres auctenticques en double de ceste court et soubz le seel Lune pour le deffendeur et laultre pour les demandeurs Ce que lesdictz demandeurs acceptent Suyvant quoy josse Verdebout comme procureur <sup>150</sup>especial et irrevocable de Phles de Noyelles Seigneur Doberch et Damoiselle Adrienne de Noyelles Dame Dantigneul etc sœur et heritiere apparente et ayant ladministration des biens dudict Seigneur Dauberch Sire jehan Despretz Pbre Cure dudict Dauberch jehan Fascon bailly Enguerant de le Barre Phles du Bois et jehan Parquet eschevins dudict Auberch Nicollas Saintgier Robert Fascon et Andrieu Roussel margliseurs Andrieu Parquet jehan de le Ruelle Mahieu de la Broye Denis de le Salle Martin de le Ruelle Pierre Chombart jehan Faulqueberghe Rogier Ployart et Mahieu de le Barre tous laboureurs et manans dudict Auberch pour eulx et leurs faisans fort lung pour laultre et chascun pour le tout de tous aultres inhabitans de ladicte paroische Dauberch en vertu des procurations especiales et irrevocables aluy donnees et octroyes par lesdictz demandeurs ses Maistres dont les teneurs cy apres sensuyvent de mot a aultre et premierement celle dudict Phles de Noyelles Seigneur Dauberch Damoiselle Adrienne de Noyelles etc et aultres **A tous ceulx qui** ces presentes lettres verront eschevins de la ville de

Bethune salut **Scavoir faisons** que aujourd'hui pardevant nous sont comparus Noble homme Phles de Noyelles Seigneur Dauberch Ploich etc Damoiselle Adrienne de Noyelles Dame Dantignoeul sœur et heritiere apparante et aiant ladministration des biens dudict Seigneur Dauberch Sire jehan Despres Pbre cure dudic Auberch jehan Fascon bailly Enguerand de la Barre Phles du Boys et jehan Parquet eschevins dudict lieu Nicollas Saint Leger et Robert Fascon mergliseurs de leglise dudict Auberch Pierre Toucry et Zacharie du Quesne tous demourans audict Auberch et Recongnurent lesdictz comparans tant esdictes qualitez que eulx faisans fors des aultres manantz et habitans dudict Auberch avoir constitue et estably leurs procureurs generaux et messagers especiaux de josse Verdebault jooris Massean et Maistre joos van Smid Ausquelz procureurs et a chascun deulx seul et pour le tout portans ces lettres lceulx comparans ont donne pouvoir especial absolu et irrevocable <sup>151</sup>en leurs noms comparoir pardevant Messieurs les Presidentz et gens du conseil en flandres et Illecq en jugement ou dehors accepter l'offre que pourra faire Guillaume Hangouart Seigneur de Pietre au proces estant pardevant lesdictz Sieurs du conseil de flandres de consentier l'interinement de certaines lettres pattentes obtenues par lesdictz constituantz et autres manans dudict Auberch pour pouvoir vendre et ademerer au prouffict de ladicte

---

<sup>150</sup> Folio 169r°.

<sup>151</sup> Folio 169v°.



eglise les grandes Sablonnieres dudict villaige et en ce faisant declarer de la part desdictz constituantz confesser et accorder quilz ne pretendent aucune justice droict ou seignourie des petites Sablonnieres ainsy quelles se comprennent et extendent Et sy avant que la possession a este adiuge audict Seigneur de Pietre en la cause par luy intentee au conseil Darthois allencontre desdictz constituantz Ains les laissent et quictent du tout au droict dudict Seigneur de Pietre et que ledict interinement sera du tout aux despens desdictz impetrans Et generalmente povoir de tant faire dire et accorder comme ilz feroient personnellement ja fust il que le cas requist mandement plus especial Promectant tenir pour agreable ferme et estable a tousiours tout ce que par lesdictz procureurs ou lung deulx sera dict accorde et besoingne soit pour ou contre eulx et a paier le juge se mestier est soubz lobligation de tous les biens terres et heritaiges du temporel appartenantz a ladicte eglise Ensamble ceulx desdicts Seigneurs et dudict villaige Renunchans a toutes choses contraires en ces presentes En tesmoing de ce nous avons mis a ces presentes le seel aux causes de ladicte ville Qui furent faictes et passees le vingthuitiesme jour de may mil cinq cens soixante sept Dessous estoit escript pardevant Messieurs Franchois Fascon et Me Nicollas Brougnart eschevins sur le remploy estoit signe Du crocq et seelees dung seel de chire verde, sur double queue de parchemin Icy sensuyvent les lettres de procuracion desdictz et aultres manans dudict Dauberch **A tous ceulx** qui ces presentes<sup>152</sup> lettres verront orront Rewart et Eschevins de la ville de La Basse salut **Scavoir faisons** que aujourdhuy pardevant nous Comparurent en leurs personnes jehan Fascon bailly du villaige Dauberch, Nicollas Saint Gier, Robert Fascon, Andrieu Roussel, manegliers dudict Auberch Andrieu Parquet, jehan de le Ruyelle, Mahieu de la Broye, Denis de le Salle, Martin de le Ruyelle, Pierre Chombart, jehan Faucqueberghe, Rogier Ployart et Mahieu de le Barre, tous labouriers manans et habitans dudict Auberch et Recongnurent lesdictz comparantz et chascun deulx et eulx faisans fors des aultres manans dudict Auberch Avoir fait denomme constitue et estably leurs procureurs generaulx et especiaux de josse Verdebout, joris Massean et Me joos van Zuint Ausquelz procureurs dessusnommez et a chascun deulx seul et pour le tout portant ces lettres iceulx comparans ont donne povoir especial absolut et irrevocable de en leurs noms aller et comparoir pardevant Messieurs les president et gens du conseil en flandres / et illecq en jugement ou dehors accepter loffre que pourra faire Guillaume Hangouart Seigneur de Pietre au proces estans pardevant lesdictz Seigneurs du conseil en flandres de consentir linterinement de certaines lettres patentes obtenues par lesdictz constituans et aultres manans dudict Auberch pour povoir vendre et ademerer au prouffict de ladicte eglise les grandes Sablonnieres dudict villaige Et en ce faisant declarer de la part desdictz constituans confesser et accorder quilz ne pretendent aucunes justice droict et seignourie des petites Sablonnieres ainsy quelles se comprennent et extendent Et sy avant que la possession a este adjudie audict Seigneur de Pietre en la cause par luy intentee au conseil Darthois allencontre desdictz constituans ains les laissent et quictent du tout au droict dudict Seigneur de Pietre et que linterinement sera du tout aux despens desdictz impetrans et generalmente et especialement povoir aultant faire dire accorder et besoingner comme ilz feroient se presentz en personnes y estoient ores que le cas requist mandement plus especial Promectant avoir<sup>153</sup> pour agreable ferme et estable a tousiours tout ce que par lesdictz procureurs ou lung deulx sera fait dict et accorde

---

<sup>152</sup> Folio 170r°.

<sup>153</sup> Folio 170v°.

Soit pour ou contre eulx et a paier le juge se mestier est soubz lobligation de tous les biens terres et heritaiges temporelz dicelle eglise et communaulte dudict villaige Renonchans a toutes choses contraires a ces presentes En tesmoing de ce nous avons mis a ces presentes le seel et contre seel aux causes dicelle ville quy furent faictes et ainsy passez en ladicte ville de le Bassee le vingthuitiesme jour du mois de novembre quinze cens soixante et sept Pardevant Nicollas Labbe et Martin le Wattier eschevins dicelle ville sur le reply signe j de Faucompre et seellees dung seel de chire verde sur double queue de parchemin A accepte et accepte par cestes comme dessus lesdictes offres et presentations dudict deffendeur Consentant que audict deffendeur reciproquement soient adjudiez ses fins et conclusions par luy prises en ceste instance Touchant les petites Sablonnieres en grandeur scituations et devises contenues en laccord entre les parties fait et accorde le tout aussi selon les devises et conditions comprinses et susdictes procurations consentans et requerrans les parties huicjude<sup>154</sup> au contenu desdictes offres presentations et acceptations estre condempnez Et nous les susdictes offres presentations et acceptations oyes / Veu aussy lesdictes procurations cy dessus inserees Avons condempne et condempnons par cestes nostre acte Icelles parties reciproquement en leure susdictes offres presentations et acceptations suyvant leurs forme et teneur declairant partant la cause et proces comme extainct estre royee hors du rolle de la court En tesmoing de verite avons-nous a ces presentes lettres fait mectre le seel de la chambre dudict conseil en flandres donne a Gand le vingt et troisesme jour de febvrier quinze cens soixante et sept /



<sup>155</sup>Quittance du Seigneur de Pietre des despens taxez a son prouffict au conseil Darthois contre Michiel Mesurolle pour le proces intente contre luy pour le courant estant entre les petites Sablonnieres de Pietre et les grandes Sablonnieres Dauberch Et le proches touchant les gretz ostez fouynes et emprinses commises en la seignourie des Pummereaulx

Aussy recongnissance et restablissement des emprises que ledict Mesurolles pavoit avoir fait audict courant Et congie requis de relever et fouyr audict courant

je Guillaume Hangouart Seigneur de Pietre congnoy avoir receu de Michiel Mesurolles labourier demourant au Aubers par une partie la somme de vingt et une livre dix sept sols flandres quil me devoit pour et a cause du tax des despens en quoy ladicte Mesurolle a este par Messieurs du conseil Darthois vers moy condempne en certain proces de complaincte de simple saisine a raison des fouynnes restoupement ralargissement et emprinses par luy faictes au fosse et courant deauwe a moy appertenant entre les petites Sablonnieres de Pietre et les grandes Sablonnieres Dauberch Et par aultre partie la somme de vingt livres trois sols par moderation monnoye dicte pour la moictie des despens que ledict Mesurolles et jehan Parcquet aussy labourier demourant audict Auberch me doibvent par ensamble et chascun pour le tout pour raison de aultre complaincte de simple saisine par eulx recongne audict conseil touchant aucunes fouynnes emport de plusieurs

---

<sup>154</sup> (?)

<sup>155</sup> Folio 171r°.

grez et emprinses par eulx faictes a tort et indeuement sur les chemins et flegardz de ma seigneurie des Pummereaulx Et quant aux amendes que lesdictz Michiel Mesurolles et Parcquet me doibvent et ont este vers moy condemne par Messieurs dudict conseil es sentence et recongnissance ensievies sur lesdictes deux complainctes et proces Et laultre moictie desdictz despens du proces des grez et emprinses de la seigneurie des Pummereaulx je les laisse encoires en suspens pour en estre par moy ou mes successeurs faicte la demande et satisfaction lors que bon nous samblera Promectant moy Michiel Mesurolles susdict et moy faisant fort de tous<sup>156</sup> ceulz quilz appertiendra que desdictz despens des deux proces de complainctes cy dessus mentionez et des deux sommes cy dessus par moy paiees nen demanderons nul recouer sur les seigneur, cure margliseurs eglise corps et habitans Dauberch ne sur personne quelconque nest par le congie consentement et expresse volente dudict Seigneur de Pietre ou de ses successeurs et ce en consideration de plusieurs bonnes et raisonnables causes quy mesmement ainsy le promectre Restablissant de rechief par cestes toutes et chascunes les fouynnes et emprinses par moy faictes jusques a present audict fosse et courant deauwe appartenant audict Seigneur de Pietre pour le tout remettre en estat Promectant ne plus faire le samblable Recongnissant mesmement que la derniere fouynne et relevoison que en ay fait et la terre que je puis avoir jecte sur mon camp joinnant et confrontant ledict courant a este par le congie et licence dudict Seigneur de Pietre que luy avoie requis auparavant y attenter ladicte derniere foys Tout ce que dessus promais furnir et entretenir et congnoy estre veritable en tout et de tout point apres que le tout m'a este meurement leu du commencement de la page du blancq de cestes jusques a la fin et que jay leu et bien entendu Aussy le recongnistre a mes despens par tout ou requis seray Ce fut ainsy fait et par nous recognu et accorde le lie de juing an quinze cens soixante huict Tesmoing noz seingz icy mis Ainsy signe M. Mesurolle

Ledict Mesurolles a appointie avecq ceulx Dauberch touchant le recouvrement de ces despens / comme aussy a fait Parcquet duquel Parquet suis aussy contente pour sa portion Et quant aux amendes cy dessus mentionees et retenues en suspens en cas que ne les aye demande de mon vivant je les quicte fait par moy sousigne ce vingt et ungiesme de juing an XV c soixante dix huit Ainsy signe G. Hangouart



Congie requis au Seigneur de Pietre par Michiel Mesurolles de pouvoir relever le courant estant entre les petites Sablonnieres de Pietre et son camp lequel estoit parcidevant les grandes Sablonnieres Dauberch Et de se pouvoir ayder de la terre dudict relevement

je Michiel Mesurolles labourier demourant a Auberch<sup>157</sup> Congnoy avoir requis grace congie et licence a Guillaume Hangouart Seigneur de Pietre de pouvoir relever le fosse et courant estant entre les petites Sablonnieres de Pietre appartenans audict Seigneur et mon camp qui fut les grandes Sablonnieres et de pouvoir jecter partie de

---

<sup>156</sup> Folio 171v°.

<sup>157</sup> Folio 172r°.

la terre dudict fosse et courant sur mondict camp et ameaulx que jay plante sur ledict camp Ce que ma este accorde par ledict Seigneur de Pietre a condition de ne amoindrir en riens le lez et coste desdictes petites Sablonnieres ains de y parer seulement en planiant et de jecter partie de ladicte terre et relevement sur les bordz desdictes petites Sablonnieres pour iceulx amender et remplir toutes les vallees quy y sont Ce que jay promis faire et ainsy moy reigler et le faire a ceste arriere saison prochaine Tesmoing mon seing cy mis le XXIe jour daoust an quinze cens soixante dix avecq ceulx de Charles Mesurolles mon frere et Guillaume de Ruys cy mis a ma requeste pour tesmoingnage et approbation de verite

Reconnoissance et restablissement fait par Pierre du Pret demourant sur Auberch de ce quil avoit fait sans le congie du Seigneur de Pietre ny de ses officiers ung ruissot et petit fosse entre les petites Sablonnieres de Pietre et les grandes Sablonnieres Dauberch audevant la maison Henry du Bacquelerot pour passer plus facilement les eauwes desoubz lequel petit ruissot et fosse le Seigneur Dauberch y a fait faire par accord verbal fait avecq le Seigneur de Pietre une buisse<sup>158</sup> de potz de potterie ou de quesne quil est tenu entretenir affin de y passer les eauwes du vray courant descendans de Auberch pierre au bois et Pummereaulx En consideration que parci devant ladicte plache de seure icelle buisse estoit parci devant tout a usage de fosse et large courant / et y avoit une planche pour passer dessus qui a este remply par Michiel Mesurolles et que ne tient que au Seigneur de Pietre de faire remettre en estat anchien selon la sentence obtenue contre ledict Mesurolles au conseil Darthois / Aussy congie donne pour ladvenir audict du Pret et aultres de faire ledict ruissot pour faire passer les eauwes dudict vray courant affin quelle puissent tousiours passer entre lesdictes deux Sablonnieres sans estre contrainte prendre leurs cours par le trou pierart et a travers le chemin de Pietre

<sup>159</sup> je Pierre du Pret labourier demourant au grand chemin Dauberch dict le chemin du mont Wacquet / Congnoy par cestes sur ce que jay de mon auctorite privee indeue et desraisonnable et sans le congie et licence de Guillaume Hangouart Seigneur de Pietre foy et fait certain petit ruissot et fosse entre les petites Sablonnieres de Pietre et les grandes Sablonnieres Dauberch audevant la maison de Henry du Bacquelerot pour faire tant plus aisement couller les eauwes du vray courant venans Dauberch, pierre au bois, des Pummereaulx, pretz louvetz et rue du mont Wacquet a travers et entre icelles Sablonnieres de Pietre et Dauberch et dillecq droict au petit Tricquenel et a Fauqhissart que ie ne ay peu et ne puis ce faire sans lepres consentement et congie dudict Seigneur de Pietre auquel appertienent lesdictz courant fossez et petites Sablonnieres et auquel courant et petites Sablonnieres nest loisible a moy ne personne quelconque picquier fouyr ne hauwer sans le congie grace et grez dudict Seigneur de Pietre a paine de soixante sols parisis damende et de reparation Parquoy congnoissant mon tort et usant de bonne foy je revoque ledict trouble et emprinse restablissant le droict dudict Seigneur et promais ne plus faire le samblable Et a cest effect congnoy avoir presentement requis audict Seigneur grace et congie de povoir a ladvenir et aux annees subsequentes faire et relever ledict ruissot et fosse pour tant plus aisement passer et couler lesdictes eauwes desdictz courrans ce que ledict Seigneur de Pietre a accorde mesmes donne chergie de povoir faire a moy et a nous jehan Hennicquo,

---

<sup>158</sup> Buisse: canalisation

<sup>159</sup> Folio 172v°.

jehan Widebien, Betro le Roy et Thonequin Beniault le jeusne sans que en puissions estre inquietez de luy ses officiers ne aultres quelcunques contre lesquelz il nous a promis garandir Ce fut ainsy recongu et fait le vingttroisiesme jour daout quinze cens soixante dix tesmoingz noz seingz cy mis



Recongnissance Henry du Bacquelerot de avoir relever sans grace le fosse estant entre les petites Sablonnieres de Pietre et ung camp de cincq mencauldees appertementz audict Henry tenues de la seignourie Dauberch Commenchant ledict fosse audevant de la maison dudict Henry quil a acquis des hoirs Antoine Descamps et venant droict au trou Pierrart et au grand chemin de Pietre

A tous ceulx qui ces presentes lettres verront jehan<sup>160</sup> Demirenault Escuier licencie es loix ad present garde du seel ordinaire estably Arras par le Roy nostre Sire pour seller et confermer les contractz marchiez et obligations quy sont faictes passees et receues en ladicte ville pays et conte Darthois entre parties salut Sachent tous que pardevant jehan de Faucompre et Martin le Watier notaires dicelluy Seigneur de par luy mis en la ville de le Bassee ad ce oyr Comparut en sa personne Henry du Bacquelerot labourier demeurant a Auberch lequel recongut comment Guillaume Hangouart escuier Seigneur de Pietre avoit toute justice haulte moienne et basse et estoit par tout ruier en sadicte seignourie de Pietre se napparisoit du contraire aiant par tout en icelle seignourie justice es flegardz, flos chemins commune riez et voiries sur lesquelz il nestoit loisible a personne entreprendre ne y fouir picquier relever ne hauwer sans le gre licence ou congie dudict Seigneur de Pietre a paine de soixante solz parisis et estre tenu en faire reparation Et a laquelle seignourie de Pietre sont deppendans certaines Sablonnieres nommees les petites Sablonnieres de Pietre entre lesquelles petites Sablonnieres et certain camp contenant environ cincq mencauldees tenues de la seignourie Dauberch appartenant icelluy camp audict Henry quil a achepte des hoirs de feu Phles du Hamel y a tousiours eu certain fosse commenchant au devant du logis et manoir dudict comparant seant audict Auberch quil a achete des hoirs de feu Anthoine Descamp et venant ledict fosse droict jusques au trou Pierrart et au grand chemin de Pietre appartenant ledict fosse du moings pour la moictie audict Seigneur de pietre Lequel fosse ledict comparant sest ingere depuis nagerres de son auctorite privee et sans le congie et gre dudict Seigneur de Pietre relever et faire relever en troublant par tant ledict Seigneur de Pietre en ses droix possessions et saisines et commectant vers luy plusieurs amendes de soixante solz parisis chascune Surquoy voeuillant ledict comparant en ce user de bonne foy, et congnoissant son tort il a revocque et par ces presentes revocque ledict trouble Promectant ne plus faire le samblable Et sy a au regard de tout ce que dessus est dict en tout et par tout et de tous pointz Recongu et par ces<sup>161</sup> presentes recongnost les droix possession et saisines dudict Seigneur de Pietre et promet jamais aller au contraire et de paier les amendes pour ce par luy encourues jusques au nombre de trois quil promet paier audict Seigneur ou son commis soubz et par lobligation de tous ses biens et heritaiges et ceulx de ses hoirs presens et futurs Renonchans a toutes choses contraires a ces presentes Tout ce

---

<sup>160</sup> Folio 173r°.

<sup>161</sup> Folio 173v°.

dessusdict nous ont lesdictz notaires tesmoingne estre vray par leurs saingz manuelz et nous a leurs tesmoingz avons mis a ces presentes lettres ledict seel ordinaire quy furent faictes et passees au chasteau dudict Pietre le quatorziesme jour du mois daout lan mil cinq cens soixante quatre



Commission contre jehan Hennicocq, jacques du Retz et jehan de le Croix en cas de nouvelle pour avoir fouy en la ruelle des Mottes a Pietre et au trou Pierrart estant de la seignourie de Pietre

Les Gouverneur President et gens du conseil Dartois Au premier huissier dudict conseil sur ce requis salut Expose nous a Guillaume Hangouart escuier Seigneur de Pietre en soy grievement complaignant tout affin de saisine et de nouvelle Que entre aultres ses biens luy compete et appertient a vray et juste tiltre a declarer plus a plain en temps et lieu ladicte terre et seignourie de Pietre en laquelle il a toute justice haulte moienne et basse avecq es flotz flegardz chemins et voirries allendroict dicelle sans que en iceulx chemins et flegardz soit loisible a aucuns picquier fouyr ou hauwer ny les deteriorer et endommagier sur paine et amende de soixante solz(barre) patars parisis applicable audict exposant et de ce ainsy joyr user est ledict exposant tant par luy que ses predecesseurs et ceulx dont il a le droict et cause en toutes bonnes possessions et saisines affirmatives negatives et mixtes par tel et sy long temps quil nest memoire du commencement ne du contraire aumoings par temps suffissant et vaillable pour bonne possession et saisine avoir acquis garder et retenir paisiblement publicquement et par les derniers ans et exploix au veu et sceu de jacques du Retz carpentier demourant a Auberch pays de flandres jehan Hennicocq et jehan de le Croix demourans soubz la chastellenie de Lille et tous aultres<sup>162</sup> que ce ont vollen veoir et scavoir Ce nonobstant les dessusnommez ou aultres a leur adveu et dont ilz ont eu le fait pour agreable se seroient ingerez et avancez depuis an et jour encha en regard a ladicte de ceste complaincte outre le gre et vollunte dudict exposant de picquier fouyr et hauwer sur et allendroict du chemin et flegard de ladicte seignourie de Pietre et y remue certaine grosse pierre de gre estant audict chemin et flegard es mettes de la seignourie dudict exposant meismement de fouyr et relever certaine longue frette estant allendroict et au commencement et embouchement de la ruelle et yssue de la maison et cense de le Mottes appartenant audict exposant et estant de sadicte seignourie de Pietre Combien que icelle frette ne servit oncques de courant ny passage deauwe et ne fut jamais a ces fins fouye ne relevee en troublant et empeschant partant ledict exposant en sesdictz droix possessions et saisines et commectant vers luy par chascun deulx amende de soixante solz parisis Requerant partant sur ce nostre provision **Pourquoy** nous vous mandons et commectons que sil vous appert de ce que dict est ou de tant que pour suffir en ce cas a la requeste dudict complaignant ou de son procureur adiournez a certain brief jour et heure que declarerez lesdictz turbateurs et aultres quil appertiendra et dont requis serez a estre et comparoir pardevant nous sur et au plus prez dudict chemin et de ladicte ruyelle et yssue pour tous lieux contemptieulx et illecq tenez maintenez et gardez de par le Roy nostre Sire et nous pour justice en sesdictz droix possessions et saisines et diceulx le faictes joyr

---

<sup>162</sup> Folio 174r°.

et user a pur et a plain en ostant tous troubles et empeschemens faitz mis ou donnez au contraire en faisant commandement ausdictz turbateurs et aultres que requis serez que incontinent et sans dilay ilz restablissent les troubles dessusdictz / Paient et gaigent lesdictes amendes Se cessent de plus faire le samblable et en cas dopposition la nouvelle ostee et la chose contensieuse desdictes parties prinse et mise en la main du Roy nostre Sire comme souverain Restablissement fait deurement prealablement donnez et assignes jour<sup>163</sup> competent aux parties lune contre lautre a estre et comparoir pardevant nous oudict conseil pour tant sur le principal que sur la recedence de la matiere respondre et proceder comme de raison Et sy lesdictz adjournez ou aucuns deulx ne comparoient pardevant vous aux jour lieu et heure que leur aurez assigne ou fussent deffailans de a vosdicts commandemens obeir et que par ce deffault fut par vous contre eulx donnez readiournez lesdicts deffailans a comparoir comme dessus pardevant nous pour ledict deffault veoir confirmer et ledict complaindant ou procureur pour luy pour ledict deffault veoir confirmer et ledict complaindant ou procureur pour luy plusapleit maintenir et garder en sesdicts droix possessions et saisines Et proceder en oultre selon raison Et pour ce que aucuns quil conviendra adjourner en ceste partie sont demourans hors des mectes de nostre jurisdiction Prions et requerons a tous seigneurs juges justiciers et officiers quil appertiendra que lesdictz adiournemens et exploix ilz leur plaise faire ou souffrir par vous estre faitz Et en ce tant faire pour nous quilz vouldroient que feissions pour eulx en pareil cas ce que ferions volontiers nous requis Et en cas quilz soient de ce faire reffussans mandons et connectons que lesdictz adiournemens et exploix faictes en parlant a leurs personnes se trouvez et apprehendez peuvent estre es mectes de nostre jurisdiction sinon et parlant a leurs procureurs parens amys facteurs entremecteurs et negociateurs de leurs besongnies et affaires ou par cry publique a la bretecque de la plus prochaine bonne ville du lieu de leur residence estant de nostredite jurisdiction affigeant aux portaulx et entrees des eglises copie de ceste commission et de vostre exploict et pardessus ce leur insinuant par samblable copie et vostre missive affin quilz nen pretendent cause dignorance tellement quil soit vray samblable que lesdictz adiournemens et exploix soient venus a leur notice et congnoissance Et lesquelz exploix faitz par la maniere que dict est seront daultel effect et valleur comme se faitz estoient a leurs personnes et vrais domicilles Et pour telz ou cas dessusdicts les avons auctorise et auctorisons en rescripvant de ce que fait<sup>164</sup> en aurez de ce faire Vous donnons pouvoir donne soubz le contreseel dudict conseil le vingtroisiesme jour de novembre quinze cens soixante deux



Recongnissance et restablissement fait par jehan de le Croix de ce que il avoit fouy en la ruyllette chemin flegard et frette estant allendroit et au commenchement de la cense des Mottes a Pietre et au trou Pierrart

Comparut en sa personne jehan de le Croix labourier demourant Auberch Lequel comparant recongnut que de ce quil avoit naguerris fait quelcques fouyne sur et a travers de certain chemin et flegard y relieve certaine longue frette estant allendroit

---

<sup>163</sup> Folio 174v°.

<sup>164</sup> Folio 175r°.

et au commencement de la ruyelle et yssue de la maison et cense des Mottes appartenant a Guillaume Hangouart escuier Seigneur de Pietre audict Auberch Combien que ladicte frette ne a jamais servy de courant ou passage deauwes et que ladicte frette a ceste fin ne a jamais este fouye ny relevee Et ce quil comparant avecq jehan Hennicoq et jacques du Retz avoient fait / pour par illecq faire passer et divertir certain courant deaue quy de tout temps avoit passe entre deulx riez nommez les grandes et petites Sablonnieres le tout au prejudice des droix possessions et saisines dudict seigneur de Pietre Icelluy comparant a revocque et par ces presentes revocque ledict trouble Promectant de ne plus faire le samblable Et sy a au regard de ce que dessus recongnu les droix possessions et saisines dudict Seigneur de Pietre Et ce quil a promis et par ces presents promect entretenir meismes ce que dessus recongnostre a ses despens pardevant les president et gens du conseil Darthois et payer portion des mises despens et amendes pour ce par luy deuz et encourruz soubz lobligation de tous ses biens et heritaiges vers tous seigneurs et justices fait et passe pardevant moy jehan Deffontaines notaire resident a Lille Presens jehan Scaudeten et Maurice Saillart clerqz demourans audict Lille tesmoingz ad ce requis et appelez le IXe jour du mois de decembre quinze cens soixante et deux Ainsy signe j. Deffontaines



<sup>165</sup>Restablissement fait par jehan Hennicoq du trouble susdict par luy commis avecq ledict de le Croix

Sachent tous presens et advenir / que pardevant moy Allard Cuvillon notaire royal resident a Lille et en la presence des tesmoingz subzscriptz Comparut en sa personne jehan Hennicot labourier demourant a Auberch Lequel comparant recongnut de ce quil avoit naguerre fait quelques fouyne sur et a travers de certain chemin et flegard y releve certaine longue frette estant allendroict et au commencement de la ruyelle et yssue de la maison et cense des Mottes appartenant a Guillaume Hangouart escuier Seigneur de Pietre audict Auberch Combien que ladicte frette ne a jamais servy de courant ou passage deauwes et que ladicte frette a ceste fin ne a jamais este fouye ny relevee Et ce quil comparant avecq jehan de le Croix et jehan du Retz avoient fait pour par illecq faire passer et divertir certain courant deaue quy de tout temps avoit passe entre deux riez nommez les grandes et petites Sablonnieres Le tout au prejudice des droix possessions et saisines dudict Seigneur de Pietre Icelluy comparant a revocque et par ces presentes revocque ledict trouble Promectant de ne plus faire le samblable Et sy a au regard de ce que dessus recongnu les droix possessions et saisines dudict Seigneur de Pietre Et ce quil a promis et par ces presentes promect entretenir meismes ce que dessus recongnostre a ses despens pardevant les president et gens du conseil Darthois et paier portions des mises despens et amendes pour ce par luy deubz et encourrus soubz lobligation de tous ses biens et heritz vers tous seigneurs et justices Ce fut ainsy fait pardevant moy notaire dessusnomme en la presence de Loys du Thoit chavetier et jehan le Turcq dems à Lille le XXIIIe jour de febvrier XV<sup>c</sup> LXII



---

<sup>165</sup> Folio 175v<sup>o</sup>.



Commission en cas de nouvellite Contre jehan Fascon bailly Dauberch jehan Parcquet et Michiel Mesurolles margliseurs de leglise dudict Auberch aians oste et emporte pluisieurs grosses pierres de gretz estans es chemins et flegardz de la seignourie des Pummereaulx laquelle commission de<sup>166</sup> nouvellite ne fut executee a raison que lan du trouble se passa sur ce que lesdictz turbateurs promettoient tousiours de reconnoistre sans y furnir Mais fut procede contre eulx par la commission de simple saine copiee ensievante ceste

**Les Gouverneur President et gens du conseil Darthois** Au premier huissier dudict conseil sur ce requis salut espose nous a Guillame Hangouart escuier Seigneur de Pietre et des pummereaulx en soy griefvement plaignant tout affin de saisine et de nouvellite Que a vray et juste tiltre a declare plus a plain en temps et lieu luy compete et appertient ladicte terre et seignourie des Pummereaulx en laquelle il a toute justice haulte moienne et basse avecq les flos flegardz chemins et voirries dicelle seignourie esquelz nest loisible a aucuns picquier fouyr ne hauwer ny prendre oster et emporter les pierres de grez y estans sans le gre congie ou licence dudict exposant sur paine et amende de soixante patars parisis a luy applicables et de ce ainsy joir et user est ledict exposant tant et luy que ses predicesseurs en toutes bonnes possessions et saisines affirmatives negatives et mixtes paisiblement publicquement et par les derniers ans et exploix Au veu et sceu de jehan Fascon lieutenant Dauberch, jehan Parcquet, Michiel Mesurolles et aultres manegliers et entremecteurs des ouvraiges de leglise dudict Auberch et tous aultres quy ce avoient vollu veoir et scavoir Se nonobstant les dessus nommez ou aultres a leur adveu et dont ilz ont le faict pour agreable se sont ingerez depuis an et jour encha en regard a la dacte de ceste complaincte de prendre oster et lever pluisieurs grosses pierres estans esdictz chemins et flegardz de ladicte seignourie des Pummereaulx sans le gre congie et licence dudict exposant en le troublant et empeschant en sesdictz droix possessions et saisines et commectant vers luy amende de soixante patars parisis a tort sans cause indeuement et de nouvel / requerant sur ce nostre provision Pourquoi nous vous mandons et commectons que sil vous appert de ce que dict est ou de tant que pour suffir a la requeste dudict complainant ou de son procureur adjournez a certain brief jour et heure que declairerez lesdicts turbateurs et aultres quil appertiendra et dont requis serez a estre et<sup>167</sup> comparoir pardevant vous sur et au plus prez desdictz chemins et flegardz pour tous lieux contemptieux Et illecq tenez maintenez et gardez de par le Roy nostre Sire et nous pour justice Ledict complainant ou procureur pour luy en sesdictz droix possessions et saisines et diceulx le faicte joyr et user pur et a plain en ostant tous troubles et empeschemens faictz mis ou donnez au contraire En faisant commandement ausdictz turbateurs et aultres quil appertiendra que incontinent et sans delay ilz reestablishent les troubles dessusdicts Se cessent de plus faire le samblable Et en cas dopposition le nouvellite ostee et la chose contensieuse desdictes parties prinse et mise en la main du Roy nostre Sire comme souverain reestablishement faict prealablement assignez jour competent aux parties lune contre lautre a comparoir pardevant nous oudict conseil

---

<sup>166</sup> Folio 176r°.

<sup>167</sup> Folio 176v°.

pour tant sur le principal que sur la recedence de la matiere respondre et proceder comme de raison Et sy lesdictz adiournez ou aulcuns deulx ne comparoient pardevant vous aux jour lieu et heure que leur aurez assigne ou fussent deffaillans de a vosdicts commandemens obeyr Et que par ce deffault fut par vous contre eulx donne readjournez lesdictz deffaillans a comparoir comme dessus pardevant nous pour ledict deffault veoir confirmer et ledict complaindant ou procureur pour luy plusamment maintenir et garder en sesdicts droix possessions et saisines et proceder en oultre selon raison et pour ce que lon dict aulcuns quy sera besoing adjourne en ceste partie estre demourans hors des mectes de nostre jurisdiction Prions et requerons en ayde de droict a tous seigneurs juges justiciers et officiers quil appartiendra que lesdictz adiournemens et explois ilz leur plaise faire ferre ou souffrir par vous estre faitz Et en ce tant faire pour nous quilz vouldroient que feissions pour eulx ce que ferions volluntiers nous requis Et en cas quilz soient de ce faire reffusans faictes les adjournemens dessusdictz en parlant a leurs personnes se trouvez et apprehendez poeuvent estre es mectes de nostre jurisdiction sinon en parlant a leurs procureurs parens amys facteurs negociateurs et entremecteurs de leurs besoignes et affaires ou par cry publicque a la bretecque de la plus prochaine bonne ville du lieu de leur<sup>168</sup> residence estant de nostre jurisdiction Affigeant aux portaulx de leglise copie de ceste commission et de vostre exploit Et pardessus ce leur insignuant par samblable copie et de vostre missive affin quilz nen pretendent cause dignorance tellement quil soit vray samblable que lesdicts adiournemens et explois soient venus a leur notice et congnoissance Et lesquelz explois faitz par la maniere que dict est seront dautel effect et valleur comme se faitz estoient a leurs personnes ou vrais domicilles Et pour telz ou cas dessusdicts les avons auctorise et auctorisons en rescripvant de ce que fait en aurez de ce faire vous donnons pouvoir donne soubz le contreseel dudict conseil le vingt quatriesme jour de novembre quinze cens soixante deux



Commission en cas de simple saisine executee contre jehan Parquet et Michiel Mesurolles margliseurs de leglise Dauberch pour les emportz de gretz et troubles par eulx commis en la seigneurie des Pummereaulx

Les Gouverneur President et gens du conseil Dartois au premier huissier dudict conseil sur ce requis salut De la partie de Guillaume Hangouart Seigneur de Pietre et des Pummereaulx nous a este expose en soy complainant tout affin de simple saisine disant que a vray et juste tiltre a declare en temps et lieu Luy compete et appartient ladicte terre et seigneurie des Pummereaulx en tous droix perminence<sup>169</sup> amendes et aultres choses par indivis allencontre des prevost doyen et chappitre de Saint Ame en Douay En laquelle il a toute seigneurie haulte moienne et basse avecq les flos flegardz chemins et voeries allencontre desdictz Seigneurs de chappitre En laquelle nest loisible a aulcuns picquier hauwer ny prendre oster et emporter les pierres de grez y estans sans son gre congie ou licence sur paine et amende de soixante solz parisis De laquelle luy appartient la moictie contre lesdictz de St Ame Et de ce ainsy joyr et posséder sans ce que aulcuns quelz quilz soient

---

<sup>168</sup> Folio 177r°.

<sup>169</sup> Perminence: (?)

luy puissent faire quelque trouble et empeschement ne faire<sup>170</sup> entreprinse sur ladicte seigneurie en quelconque maniere que ce soit est en toute bonne possession et saisine affirmative negative et mixte Desquelles et de toutes possessions pertinentes a ladicte matiere a declarer comme dessus il a joy et possesse par temps suffisant et vaillable pour bonne possession et saisine avoir acquis garder et retenir paisiblement et publicquement au veu et sceu de Jehan Parcquet et Michiel Mesurrolles eulx disans margliseurs de leglise Doberch et de tous aultres quy ce ont voutu veoir et scavoir ce nonobstant les dessusnommez ou aultres a leur adveu dont ilz ont eu le fait pour agreable se sont ingerez et avancez en lannee quinze cens soixante et ung ou soixante deux signamment depuis dix ans encha ou regard a la dacte de ceste complaincte de prendre oster et lever plusieurs grosses pierres estans esdictz chemins et flegardz de ladicte seigneurie des Pummereaulx sans son gre congie ou licence Et en ce faisant picquie et fouy sur lesdictz chemins et voiries en le troublant et empeschant en sesdictz droix possessions et saisines en commectant amende de soixante sols parisis de laquelle luy en appartient la moictie allencontre desdictz de chappitre Lesquelz troubles et empeschemens ilz nont voutu reparer reintegrer et restablir ny paier ladicte amende a tort et sans cause requerant sur ce nostre provision **Pourquoy nous vous mandons** et commectons que a la requeste dudict complainant ou de son procureur faictes expres commandemens de par le Roy nostre Sire et nous pour justice ausdictz turbateurs et aultres quil appartiendra et dont requis serez que incontinent et sans delay ilz aient a remectre et garder ledict exposant en sesdictz droix possessions et saisines et que doresnavant ilz le laissent diceulx joyr user et posseder meismes quilz reparent les troubles dessusdicts paient et gaigent ladicte amende Se cessent de plus faire le samblable ne plus troubler ledict complainant en aucune maniere Et en cas dopposition donnez et assignez jour competent aux opposans a estre et comparoir pardevant nous audict conseil pour dire leurs causes dopposition et en outre respondre et proceder comme de raison en rescripvant de ce que fait en aurez<sup>171</sup> ce faire vous donnons pouvoir donne soubz le contreseel dudict conseil le treisiesme de novembre quinze cens soixante trois Soubz signe Hapiot



Requisition du conseil Dartois pour mettre la susdicte commission a execution contre les turbateurs demourans hors Dartois

Les Gouverneur president et gens du conseil Darthois Au premier huissier dudict conseil sur ce requis salut Veue la commission de nous donnee parmy laquelle ceste est infixee et entendu que les turbateurs y denommez sont demourans hors des mectes de nostre jurisdiction Requerons tous seigneurs et juges quil appartiendra que les commandemens adjournemens et exploix mentionnez en ladicte commission ilz vous soeuffrent faire en leur mectes ou les facent faire par leurs officiers Et en ce tant faire pour nous quilz vouldroient que feissions pour eulx ce que ferions volentiers en pareil cas requis Et de ce leur plaise rescriptre et vous meismes huissier rescripvez de ce que fait en aurez de ce faire Vous donnons pouvoir donne

---

<sup>170</sup> Folio 177v°.

<sup>171</sup> Folio 178r°.

soubz le contreseel dudict conseil le vingtiesme de novembre quinze cens soixante trois Signe Hapiot



Rellation de lhuissier aiant mis a execution ladicte commission

A mes treshonnorez seigneurs messieurs les gouverneur President et gens du conseil Darthois Noel Creton huissier dudict conseil le vostre en tout plaise vous scavoir que a la requeste de Guillaume Hangouart escuier Seigneur de Pietre et des Pummereaux impetrant de la commission de reintegrande et attache contenant clause de requisition de vous donnee au marge desquelz cest ma rellation est attache le septiesme jour de janvier quinze cens soixante trois me suis transporte en la paroisse Dauberch aux domiciles de jehan Parquet et Michiel Mesurolles<sup>172</sup> Ausquelz parlant a leurs personnes apres assistance a moy octroie et en la presence de Henry Meurin et jehan Belle sergeans tesmoingz par moy evocquiez feis expres commandemens de par le Roy nostre Sire et vous mesdicts seigneurs pour justice que incontinent et sans delay ilz aient a remectre et garder ledict exposant en ses droix possessions et saisines et le laissent diceulx joyr et user mesmes repare les troubles paient et gaigent les amendes et cessent de plus faire le samblable Et pour iceulx commandemens veoir decreter leur auroie donne et assigne jour a comparoir pardevant vous mesdictz seigneurs aux plais du mardy dix huictiesme jour dudict mois et y proceder selon raison Mesdictz seigneurs ce que dessus certiffie estre vray soubz mon saing cy mis les jour et an dessusdicts Soubz signe N Creton

---

<sup>172</sup> Folio 178v<sup>o</sup>.

Reconnoissance faite par jehan Parcquet et Michiel Mesurolles gliseurs Dauberch tant en leur nom privez que comme gliseurs / et aultres que il nest loisible picquier fouyr oster gretz ne entreprendre sur la seignourie des Pummereaulx rietz voies et chemins dicelle sans le gre et licence de Guillame Hangouart escuier Seigneur desdictz Pummereaulx Contenant aussy par jan Fascon bailly Dauberch Engrand de le Barre gliseurs Mahieu Vignoble, jan de le Barre et Pierre Screve jointtz audict proces

**Les Gouverneur President et gens du Conseil** provincial Darthois A tous ceulx qui ces presentes lettres verront salut comme Guillaume Hangouart Seigneur de Pietre et des Pummereaulx eust puis naguerrres obtenu nostre commission de complaincte en cas de simple saisine Narree que a vraye et juste tiltre luy competoit et appartenoit ladicte terre et seignourie des Pummereaulx en tous droix proeminences amendes et aultres choses par indivis allencontre des prevost doyen et chappitre de Saint Ame en Douay En laquelle il avoit toute seignourie haulte moienne<sup>173</sup> et basse avecq les flotz flegardz chemins et voiries alencontre desdict de chappitre en laquelle nestoit loisible a aulcuns picquier fouyr hauwer ny prendre ny emporter les pierres de gretz y estans sans son gre congie ou licence sur paine et amende de soixante solz parisis De laquelle luy appartenoit la moictie contre lesdicts de Saint Ame Et de ce ainsy joir user et posséder sans ce que aulcuns quelz quilz fussent luy puissent faire quelque trouble et empeschement ne faire entreprinse sur ladicte seignourie en quelconcque maniere que ce fut estoit en toute bonne possession et saisine affirmative negative et mixte Desquelles et de toutes possession pertinentes a ladicte matiere il avoit joy et possesse par temps suffissantz et vaillable pour bonne possession et saisine avoir acquis garder et retenir paisiblement et publiquement au veu et sceu de jan Parcquet et Michiel Mesurolle eulx disant manegliers de leglise Dauberch et de tous aultres quy ce avoient voulu veoir et scavoir ce nonobstant lesdicts jehan Parcquet et Michiel Mesurolle ou aultres a leur adveu dont il avoient eu le fait pour agreable sestoient ingeres et advanchies en lannee quinze cens soixante et ung ou soixante deux signament depuis dix ans encha en regard au treiziesme jour de novembre quinze cens soixante trois dacte de ladicte complaincte de prendre oster et lever plusieurs grosses pierres estantz esdictz chemins et flegardz de ladicte seignourie des Pummereaulx sans son gre congie ou licence Et en ce faisant picquie et fouy sur lesdictz chemins et voiries en le troublant et empeschant en sedictz droictz possessions et saisines et commectant amende de soixante solz parisis de laquelle luy en appartenoit la moictie allencontre desdictz de chappitre de Saint Ame Lesquelz troubles ilz navoient volu reparer reintegrer et restablir ny payer ladicte amende a tort et sans cause pour de quoy estre repare ledict demandeur auroit obtenu nostre commission de complaincte oudict cas de simple saisine narree de ce que dessus et par certain huissier dudict conseil la fait mettre a execution selon ses termes allencontre desdicts jehan Parcquet et Michiel Mesurolle<sup>174</sup> Ausquelz pour l'opposition par eulx y cree jour aueroit este assigne pardevant nous aux plaix y tenus le dixhuictiesme jour de janvier que lors de la part dudict demandeur par Me Jacques du Boys advocat pour Mahieu du Crocq son procureur aueroit este conclud affin destre remis maintenu et garde esdictz droix possessions et saisines tant pour le

---

<sup>173</sup> Folio 179r°.

<sup>174</sup> Folio 179v°.

droict que amende et que lesdicts deffendeurs fussent condempnez a reparer ledict trouble et es despens Surquoy lesdictz deffendeurs seroient entrez en deffences et en ladicte cause inssievies pluisieurs procedures pendant lesquelz Robert de Penin procureur de Mahieu Vignoble, Pierre Screve et jehan de le Barre dems en la paroisse Dauberch tant en leurs noms privez que comme tutteurs commis par justice aux enfans mineure de feu Pierre Hayart et Anthoine Vignoble se seroit jointct avecq lesdictz deffendeurs Et aians lesdictes parties sieuvant nostre ordonnance servy de leurs faitz et moiens par escript en forme de memoires et estans reiglees a veriffier et lesdictz deffendeurs et jointctz adjournez a la requeste dudict demandeur audict VIIe jour de ce present mois a comparoir pardevant nostre bien ayme Me Baptiste du Mont Saint Eloy Conseiller oudict conseil Commissaire par nous delegue pour faire lenqueste dudict demandeur pour veoir jurer tesmoingz seroient comparuz personnellement pardevant ledict commissaire lesdictz Pierre Screve, Mahieu Vignoble et jehan de le Barre jointctz, lesquelz auroient declare quilz navoient vullu et ne volloient advouer en quelque qualite que ce fut ledict trouble Ains confessoient quil nestoit loisible a personne sans le gre et consentement dudict demandeur a cause de sadicte seignourie des Pummereaulx de prendre oster ou lever aulcunes pierres ou grez estans es chemins et flegardz de ladicte seignourie des Pummereaulx a paine de soixante solz parisis damende et duquel droict ilz confessoient ledict demandeur estre en bonne possession et saissine Declarant outre quilz ne setoient jointctz oudictz proces pour lempport desdictz gretz et troubles cy desoubz desingnies Ains seulement pour ce que lesdicts Mesurolles et Parcquet deffendeurs leur auroient donne a entendre que ledict demandeur les volloit empescher de planter sur le front estans alendroit de leurs heritaiges Sy seroient aussy ledict jour comparus pardevant ledict commissaire jehan Fascon bailly dudict Auberch et Engrand de le Barre labourier demourant audict<sup>175</sup> lieu Lesquelz auroient pareillement declarez quilz ne avoient advoue et ne volloient advouer tant en leurs noms privez que comme ayant ladministration de leglise dudict Auberch lempport et transport des pierres de gretz faitz sur ledict flegard par adveu desdicts Mesurolles et Parcquet Declarant outre que Damoiselle Adrienne de Noielle Damoiselle Dantignoeul administratresse des biens du Seigneur dudict Auberch son frere leur avoit pluisieurs foys dict quilz euissent a reconnoistre les droix dudict demandeur cy dessus mentionne Et au regard desdicts Michiel Mesurolle et jehan Parcquet deffendeurs ilz y seroient samblablement comparus pardevant ledict Seigneur commissaire Asscavoir ledict Mesurolle ledict septiesme daoust Et ledict Parcquet le jourdhuy dacte de cestes Lesquelz auroient respectivement declare que nullement ilz ne volloient soustenir ledict proces contre ledict Seigneur demandeur a cause du transport desdicts grez oster par leur charge comme manegliers et ladicte eglise Dauberch sur le chemin et flegard de ladicte seignourie des Pummereaulx appertenant audict demandeur luy accordant en leur regard conclusions adjugie tant pour le droict que amende Consentans aussy estre condempnez es despens Ce que icelluy demandeur en personne auroit accepte selon que par le proces verbal dudict Seigneur commissaire estoit et est plusaplain contenu Scavoir faisons que veues lesdictes reconnoissances et acceptations Avons ledict demandeur remis maintenu et garde remectons maintenons et gardons de par le Roy nostre Sire et nous pour justice es droix et possessions cy dessus baptisees Luy adjugeant au surplus ses conclusions cy dessus Et condempnant ledict Michiel Mesurolle et jehan Parcquet es despens a nostre taxation En tesmoing de ce nous avons fait mettre le seel dudict

---

<sup>175</sup> Folio 180r°.

conseil a ces presentes Qui furent faictes et donnees oudict conseil le huitiesme jour daoust quinze cens soixante quatre



Commission requisitoire du conseil Darthois pour adiourner jehan Parquet et Michiel Mesurolle pour veoir taxer les despens dudict proces auquel ilz ont passe condemnation et recongnu les droix de la Seignourie des Pummereaulx avecq auctorisation du conseil de povoir par huissier faire ledict adjournement par attache et cry publicq et signification par lettres ausdicts condemnez ou a leurs amys en cas que ilz soient demourans hors Darthois

<sup>176</sup>Les Gouverneur President et gens du conseil Darthois Au premier huissier dudict conseil sur ce requis salut Nous vous mandons et commectons que a la requeste de Guillaume Hangouart Seigneur de Pietre des Pummereaulx etc ou de son procureur adjournez a jour competent a estre et comparoir pardevant nous oudict conseil Michiel Mesurolle et jehan Parquet demourant en la paroisse Dauberch Pour respondre a la demande de plusieurs coustz frays et despens esquelz par nostre sentence ilz ont este condempnez envers ledict impetrant A raison de certain proces contre eulx illecq intempte par ledict demandeur sur complaincte en cas de simple saisine Auquel apres plusieurs procedures Lesdictz deffendeurs auroient accorde audict Seigneur de Pietre ses conclusions adjugees avecq condemnation desdictz despens Et oultre respondre a telz fins demandes et conclusions que ledict impetrant voldra au jour servant contre eulx prendre et eslire et proceder en oultre comme de raison Et pour ce que lesdicts Mesurolle et Parquet sont demourans hors des metes de nostre jurisdiction Prions et requérons a tous seigneurs juges justiciers et officiers que lesdictz adjournemens soeuffrent par vous estre faictz comme ferions pour eulx sy de leur part requis en estions Et ou de ce faire ilz seroient refusans faictes lesdictz adjournemens en parlant a leurs personnes sy trouver et apprehender les povez es metes de nostre jurisdiction sinon en parlant a leurs procureurs negociateurs et entremecteurs de leurs besongnes et affaires Ou par cry publicque a la bretecque de la plus prochaine bonne ville du lieu de leur residence estant de nostre jurisdiction Affigeant aux portaulx de leglise coppie de ceste commission et vostre exploict et pardessus ce luy insinuant par samblable coppie et vostre missive affin quilz ne pretendent cause dignorance Tellement quil soit vray samblable que lesdictz adjournemens soient venus a leur congnoissance et notice lesquelz exploix faictz par la maniere dicte soient daultel effect et valleur comme sy fais estoient a leurs personnes ou vray domicile et pour tel ou cas dessusdict les avons auctorize et auctorisons par ces presentes en rescripvant de ce que fait en aurez de ce faire vous donnons povoir donne soubz le contre seel dudict conseil le XXVIIe jour doctobre XV<sup>c</sup> soixante cincq



---

<sup>176</sup> Folio 180v<sup>o</sup>.

<sup>177</sup>Commission de commendementz contre jehan Preudhomme Seigneur du Creux pour avoir fouy et fait ung fosse ——— au chemin de la seigneurie des Pummereaulx et y plante plantes outre le front et contre Martin Hennart Cochet et le Febvre pour avoir fait des bersaulx au riet sans le congie de Guillaume Hangouart escuier Seigneur des Pummereaulx Laquelle commission na este mise a execution ains y a este precede par la commission ensieuvant ceste

**Les Gouverneur President et Gens du Conseil Darthois** Au premier huissier dudict conseil sur ce requis salut de la partie de Guillaume Hangouart escuier Sr de Pietre des Pummereaulx etc nous a este expose disant que a luy compete et appartient ladicte terre et Sgrie des Pummereaulx par indivis allencontre de chappitre de Saint Ame en Douay En laquelle il a toute justice haulte moienne et basse amendes de soixante solz parisis et aultres en dessoubz et par-dessus desquelles en appartient la moictie ausdictz de Saint Ame allencontre de luy / Laquelle seigneurie se consiste entre aultres choses en certain riez nomme le riez du joncqouy Auquel ny es rues flotz flegardz ny ailleurs ne nulz quelz quilz soient ne poeuvent picquier fouyr hauwer faire berseaux prendre wasons<sup>178</sup> de terres ny aultres choses pour faire et besongnier ausdictz berseaulx ny planter arbres en aultres lieux que ceulx accoustumez ny pareillement y faire aucune chose tant pour faire fossez reiect diceulx comme aultres choses quelconques le tout sans son gre congie ou licence A paine de soixante solz parisis damende pour chascune fois quon feroit le contraire des choses dictes ou aulcunes dicelles a aplicquier comme dict est et de reparer tous les troubles quelzconques quon auroit fait es lieux et tout ce que dict est es mettes de la comprehension de ladicte seigneurie Or il est que Pierre Cochet Anthoine le Febvre Martin Hennart et jehan Preudhomme escuier Seigneur du Creux ou aultres a leur adveu dont ilz ont eu le fait pour agreable se sont ingerez et<sup>179</sup> advanchiez de leur auctorite prive indeue et desraisonnable et sans le congie et licence dudict Seigneur exposant de faire les troubles et choses cy apres declarees en enprenant sur lauctorite dicelle seigneurie et dudict exposant Asscavoir lesdictz Cochet le Febvre et Hennart davoir picquie fouy fait berseaulx prins wasons et terre et desrachine plusieurs plantes dherbes sur ledict riez par divers fois jusques au nombre de douze journees saulf juste estimation en commettant pour chascune fois amende de soixante solz parisis Item ledict Preudhomme auroit plante ou fait plante jusques au nombre de seize plantes dormeaulx ou aultres especes darbres fort avant sur les chemins et flegardz de ladicte seigneurie des Pummereaulx beaucoup outre le front auquel ses heritaiges tenus de ladicte seigneurie abordent ausdictz chemins Et icelles plantes assizes mises et plantees sy prez des cauchies publiques servantes pour aller au riez / au puich des Pummereaulx a leglise et ailleurs / Que pour le present ladicte cauchie et le passage de pied en sont rendus fort incomodes et mal ayses et seront davantaige lors que lesdictes plantes seront devenues par accroissement de temps plus grosses le tout a lempirement desdictz chemins et cauchie tant pour le present que advenir en commectant pour avoir ce fait seize amendes chascune de soixante solz parisis Item a ledict Preudhomme en aultre endroit Asscavoir au chemin menant du riez pardevant sa maison a Lorgies a le Bassee et ailleurs plante plusieurs plantes outre

---

<sup>177</sup> Folio 181r°.

<sup>178</sup> Wason: motte de terre.

<sup>179</sup> Folio 181v°.



les plantes quil avoit environ depuis cinq a six ans encha mis et plante sur le front dudict chemin Et en ce faisant plante double rancque et consegnement faict sur lesdictz chemins plusieurs diverses fouynes fossez trauees et emprinses commectant douze aultres amendes aussy chascune de soixante solz parisis saulf juste extimation Item est encoires ledict Preudhomme ingere depuis le temps que dict est de faire entre son gardin et lieu quil tient dudict Seigneur de Pietre et entre le chemin publicq menant dudict riez du jonquoy a Lorgies et au puich dudict des Pummereaulx certain nouveau fosse depuis et commenchant a la porte de sondict heritaige et allant jusques audict riez / et en ce faisant fouyr en aulcun endroit sur ledict chemin et flegard publicque et prins quelque portion dicelluy et laplicque audict fosse Aussy dessus<sup>180</sup> et remue toute la cauchie publicque et grez quy estoient<sup>181</sup> sur ledict chemin et flegard et iceulx jectes au mittant dudict chemin et ailleurs commectant pour ce deux amendes aussy chascune de soixante solz parisis Item sy a ledict Preudhomme releve tout le chemin fond de la moictie de certains flos et fosse estant entre sondict gardin et icelluy riez et faict iecter tous les brays et relevement dudict plain fond sur sondict gardin Combien que ledict fosse brays et relevement dicelluy ne luy appertienent pour plus que la moictie et laultre moictie est de la comprehension dudict riez Quainsy soit toutes et quantes fois quil a este releve tous les brays du plain font dicelluy ont este entierement jectees sur ledict riez dumoins la moictie et emploie a la fumure des plantins que les Seigneurs dudict es Pummereaulx ont parcidavant accorde estre plantes tant sur le front bord et rive dudict fosse que sur tous les aultres fontz dudict riez au prouffict de la charite des pauvres dicelle seignourie des Pummereaulx moiennat certaine redevanche annuelle et perpetuelle que lon paie chascun an auxdictz Seigneurs de Saint Ame et audict exposant en lacquict dicelle charite pour la reconnoissance dudict octroy et permission de laquelle charite biens et droit dicelle ledict exposant est principal administrateur Davantaige auroit icelluy Preudhomme depuis deux ans encha espinchie certain plouplier montant appertenant a ladicte charite et croissant sur icelluy riez sur le front allendroit de certaine pieche de terre a labour que ledict Preudhomme a illecq abordant pretendant par ce moien aprehender a luy Ledict pouplier sans le gre et congie dudict Seigneur commectant pour lesditz derniers troubles trois amendes chascune de soixante solz parisis Tous iceulx troubles et choses dictes faictes depuis dix huict ans encha Lesquelz troubles entreprinses et choses dictes les turbateurs dessusnommez nont vollen reparer reintegrer et reconnoistre que a tort ilz avoient ce faict et quilz ne le pooient faire sans le congie expres dudict exposant et sy ont este aussy refusans delay ans et en demeure de paier icelles amendes pour les distribuer et en faire paiement selon que dict est dessus a tort et sans cause au grand prejudice diceluy exposant et plus sera sans sur ce avoir provision requerant icelle attendu ladicte jurisdiction par indivis entre ledict exposant<sup>182</sup> et lesdictz de Saint Ame en Douay dont sommes gardiens

**Pourquoy nous vous** mandons et commandons que a la requeste dudict exposant faictes expres commandement ausdictz turbateurs et chascun deulx quilz aient incontinent et sans delay a reparer lesdictz troubles et passer condamnation quilz ne povoient ne debvoient ce faire sans lexpres consentement dudict Seigneur de Pietre Avecq ce quilz aient a paier toutes lesdictes amendes de soixante solz parisis pour les appliquer comme dessus Sy cessent doresnavant de plus faire le

---

<sup>180</sup> Dessis : démolis.

<sup>181</sup> Folio 182r°.

<sup>182</sup> Folio 182v°.

samblable a paine desdictes amendes et de reparer les troubles que lon feroit Et en cas d'opposition refus ou delay donnez et assignez jour compectant aux opposans refusans et delaians a comparoir audict conseil pour dire leurs causes d'opposition et proceder en oultre selon raison Et pour ce que aucuns des dessusnommez sont demourantz hors les mectes de nostre jurisdiction Requerons a tous seigneurs et juges que lesdictz exploitz vous seuffrent faire en leurs mectes en faveur et ayde de droict Et sy de ce faire sont reffusans faictes iceulx exploitz en parlant a leurs personnes se trouvez et apprehendez poeuvent estre es mectes de nostre jurisdiction Sinon a leurs procureurs parens amys facteurs negociateurs et entremecteurs de leurs besoingnes et affaire Ou par cry publicque a la bretecque de la plus prochaine bonne ville du lieu de leur residence estant de nostre jurisdiction Affigiant aux portaulx de leglise copie de ceste commission et de vostre exploit pardessus ce leur insignuant par samblable copie et vostre missive affin quilz nen pretendent cause dignorance tellement quil soit vray samblable que lesdictz adiournemens et exploix soient venus a leur notice et congnoissance Et lesquelz exploix faictz par la maniere que dict est seront daultre effect et valleur comme se faictz estoient a leurs personnes ou vrays domicilles et pour telz ou cas dessusdict les avons auctorise et auctorisons en rescripvant de ce que fait en auez de ce faire Vous donnons pouvoir donne soubz le contreseel dudict conseil le vingt et ungesime de novembre quinze cens soixante et quatre



<sup>183</sup>Commission de commandemens executee contre Martin Hennart Anthoine le Febvre et Pierre Cochet aians fouy prins wazons et fait des berseaulx sur le riet des Pummereaulx et contre Jehan le Preudhomme Seigneur du Creux aiant fouy sur les flegardz et y plante en ladicte Sgrie des Pummereaulx des arbres sur le front plus avant quil nappertenoit

**Les gouverneur President et gens du Conseil Dartois** Au premier huissier dudict conseil sur ce requis salut De la partie de Guillaume Hangouart escuier Seigneur de Pietre des Pummereaulx etc nous a este expose disant que a luy compete et appartient ladicte terre et seigneurie des Pummereaulx par indivis allencontre de chappitre Saint Ame en Douay En laquelle il a toute justice haultre moienne et basse amendes de soixante solz parisis et aultres endessoubz et pardessus Desquelles en appartient la moictie ausdicts de St Ame allencontre de luy Laquelle seigneurie se consiste entre aultres choses en certain riez nomme le riet du joncqouy Auquel ny es rues flolz flegardz ny aillieurs nulz quelz quilz soient ne peuvent picquier fouyr hauwer faire berseaulx prendre wasons de terres ny aultres choses pour faire et besoingnier ausdicts berseaux / ny planter arbres en aultres lieux que ceulx accoustumez, ny pareillement y faire aucune chose tant pour faire fossez reiect diceulx et aultres choses quelconques le tout sans son gre congie ou licence a paine de soixante solz parisis damende pour chascune foys que feroit le contraire des choses dictes ou aucunes dicelles a applicquier comme dict est et de reparer tous les troubles quelconques quon aueroit fait es lieux et tout ce que dict

---

<sup>183</sup> Folio 183r°.

est es mettes de la comprehension de la dicte seigneurie Or est il que Pierre Cochet Anthoine le Febvre Martin Hennart et Jehan Preudhomme esquier Sr du Creux ou aultres a leur adveu dont ilz ont eu le fait pour agreable se sont ingerez et avancez de leur auctorite privee indeue et desraisonnable et sans le congie ou licence dudict Seigneur expossant de faire les troubles et choses apres declarees en enprendant sur lauctorite dicelle seigneurie et dudict exposant Asscavoir lesdictz<sup>184</sup> Cochet le Febvre et Hennart davoit picquie fouy fait berseaux prins wasons de terres et derachine plusieurs plantes dherbes sur ledict riet par diverses foys jusques au nombre de six journees sauf juste estimation en commectant pour chascune foys amende de soixante solz parisis Item ledict Preudhomme aueroit plante ou fait plante jusques au nombre de vingt trois plantes de omeaulx ou aultres especes darbres fort avant sur les chemins et flegardz de ladicte Sgrie des Pummereaulx beaucoup outre le front auquel ses heritaiges tenus de ladicte seigneurie abordent ausdicts chemins Et icelles plantes assises mises et plantees sy pres des chauchies publiques servantes pour aller du riet au puich des Pummereaulx a leglise et ailleurs Que pour le present ladicte cauchie et le passage de pied en sont rendus fort incommodés et mal aises et seront davantage lors que lesdictes plantes seront devenues par accroissement de temps plus grosses Le tout a lempirement desdictz chemins passages et cauchie tant pour le present que advenir en commectant pour avoir ce fait vingt trois amendes chascunes de soixante solz parisis sauf juste estimation Item sy a ledict Preudhomme en aultre endroit Asscavoir au chemin menant du riet par devant sa maison et Pierre Screve audict puich des Pummereaux a la Bassee et ailleurs encoires plante le nombre de vingt aultres plantes de omeaux ou aultres especes darbres fort avant sur lesdictz flegardz et chemins beaucoup outre le front auquel ses heritaiges tenus de ladicte seigneurie abordent ausdictz chemins Et en ce faisant fait sur lesdictz chemins plusieurs diverses fouynes fossez trauees et emprinses commectant vingt aultres amendes aussy chascune de soixante solz parisis sauf en tout juste estimation Tous iceulx troubles et choses dictes faites depuis dix huit ans encha Lesquelz troubles emprinses et choses dictes les turbateurs dessusnommez nont voutu reparer reintegrer et recongnoistre que a tort ilz avoient ce fait et quilz ne le pouvoient faire sans le congie expres dudict exposant Et sy ont este aussy reffusans delaians et en demeure de paier icelles amendes pour les distribuer et en faire paiement selon que dict est dessus a tort et sans cause au grand preiudice dicelluy exposant et plus sera sans sur ce avoir provision Requerant icelle<sup>185</sup> attendu Ladicte jurisdiction par indivis entre ledict exposant et lesdictz de Saint Ame en Douay dont sommes gardiens **Pourquoy NOUS** vous mandons et commectons que a la requeste dudict exposant ou de son procureur faites expres commandement ausdictz turbateurs et chascun quilz aient incontinent et sans delay a reparer lesdictz troubles et passer condamnation quilz ne pouvoient ne devoient ce faire sans lepres consentement dudict impetrant Avecq ce quilz aient a paier toutes lesdictes amendes de soixante solz parisis pour les applicquier que dessus Sy cessent doresnavant de plus faire le samblable a payne desdictes amendes et de reparer lesdictz troubles et en cas dopposition reffus ou delay donnez et assignez jour competent aux opposans reffusans et delaians a comparoir oudict conseil pour direz leurs causes dopposition Et proceder en outre selon raison Et pour ce que les dessusnommez sont demourans hors des mectes de nostre jurisdiction requerons a tous seigneurs et juges que lesditz exploix vous

---

<sup>184</sup> Folio 183v°.

<sup>185</sup> Folio 184r°.

soeuffrent faire en leurs mectes en faveur et ayde de droit Et sy de ce faire sont reffusans faictes iceulx exploix en parlant a leurs personnes se trouvez et apprehendez peuvent estre es mectes de nostre jurisdiction Sy non a leurs procureurs parens amys facteurs negociateurs et entremecteurs de leurs besoingnes et affaires Ou par cry publicque a la bretecque de la plus prochaine bonne ville du lieu de leur residence estant de nostre jurisdiction Affigiant aux portaulx de leglise copie de ceste commission et de vostre exploict par dessus ce leur insignuant par samblable copie et vostre missive Affin que nen pretendent cause dignorance tellement quil soit vray samblable que lesdictz adjournemens et exploix soient venus a leur notice et congnoissance Et lesquelz exploix faictz par la maniere que dict est seront dautel effect et valleur comme se faictz estoient a leurs personnes ou vray domicile et pour telz ou cas dessudict les avons auctorise et auctorisons en rescripvant de ce que faicte en aurez de ce faire vous donnons pouvoir donne soubz le contre seel dudict conseil le seisiesme jour de decembre XV<sup>c</sup> soixante quatre



<sup>186</sup>Relation de ladicte commission

A mes treshonnorez Srs Messieurs les gouverneur President et gens du conseil Darthois Noel Creton huissier dudict conseil le vostre en tout honneur et reverence plaise vous scavoir que a la requeste de Guillaume Hangouart escuier Seigneur de Pietre des Pummereaulx etc impetrant de la mission de vous donnee au marge de laquelle ceste ma rellation est atachie le vingt deuxiesme jour de janvier quinze cens soixante quatre me suis transporte au hault Pumereaulx paroische Dauberch aux domicilles de Pierre Cochet Anthoine le Febvre manouvriers Martin Hennart brasseur et jehan Preudhomme escuier Seigneur du Creux Ausquelz parlant aux personnes desdictz Cochet Hennart et Preudhomme et a la femme dudict le Febvre Apres assistance par moy requise et es presences de jehan Belle sergeant de la ville de le Gorgue et George le Maieur tesmoingz par moy evocquiez feis tous et chascuns les commandemens portez par madicte commission Et ausquelz commandemens ilz et chascun deulx se seroient rendus opposans au moien de quoy leur auroie donne et assigne jour a comparoir pardevant vous mesdictz Seigneurs aux plaix du mardy sixiesme jour de febvrier enssievant pour dire leurs causes dopposition refus ou delay respondre proceder et y aller avant en la cause selon raison Treshonnorez Seigneurs ce que dessus certifie estre vray soubz mon seing icy mis le jour et an dessusdict



Recongnoissance Martin Hennart Anthoine le Febvre et Pierre Cochet touchant les droictz de la seignourie des Pummereaulx

**A tous ceulx** qui ces presentes lettres verront ou orront Rewart et Eschevins de la ville de le Bassee salut **Scavoir faisons** que aujourdhuy pardevant nous

---

<sup>186</sup> Folio 184v<sup>o</sup>.

Comparurent en leurs personnes Martin Hennart brasseur<sup>187</sup> Anthoine le Febvre et Pierre Cochet manouvriers demourans en la seigneurie des Pummereaulx paroische DAuberch / Et recongnurent chascun deulx avoir fait commis ordonne et estably et par ces presentes commettent ordonnent et etablissent leurs procureurs lung de laultre aussy jehan Buisine jehan Doresmieulx Raout Gosson Charles le Febvre Martin le Wattier jehan le Turcq

Ausquelz procureurs et a chascun deulx ou lun deulx seul et pour le tout Ilz ont donne pouvoir especial et irrevocable de pour eulx et en leurs noms comparoir pardevant messieurs le president et gens du conseil Darthois et par tout ailleurs ou mestier sera Et reconnoistre les droix possessions et saisines de Guillaume Hangouart escuier Seigneur de Pietre et de ladicte seigneurie des Pummereaulx designez et baptisez en certaine commission en forme de commandemens emanee dudict conseil / a la requeste dudict Hangouart et executee contre lesdictz comparans pour raison de ce que lesdictz comparans de leur auctorite privee indeue et deraisonnable et sans le congie gre et licence dudict Hangouart se estoient ingere et advanchiez de picquier fouyr faire berseaux prendre wason de terre et desrachiner pluisieurs plantes dherbes sur le riet de la dicte seigneurie des Pummereaulx dict le riet du joncquoy appertenant audict Seigneur mouvant et deppendant de sadicte seigneurie des Pummereaulx et ce par divers foys et journees en commectant pour chascun fois amendes de soixante solz parisis dont la moictie luy appertient allencontre de messieurs de Saint Ame en Douay Accorder que ledict Hangouart soit maintenu et garde en sesdictz droix possessions et saisines par luy baptisees par ladicte commission de commandemens tant pour le droict principal que amendes avecq condempnation dicelles amendes et despens sur lesdicts comparans au tax de la court Et ses conclusions pour ce par luy prises luy estre en tout et de tous pointz adiugees Et generalmente et especiallement de ces choses dictes et les dependences aultant faire dire accorder et aultrement besoingner comme faire et dire polroient lesdictz constituans sy en leurs personnes meismes presens y estoient ja fust il que le cas requist ou desirast mandement plus especial Promectans lesdictz comparans par leur foy et serment tenir et avoir agreable ferme et estable a tousiours tout ce que par lesdictz procureurs ou lung deulx sera en ce que<sup>188</sup> dict est et qui en deppend fait dict accorde et aultrement besongne soit contre eulx ou aultrement Meismes de paier le jugie se mestier est Soubz et par lobligation de tous leurs biens et heritaiges et ceulx de leurs hoirs presens et advenir quilz submectent et obleigent quant ad ce envers tous seigneurs et justices Renunchant comme dessus a toutes choses contraires ad ces presentes En tesmoing de ce nous avons mys a ces presentes lettres le seel aux causes dicelle ville Quy furent faictes et passees en ladicte ville de le Bassee le vingthuictiesme jour de juillet quinze cens soixante cinq pardevant Adrien Ballet et jaspert Becquet eschevins dicelle ville

Ausquelles lettres sont infixees les lettres qui sensieuent

**Les Gouverneur President et (*gens*<sup>189</sup>) du Conseil** provincial Darthois  
**A tous ceulx** qui ces presentes lettres verront salut Comme Guillaume Hangouart escuier Seigneur de Pietre des Pummereaulx etc nous eust fait exposer que a luy competoit et appertenoit la terre et seigneurie dudict Pummereaulx par indivis

---

<sup>187</sup> Folio 185r°.

<sup>188</sup> Folio 185v°.

<sup>189</sup> Le mot « Gens » a été omis sur l'original.

allencontre de Chappitre de Saint en Douay en laquelle il avoit toute justice haulte moienne et basse amendes de soixante solz parisis et aultres endesoubz et pardessus Desquelles en appartenoit la moictie ausdictz de Saint Ame Laquelle seignourie se consistoit entre aultres choses en certain riet nomme le riet du joncquoy Auquel ny es rues flotz flegardz ny ailleurs nulz quelz quilz soient ne povoient picquier fouyr hauwer faire berseaulx prendre wasons de terre ny aultres choses pour faire et besongnier ausdictz berseaulx ny planter arbres en aultres lieux que ceulx accoustumez ny pareillement y faire aucune choses tant pour faire fossez reiect diceulx et aultres choses quelconques le tout sans son gre congie ou licence A paine de soixante solz parisis damendes pour chascune fois que on feroit le contraire et de reparer les troubles Or il estoit que Pierre Cochet Anthoine le Febvre Martin Hennart et Jehan Preudhomme esquier Seigneur du Creux ou aultres a leur adveu dont ilz avoient eu le fait pour agreable se estoient ingerez et advanchiez de leur auctorite privee indeue et desraisonnable et sans congie ou licence de faire les troubles cy apres declarees en emprendant sur lauctorite dicelle seignourie et dudict impetrant Asscavoir lesdictz Cochet le Febvre et Hennart davoit picquie fouy fait berseaulx prins wasons<sup>190</sup> de terres et derachine plusieurs plantes dherbes sur ledict riez par diverses fois jusques au nombre de six journees sauf juste estimation en commectant pour chascune fois amende de soixante solz parisis Item ledict Preudhomme avoit plante ou fait planter jusques au nombre de vingt trois plantes de ommeaulx ou aultres especes darbres fort avant sur les chemins et flegardz de ladicte seignourie des Pummereaulx beaucoup outre le front auquel ses heritaiges tenus de ladicte seignourie abordent ausdictz chemins de sorte que a loccasion de ce le passage pour aller audict riet au puich dudict Pummereaulx a leglise et ailleurs en estoit fort incommode et malaise et seroit davantage lors que les arbres par succession de temps seroient en grosseur En commectant partant vingt trois amendes chascune de soixante solz parisis sauf juste estimation Sy avoit encoires ledict Preudhomme au chemin menant du riez pardevant sa maison et Pierre Screve audict puich des Pummereaulx a le Bassee et ailleurs encoires plante le nombre de vingt aultres plantes de ommeaulx ou aultres especes darbres fort avant sur lesdictz flegardz et chemins beaucoup outre le front auquel ses heritaiges tenus de ladicte seignourie abordent et en ce faisant avoit fait plusieurs fouynes fossez hauwees et emprinses commectant vingt aultres amendes aussy chascune de soixante solz parisis sauf en tout juste estimation Tous iceulx troubles avoient este fait depuis dix huit ans en regard a lintroduction de la presente poursiulte lesquelz troubles et choses dictes Lesdictz turbateurs navoient voulu reparer reintegrer et recongnoistre ny paier lesdictes amendes a tort et sans cause Au moien dequoy ledict impetrant eust obtenu nostre commission narree de ce que dessus et en vertu dicelle Par Noel Creton huissier dudict conseil fait ferre commandement ausdictz turbateurs quilz euissent incontinent et sans delay a reparer lesdictz troubles et passer condempnation quilz ne pooient et ne devoient ce faire sans lepres consentement dudict impetrant Ensemble payer lesdites amendes<sup>191</sup> Et quilz cessassent doresnavant de plus faire le samblable a paine de reparer les troubles et paier les amendes Ausquelz commandemens iceulx turbateurs se euissent rendu opposans A raison dequoy leur aueroit este assigne jour a comparoir pardevant nous oudict conseil aux plais y tenus le septiesme jour de febvrier XV<sup>c</sup> soixante quatre Que lors pour icelluy impetrant par Maistre Jacques du Bois advocat pour Mahieu du Crocq son procureur fut conclud aux fins que dessus demandant despens domaiges et

---

<sup>190</sup> Folio 186r°.

<sup>191</sup> Folio 186v°.

interestz Surquoy apres plusieurs procedures Comparant ledict Anthoine le Febvre tant en son nom que comme procureur especial desdictz Martin Hennart et Pierre Cochet / personnellement pardevant nous le jourdhuy datte de cestes euist en vertu du pouvoir especial passe pardevant eschevins de le Bassee en dacte du vingthuictiesme jour de jullet quinze cens soixante cincq Accorde audict Seigneur impetrant ses conclusions luy estre adjudgies Ensamble estre condempne a reparer les troubles payer les amendes commises en leur regard et despens quil a consenty taxer le tout sy avant que faire pavoit en vertu dudict pouvoir Ce que jehan Venant procureur dudict demandeur aueroit accepte Et au regard dudict Preudhomme Anthoine le Roux son procureur euist servy dadditions a court pendant outre ledict impetrant et Preudhomme apointement de veriffier Selon que es exploix et procedures de la court estoit et est plusaplain contenu **Scavoir faisons** que veu lesdicts accord pouvoir especial parmy lequel ces presentes sont infixees et acceptation Avons audict impetrant adjudgie et adjugeons sesdictz conclusions au regard desdicts le Febvre Hennart et Cochet les condempnant a reparer les troubles et amendes commises en leur regard et es despens a taxer comme dessus En tesmoing de ce nous avons fait mectre le seel dudict conseil a ces presentes quy furent faictes et donnees en jugement le dernier de jullet Lan mil cincq cens soixante cincq



<sup>192</sup>Attestation tenue pardevant Notaires Roiaux / Que en la seigneurie des Pummereaulx on ne peult relever fossez que a eauwe de mars Sans pouvoir parer reparer ny rendre contre et du coste des chemins flegardz bordz frontz et crestes

Comparurent en leurs personnes Grard le Roy eaige de cinquante ans, jehan le Turcq aussy eaige de cinquante ans / Pierre Screve eaige de quarante ans / Thomas Castricque eaige de trente et sept ans / jehan le Febvre eaigie de quarante ans / Martin Hayart eaigie de vingt huict ans / Thomas Bonnel eaigie de trente quatre ans / Anthoine Binault eaigie de trente ans / Mahieu Roussel eaige de cinquante trois ans et Martin Hennart filz de feu Pierre eaige de trente trois le tout ou environ tous labouriers demourans en la seigneurie des Pummereaulx paroisse Dauberch saulf ledict Mahieu resident a Lille et lesdictz Grard le Roy jehan le Turcq et Anthoine Binault en la seigneurie de Pietre / Lesquelz et chascun deulx apres serment par eulx fait es mains des notaires Roiaux soubzsignez et examinez sur les interrogatoires a eulx exhibees de la part de Guillaume Hangouart escuier Seigneur de Pietre des Pummereaulx etc Ont dict atteste et pour verite separement et concordablement ensamble afferme / quilz scevent et ont tousiours veu sur le fait des relevemens des fossez frontztantz les chemins de ladicte seigneurie Dauberch des Pummereaulx et alenviron quil est requis faire lesdictz relevemens a eauwe de mars sans quil soit loisible de reparer et rendre contre et du coste desdictz chemins flegardz bordz et frontz diceulx ne dessus lesdicts bordz frontz et crestes et que aussy sentend davoir fosse a eauwe de mars par heritiers aiantz leurs heritaiges contingue et abordantz lesdictz fossez frontantz les flegardz frontz et chemins et ainssy se doibvent reiglier Et ce scevent lesdictz attestantz par avoir demourer et

---

<sup>192</sup> Folio 187r°.

converse des leurs josne eaige esdictes seignouries / Meismes ledict Screve filz de feu jacques et Hayart aiant espouse la fille de Demiselle Marie le Gillon fille de feu jehan heritiere dheritaiges en tenus tant de leurs chiefz comme de leurs femmes et Thomas Castricque estantz tous natifz dudict<sup>193</sup> des Pummereaulx et y aiantz tousiours demoure comme aussy y a demoure jehan le Turcq et Mahieu Roussel avecq ledict feu Pierre Hennart son beau frere et ledict Binault avoir ouvre a relever fossez et aultrement besoingnier en ladicte seignourie des Pummereaulx / et Bonnel par avoir este allie et prins femme audict des Pummereaulx / et Grard par y avoir tousiours converse et hante et passe vingt ans demoure en la paroisse dudict Auberch et natif de Fauquissart paroisse de le Venthie seignourie contigue a ladicte seignourie de Pietre et des Pummereaulx / Disent tous lesdictz dessusnommez saulf ledict Hennart que depuis le jour Saint Remy dernier passe jehan de Noyelles jehan Vreton et jheromme Vignoble manouvriers ont releve par la charge de Pierre Screve censsier de jehan Preudhomme escuier Seigneur du Creux comme ledict Screve ad ce comparant a confesse que ce aueroit este par sa charge trois fossez estantz allendroict des terres lieu et heritaiges appertenantz audict Preudhomme confrontans le chemin par lequel on va du riet des Pummereaulx dict le riet du joncquoy pardevant la maison dudict Seigneur du Creux a Lorgies au puich des Pummereaulx a leglise Dauberch tenant aux heritz de Martin Hennart et que iceulx heritaiges dudict Seigneur du Creux sont tenus dudict Seigneur de Pietre ad cause de sadicte seignourie des Pummereaulx Apres que tous lesdictz attestantz lesdictz nottaires presentz en absence dudict Hennart aueroient este sur les lieux contentieux aueroient trouvez Asscavoir lung desdictz fossez commenchant pres du riet allant jusques au lieu et porte dudict Seigneur du Creux contenir le nombre de deux cens trente cinq piedz ou environ mesurez par ung desdictz tesmoingz Usite de mesure avecq bastons de mesure et avoir este parez contre et sur le bord du frond du flegard et releve aultrement que a eauwe de mars et les deux aultres fossez commenchans audevant de ladicte maison et porte du Creux allant vers ladicte maison de Martin Hennart qui fut a Pierre Screve filz de feu jacques son beau frere contenant chascun<sup>194</sup> diceulx cent quatre vingtz dix piedz ou environ a chascun coste du chemin / Lesquelz y ont estez tous trouvez parez par tout contre et sur les bordz et flegardz et aultrement relevez que a eauwe de mars / et rengrangiez en pluiseurs endroitz du coste desdictz flegardz Enquoy faisant aueroit sur lesdictz trois fossez este pare sur les bordz et crestes des flegardz et chemins en la longueur que dict est Enquoy faisant lesdictz attestans scevent que pour faire lesdictes ouvraiges et relevemens lesdictz ouvriers polroient avoir vaquhie et ont vaquhie pour le moingz l'espace de dix a douze jours divers Disent quilz scevent que audict Seigneur de Pietre compete et appartient ladicte terre et seignourie des Pummereaulx et que en icelle il a toute justice haulte moienne et basse et que lesdictz trois fossez sont ceulx qui habordent aux plantins flegardz et chemins dont il y aueroit eu proces entre lesdicts Seigneur de Pietre et du Creux Dont ilz se seroient accordez amiablement apres avoir este reigle en enquete pardevant Monsieur le conseiller Grenet commissaire pour lors dudict proces Affirme outre ledict Castricque que lors quil a parcidavant releve aucuns fossez tenantz aux chemins de ladicte seignourie des Pummereaulx quil en aueroit de ce requis congie audict Seigneur ce que luy fut accorde Dont et desquelles attestations affirmations et choses dictes ledict Seigneur de Pietre a requis lettres ausdictz nottaires a luy accordees ces presentes pour luy servir a son intention sy avant que de raison , faict et atteste audict des Pummereaulx le dix

---

<sup>193</sup> Folio 187v°.

<sup>194</sup> Folio 188r°.



noeufliesme jour daoust quinze cens soixante et sept pardevant lesdictz notaires Ainsy signe j. de Faulcompret et M. le Wattier



Appointement dentre jehan Preudhomme Seigneur du Creux et moy  
faict en lan XV<sup>c</sup> soixante cincq touchant les droix de ma seigneurie  
des Pummereaulx

**Les Gouverneur President et gens du conseil Darthois A tous ceulx** qui ces presentes lettres<sup>195</sup> verront salut Comme Guillaume Hangouart escuier Seigneur de Pietre des Pummereaulx etc nous ay fait exposer Que a luy competoit et appartenoit ladicte terre et seigneurie des Pummereaulx par indivis allencontre de chappitre de Leglise de Saint Ame en Douay En laquelle il avoit toute justice Haulte moienne et basse avecq amendes de soixante solz parisis et aultres pardessus et endessoubz Dont la moictie appartenoit ausdictz de Saint Ame allencontre de luy Laquelle seigneurie se consistoit entre aultres choses en certain riet nomme le riet du joncqoy Auquel ny es rues flot flegardz chemins et voiries nestoit loisible a aucuns quelz quilz fussent picquier fouyr hauwer faire berseaulx prendre wazons de terre ne aultres choses pour faire fossez reiect diceulx ou autrement sans le gre congie et licence dudict seigneur a paine de soixante solz parisis damende pour chascune foys que lon faisoit le contraire a applicquier comme dict est Ores estoit que Pierre Cochet Anthoine le Febvre mannouvriers Martin Hennart brasseur et jehan preudhomme escuier Seigneur du Creux ou aultres a leur adveu et dont avoient eu le fait pour agreable sestoient ingerez et avancez de leur auctorite privee indeue et desraisonnable et sans le gre congie et licence dudict Seigneur de Pietre de faire les troubles cy apres declaires Asscavoir lesdicts Cochet le Febvre et Hennart de picquier fouyr faire berseaulx prendre wazons de terre et desraciner pluisieurs plantes dherbes sur ledict riet par diverses foys et jusque au nombre de six diverses journees en commectant pour chascune fois amende de soixante solz parisis Item ledict Preudhomme de planter ou faire planter jusques au nombre de vingt et trois plantes de ommeaulx ou aultres especes darbres fort avant sur les chemins et flegardz de ladicte seigneurie des Pummereaulx et beaucoup outre le froncq auquel ses heritaiges tenus de ladicte seigneurie abordoient ausdictz chemins et flegardz Et lesdictes plantes mises et assizes sy pres des chaussees publiques servant de aller audict riet au puich des Pummereaulx a leglise et aillieurs que ladicte chaussee et passaige de pied en estoit rendue fort incommode et mal aisee En commectant par ledict <sup>196</sup>Preudhomme pour avoir ce fait vingt trois amendes chascune de soixante solz parisis Sy avoit encoires ledict Preudhomme en autre endroict Sicomme au chemin menant du riet pardevant sa maison et celle de Pierre Screve audict puich des Pummereaulx a la Bassee et aillieurs plante aultres vingt plantes et ommeaulx ou aultres sortes derbes fort avant sur lesdictz flegardz et chemins et beaucoup outre le froncq auquel sesdictz heritaiges tenus de ladicte seigneurie abordoient sur lesdictz chemins Et ad ces fins fait sur iceulx chemins pluisieurs diverses fouynes fossez et emprinses Commectant vingt aultres amendes

---

<sup>195</sup> Folio 188v<sup>o</sup>.

<sup>196</sup> Folio 189r<sup>o</sup>.

telles que dessus Saulf en tout juste estimation Lesquelz troubles et emportz faitz depuis dix huict ans encha en regard a lintroductiõ de ceste poursieulte Lesdictz dessusnommez navoient vøllu reparer ny reconnoistre le droict dudict Seigneur de Pietre et luy paier lesdictes amendes applicables comme dessus A raison de quoy auroit sur ledict expose obtenu nostre commission et en vertu dicelle par certain huissier dudict conseil faitz faire commandemens ausdictz dessusnommez que incontinent et sans delay ilz euissent a reparer lesdicts troubles et paier lesdictes amendes et cesser de plus faire le samblable / Mesmes passer condempnation quilz ne pooient ce faire sans lepres consentement dudict Sr demandeur Ausquelz commandemens ilz se seroient opposez et partant leur auroit este assigne jour a comparoir audict conseil aux plaix du VII de febvrier soixante quatre Pendant par icelluy demandeur audict jour conclusion par Maistre jacques du Bois advocat pour Mahieu du Crocq son procureur Affin que a bonne et juste cause lesdictz commandemens euissent este faitz seroient decretez selon et aux fins que dessus Surquoy tant auroit este procede en ladicte cause que estans lesdictes parties reiglees en enqueste et veriffication et sestant nostre bien aime Maistre Pierre Grenet escuier conseillicr oudict conseil commissaire par nous deleguie au fait de ladicte enqueste transporte audict villaige des Pummereaulx pour besongnier a icelle enqueste se <sup>197</sup>seroient lesdictz Seigneur de Pietre et du Creux appointie pardevant ledict seigneur commissaire selon quilz sensieut Asscavoir que les ommeaulx et yppreaux<sup>198</sup> dont estoit question demoureroient en lestat quilz estoient pour le present Et que pour ladvenir ledict Seigneur du Creux a lendroit des chemins en question ne polroit planter aultres arbres que a pied et demy pres des fossez estant allentour de ses heritaiges Ce quil polra faire saulf sur ledict riez du joncquoy et les abbatre quant bon luy samblera Et en leur lieu en planter aultres de samblable distance Et demoureront les fossez au prouffict dudict Seigneur du Creux jusques a eauwe de mars en les entretenant sy avant quilz ne puissent pour les eauwes engendrer quelque prejudice audict riez du joncquoy ny aultres heritaiges voisins Et pour ce quil y avoit ung pouplier assis a lendroit de la planquette pour aller aux champ au coing dudict riez quy estoit aussy en different entre lesdicts Seigneur de Pietre et du Creu que icelluy Seigneur de Pietre volloit dire estre assis que ledict riez et par ce moien appertenir a la carite et povrete des Pummereaulx et icelluy Seigneur du Creux au contraire et que icelluy luy devoit appertenir comme aiant este plante par ses predicesseurs Avoit este advise et appointie que ledict pouplier seroit donne en aulmosnes ou aultrement emploie a la discretion diceulx Seigneurs Et entant quil touchoit les despens dudict proces sestoient lesdictz Seigneurs accordez En ce que ledict Seigneur du Creux seroit tenu et avoit promis paier audict Seigneur de Pietre quatre florins carolus Et pour le voiaige dudict Sr Grenel commissaire et son adjoint avoit este devise et appointie que lesdictz Seigneurs paieroient icelluy voiaige chascun par moictie En paiant neantmoins par ledict Seigneur de Pietre les tesmoings quil avoit faitz adjourne a comparoir pardevant lesdicts commissaire et adjoint Ensamble le sallaire de lhuissier demeurans tous les aultres despens compensez entre lesdictz Seigneurs declarant par ledict Seigneur <sup>199</sup>du Creux quil ne pretendoit aulcun droict de seignourie es flotz flegardz chemins riez et communes Ains que icelle seignourie appartenoit audict Seigneur de Pietre et ausdicts de Chappitre de Saint Ame en Douay par indivis en haulte justice moienne et basse Sieuvant quoy avons lesdictz Srs de Pietre et du Creux respectivement condempne

---

<sup>197</sup> Folio 189v°.

<sup>198</sup> Yppreaux: ypreau, espèce d'orme à feuillage large.

<sup>199</sup> Folio 190r°.

et condempnons a lentretenement dudict appointement En tesmoing de ce nous avons fait mectre le seel dudict conseil a ces presentes qui furent faictes et donnees audict conseil le tierch jour daoust mil cinq cens soixante cinq



Reconnoissance des rentiers et manans de ma seignourie des Pummereaulx touchant les droictz de madicte seignourie

A tous ceulx qui ces presentes lettre verront jehan Demirenault Escuier Licencier es loix ad present garde du seel ordinaire estably Arras par le Roy nostre Sr pour seeller et confirmer les contractz marchie et obligations / quy sont faictes passees et receues en ladicte ville pays et conte Darthois entre parties salut Sachent tous que pardevant jehan de Faucompre et Martin le Wattier notaires dicelluy Sr de par luy mis a le Bassee ad ce oir Comparurent en leurs personnes Pierre Screve Martin Hennart jehan le Febvre Thomas Castricque et Martin Hayart tous rentiers et tenant de ladicte seignourie des Pummereaulx et y demourans Et recongnurent lesdicts comparans et chascun deulx de leur bonne et franche volonte ad ce non constraint comment a Guillaume Hangouart escuier Seigneur de Pietre des Pummereaulx compete et appertient ladicte terre et seignourie des Pummereaulx par indivis allencontre de messieurs les Doyen et chappitre de Saint Ame en Douay En laquelle il a toute justice haulte moienne et basse Sy luy appertient les rietz flegardz rues chemins et voiries es mectes de sadicte seignourie Esquelz nest loisible a personne quel quil soit picquier fouyr ny hauwer Remplir les flotz et fossez ne les aplicquier a prouffict particulier Iceulx relever aultrement et plus avant que a eauwe de mars, ne parer ou rendeuer contre <sup>200</sup>et du coste desdictz chemins flegardz bordz et frontz diceulx, ne sur lesdictz bordz frondz et crestes planter arbres en aultres lieux que ceulx accoustumez et nulle part point plus avant que a ung pied et demy prez de ladicte eaue de mars Oster ne remuer les grez pavetz et cauchies ne pareillement faire aucune chose tant pour faire fossez reiectz diceulx ne aucunement entreprendre en sorte que soit le tout sans le gre congie et licence dudict Hangouart Seigneur des Pummereaulx a paine de soixante solz parisis damende pour chascune foys que on feroit le contraire des choses dictes et que emprinses seroit faictes sur ladicte seignourie a aplicquier moictie ausdictz Seigneurs St Ame et laultre audict Seigneur des Pummereaulx Et en faire la reparation Estant lesdictz rentiers et tenans dicelle seignourie tenus entretenir en bonne et suffissant estat desdictz chemins voyes chauchies flotz et fossez a leurs despens chascun endroit ses heritaiges lors toutes quantefois que leur est et sera commande par ledict Seigneur de Pietre en eulx reiglant selon que dessus est dict a peril de samblable amende aplicable comme dessus Et moiennant ce ledict Seigneur present et acceptant cest accord consend aux dessusnommez de planter sur lesdictz bordz frontz et crestes arbres es lieux accoustumez a un pied et demy pres deauwe de mars Iceulx abatre a leur bon plaisir et au lieu diceulx en planter aultres en la mesmes sorte et distance que cy dessus est dict et declare Restablissans par tous lesdictz premiers comparans les troubles par eulx emprins au contraire des droix possessions saisines et accordz cy dessus mentionne reservant par ledict Seigneur tous ses droix possessions et saisines contre toutes aultres personnes pour en faire

---

<sup>200</sup> Folio 190v<sup>o</sup>.

et user comme il trouvera au cas appertener Et ad tout ce que dessus est dict tenir entretenir et accomplir de point en point ainsy et par la maniere dicte Avecq pour rendre tous despens dhommaiges et interestz que a raison de ce polroient ensievir lesdictes parties comparantes chascun en son regard ont soumis et obligez lung envers laultre tous leurs biens heritaiges presens et futurs Renonchantz par leur foy et serment a toutes choses contraires a ces presentes Tout ce que dessusdict nous ont lesdictz nottaires tesmongne <sup>201</sup>estre vray par leurs saingz et nous a leurs tesmoingz avons mis a ces presentes lettres ledict seel ordinaire quy furent faictes et passees audict Pietre le dix neufiesme jour daoust quinze cens soixante sept



---

<sup>201</sup> Folio 191r°.

Reconnoissance Mahieu Vignoble et jehan de le Barre touchant les droictz de ma seignourie des Pummereaulx

**A tous ceulx** qui ces presentes mettres verront jehan Demirenault licencier es loix Advocat postulant au conseil Darthois / ad present garde du seel ordinaire estably a Arras par le Roy nostre Sire pour seeller et confirmer les contractz marchiez et obligations quy sont faictes passees et receues en ladicte ville pays et Conte Darthois Entre partie salut Sachent tous que pardevant jehan de Faucompre et Martin le Wattier nottaires dicelluy Seigneur Roy de par luy mis en la ville de le Bassee a ce ouyr Comparurent en leurs personnes Mahieu Vignoble labourier demourant a Pummereaulx paroisse Dauberch et jehan de le Barre censsier de la maison et cense de Cliquetrie Et recongnurent lesdicts comparans et chascun deulx de leur bonne et france volonte a ce non constraint comme a Guillaume Hangouart escuier Seigneur de Pietre des Pummereaulx etc compete et appertient ladicte terre et seignourie des Pummereaulx par indivis allencontre de messieurs les Doyen et chappitre de Saint Ame en Douay En laquelle il a toute justice haulte moienne et basse Sy luy appertient les rietz flegardz rues chemins et voieries es mectes de sadicte seignourie Esquelz nest loysible a personne quel quil soit picquiez fouyr ny hauwer remplir les flotz et fossez ne les appliquer a prouffict particulier iceulx Relever aultrement et plus avant que a eauwe de mars ne parer ou renduver contre et du coste desdictz chemins flegardz bordz et front diceulx / ne sur lesdictz bordz frontz et crestes planter arbres en aultres lieux que ceulx acoustumez et nulle part point plus avant que a ung pied et demy prez de ladicte eauwe de mars Oster ne remuer les grez pavez et cauchiez ne pareillement faire aucune chose tant pour faire fossez reiect diceulx ne aucunement entreprendre en sorte que soit le tout sans le gre congie et licence dudict <sup>202</sup>Hangouart Seigneur des Pummereaulx A paine de soixante solz parisis damende pour chascune foys que lon feroit le contraire des choses dictes et que emprins seroient faictes sur ladicte seignourie A applicquier moictie ausdictz Seigneurs de Saint Ame Et laultre audict Seigneur des Pummereaulx et en faire la reparation Estans lesdictz rentiers et tenans dicelle seignourie tenus dentretenir en bon et souffissant estat lesdictz chemins voyes cauchies flotz et fossez a leurs despens chascun endroit ses heritaiges / lors et toutes et quantefois que leur est et sera commande par ledict Seigneur de Pietre en eulx reiglant selon que dessus est dict / A peril de samblable amende aplicable comme dessus Et moiennant ce ledict Seigneur present et acceptant cest accord consent aux dessusnommez planter sur lesdictz bordz frontz et crestes arbres es lieux acoustumes a ung pied et demy prez de eauwe de mars Iceulx abattre a leur bon plaisir et au lieu diceulx en planter aultres en la meisme sorte et distance que cy dessus est dict et declare Restablissans par lesdictz premiers comparans les troubles par eulx emprins au contraire des droictz possessions saisines et accord cy dessus mentionne / Reservant par ledict Seigneur tous ses droictz possessions et saisines contre toutes aultres personnes pour en faire et use comme il trouvera au cas appertener Et a tout ce que dessus est dict tenir entretenir et accomplir de point en point ainsy et par la maniere dicte Avec pour rendre tous despens dommaiges et interestz quy a raison de ce sen pouroient ensuyvir lesdictes parties comparantes

---

<sup>202</sup> Folio 191v<sup>o</sup>.

chascune en son regard ont soumis et oblige lun envers laultre tous leurs biens et heritz presens et futurs Renonchans par leurs foy et serment a toutes choses contraires a ces presentes Tout ce dessusdict nous ont lesdictz notaires tesmoingne estre vray par leurs saingz manuelz et nous a leurs tesmoingz Avons mis a ces presentes lettres ledict seel ordinaire quy furent faictes et passees en ladicte ville de ladicte Basse le vingtiesme jour doctobre Lan mil cincq cens soixante sept



<sup>203</sup>Commission de complaincte en cas de saisine et de nouvelleite contre jehan Preudhomme Seigneur du Creux aiant releve aucuns fossez en la seigneurie des Pummereaulx plus avant que a eauwes de mars pare et renduvez sur les frontz desdictz fossez sans la grace et congie de Guillaume Hangouart escuier Seigneur desdictz Pummereaulx

**Les Gouverneur** President et gens du conseil Dartois Au premier huissier dudict conseil sur ce requis salut Expose nous a Guillaume Hangouart escuier Seigneur de Pietre des Pummereaulx etc en soy complaingnant adfin de saisine et de nouvelleite Que a vray et juste tiltre a declare plus a plain quant mestier sera Luy compete et appertient entre aultres ses biens ladicte terre et seigneurie des Pummereaulx par indivis allencontre du chappitre de Saint Ame en Douay En laquelle terre et seigneurie qui est France regalle de Roy il a toute justice et seigneurie haulte moienne et basse amendes de soixante solz parisis et aultres endessus et endessous Sy luy appartiennent les riez chemins rues waresquais flegardz et voieries es mectes de sadicte seigneurie esquelz nest loisible a personne quel quil soit, picquier fouyr ne hauwer remplir les flotz et fossez Iceulx relever autrement et plus avant que a eauwe de mars, ne parer ou renduver contre et du coste desdictz chemins flegardz bordz et front diceulx, ne sur lesdictz bordz front et crettes, planter arbres en aultres lieux que ceulx accoustumez, et point plus avant que a pied et demy prez de ladicte eaue de mars / oster ne remuer les grez et cauchies ne pareillement faire aucune chose tant pour faire fossez reiect diceulx ne autrement entreprendre en sorte que soit le tout sans le gre congie et licence dudict exposant a paine de soixante solz parisis damende pour chascune fois que lon feroit le contraire des choses dictes applicables la moictie a son prouffict et laultre moictie ausdicts de St Ame Dont de ce joir user et posséder est ledict exposant en toutes bonnes possessions et saisines affirmatives negatives et mixtes Desquelles et de toutes possessions pertinentes a ladicte matiere a declarer comme dessus Il et ses predecesseurs dont il a le droict et cause ont jouy et possesse par tel et <sup>204</sup>sy long temps quil nest memoire du commencement ny du contraire Aumoing par temps suffissant et vaillable pour bonne possession et saisine avoir acquis garder et retenu paisiblement publicquement et par les derniers ans et exploix Au veu et sceu de jehan Preudhomme escuier Seigneur du Creux et de tous aultres quy ce ont vollu veoir et scavoir Ce non obstant ledict Preudhomme ou aultre a son adveu dont il a eu le fait pour agreable se seroit ingere et advanchie de son auctorite privee indeue et desraisonnable puis certain temps Signamment puis an et jour encha en regard a la dacte de ceste presente complainte de faire relever certains fossez entre ses

---

<sup>203</sup> Folio 192r°.

<sup>204</sup> Folio 192v°.

heritaiges et lesdictz flegardz de la longueur de cincq cens piedz ou environ Et en ce faisant picquie fouy et hauwe esdicts flegardz pour parer ledict ouvraige par tel moien dequoy iceulx flegardz en seroient amoindris demy pied de large ou davantaige le tout saulf juste extimation en troublant et empeschant partant ledict exposant en sesdicts droix possession et saisine et commectant vers luy vingt amendes chascun de soixante solz parisis a les applicquier comme dict est pour avoir besoingnier par vingt jours Aussy saulf juste estimation a faire les relevaiges et choses dictes Lesquelz troubles et empeschemens il nauroit vullu reparer reintegrer et restablir paier ny gaiger lesdictes amendes A tort sans cause indeuement et de nouvel requerant sur ce nostre provision Pourquoi nous vous mandons et commectons que a la requeste dudict exposant ou de son procureur adjournez a certain brief jour et heure que declairerez ledict turbateur et aultres quil appertiendra et dont requis serez a estre et comparoir pardevant vous sur et au plus prez desdictz flegardz pour tous lieux contentieux Et illecq tenez maintenez et gardez de par le Roy nostre Sire et nous pour justice ledict complainant ou procureur pour luy en sesdictz droix possessions et saisines et diceulx le faictes joyr user a pur et a plain en ostant tous troubles ou empeschemens faictz mis ou donnez au contraire En faisant commandement audict turbateur et aultres quil appertiendra et dont requis serez que <sup>205</sup>incontinent et sans delay ilz restablissent les troubles dessusdictz / paient et gaigent les amendes Se cessent de plus faire le samblable Et en cas dopposition la nouvellite ostee et la chose contentieuse desdictes parties prinse et mise en la main du Roy nostre Sire comme souverain Restablissement faict deuement preallablement Donnez et assignez jour competant aux parties lune contre lautre a estre et comparoir pardevant nous audict conseil Pourtant sur le principal que sur la recredence de la matiere Respondre et proceder comme de raison Et sy lesdictz adjournez ou aucun deulx ne comparoient pardevant vous au jour lieu et heure que leur aurez assigne ou fussent deffaillans de a vosdicts commandemens obeir et que par ce deffault fut par vous contre eulx donnez Readiournez lesdicts deffaillans a comparoir comme dessus pardevant nous pour ledict deffault veoir confermer Et ledict complainant ou procureur pour luy plus amplement maintenir et garder en sesdictz droix possessions et saisines Et proceder en oultre selon raison En rescripvant de ce que faict en aurez de ce faire Vous donnons povoir donne soubz le contreseel dudict conseil le dix neufiesme jour de juillet quinze cens soixante sept



Relation de lhuissier aiant mis a execution la susdicte commission a la personne dudict Preudhomme demourant a Arras qui a accepte lexploit

A mes treshonnorez Seigneurs messieurs les President et gens du conseil provincial Darthois Guy le Febvre huissier ordinaire dudict conseil Le vostre en tout mesdictz Seigneurs plaise vous scavoir que a la requeste de Guillaume Hangouart escuier Seigneur de Pietre impetrant de vostre commission de complaincte en cas de nouvellite icy jointe et pour le mettre a execution jay le vingnoefiesme de juillet quinze cens soixante sept / apres assistance requise adjourne jehan Preudhomme aussy escuier Seigneur du Creux et Pierre Screve son censier parlant pour tout a la

---

<sup>205</sup> Folio 193r°.

personne <sup>206</sup>de Anthoine le Roux procureur audict conseil en ceste ville Darras Qui se seroit declare et fonde procureur des dessusdicts Pour iceulx accepter l'exploict Meisme soy tenu content du lieu litigieux et des jours et heure que luy vaudroie assigner pour la remise me requerant faire icelle au meisme instant pour eviter a frais ce que luy auroye accorde Et sievant ce maintenu et garde de par le Roy nostre Sire et vous mesdicts Seigneurs pour justice Ledict Seigneur impetrant par la personne de jehan Venant son procureur Aussy illecq estant en personne en ses droictz possession et saisine baptisees par ladicte complaincte faisant audict le Roux audict nom Tous les commandemens de restablir inhibitions et deffences contenue en ladicte commission A quoy il seroit pour sesdictz maistres oppose Apres avoir restably le trouble figurativement en ma main comme constraint sy que disoit, Et pour dire ses causes dopposition / Et en oultre par les parties proceder comme de raison Le tout present jehan Baillet clercq dudict le Roux et Pierre le Pecqueur demourant en la cite Darras leur ay donne et assigne jour a comparoir aux plais dudict Conseil du second jour de septembre enssieuvant



Deuxiesme reconnoissance des droictz de ma seigneurie des Pummereaulx faicte par jehan le Preudhomme escuier Seigneur du Creux le XIX<sup>e</sup> daoust XV<sup>c</sup> LXX

A tous ceulx qui ces presentes lettres verront jehan Macrel le josne bourgeois ad present garde du seel ordinaire estably Arras par le Roy nostre Sire pour seeller et confirmer les contractz marchiez et obligations qui sont faictes passees et receues en ladicte ville pays et conte Darthois entre partie salut Sachent tous que pardevant Martin le Wattier et jehan de Faucomprez nottaires dicelluy Seigneur de par luy mis en la ville de <sup>207</sup>le Bassee ad ce oyr Comparut en sa personne jehan de Preudhomme escuier Seigneur du Creux Lequel comparant recongnut que pour paix et concorde nourrir entre luy et Guillaume Hangouart aussy escuier Seigneur de Pietre et des Pummereaulx Et appointier de certain proces que ilz avoient lung contre laultre pardevant messieurs les president et gens du conseil provincial Darthois et obvier aultres proces et differendz que a ladvenir polroient estre suscitez entre eulx il sest appointie et accorde pour luy ses hoirs et aians cause en la forme et maniere quil sensieult Cest asscavoir que icelluy Seigneur du Creux comparant a congnu et congnoist par ceste compecter et appertener audict Hangouart ladicte terre et seigneurie des Pummereaulx par indivis allencontre de messieurs de Saint Ame en Douay et que en icelle ledict Hangouart a toute justice et seigneurie haulte moienne et basse en tous droict preeminences et aultres choses Sy luy appertiennet les rietz flegardz rues chemins et voiries es mectes de sadicte seigneurie Esquelz nest loisible audict Seigneur du Creux ne a personne quel quil soit picquier fouyr ne hauwer remplir les flos et fossez Iceulx relever aultrement ne plus avant que a eauwe de mars ne parer ou renduver contre et du coste desdictz chemins flegardz bordz et crestes, planter arbres en aultre lieux que ceulx accoustumez et nulle part plus avant que a ung pied et demy prez de ladicte eauwe de mars / oster ne remuer les grez, pavetz et cauchies, ne pareillement faire aucune chose tant pour faire fossez reiectz diceulx ne aucunement entreprendre en sorte que

---

<sup>206</sup> Folio 193v<sup>o</sup>.

<sup>207</sup> Folio 194r<sup>o</sup>.



soit le tout sans le gre congie et licence dudict Hangouart Seigneur des Pummereaulx a paine de soixante solz parisis damende pour chascune foys que on feroit le contraire des choses dictes et que emprinses seroient faictes sur ladicte seignourie A applicquier la moictie ausdictz Seigneurs de Saint Ame et laultre moictie audict Hangouart Seigneur <sup>208</sup>des Pummereaulx et en faire reparation / Estant ledict Seigneur du Creux tenu de entretenir en bon et souffissant estat lesdictz chemins rues flos fossez cours deauwe et chaussees a ses despens touteffois et quantes que sera publie et enjoinct de ce faire par ledict Seigneur des Pummereaulx en se reiglant au fait desdictz relevemens et entretenemens selon que dessus est dict a peril de samblable amende aplicable comme dessus / Congnoissant davantaige et advouant ledict Seigneur du Creux que tous les lieux motte maison de plaisance cense eauwes jardins pretz bois terre et heritaiges quelconcques que il a scituez et gisans en ladicte seignourie des Pummereaulx et en la paroisse Dauberch et allenviron sont tenus en cotterie dudict Hangouart Seigneur des Pummereaulx ad cause dicelle sa seigneurie des Pummereaulx a certains reliefz droictz seignouriaux droitures et rentes seignouriales Saulf une mencaudee tenu en cotterie de ladicte seignourie de Pietre Sans quil soit loisible audict Seigneur du Creux soy intituler ne sadicte maison cense et heriatige du nom et tiltre des Pummereaulx ou Pummereaulx par ce que ladicte maison cense et heritaiges ne ont nulle denomination ne tiltre / trop bien estre appelee sa cense ou maison gisant a Pummereaulx Ce bien entendu que ledict Seigneur du Creux ses hoirs et aians cause peuvent et polront allendroit des chemins de ladicte seignourie des Pummereaulx planter arbres a pied et demy pres de eauwe de mars des fossez estans allentour de ses heritz tant sur frontz presentement plantez que non plantez Saulf sur le rietz des Pummereaulx dict le riet du joncquoy sur lequel riet ne les frontz dicelluy il ne poeult et ne polront planter Et iceulx arbres abattre toutes et quanteffois que bon luy samblera a luy et tous ses heritiers sans le congie dudict Seigneur de Pietre a blanche taille ou noir cul et desroder comme de raison / sans touteffois donner empeschemens au passaige des chemins et en remectant et refectionnant deux mois apres ladicte abbatizon les flegardz fossez fronts cauchies et chemins en bon estat sans riens amoindrir Et en leur lieu planter aultres arbres de samblable <sup>209</sup>distance que dessus est dict / Sy restablist par ceste ledict Seigneur du Creux tous troubles et emprinses faictes au contraire des droictz recongnissances appointement et accordz susdictz Ce que a este accepte par ledict Guillaume Hangouart escuier Seigneur de Pietre et des Pummereaulx pour ce present et comparant en personne Sy ont lesdictz Seigneur de Pietre et du Creux comparans ce que dessus chascun en son regard promis furnir accomplir et entretenir de point en point et estre a tousiours entretenu par leurs hoirs successeurs et aians cause Soubz lobligation de leurs biens et heritaiges et ceulx de leurs hoirs presens et futurs Renonchans a toutes choses contraires a ces presentes Meismes au droict disant generale renonchiation non valoir sy lespecial ne precede Et non obstant droict loy stil ou coustume ad ce contraire aquoy ilz ont renonchie et renonchent par ces presentes Et pour tant plus effectuer lesdictes recongnissance appointement et choses susdictes et mettre plus sceure et certaine fin audict proces Lequel est presentement en estat denqueste Lesdictz Seigneurs comparans ont estably constitue et ordonne leurs procureurs generaulx et especiaulx jehan Venant et Anthoine le Roux leurs procureurs audict conseil Ensamble Maistres jehan de Landas et Adrien de Beluwet escuiers advocatz jehan Bourgeois

---

<sup>208</sup> Folio 194v°.

<sup>209</sup> Folio 195r°.

Ausquelz procureurs dessusnommez et a chascun ou lung deulx seul aiant ces presentes ilz ont donne et donnent pover absolu especial et irrevocable daller et comparoir pardevant messieurs les president et gens du conseil provincial Darthois Et pardevant eulx en jugement ou dehors recongnoistre et ratifier le contenu en ces presentes selon sa forme et teneur Et generalmente et especiallement aultant faire dire recongnoistre et accepter comme lesditz constituans feroient se presens en personne y estoient Ores que le cas requis mandement plus especial Promectant le tout tenir ferme et agreable Soubz lobligation que dessus Tout ce dessusdicts nous ont lesdictz nottaires tesmongne estre vray par leurs seings manuelz Et nous a leurs tesmoings Avons mis a ces presentes lettres ledict seel ordinaire Quy furent faictes et <sup>210</sup> passees en ladicte seignourie des Pummereaulx paroische Dauberch le dixnoeufliesme jour daoust quinze cens soixante dix



Ausquelles lettres son infixees les lettres quy sensieuent

Les president et gens du conseil provincial Darthois **A tous ceulx** qui ces presentes lettres verront salut Comme Guillaume Hangouart escuier Seigneur de Pietre des Pummereaulx etc ait obtenu nostre commission de complaincte en cas de saisine et de novellite naree que a vray et juste tiltre luy competoit et appartenoit ladicte terre et seignourie des Pummereaulx par indivis allencontre du chappitre de Saint Ame en Douay En laquelle il avoit toute justice haulte moienne et basse Sy luy appartenoit les riez chemins flegardz et voiries es mectes de sadicte seignourie Esquelz nestoit loisible a personne picquier fouyr ne hauwer / remplir les flotz et fossez iceulx relever aultrement et plus avant que a eauwe de mars, ne parer ou renduver contre et du coste desdictz chemins flegardz bordz et front diceulx , ne sur lesdictz bordz front et crettes / planter arbres en aultres lieux que ceulx accoustumez et point plus avant que a pied et demy prez de ladicte eauwe de mars / oster ne remuer les grez et cauchies, ne pareillement faire aulcune chose tant pour faire fossez reiect diceulx ne autrement entreprendre en sorte que soit le tout sans le gre congie et licence dudict impetrant a paine de soixante solz parisis damende pour chascune foys que lon feroit le contraire des choses dictes applicables la moictie a son prouffict et lautre moictie ausdictz de Saint Ame Dont de ce joyr user et possesser estoit ledict impetrant en toutes bonnes possessions et saisines affirmatives negatives et mixtes par tel et sy long temps quil nestoit memoire du commencement ne du contraire Au veu et sceu de jehan Preudhomme escuier Seigneur du Creux et de tous aultres quy ce avoient vullu veoir et scavoir Ce non obstant ledict Preudhomme ou aultre a son adveu et dont il avoit eu le fait pour agreable sestoit ingere et advanchie de son auctorite prive indeue et desraisonnable depuis an et jour encha en regard au XIX<sup>e</sup> jour de jullet quinze cens soixante sept dacte de ladicte complainte <sup>211</sup> de faire relever certains fossez entre ses heritaiges et lesdict flegardz de la longueur de cinq cens piedz ou environ Et en ce faisant picquie fouy et hauwer esdicts flegardz pour parer ledict ouvraige par le moyen de quoy iceulx flegardz en seroient amoindris demy pied de large ou davantaige le tout sauf juste estimation en troublant et empeschant partant ledict impetrant en sesdictz droix possessions et saisines et commectant vers luy vingt

---

<sup>210</sup> Folio 195v°.

<sup>211</sup> Folio 196r°.

amendes chascune de soixante solz parisis a les applicquier comme dict est pour avoir besongnie par vingt jours aussy saulf juste estimation a faire les relevaiges et choses dictes Lesquelz troubles il navoit vullu reparer reintegrer et restablir paier ny gaiger lesdictes amendes A tort sans cause indeuement et de nouvel Pour ces causes ledict impetrant auroit par certain huissier dudict conseil faict mettre ladicte ladicte complaincte a execution selon ses termes tant allencontre dudict Preudhomme que Pierre Screve son censier Ausquelz pour l'opposition par eulx a ce cree jour leur fut assigne pardevant nous aux plais du second jour de septembre oudict an soixante sept que lors jehan Benaut procureur dudict demandeur auroit mis en fait ledict demandeur estre dacord avecq ledict Screve selon quil estoit passe pardevant nottaires Et quand audict Preudhomme par Maistre jacques du Boys advocat pour ledict Venant procureur dudict demandeur auroit este prinse conclusion Affin destre maintenu et garde tant au droict que amendes et que ledict Preudhomme fut condempne restablir le trouble requerant la recedence du litigieux en cas de proces demandant despens Surquoy apres plusieurs procedures tenues en ladicte cause et estant icelle en estat de veriffier le jourdhuy dacte de ces presentes Anthoine le Roux procureur dudict deffendeur en vertu de pover especial insere es lettres d'apointement entre les parties passe pardevant nottaires royaulx le dixnoeufliesme daoust dernier a recongnu le contenu esdictes lettres d'apointement le tout sy avant que faire pavoit en vertu dudict pover Ce que ledict jehan Venant audict nom auroit accepte selon que au registre de la court estoit et est plus aplain contenu

<sup>212</sup>**Scavoir faisons** que veues lesdictes recongnissance et acceptations Avons condempne et condempnons lesdictez parties a l'entretenement dudict apointement parmy lequel ces presentes sont infixees En tesmoing de ce Avons fait mettre a ces presentes lettres le seel dudict conseil Ce quatorziesme jour de novembre XV<sup>c</sup> soixante dix



Commission de complaincte en cas de novellite Contre Mahieu Vignoble aiant releve aucuns fossez en la seignourie des Pummereaulx plus avant que a eauwe de mars / pare et renduve contre du coste et sur les frontz desdictz fossez sans congie

**Les gouverneur President et gens du conseil Dartois** Au premier huissier dudict Conseil sur ce requis salut Expose nous a Guillaume Hangouart escuier Seigneur de Pietre des Pummereaulx etc en soy complaignant tout affin de saisine et de novellite Que a vray et juste tiltre a declare plusaplain quand mestier sera Luy compete et appertient entre aultres ses biens Ladicte terre et seignourie des Pummereaulx par indivis allencontre du chappitre de Saint Ame en Douay En laquelle terre et seignourie quy est franche regalle du Roy nostre Sire Il a toute justice et seignourie haulte moienne et basse amendes de soixante solz parisis et aultres endessus et endessous Sy luy appertienent les rietz chemins rues flegardz waresquais et voiries es mectes de sadicte seignourie esquelz nest loisible a personne quelque quil soit picquier fouyr ny hauwer remplir les flots et fossez Iceulx

---

<sup>212</sup> Folio 196v<sup>o</sup>

relever aultrement et plus avant que a eauwe de mars ne parer ou renduver contre et du coste desdictz chemins flegardz bordz et frontz diceulx ne sur lesdictz bordz planter arbres en aultres lieux que ceulx accoustumez et nulle part plus avant que a pied et demy prez de ladicte eauwe de mars <sup>213</sup>oster ne remuer les grez pavez et cauchees ne pareillement faire aulcune chose tant pour faire fossez reiectz diceulx ne aultrement entreprendre en sorte que soit le tout sans le gre congie et licence dudict exposant Apaine de soixante solz parisi damendes pour chascune foys que lon feroit le contraire applicable la moictie a son prouffict et laultre moictie audicts de Saint Ame Dont de ce joyr user et posséder est ledict exposant en toutes bonnes possessions et saisines affirmatives negatives et mixtes Desquelles et aultres plus pertinentes a ladicte matiere a declarer comme dessus Il et ses predicesseurs dont il a droit et cause ou joy et possesse par tel et sy long temps que nest memoire du commencement ny du contraire Au moing par temps souffissant et vaillable pour bonne possession et saisines avoir acquis garder et retenir paisiblement publicquement et par les derniers ans et exploictz Au veu et sceu de Mathieu Vignoble labourier demourant audict es Pummereaulx Et de tous aultres quy ce ont vullu veoir et scavoir Ce nonobstant ledict Vignoble ou aultres a don adveu et dont il a eu le fait pour agreable se seroit ingere et advanchie sans le gre congie ou licence dudict Hangouart puis le mois doctobre dernier signamment dan et jour encha en regard a la dacte de ceste complaincte de faire relever deux fossez entre certains heritaiges et lesdictz flegardz assavoir contre une pieche de terre a luy appartenant haboutant aux chemin quy maisne du rietz des Pummereaulx et de la cense jehan Preudhomme au puich des Pummereaulx et au hault Pummereaulx contenant environ cent quatre vingtz piedz de long Tenant de deux aultres sens aux terres dudict Preudhomme Item laultre fosse estant entre une pieche de terre par luy tenue en cense de Martin de le Barre son nepveu haboutant au chemin quy maisne de Lhommelet au mollin de Mailly et a leglise Dauberch tenant dun coste aux terres des hoirs de feu Pierre Haiart Et daultre a le terre des hoirs de feu jacques Screve contenant <sup>214</sup>environ de long trois cens quatre vingtz dix piedz enquoy faisant Il aueroit fouy picquie et hauwe pare et renduve contre et du coste desdictz chemins flegardz bordz et frontz diceulx Et touchie pare et emprins sur lesdicts flegardz bordz frontz et crettes par le moien de quoy iceulx flegardz seroient amointris demy piedz de large ou davantaige le tout saulf juste estimation En troublant et empeschant partant ledict exposant en sesdictz droix possessions et saisines Et commectant vers luy dix amendes a les applicquier comme dist est pour avoir besongnie par dix jours aussy saulf juste estimation En troublant et empeschant par tant ledict exposant en sesdicts droix possessions et saisines et commectant vers luy lesdictes amendes quil navoit vullu reparer a tort sans cause indeuement et de nouvel Requerant ad ceste cause sur ce nostre provision **Pourquoy nous** vous mandons et commectons Que a la requeste dudict complainant ou de son procureur adjournez a certain brief jour et heure que declarez ledict turbateur a comparoir pardevant vous sur et au plus prez desdictz flegardz pour tous lieux contentieux Et illecq tenez maintenez et gardez de par le Roy nostre Sire et nous pour juste ledict complainant en sesdictz droix possessions et saisine En faisant commandement audit turbateur que incontinent et sans delay il restablisse lesdicts troubles paie et gaige lesdictes amendes Se cesse de plus faire le samblable Et en cas dopposition la novellite oste de la chose contentieuse desdictes parties prinse et mise en la main du Roy nostre Sire comme

---

<sup>213</sup> Folio 197r°.

<sup>214</sup> Folio 197v°.

souverain restablissement fait deuement preallablement donnez et assignez jour competent aux parties lune contre laultre a estre et comparoir pardevant nous audict conseil Pour respondre et proceder comme de raison Et sy lesdictz adjournez ou aucuns deulx ne comparoient pardevant vous aux jour lieu et heure que leur aurez assignez où fussent defaillans de a vosditz commandemens obeir Et que par ce deffault fut par vous contre eulx donne <sup>215</sup>readjournes lesdictz defaillans a comparoir pardevant nous audict conseil comme dessus pour ledict deffault veoir confirmer et proceder en oultre comme de raison en rescripvant de ce que fait en aurez de ce faire vous donnons povoir donne soubz le contreseel dudict conseil le vingt et ungiesme jour de mars quinze cens soixante douze



### Relation de ladicte Commission

A mes treshonorez et doubtez Seigneurs messieurs les gouverneur president et gens du conseil Darthois Franchois de Forcheville huissier dudict conseil resident en la ville de la Bassee bien vostre en tout mesdicts treshonorez et doubtez Seigneurs plaise vous scavoit que en vertu de la commission de complaincte et saisine de novellite de vous donne au marge de laquelle ce present mon rescript est atache et pour icelles interiner et mettre a execution a la requeste de Guillaume Hangouart escuier Seigneur de Pietre des Pummereaulx impetrant dicelles le vingtroisiesme jour du mois dapvril XV<sup>c</sup> soixante treize me suis transporte au hameau des Pummereaulx au domicile et par devers la personne de Mahieu Vignoble et apres assistance par moy requise ou il appertenoit parlant a la personne dudict Vignoble le adjournay donnay et asseignay jour a estre et comparoir pardevant moy sur et au plus pres desdictz fossez mentionnez en ladicte commission pour tous lieux contentieux au mardy ensieuvant vingthuitiesme dudict mois dix heures attendant onze du matin pour veoir mettre a execution ladicte commission selon sa forme et teneur auquel jour lieu et heure comparurent et se presenterent pardevant moy Anthoine Binault demourant audict Pietre au nom et comme procureur dudict impetrant souffissamment fonde de procure quy me fit apparoir dune part et ledict Vignoble en personne daultre part quy se seroit tenu content du jour lieu et heure a luy assigne en la presence de jheromme Vignoble demourant audict Pietre et Michel de le Follie demourant en la ville de la Bassee tesmoingz ad ce par moy appelez je tiens maintiens et garday de par le Roy nostre Sire et de vous mesdicts seigneurs pour justice <sup>216</sup>Ledict Binault audict nom et comme procureur es droix possessions et saisine narree par ladicte commission et diceulx je feis jouir et user a pur et aplain ostant tout troubles et empeschemens fait mis et donnez au contraire sy feis commandement de par ledict Sr Roy audict turbateur de restablir incontinent et sans delay ledict trouble sesser de plus faire le samblable aquoy se seroit rendu opposant Restablissant neantmoins par figure dung baston en ma main comme constraint comme il disoit au moien dequoy je ostay la novellite et chose contentieuse des parties prinse et mis en la main du Roy nostre Sire comme souverain tant et sy longuement que autrement en seroit ordonne Donnant et asseignant jour et a chascun deulx a estre et comparoir pardevant vous mesdictz Seigneurs audict conseil aux plais du mardy cincquiesme jour du mois de may ensieuvant audict an

---

<sup>215</sup> Folio 198r°.

<sup>216</sup> Folio 198v°.

pour tant sur le principal que sur la recredence aller et proceder selon raison certifiant ce que dessus tesmoing mon saing manuel cy mis le jour an dessusdict



Lettres d'appointement pour Guillaume Hangouart escuier Seigneur de Pietre des Pummereaulx etc touchant sadicte seignourie des Pummereaulx Asscavoir la reconnoissance de plusieurs droix de ladicte seignourie faicte par Mahieu Vignoble

A tous ceulx qui ces presentes lettres verront ou orront **Maximilien Villain** baron de Rassenghien Izenchien francq Seigneur de St jansteene Conseillier du Roy nostre Sire Gouverneur et capitaine des ville chasteaulx et chastellenies de Lille Douay Orchies et des appertenances salut **Scavoir faisons** que pardevant Nicollas de Saint Aubin et Phles Hochart auditeurs commis et deputez ou nom dudict Seigneur Roy A prendre oyr et recepvoir les contractz convenances marchiez et obligations quy se font et passent soubz le seel du souverain bailliaige dudict Lille Comparut en sa personne Mahieu Vignoble filz de feu Mahieu laboureur demourant au villaige des Pummereaulx Et recognut de sa pure et franche voulonte comment il estoit apparant entrer en proces contre Guillaume Hangouart escuier Seigneur de <sup>217</sup>Pietre de ladicte seignourie des Pummereaulx etc Pour raison que luy comparant avoit au mois de novembre dernier ou environ releve et fait relever de son auctorite privee indeue et desraisonable et sans grace gre congie et licence dudict Hangouart Seigneur des Pummereaulx par pluisieurs et diverses journees et non moings que de sept journees deux fossez abordans tant a ses heritz propres que aux heritaiges de Martin de le Barre son nepveu par luy occupees a tiltre de censse le tout tenu de ladicte seignourie des Pummereaulx et frontans aussy lesdicts fossez aux flegardz et chemins de ladicte seignourie des Pummereaulx Et oultre ledict relevement fait comme dict est aueroit ledict comparant pare et fouy et fait parer et fouir aussy sur les bordz frontz et crettes desdictz fossez flegardz et chemins voires aussy emprins sur lesdictz frontz et flegardz et iceulx amoindris le tout de son auctorite privee indeuement a tort et de nouvel en contrevenant et emprendant partant sur les droictz auctorite et preeminence dudict Hangouart Seigneur des Pummereaulx et le troublant en iceulx A raison dequoy il seroit escheu vers ledict Seigneur des Pummereaulx en pluisieurs amendes de soixante solz parisis chascune monnoie realee Darthois faisant vingt sept deniers flandres le solz et non moings que de sept amendes Pour auquel proces obvier et faire deue Reconnoissance Restablissement et reparation desdictes troubles empeschemens et emprinses Ledict Mahieu Vignoble comparant congnoissant son tort en tout ce que dessus est dict et voullant user de bonne foy a congnu et congnoit par cestes competer et appertenir audict Hangouart ladicte terre et seignourie des Pummereaulx laquelle est franche regale de Roy Et que en icelle ledict Hangouart a toute justice et seignourie haulte moienne et basse en tous droix preeminences amendes de soixante solz parisis monnoye realee Darthois de vingt sept deniers flandres le sol et aultres endessus et endessous et aultres choses / Et sy luy appertiennent les riez flegardz waresquaulx flolz fossez reiectz rues chemins

---

<sup>217</sup> Folio 199r°.

et voiries es mectes de sadicte seignourie <sup>218</sup>des Pummereaulx esquelz nest loisible audict Mahieu Vignoble comparant ne a personne quel quil soit picquier fouyr ne hauwer remplir four<sup>219</sup> ne relever les flotz et fossez ne iceulx applicquier a prouffict particulier, ne iceulx fossetz relever et nettoier ne aussy four parer ne renduver sur contre et du coste desdictz chemins flegardz bordz et crettes, ne planter arbres en aultres lieux que ceulx accoustumez et nulle part plus avant que ung pied et demy pres de leaue de mars des flotz et fossez, ne oster et remuer les grez pavetz cailloux et chaussies, Ne pareillement faire aulcune chose tant pour faire fossez reiectz diceulx ne aulcunement entreprendre en sorte que soit le tout sans le gre congie et licence dudict Hangouart Seigneur des Pummereaulx a payne de soixante solz parisis monnoie dicte damende pour chascune fois que on feroit le contraire des choses dictes et que emprinses seroient faictes sur ladicte seignourie a applicquier moictie audict Hangouart Seigneur des Pummereaulx Et laultre moictie a Messieurs de Saint Ame en Douay Et oultre ce de en faire reparation Estant ledict Mahieu Vignoble et tous aultres rentiers et tenans de ladicte seignourie tenus et obligiez entretenir en bon et souffissant estat lesdicts chemins rues flotz waresquais fossez cours deauwe gretz chaussees a leurs despens touteffois et quantes et lors que sera publie et enioinct de ce faire par ledict Seigneur des Pummereaulx En se reiglant au faitz desdictz relevemens et entretenemens selon que dessus est dict a peril de samblable amende applicable comme dessus Et moiennant ce que dessus ledict Hangouart Seigneur des Pummereaulx present et acceptant ceste recongnissance et accord dudict Vignoble consent que ledict Mahieu puisse planter sur lesditz bordz frontz et crettes arbres es lieux accoustumez a ung pied et demy pres de ladicte eauwe de mars Sauf sur le riet des Pummereaulx dict le riez du joncquoy appartenant audict Seigneur des Pummereaulx et estant du gros de son fief et seignourie des Pummereaulx Sur lequel riet ne les frontz dicelluy il ne polra planter et iceulx arbres abbatre toutes et quantefois que bon luy samblera sans <sup>220</sup>touteffois donner empeschemens au passage des chemins et en remectant et refectionnant deux mois apres ladicte abbatisson les flegardz fossez frontz gretz cauchies et chemins en bon estat Sans riens amoindrir ne empirer Et sy a revocquie et restably revocque et restablit par cestes ledict Mahieu Vignoble tous troubles empeschemens et emprinses faictes au contraire des droictz Recongnissance et appointement susdicts Et aussy promis remplir endedens laoust certaine fosse estant au chemin contre le tilleul appartenant audict Seigneur des Pummereaulx contre et audevant la maison ou demeure ledict comparant et pour ce faire prendre la terre sur ses heritaiges Promectant ne plus faire le samblable Ains de tousiours bien et leallement furnir et entretenir par luy ses hoirs et aians cause tout ce que dessus est dict Soubz lobligation de tous ses biens presens et futurs et ceulx de ses hoirs vers tous seigneurs et justices Renonchant a toutes choses contraires a cestes meismes au droict disant generale Renonchiation non valloir sy lespecialle ne precede Et non obstant droict loy stil ou coustume a ce contraire a quoy il a deroghie et renonchie deroghe et renonche par ces presentes Et au regard des sept amendes et aultres que ledict Mahieu congnoit avoir fourfait vers ledict Seigneur des Pummereaulx et congnoit luy debvoir et promet paier a son bon plaisir pour lesdictz relevemens de fossez par luy faitz et aultres emprinses environ ledict mois de novembre dernier Icelluy Mahieu sen est soumis et submect a la bonne grace dudict Seigneur des Pummereaulx lequel Seigneur pour ce present et comparant et acceptant ladicte

---

<sup>218</sup> Folio 199v°.

<sup>219</sup> Four les flots et fossez (?).

<sup>220</sup> Folio 200r°.

reconnaissance affin de tant plus favourablement traictier avecq ledict Mahieu les a en son regard par grace toutes quictées Sauf quatre desquelles quatre amendes ledict Mahieu sera tenu et a promis de en paier bien et leallement comme dessus est dict audict Seigneur de Pietre les deux prestement et les deux autres touteffois et lors que bon samblera audict Seigneur les requerir et avoir Promectant davantaige ledict Mahieu Vignoble <sup>221</sup>reconnoistre ces presentes a ses despens selon leur forme et teneur et en tous ses pointz pardevant Messieurs les president et gens du conseil provincial Darthois notaires royaux dudict Artois bailly et hommes de ladite seigneurie des Pummereaulx et par tout ailleurs ou requis sera dudict Seigneur de Pietre Et pour lesquelles reconnoissances faire Ledict Mahieu Vignoble a commis denomme et estably commect denomme et establisset ses procureurs et messagers generaux et especiaux de Me Jehan de Landas escuier licencie es droix Me Adrien de Belvalet Jehan Venant Raoul Gosson Claude et Mahieu Chuyne pere et filz Ausquelz procureurs dessusnommez et a chascun deulx seul et pour le tout portans ces lettres Ledict constituant a donne et donne pouvoir absolu et irrevocable de pour et en son nom aller et comparoir pardevant les Seigneurs dessusnommez et en chascun desdictz lieux reconnoistre ces presentes selon leurs forme et teneur et tous sesdictz pointz et ce aux despens dicelluy constituant Promectant ledict constituant avoir pour agreable tenir ferme et estable a tousiours tout ce que par sesdictz procureurs ou lun deulx touchant ce que dessus sera fait et besoingne Soubz lobligation de ses biens et heritaiges vers tous seigneurs et justices Renonchant a toutes choses contraires ad ces presentes En tesmoing de ce nous a la relation desdictz auditeurs par leurs saingz manuelz mis a cesdictes presentes Avons icelles fait seeller du seel dudict souverain bailliaige Sauf le droict dudict Seigneur Roy et laultroy en tout Ce fut fait et passe le deuxiesme jour de may quinze cens soixante et treize

---

<sup>221</sup> Folio 200v<sup>o</sup>.



Ausquelles lettres sont infixees ces lettres quy sensieuent

**Les Gouverneur President et Gens du Conseil** Darthois **A tous ceulx** qui ces presentes lettres verront Salut Scavoir faisons que le jourdhuy dacte de cestes pardevant nous audict conseil Comparut en sa personne jehan Venant ou nom et comme procureur de Mahieu Vignoble filz de feu Mahieu fonde de procuration especialle inseree en certaines<sup>222</sup> lettres passees pardevant auditeurs du roy en la ville de Lille en forme de recongnissance faicte par ledict Mahieu au prouffict de Guillaume Hangouart escuier Seigneur de Pietre des Pummereaulx icy en dacte du secong de may dernier Lequel a recongu et recongnoist par ces presentes tout le contenu esdictes lettres dapointement et recongnissance Acordant icelles estre et demourer executoires sur ledict Mahieu Vignoble et ses biens selon leur forme et teneur Le tout sy avant que faire povoit en vertu dudict pooir Ce que de la part dudict Hangouart a este accepte Suivant quoy Avons lesdictes lettres parmy lesquelles ces presentes sont infixees dict et declare Disons et declarons executoires sur ledict Mahieu Vignoble ses biens et heritaiges selon leur forme et teneur au prouffict dicelluy Hangouart En tesmoing de ce Avons fait mettre a ces presentes lettres le seel dudict conseil que furent faictes et donnees le vingtiesme de juillet quinze cens soixante treize //



Vente faicte par Guillaume Hangouart escuier Seigneur des Pummereaulx et jehan Barbet du droict davoit de bastard a luy escheu par le trespas de Lucette de le Boe bastarde trespassee en ladicte seigneurie des Pummereaulx

Comparut en sa personne Guillaume Hangouart escuier Seigneur de Pietre et des Pummereaulx icy Et recongnut que moiennant certaine somme de deniers que a confesse avoir eu receu de jehan Barbet Izabeau Boedin sa femme demourans audict Pummereaulx Et dont il sest tenu pour content Il auroit et a pour ce cede vendu et transporte ausdictz Barbet et sa femme Ledict Barbet pour ce present comparant pardevant lesdictz nottaires ce acceptant Tous tel droit part et portion dhoirie et avoir de bastart devolu et escheu audict Seigneur comparant en demy cent de terre jardinaige par le trespas de feu Lucette de le Boe fille illegitime de Thonnette de Wancourt quelle a eu de Nicollas de le Boe en son vivant demourant audict Pummereaulx Ledict demy cent de terre aboutant dun coste au riez dudict Pummereaulx Daultre a le maison dudict Barbet acquis par icelle deffuncte<sup>223</sup> de feu jacques le Gillon, Pour dudict demy cent de terre en joyr et possesser par lesdictz Barbet et sa femme et par les hoirs ou aians cause dicelle Izabeau Boedin en cas quelle termine auparavant ledict Barbet sans delaisser enffans de ce jourdhuy en avant a tousiours selon et ainsy que faire povoit Ledict Seigneur auparavant ce present transport a luy escheu comme Seigneur dudict Pummereaulx Promectant icelluy transport tenir et entretenir sans jamais aller au contraire faict et passe audict Pietre ce vingtdeuxiesme jour daoust XV c soixante pardevant nottaires Roiaux soubz signez Ainsy signe j.Caudron N.Creton //



---

<sup>222</sup> Folio 201r°.

<sup>223</sup> Folio 201v°.

Reconnoissance et restablisement fait par Bauduin du Crocquet demourant a Pummereaulx / pour avoir ses vaches este trouve en dhommaige et emprissonnees Et depuis par sa femme reprises de prison par auctorite privee / enfraindant la main de justice

A tous ceulx qui ces presentes lettres verront ou orront Baulde Cuvillon escuier licencie es droix Seigneur du Mollinel Conseillier du Roy nostre Sire Et lieutenant de hault et Noble Monsieur le gouverneur du souverain baillaige de Lille Douay Orchies et aux appertenance salut **Scavoir faisons** que le jourdhuy pardevant nous Comparut en sa personne Bauduin du Crocquet laboureur demourant en la terre et seigneurie des Pummereaulx paroissee Dauberch appartenant a Guillaume Hangouart escuier Seigneur de Pietre Lequel comparant recongnut comment depuis deux mois encha le sergeant dicelle seigneurie Despummereaulx aueroit trouve et prins par quettre diverses fois et journees les veaux et bestiaux dudict comparant pasturans et faisans dommaige sur deux pieches de terre advestis de bois tenus dicelle seigneurie des Pummereaulx Asscavoir les deux fois en ung bois et taily de deux ans appartenans a Pierre Screve Et les deux aultres foys en ung bois et jectons dun an<sup>224</sup> appartenant a George le Cocq par luy acquis de Me Nicolle Fournier et des hoirs de feuz jehan Ricquier et Martine Fournier Pour lesquelles fourfaictures amendes reparations et interetz aueroit ledict sergeant amene lesdictz bestiaux en prison Lesquelz la femme dudict comparant seroit venue prendre et enmener de son auctorite privee et sans auctorite de justice dudict Hangouart Seigneur des Pummereaulx Lequel a en ladicte seigneurie quy est franche regalle toute justice haulte moienne et basse avecq tous droictz appartenant a icelle et en le troublant en sesdictz droictz possessions et saisines et encourant en quatre amendes de soixante solz parisis chascune de vingt sept deniers flandres le solz pour raison desdictz quatre prises de ses bestiaux trouvez en dommaiges comme dessus est dict desquelles la moitie en appartient a messieurs de chapitre de Sainst Ame en Douay allencontre dudict Seigneur des Pummereaulx Et pardessus ce encoires une aultre amende de soixante solz parisis monnoye dicte et a aplicquier comme dessus pour raison de ladicte spoliation et main enfraincte Surquoy ledict comparant congnoissant son tort en tout ce que dessus est dict a revocque et par ces presentes revocque lesdictz troubles promectant ne plus faire le samblable Et sy a recongu et restably / revocque et restablist en tout et de tous pointz les droictz possessions et saisines dudict Seigneur des Pummereaulx promectant jamais aller au contraire aussy de paier lesdictes amendes avecq tous despens de justice et les dommaiges et interestz des parties selon que iceulx despens dommaiges et interestz seront arbitrez par ordonnance des bailly et hommes dudict Seigneur Soubz lobligation de son corps et tous ses biens meubles cateulx et heritaiges et ceulx de ses hoirs presens et advenir vers tous seigneurs et justices Promectant davantaige ledict comparant recongnostre ces presentes lettres executoires et les faire recongnostre par sadicte femme le auctorisant a ces fins desmaintenant pour lors pardevant messieurs les presidents et gens du conseil<sup>225</sup> provincial Darthois et par tout aillieurs ou requis

---

<sup>224</sup> Folio 202r°.

<sup>225</sup> Folio 202v°.

seront a leurs despens Renonchant a toutes choses contraires a ces presentes Aquoy entretenir paier et furnir nous avons ledict comparant condempne et condempnons par nostre sentence et de son consentement En tesmoing de ce nous avons ces presentes faict seeller de nostre seel Ce fut ainsy faict et passe Le dixhuictiesme jour du mois de mars quinze cens soixante six



Deuxiesme attestation tenue au proces eu au conseil Darthois contre le Sgr du Creux sur lequel est ensiev le deuxiesme appointement cy dessus copie.

Comparurent en leurs personnes Grard Le Roy eaige de cinquante ans jehan de le Herre eaige de quarante ans jehan Leturcq eaige de cinquante ans Anthoine Binault eaige de trente ans et Noel Vignoble eaige de quarante noef ans le tout ou environ tous laboureurs demourans en la terre et seignourie de Pietre paroische Dauberch Lesquelz et chascun deulx apres serment par eulx faict es mains des notaires royaulx sousignez Interogiez tant separement que concordablement par ensamble sur les interrogatoires exhibees ausdictz notaires de la part de Guillaume Hangouart escuier Seigneur de Pietre des Pummeraulx etc On dict jure et affirme pour verite Asscavoir lesdictz le Roy de le Herre le Turcq et Binault Quilz scevent et ont bonne memoire que il y a environ trois ans que ledict Seigneur de Pietre intenta proces au conseil Darthois contre jehan le Preudhomme Seigneur du Creux pour ce que ledict Seigneur du Creux avoit plante ou faict planter plusieurs plantes dhommeaulx ou aultres especes darbres fort avant sur les chemins et flegardz de ladicte seignourie des Pummereaulx beaucoup oultre le front auquel ses heritaiges tenus de ladicte seignourie des Pummereaulx abordent ausdictz chemins et flegardz Et lesdictes plantes mis et assis sy pres des chaussees publiques servans a aller au rietz des Pummereaulx a leglise a la Bassee et aillieurs que la dicte chaussee et passaige de pied en son rendus fort incommodes et malaisez et plus seront lors que lesdictes plantes seront a succession de temps<sup>226</sup> devenues plus grosses que lors Ils astestans et chascun deulx visiterent plusieurs foyz meurement<sup>227</sup> lesdictz plantins et trouverent que la chose alloit comme dessus est dict que mesmes il y avoit plusieurs desdictes plantes plantees et assises bien trois piedz long des frontz et bordz desdictz heritaiges fossez plusieurs deux piedz demy et aultres deux piedz long et arrieres diceulx frontz Et plusieurs fort prez desdictes chaussees comme dessus est dict et en appert encoires presentement comme ilz attestans ont trouve par visitation par eulx faicte deux ou trois foyz depuis quatre ou cinq mois de sorte quil y en a plusieurs desdictes plantes lesquelles touchent presentement ausdictes chaussees grez et pavetz de la voye publique A raison de quoy lesdictes chaussees et passaiges en sont presentement empeschiez et rendus incommodes et seront davantaiges lors que icelles plantes seront par succession de temps devenues plus grosses de sortes que il convient et conviendra aux passans aller aux vrais travers dudict grand chemin Ou fauldra necessairement reculer lesdictes chaussees gretz et pavetz plus avant sur lesdictz grandz chemins au prejudice et amoindrissement diceulx pour faire nouvelles chaussees et piedsentes Disent et affirment que depuis peu de temps que ledict Seigneur de Pietre est en

---

<sup>226</sup> Folio 203r°.

<sup>227</sup> Meurement : avec attention.

nouvelle cause et proces en demandant en matiere de nouvellite contre ledict Seigneur du Creux deffendeur pour les relevemens paremens et fouynnes des meismes fossez chemins et flegardz contre les plantes pour lesquelles il eult il y a environ trois ans le proces susdict ils ont de rechief visite iceulx fossez et ont trouue et treuvent que maintenant par lesdictz relevemens ragrandissemens renduevemens fouynnes et paremens il y a grand nombre desdictes plantes quy estoient les aulcunes bien trois pieds aultres deux piedz demy et aultres deux piedz plusavant que le front desdictz fossez Lesquelles sont maintenant tout pres du front aucunes a un pied pres Dont ilz appercoient bien et treuvent que en faisant lesdictz relevemens ledict deffendeur a faict ralargir lesditz<sup>228</sup> fossez beaucoup plus large que ils ne furent oncques<sup>229</sup> de sorte que a raison dedictz relevemens et plantins il sera cy apres dutout besoing pour les passaiges de piedz reculer sur le grand chemin les chaussees pour soy aidier dicelles Combien que le fosse presentement releve audevant dicelles plantes et chaussees estoit fort petit auparavant ledict relevement et long de ladicte chaussee et lequel navoit jamais de memoire dhomme este releve pare ne rendue Davantaige disent et afferment que ausdictz chemins en question droict audevant de la maison et cense dudict deffendeur au mittan des commenchemens des trois fossez en question il y a ung anchien tilleul appartenant audict demandeur, comme aussy y a aultres tilleux au mittan du chemin devant la maison de Pierre Screve et Martin Hennart quy est aussy le boult de lung des chemins en question pareillement au chemin devant la maison Mahieu Vignoble Item ung aultre au chemin devant la maison Thomas Castricque et Hellin Le Leu tous lesquelz tilleux estans es dictz chemins par tout la dicte seigneurie des Pummereaulx tant au devant desditz chemins et fossez en question et maison dudict deffendeur que aultres estans es aultres chemins appartiennent audict Seigneur de Pietre demandeur desquelz ledict demandeur et ses predicesseurs comme Seigneurs desdictz Pummereaulx ont tousiours joy et prouffite pour la moictie allencontre de Messieurs de St Ame en Douay paisiblement Mesmes ledict Binault les a plusieurs foys espinchie et coppe en temps et saison par le commandement et au prouffict dudict demandeur et depuis ung an ou deux este aucuns qui estoient devenus secqs et au lieu diceulx oster et desrander en replante aultres par sa charge Tous lesquelz chemins cy dessus mentionnez et notamment ceulx en question tous iceulx attestantz et avecq eulx ledict Noel Vignoble ont atteste et afferment estre anchiens chemins de ladicte seigneurie tous habitez de maisons y confrontans et servantz pour aller a la Bassee Lens Arras Fournes Herlies Lille Lorgies Armentieres Bethune Auberch Frommelles rietz des Pummereaulx et a la chappelle dudict riet dict le riet du joncquoy lors que il y avoit chappelle et service divin auparavant<sup>230</sup> que par les grandes longues et calamineuses guerres qui ont parcidevant illecq regne, icelle chappelle a este destruite et consume. Meismement que les chemins en question estant audevant du logis dudict deffendeur sont droict chemin royal venant du bourg place et eglise Dauberch passant a travers dudict riet et dillecq droit pardevant ladicte cense et maison dicelluy deffendeur a la Bassee Lens et Arras Davantaige que ledict riet est aussy environne de plusieurs manoirs et ediffices y confrontans Les habitans desquelles maisons prenent leursdictz chemins pour aller a la Bassee Arras au puich des Pummereaulx au mollin de Mailly et aillieurs par lesdictz chemins en question Lesquels sont tous contingnus audict riet et les plus frequentez et roiaux chemins de ladicte seigneurie, tant a raison que cest le roial chemin dudict bourg Dauberch et des Pummereaulx

---

<sup>228</sup> Folio 203v°.

<sup>229</sup> ils ne furent oncques : ils ne le furent jamais depuis.

<sup>230</sup> Folio 204r°.

pour aller a le Bassee Lens et Arras que aussy pour aller de ladicte seignourie des Pummereaulx a Lille Armentieres et aillieurs et aussy ad cause dicelluy riet chiefz lieu et principal du gros du fief de ladicte seignourie auquel lesdictz chemin en question habordent Affimans pareillement tous lesdictz attestans que les eauwes et courans du hault Pummereaulx seignourie voisines ont leurs cours par lesdictz fossez et chemins en question entre iceulx demandeurs et deffendeur passans dillecq et par iceulx en la seignourie de Pietre fossez de la maison seignouriale dicelle seignourie de Pietre chemins censes terres et heritaiges y gisans et en tenu tant appertenant audict Seigneur de Pietre que aux rentiers et habitans dudict Pietre et dillecq au fosse des Layes Davantaige afferment que Mahieu Vignoble lequel est filz de feu Mahieu filz de jehan, Martin Haiart, Martin Vignoble, Michiel de le Ruyelle, Pierre Catricque, Hellin le Leu, Pierre Lefebvre, Nicollas Fascon, Thomas Catricque, Martin Hennart et Pierre Screve filz de feu jacques quy estoit filz de Mallin, desquelz ils ont bonne congnoissance sont tous rentiers de ladicte seignourie<sup>231</sup> des Pummereaulx y aians tous et chacun deulx maisons jardins terres et heritaiges a eulx appertenaus demourans tous en icelle seignourie et sur leursdictz manoirs et heritaiges, sauf ledict Screve lequel combien quil soit aussy comme sont tous les susnommez riches labourie et heritier en icelle seignourie demeure en ladicte cense et maison dudict deffendeur aiant en le droict dicelle cense par le transport a luy fait par ledict Martin Hennart, lequel y avoit demeure deux ou trois ans audict tiltre de transport aussy a luy fait du consentement dudict deffendeur par ledict Mahieu Vignoble censier precedent Comme aussy congnoissent Pierre Gillon barbu filz de feu jehan lequel trespasa en ladicte seignourie des Pummereaulx en sa maison confrontant sur ledict riet par le deches duquel sont escheuz audict Pierre Gillon plusieurs terres et heritaiges tenus de ladicte seignourie des Pummereaulx et y gisantz, lequel Pierre ilz congnoissent estre homme fort legier et inconstant tant de cerveau parolles que faitz Affermans aussy avoir bonne congnoissance de jehan de le Barre demourant a Herlies en la cense de le Clicqueterie jehan Parquet demourant a Auberch Antoine le Clercq et jehan Henniart demourans ausdictz Pummereaulx Lesquelz de le Barre Parquet le Clercq et Henniart sont tous pareillement rentiers et tenans de ladicte seignourie des Pummereaulx Toutes lesquelles personnes dessusnommees lesdictz attestans ont entendu avoir este ouyes es attestations que ledict Seigneur du Creux a fait tenir puis peu de temps en ladicte Seignourie Affermantz davantaige que iceulx sont quasy tous parens Sicomme que ledictz Mahieu Vignoble et jehan de le Barre sont freres enffans dune mere Ledictz Martin Haiart et la femme dudict Nicollas Fascon sont frere et sœur enfans de la sœur desdictz Mahieu Vignoble et jehan de le Barre Ledict Pierre Gillon est oncle maternel a la femme dudict Martin Henart et a la femme dudict Mahieu Vignoble Lesdictz Martin Hennart et jehan Parquet ont espouze les deux sœurs dudict<sup>232</sup> Pierre Screve censsier dudict deffendeur ledict Martin Vignoble est cousin germain audict Mahieu Vignoble Ledict Michiel de le Ruyelle est cousin audict jehan de le Barre Lesdicts Thomas Catricque et Pierre Catricque sont deux freres germains et cousins germains audict Hellin le Leu, Ledict Pierre le Febvre est parent audict jehan de le Barre Et lesdictz Hennart et le Clercq sont parens et alliez dudict Mathieu Vignoble et possessans en ladicte seignourie plusieurs heritaiges procedans de feu Lambin Vignoble et sa femme, et de feu Andrieu Vignoble en son vivant cousin dudict Mahieu la vefve duquel ledict Henniart a espouse et sy est presentement carton audict Mahieu Tous lesquelz personnaiges et tesmoins oys es attestations dudict Seigneur du Creux deffendeur Iceulx attestans appercoivent et scevent bien passe

---

<sup>231</sup> Folio 204v°.

<sup>232</sup> Folio 205r°.

long temps et encoires presentement se monstrent et estre fort affectionnez au party et cause dudict deffendeur, et se montrent par beaucoup de moiens fort favorisans a la cause dicelluy comme veullans maintenir pour leur propre prouffict une meisme cause et que laffaire leur touche et compete en leur particulier comme aians gaing ou perte en la cause, a raison que (comme ilz attestantz ont entendu et sceuet<sup>233</sup>) Ils se veullent attribuer chacun a soy et en particulier les meismes droictz en ladicte seignourie que faict ledict deffendeur. Oultre ce que plusieurs deulx et leursdictz parens ont fait recognoissances et restablissemens de samblables troubles et differendz que ceulx en question dont ilz ne veullent maintenant riens tenir ains sefforcent de les retracter et annuler comme ilz se vantent et que ilz deposans ont entendu, par ou Ilz se peuvent doubter et craindre entrer en proces contre ledict demandeur pour les meismes raisons faictz et moiens pour lesquelz ilz et leursdictz parens deposent esdictz attestations du deffendeur si comme a apparu ausdictz presens attestans que ledict de le Barre a depuis aucuns ans erigie sur un sien jardin abondant au<sup>234</sup> chemin publicque de ladicte seignourie prez de la fosse Lobel une nefve maison et grange ou il ny avoit jamais eu de memoire dhomme edifices et par ce moien a faict frette sur le chemin et restoupe le viel fosse cours deauwes et essenemens<sup>235</sup> des chemins et y plante arbres en double rancque Comme aussy aueroit ledict Martin Hennart faict certain nouveau fosse et relevement pour raison desquelles fouynnes relevemens et troubles susdictz et aultres iceulx de le Barre Hennart et aultres rentiers de ladicte seignourie chacun en son regard et pour aultant que touchier leur pavoit pour les troubles par eux commis en ont fait recognoissance restablissemens et appoinctemens avecq ledict Seigneur de Pietre demandeur Comme aussy afferment lesdictz attestans avoir bonne congnoissance de jehan Bouillet manouvrier demourant a Ligny le quel depuis sept a huict ans ou environ que ledict Seigneur du Creux deffendeur a hante et demeure en ladicte seignourie des pummereaulx apres le deches de son pere Il a tousiours et quasy continuellement hante ledict Seigneur du Creux lors quil estoit et est en ladicte seignourie, quasy journellement beuvant et mengeant a sa table, le filz duquel Bouillet a long temps servy ledict Seigneur du Creux se estant marie pendant sondict service a la servante dudict deffendeur et depuis tousiours demeure comme encoires fait presentement au logis de sondict maistre a Pummereaulx Lequel jehan Bouillet auparavant la hantise quil a eu comme dessus est dict avecq ledict deffendeur ne hantoit point ou fort peu en ladicte seignourie des Pummereaulx. Pareillement ilz ont bonne congnoissance de Charles le Febvre parci devant bailly de la seignourie de Pietre le quel ne se trouvoit guerres souvent sur ladicte seignourie pour lexercise de son office ne aussy a Pummereaulx tant a raison des mauvais chemins (comme ilz deposans estiment) que aussy quil estoit et est homme fort riche et opulent Et ne se mesloit daultres choses que des werps et contractz Car quant aux aultres affaires desdictes seignouries comme de baillier congie de prendre<sup>236</sup> argilles fouyr copper visiter chemins floz fossez et emprinses et faire aultres choses et actes les Seigneurs les ont tousiours fait et administre eulx meimes comme ilz ont veu faire par feu le Seigneur de Pietre president Darthois depuis par la vefve diceluy, pere et mere dudict demandeur et depuis apres leur deches par iceluy demandeur Seigneur a present desdictes deux seignouries jusques a present et sy a ledict le Febvre fort peu de temps exerce lesdictes offices de bailly Affirmans lesdictz attestans avoir aussy bonne

---

<sup>233</sup> sceuet :sus

<sup>234</sup> Folio 205v°.

<sup>235</sup> Essevemens : ecoulements des eaux.

<sup>236</sup> Folio 206r°.

connoissance de Jacques Wasselin bailly de Fauqhissart Mahieu le Grand et Mahieu Watepaste et que ledict Wasselin est homme fort legier et inconstant de parolles cerveau memoire et faitz comme aussy et fort debile de corps memoire et sens Le dict Mahieu le Grand tant a raison de son anchien eaige comme aultrement, comme aussy est ledict Watepaste, lequel est a present prisonnier au chasteau de Bethune disent et affirment davantaige lesdictz de le Herre le Turcq et Binault que ilz ont bonne memoire que il ya environ deux ans et aulcuns mois que lesdictz Seigneurs de Pietre et du Creux feirent certain appointement en la maison dudict Seigneur du Creux a Pummereaulx presens Monsieur le commissaire Grenet son adioinct et lesdictz Wasselin le Grand et Watepaste touchant les plantins fossez et chemins dont cy dessus est fait mention au commencement de ces presentes attestations Lequel appointement fut fait en la chambre du nouveau logis dudict Seigneur du Creux, entre lesdictes parties collitigantes presens les dessusnommez commissaire adioinct Waselin Watepaste et le Grand et nulz autres ains tous les tesmoings quy estoient adjournees pour lenqueste dudict proces que devoit faire ledict Seigneur commissaire du nombre desquelz estoient Ilz attestans estoient pendant que ledict apointement se tractoit et fut fait entre lesdictes parties precedantes pourmenans avecq lesdictz Bouillet Hennart Screve Thomas Catricque et aultres en grand nombre es court et jardins dudict logis et cense de sorte que apres que le dict appointement fut ainsy comme dessus est dict fait et<sup>237</sup> acheve lesdictz Seigneur commissaire adioinct de Pietre du Creux et Wasselin le Grand et Watepaste sortirent hors dudict neuf logis et vindrent trouver lesdictz tesmoings adjournez leurs declarans lappointement estre fait que lors ledict Seigneur de Pietre delivra argent pour satisfaction de la journee desdictz tesmoings et receut sieuvant de nouveaux menistres de la carite des pauvres de ladicte seignourie des Pummereaulx et peu apres ledict Seigneur du Creux requist present ledict Seigneur commissaire grace et congie de pouvoir lever et applicquer a son prouffict quelques anchiens gretz estans endesoubz terre en l'ung des chemins en question audevant de ladicte maison et cense dudict Seigneur du Creux Ce que ledict Seigneur de Pietre luy accorda, a condition de donner par luy quelque chose lors declaree et specifiee a ladicte carite et pauvrete des Pummereaulx Et entendirent lors et ont tousiours Ils attestans entendu et tenu que par ledict appointement ledict Seigneur du Creux ne pavoit avoir es fosses de la seignourie abordans a tous ses heritaiges que eae de mars, selon que le jour precedent dudict appointement ledict Seigneur du Creux declara pardevant Pierre Watepaste et Noel Creton nottaires (Lequel Creton avoit fait les adjournemens des tesmoingz), que moiennant que a ladvenir il puist planter a pied et demy pres des fossez il cognoissoit aussy plus tous les droictz possessions et saisines dudict Seigneur de Pietre par luy baptisees par la commission sur ce obtenue Meismement vint aussy ledict jour precedent de lappointement ledict Pierre Screve faire audict Seigneur de Pietre la mesme advertence pour appointier lesdictes parties. Mais y resta entre lesdictes parties differend sur ce que ledict Seigneur du Creux ne vollut contribuer a moictie aux despens quy polroient estre deubz au commissaire Lequel on attendoit lendemain Disent et affirment lesdicts le Roy le Turcq et Binault que ilz estoient presens quand ledict demandeur proposa ausdictz Haiart Hennart Screve de le Barre Vignoble et aultres comprinses reconnoissances et restablissemens faitz depuis quatre a cinq mois pardevant<sup>238</sup> Jehan de Faucompre et Martin le Wattier notaires pour scavoir silz entendoient de mener leurs differendz et troubles par eulx commis en justice seur et equitable refuge dung chacun, ou en traictier et appointier

---

<sup>237</sup> Folio 206v°.

<sup>238</sup> Folio 207r°.

aimablement / enquoy il ny eult juduction<sup>239</sup> ne constraincte quelconque. ains que ledict Seigneur de Pietre les remonstra quil leur faisoit ladicte advertence par amitie avant entrer en cause Et que il luy estoit indifferent laquelle des deux voyes ilz choisissent et ne leur scaueroit nul mauuais gre Aquoy lesdictz rentiers se accorderent volontairement a la forme que est contenue es actes desdictz notaires Royaulx sur ce faitz sen monstrant bien contens et joyeux saulf que ledict de le Barre ne se accorda lors avecq les aultres, a raison que il ne volloit contribuer pour sa quantite et coste<sup>240</sup> avecq ledict Seigneur de Pietre et aultres aux mises et sallaies dudict passaige et acte aultrement disoit estre content et bien prest faire et passer avecq les aultres lesdictes reconnoissances restablissemens et appoinctement, Dont ledict Seigneur de Pietre luy dict quil sen conseilla et quil ny vouloit contraindre personne Et quant audict Mahieu Vignoble ledict Seigneur de Pietre le aiant depuis en la meisme heure trouve en chemin en ladicte seignourie des Pummereaulx il luy dict aussy quil sen conseilla Affirmans pareillement lesdictz le Roy de le Herre le Turcq Noel Vignoble et Anthoine Binault que ilz nont veu et sceu que ledict Seigneur de Pietre ayt jamais eu aultres proces contre lesdictz rentiers et habitans des Pummereaulx que ceulx quil a depuis aucuns ans eu contre lesdictz Jehan Parquet Mahieu Vignoble de le Barre et Screve pour les fouynnes et emportz de grez lors faitz sur les chemins de ladicte seignourie des Pummereaulx, Dont y eult reconnoissance par eux faite pardevant MonSr le commissaire du mont Saint Eloy et depuis contre ledict Hennart et ses consors pour les fouynnes bersaulx et emprinses par eulx faictes sur ledict riet des Pummereaulx dict le riet du joncquoy que lesdictz turbateurs recongnurent pardevant eschevins de la ville de le Bassee<sup>241</sup> et au conseil Darthois Ains tousiours veu ledict Seigneur de Pietre traicter ses rentiers et censiers de Pietre et des Pummereaulx en douceur et raison sans leur faire vexations et molestations, pendant grande patience des paiemens termes et arrieraiges quilz leurs doibvent et lequel ilz nont veu jamais user trois fois en sa vie de saisines ou executions pour les paiemens termes et arrieraiges de ses rentes seignourieuses soubrentes arrentemens et rendaiges de censes, combien quil ayt audict quartier et seignouries grand nombre de rentiers et redevances et plusieurs censiers tous lesquelz luy doibvent tousiours arrieraiges et termes sur termes Comme aussy le ont tousiours veu et congnu fort modere voires nonchalant afaict des amendes lesquelles souvent fois et le plus souvent il ne prend et recoit ains les quicte combien que elles luy aient este adjudgies ou promises, ou soient sy notoires que les parties les reconnoissent incontinent comme en confirmation de ce ilz sont bien informez que ledict Seigneur de Pietre ne a exige et prins les amendes a luy recongnues et adjugees par sentence du conseil contre lesdictz Parquet et ses adjointz et contre ledict Hennart et consors et aultres par les avoir quictie Et sy quelque foyz il luy est forche pour conservation de la justice et bien publicque en prendre quelque chose (que advient peu souvent)<sup>242</sup> ce est avecq grande moderation et quictance de grande partie laquelle portion nest par luy emboursee, ains<sup>243</sup> donnee ou aux pauvres ou aux ministres de justice pour les esmouvoir a tenir mieulx la main a la tranquillite et bien desdictes seignouries ou ledict Seigneur semploie a son povoir faire justice plaisir et assistance a ung chacun. Disent et afferment lesdictz attestans quilz on tousiours entendu et veu user en ladicte seignourie de Pietre et des Pummereaulx terres et

---

<sup>239</sup> (?)

<sup>240</sup> Coste : coût.

<sup>241</sup> Folio 207v°.

<sup>242</sup> Les parenthèses figurent dans le texte.

<sup>243</sup> Ains : plutôt.



seignouries allenviron que les rentiers aians heritaiges abordans aux fossez des chemins et flegardz ors quilz aient droict de planter arbres sur les bordz et frontz desdictz fossez et flegardz sy ne peuvent neantmoins<sup>244</sup> relever lesdictz fossez sans congie du Seigneur ou son bailly aultrement que a eauwe de mars, et ne leur est loisible en faisant lesdictz relevemens touchier parer ne renduver contre et du coste desdictz bordz frontz et flegardz, ragrangier lesdictz fossez empescher les chemins ny les voyes pied sentes et chausees, icelles chausees oster ne passer de chevaulx cars et carrette sur icelles et quand ilz ont abattu leursdictz plantins y laisser les fossez sans les remplir ou replanter, le tout a peril damendes reparations et aultrement Dont et Desquelles affirmations attestations et choses dites a este requis lettres ausdictz nottaires de la part dudict Seigneur de Pietre que luy ont estees accordees ces presentes pour luy servir et valloir comme de raison. Faict passe et ainssy atteste en ladicte ville de le Bassee le unziesme de decembre quinze cens soixante et sept pardevant lesdictz nottaires.



Sensieuvent trois pieches quy ont este produictes audict proces

Extrait de certaine anchienne chartre en datte de lan mil et deux cens vingt quatre el mois de juing . Commenchant jo Robers provos de Saint amei de Douai par lotroi de men capitele et jo Eustacies de le Cauchie hom le provost par le creant Marien me feme . et Preron men ainne fil tresore en avant a nos homes des Pumereaus et par leur creantement quil renderont en avant por leur relies et por leur etc<sup>245</sup> Ce quil senssieuyt

Et en aoust quant jo provos et Eustachies u no sergant iermes somons raisnaulement por karier . li home des Pumereaus doibvent le terraige et le disme des Pumereaus coillir et assamblar la u nos volrons dedens le vile . le partie le provost en ung lieu . et le partie eustacie en<sup>246</sup> ung aultre liu . u assamblar ensamble se nos doi volomes . et quant li grains iect battus se li home des Pumereaus sont somons<sup>247</sup> . ils doivent le partie le provost porter a sen bure a Verlengehém . et le partie Eustacie a se maison ale caucie . et sil nel font il lamendent a nos par le loi de le ville et les rentes et les porsons<sup>248</sup> doibvent paier as termines y sont assis a my et a Eustacie qui sommes Seigneur de le ville et si ne doibvent entreprendre es voies de la vile Et sil le font Ils le doivent a noz amender par les homes de le ville. Tos les aultres forfais doibt on jurier par les homes de le ville . tot<sup>249</sup> sont asseurei le prevost de Saint amei et eustacie de le Caucie . et doibvent estre en avant et por co que ce soil ferme cose en avant jo Robers provost de Saint Amei de Doai le conferme par mien seel . Et

---

<sup>244</sup> Folio 208r°.

<sup>245</sup> « et por leur vendages et por leur autres remuemens » dans la chartre originale.

<sup>246</sup> Folio 208v°.

<sup>247</sup> somons : Avertis.

<sup>248</sup> porsous : du verbe "porsoldre" = payer entièrement..

<sup>249</sup> « tot » ? dans l'acte original de 1224 il est écrit : « ki tous ».

licapiteles de Saint Amei par le sien seel . Et jo Eustacies de le Caucie hom le provost le creant par me foy plevie <sup>250</sup> devant le provost et le capitele Saint Amei . et devant mes pers<sup>251</sup> brande le tresorier . et Bernart de le meir . adon del castel . Bauduin de Guing . Rainier de Auceel . bauduin le mayeur de meuzeville .et maroie me feme . et Pieres mes aines fuis par foy plevie le creatent et octroient aussy Et co fu faict en l'an del incarnation nostre Seigneur mil et deux cens et vingt quatre el mois de juing.



Collation faite par nous auditeurs du souverain bailliage de Lille et des appertenances soubz signez a ladicte anchienne chartre saine et entiere en parchemin et escripture

scellee de deux seaulx sur double Queuwe de chire le premier estant emprunt dung homme assis en une chaire mais quand a laultre seel na este possible discerner ce quil y a emprunt a raison de lanchiennete de ladicte chartre et seelz a nous exhibe de la part de Guillaume Hangouart escuier Seigneur de Pietre des Pummereaulx et trouver concorder de mot a mot tesmoing noz saingz cy mis le quinzesme jour de decembre quinze cens soixante et sept ainsy signe . N le grand et G van hulse //



<sup>252</sup>Extrait hors de certain livre couvert de cuyr noyr<sup>253</sup> contenant les briefz terriers et costumes de terres et seignouries de Pietre et des Pummereaulx Ce quil sensieult fol. Soixante douze

Costumes de la terre et seignourie des pummereaulx scituee en la paroisse Dauberch appartenant a messieurs doien prevost et chappitre de leglise Saint Ame en Douay et a Mahieu Desplancques leur parchonnier par indivis tenus en francque regalle du Roy et a mesdictz Seigneurs de Saint Ame et a leurdict perchonier appartiennent toutes les revenues de ladicte terre chacun par moitie tant des rentes seignourialles terraiges droictz seignouriaux relief amendes et toutes les escheanches sans touchier aux dismes que appartiennent a mesdictz Seigneurs seul et sans touchier a aulcunes petites portions que appartiennent audict parchonnier que lon appelle pour son pas ainsy que contiennent les briefz Et en icelle seignourie mesdictz Seigneurs et parchonnier ont toute justice haulte moyenne et basse mais ledict parchonnier tient sa part de mesdictz Seigneurs et haulte justice



Collation faite desdictes costumes de la seignourie des Pummereaulx cy dessus

---

<sup>250</sup> Plevie : du verbe plever = garantir, promettre.

<sup>251</sup> pers, pairs = compagnons.

<sup>252</sup> Folio 209r°.

<sup>253</sup> ADN E2335.Musée.

transcriptes et extraictes hors dudict livre couvert de noyr cuyr a nous auditeurs du souverain bailliaige de Lille et des appartenancez soubz signez exhibe de la part de Guillaume Hangouart escuier Seigneur de Pietre des Pummereaulx etc et trouve concorder Tesmoing noz saings icy mis le dix huictiesme jour de decembre quinze cens soixante et sept Ainsy signe R le Pers, G. van Hulse //



<sup>254</sup> Extraict de certain recepisse du rapport de la seigneurie des Pummereaulx escript en parchemin signe Me Gris notaire et scelle dung seau de chire verde emprainct de deux testes Ce quil sensuyt

A tous ceulx qui ces presentes lettres verront ou orront Doien et chappitre de leglise Saint Ame en Douay Salut Scavoir faisons que nous avons receu de Guillaume Hangouart escuier certaines lettres en parchemin scellees de son seel en cire vermeil contenans forme de Rapport et denombrement, desquelles quy estoient saines en entieres tant en seel comme en escripture ainsy que de prime face pavoit apparoir le teneur sensieult de mot apres aultre Cest le rapport et denombrement que nous Guillaume Hangouart et Jehenne Desplancques faisons et baillons par escript a venerables discreptz et noz treshonorez Seigneurs messeigneurs doien et chappitre de leglise Saint Ame en Douay de tout ung fief et seigneurie que nous tenons de nosdictz Seigneurs nomme le fief et seigneurie des Pummereaulx situe en la paroisse Dauberch en telle grandeur que cy apres sera declare Duquel fief et seigneurie nous avons toute justice haulte moienne et basse par indivis allencontre de nosdictz Seigneurs et aussi grande que eulx reserve la souverainnete et ressort appartient a nosdictz Seigneur / a tenir de eux et aussy franchement que ilz tiennent la moictie dicelle seignouie contre nous en francque regalle du Roy notre Sire.

Item appartient a mesdictz Seigneurs et a nous chascun par moictie tous les flegardz et waresquaix<sup>255</sup> situez en la dicte seigneurie A laquelle seigneurie appartient plusieurs rentes seignouriaux sur plusieurs terres et occupent plusieurs hommes et rentiers

Pierre Preudhomme a cause de sa femme pour six mencaudees de terre cy<sup>256</sup>  
Ledict Pierre pour noef cens au bout de le ruelle des povres  
Ledict Pierre pour terraige rachepte sur six cens de pretz  
Ledict Pierre pour son lieu gardin et eauwes

Protestant que sy mondict fief contenoit plus ou moings que cy dessus est declare / Si le advoue je a tenir de mesdicts Seigneurs sans a eulx ne a moy porter aucun prejudice ors ne pour le temps advenir Tesmoing mon seel cy mis le vingt quatriesme jour du mois de may lan mil chincq cens et unze Ainsy signe G Hangouart en tesmoing de ce nous avons faict mettre et appendre a ces presentes lettres de recepisse le seel aux causes de notredicte Eglise et icelles signes du seing manuel de nostre nottaire et scribe quy furent donnees et accordees a Douay en notre chappitre le neufiesme jour du mois de juillet audict an mil cincq cens et unze Signe Me Gris

---

<sup>254</sup> Folio 209v°.

<sup>255</sup> waresquaix : terres destinées à la pâture publique.

<sup>256</sup> Folio 210r°.

notaire et scelle en double queue de cyre verde ou sont emprainctes deux testes.



Collaction par nous Gilles van Hulse et Nicollas le Grand auditeurs du souverain bailliaige de Lille audict recepisse et trouve concorder et sain et enthier en escriure parchemin signature et seel le XVè jour doctobre XVc soixante et sept Ainsy signe G van Hulse et N le Grand

                                    Reconoissance      Mahieu      Vignoble      demt      a  
Pummereaux de paier le terrage de cinq cens prins en trois mencaudees par luy  
acquises des hoirs de feu jehan le Gillon outre et avecq deux havotz et demy  
davaine que lesdictz cinq cens de terre me doibvent de rente fonsiere et  
seignourialle

A tous ceulx qui ces presentes lettres verront<sup>257</sup> jehan Demirenault licencie es loix a present garde du seel ordinaire estably Arras par le Roy nostre Sire pour seeller et confirmer les contractz marchiez et obligations quy sont faites passees et receus en ladicte ville pais et conte Darthois Entre parties salut Scachesnt tous que pardevant jehan de Faucompre et Martin le Wattier notaires dicelluy Seigneur de par luy mis en la ville de le Bassee ad ce oyr Comparut en sa personne Mahieu Vignoble filz de feu Mahieu Vignoble demourant en la seignourie des Pummereaux et recongnut que ainsy soit que proces et question fut apparant mouvoir entre luy et Guillame Hangouart escuier Seigneur de Pietre et dudict des Pummereaulx Sur ce que ledict Seigneur de Pietre maintenoit avoir droict de perchevoir chasqun an a cause de sadicte seignourie des Pummereaulx droict de terrage sur pluisieurs heritaiges et entre aultres sur trois mencaudees de terres a labour appertenant pour le present audict Mahieu Vignoble par achapt quil en a fait il y a environ six ans aux hoirs de feu jehan le Gillon quy fut filz de Pierre tenues de ladicte Seignourie des Pummereaulx et habouttans icelles trois mencaudees au chemin qui maisne dudict des Pummereaulx au mollin de Mailly daultre lez a lheritaige des hoirs de feu jacques Screve quy fut filz de Maillin et de tiers sens au jardin dudict Mahieu par luy achepte de jehan de le Barre filz de feu Martin quy les avoit eu de la vefve et hoirs de feu jehan Vignoble desquelles trois mencaudees en y a cinq cens tenans audict jardin dicelluy comparant Lesquelz outre et pardessus ledict terrage doibvent audict Hangouart a cause de sadicte seignourie des Pummereaulx de rente fonsiere et seignourialle chascun an deux havotz et demy davaine au terme de noël Or est il que ledict Mahieu Vignoble comparant a depuis quatre ans encha refuse de paier le terrage desdictz cinq cens de terres prins en trois mencaudees dessusdictes Combien que de tout anchienete ces predicesseurs heritiers et occupeurs desdictz cinq cens le aient paye et satisfait Pour auquel proces obvier ledict Mahieu Vignoble comparant veullant user de bonne foy et congnoissance<sup>258</sup> son tort a recongnu et par ces presentes recongnoist debvoir et promect bien et leallement paier audict seigneur Hangouart ses hoirs ou aians cause annuellement heritablement et a tousiours ledict terrage pour lesdictz cinq cens prins es trois mencaudees dessus dictes outre pardessus et avecq lesdictz deux havots et demy

<sup>257</sup> Folio 210v°.  
<sup>258</sup> Folio 211r°.

davaine de rente seignouriale que lesdictz cinq cens doibvent comme dessus est dict et sy a promis de satisfaire au fermier dudict terraige le droict quil en doibt pour lesdictz quatre ans quil auroit este deffaillant de paier ensamble audict Hangouart seigneur dudict des Pummereaulx quatre amendes encourues pour le refus dudict terraige a ladvenant de soixante solz parisis pour chascune desdictes amendes et a tout ce que dessus est dict tenir entretenir paier furnir et accomplir de point en point ainsy et par la maniere dicte avecq pour rendre tous despens que a raison de ce sen polroient ensievir ledict comparant a submis et oblige tous ses biens et heritaiges et ceulx de ses hoirs presens et advenir envers tous seigneurs et justices renonchant a toutes choses contraires a ces presentes Tout ce dessus dict nous ont lesdictz nottaires tesmoingne estre vray par leurs saingz manuelz et nous a leurs tesmoings avons mis a ces presentes lettres ledict seel ordinaire qui furent faictes et passees au villaige dudict Pietre le quatorziesme jour daoust quinze cens soixante quatre.



Commission de reintegrande contre Guillame Le Gillon aiant envoie ses moutons pasturer en et sur la seignourie de Pietre combien quil ne fut masurier et reprins des mains de la justice dudict Pietre ung mouton lequel avoit este prins et saisy pour lamende et cause de la fourfaicture susdicte commise par icelluy Le Gillon

Les Gouverneur President et gens du Conseil Darthois au premier huissier dudict Conseil sur ce requis Salut de la partie de Guillame Hangouart escuier seigneur de Pietre nous a este<sup>259</sup> expose disant que a cause de sadicte seignourie luy competent et appertienent pluisieurs beaulx droix et preeminences a vray et juste tiltre a declaree plusaplain quant mestier sera et entre aultres que nulz aultres que les masuriers de ladicte seignourie ne peuvent mener ny envoyer pasturer leurs blancqz besteaulx es mectes dicelle seignourie a paine de soixante solz parisis damende a luy a applicquier et de paier linterestz que lesdictz bestiaux aueroient fait en faisant lesdictz pasturaiges et toutes et quantefois que les cas se y sont offers et advenus luy est loisible de prendre et faire prendre par ses officiers lung desdictz bestiaux pour son amende telle que dessus et le detenir tant et jusques ad ce que la main levee en ayt este accordee judiciairement Sans ce que ceulx ausquelz appertienent lesdictz bestiaux ny aultres puissent venir prendre la beste prinse pour les causes que dessus de son auctorité privee a paine de ladicte amende et interest comme dict est et de ce joyr user et posséder en toute bonne possession et saisine au veu et sceu de Guillame Le Gillon et de tous aultres que ce ont vullu veoir et scavoir ce nonobstant ledict Guillame ou aultres à son adveu et dont il a eu le fait pour agreable s'est ingere et advanche puis trois mois signamment puis an et jour encha de envoyer pasturer son blancqz bestial es mectes le ladicte seignourie de Pietre combien quil ne soit masurier dicelle seignourie et de ce adverty ledict seigneur aueroit par ses sergens et officiers fait prendre ung mouton ou brebis de son dict troupeau et le detenu prisonnier pour sadicte amende et intérestz Lequel mouton ou brebis ledict Guillame Le Gillon seroit venu prendre et emmener violement et de

---

<sup>259</sup> Folio 211v°.

son auctorite privee et sans auctorite de justice en spoliating la main de sadicte justice et seignourie et le troublant et empeschant en sesdicts droix possessions et saisines pour ladicte main enfraincte et spoliation Lesquelz troubles et empeschemens il n'a voulu réparer réintégrer et remettre ledict mouton ou brebis es mains de sadicte justice comme il estoit au jour de ladicte spoliation ne paier ladicte amende a tort en sans cause<sup>260</sup> requerant sur ce nostre provision Pourquoi nous vous mandons et commectons que a la requeste dudict exposant ou de son procureur faictes expres commandemens de par le roy nostre sire et nous pour justice audict Guillaume Gillon et aultres quil appertiendra sur certains et grosses paines a applicquier audict seigneur Roy que incontinent et sans delay ilz reintegrent restituent et restablissent es mains de sadicte justice ledict mouton ou brebis dessus declare Ainsy par eux prins et leve comme dict est et en cas dopposition refus ou delay donnez et assignez jour competent aux opposans reffusans ou delaians a estre et comparoir pardevant nous audict Conseil pour dire leurs causes dopposition reffus ou delay et proceder en oultre selon raison en rescripvant de ce que fait en aurez de ce faire vous donnons pouvoir donne soubz le contre seel dudict Conseil le quatriesme de juillet quinze cens soixante et deux



Relation de lhuissier aiant mis ladicte commission de reintegrande a execution contre Guillaume Le Gillon

A mes tres honorez et doubttes seigneurs messieurs les gouverneur president et gens du Conseil provincial Darthois Franchois de Forcheville huissier extraordinaire dudict Conseil ressident en la ville de La Bassee bien vostre en tout mesdicts tres honorez et doutez seigneurs plaise vous scavoir que en vertu de la commission de reintegrand de vous donnee au marge de laquelle ce present mon rescript est attache et pour icelles internier a la requeste de noble homme Guillaume Hangouart seigneur de Pietre impetrant dicelle le dix huictiesme jour du mois de juillet quinze cens soixante deux me suis transporte au villaige de la Neuve Chappelle au domicile et par<sup>261</sup> devers la personne de Guillaume Le Gillon auquel apres assistance par moy requisse en parlant a sa personne et en la presence de Ambroise Brunel et Bernard de le Flie tesmoingz a ce par moy appelez luy feys commandement de par le roy nostre sire et de vous mesdicts seigneurs pour justice sur payne de vingt carolus dor damende applicable a sa Maieste quilz euist incontinent et sans delay a remettre et reintegrer les emprinses declarez en ladicte commission de laquelle luy en aueroit fait lecture motz apres aultres lequel me feist responce quil sen garderoit bien et quil sosoit sieuvant celuy aueroye donne et asseigne jour a estre et comparoir pardevant vous mesdictz seigneurs audict Conseil aux plays du mardy premier jour du mois de septembre ensieuvant audict an soixante deux pour lesdictz commandementz veoir decreter et declarer tenir et en oultre faire et proceder comme de raison mesdictz seigneurs tout ce que dessus est dict je vous certiffie estre vray tesmoing mon saing manuel cy mis le jour et an dessusdict



---

<sup>260</sup> Folio 212r°.

<sup>261</sup> Folio 212v°.

**Veu le proces dentre Guillaume Hangouart** escuier seigneur de Pietre impetrant de reintegrande requerant provision dune part Guillaume Le Gillon demurant a Neuve Capelle deffendeur debatant ladicte provision daultre les actes de la court menant desdites parties attestations et aultres pieces quelle ont vullu joindre chacune a sa fin et tout considere nous a meure deliberation avons ausdictes parties comme contraires es faitz par elles posez ordonne et ordonnons veriffier iceulx apres quelles auront eu vision des memoires lune de lautre pour y servir dadditions quy faire le voudra et par instruire ledict proces comme de raison et faisans droict sur la provision requise avons en adigeant icelle audict demandeur ordonne et ordonnons audict Le Gillon deffendeur reintegrer et restablir soubz la justice de Pietre<sup>262</sup> la blanche beste en question ou la valleur dicelle sy elle nestoit recouvrable a charge que ledict seigneur de Pietre sera tenu de baillier caution pour rendre et restituer ce que sera dict et ordonne en diffinitive dudict proces jusques a laquelle avons reserve et reservons les despens de ladicte cause prononchie en jugement le vingt et deuxiesme jour de decembre quinze cens soixante trois



Sentence diffinitive contre Guillaume Le Gillon sur reintegrande et de ne pouvoir envoyer son blancq bestial pasturer sur Pietre

**Les Gouverneur President et gens du Conseil** provincial Darthois a tous ceulx qui ces presentes lettres verront salut comme en matiere de reintegrande proces se soit meu pardevant nous entre Guillaume Hangouart escuier seigneur de Pietre demandeur oudict cas dune part et Guillaume Gillon demourant a Neufcapelle deffendeur et opposant daultre part pour duquel proces avoir intelligence disoit ledict demandeur que entre aultres ses biens luy competoit et appartenoit ladicte terre et seigneurie de Pietre qui estoit france regalle tenue en haulte justice moienne et basse du chappitre de Saint Ame en Douay pour laquelle exercer il avoit bailly hommes de fiefz et masuriers sergeant et aultres officiers et plusieurs beaulx droix previlleges et auctoritez sy estoient de luy tenues plusieurs manoirs fiefz mazures terres et heritaiges les heritiers et proprietaires desquelles mazures avoient congnoissance et judicatures des desheritances adheritances saisines arrestz et toutes actions tant reelles personnelles que mixtes ensamble des fourfaictures et amendes et lesdictz hommes feodaux avoient congnoissance des fiefz et matieres criminelles et haulte justice et viscontiere Ausquelz masuriers apres avoir fait leur devoir vers ledict demandeur ou son bailly pour le fait de leur serment et autrement competoient et appartenoient plusieurs droix<sup>263</sup> previlleges et prerogatives et entre aultres quil leur estoit loisible comme pareillement audict demandeur et a ses censiers et a nulz aultres fussent manans et habitans de ladicte seigneurie ou forains envoyer et faire paistre leurs brebis ou moutons en icelle seigneurie a paine de soixante solz parisis damende applicable audict demandeur touteffois que lesdictz

---

<sup>262</sup> Folio 213r°.

<sup>263</sup> Folio 213v°.

habitans ou forains non masuriers se jugeroient ce faire et de ce ainsy joyr user et posséder estoit ledict demandeur tant par luy que ses predicesseurs et ceulx dont il avoit le droict et cause en toutes bonnes possessions et saisines affirmatives negatives et mixtes par tel et sy long temps quil nestoit memoire du contraire au moins par temps souffissant et vaillable pour bonne possession et saisine avoir acquis garder et retenir paisiblement et publicquement au veu et sceu dudict deffendeur et de tous aultres ce nonobstant icelluy deffendeur ou aultre a son adveu et dont il avoit eu le fait pour agreable sestoit ingeré et advanchié depuis trois mois signament depuis an et jour en regard de lintroduction de ceste presente poursieulte de envoyer pasturer son blancq bestial es mectes de ladicte seigneurie de Pietre Combien quil ne fut et ne soit mazurier dicelle seigneurie en fourfaisant et commectant partant vers ledict demandeur amende de soixante solz parisis Dequoy adverty icelluy demandeur avoit par ses sergears et officiers fait prendre ung mouton du troppeau dudict deffendeur et le detenu prisonnier tant pour ladicte amende que pour linterest que icelluy deffendeur luy pouvoit avoir fait Lequel mouton ledict deffendeur tost après avoit violement repris et emmené en enfreindant partant la main de la justice dudict demandeur et commectant vers luy amende de soixante solz parisis sans avoir depuis voulu reintegrer ledict mouton paier ny gaiges ladicte amende A raison de quoy icelluy demandeur auroit obtenu notre commission et en vertu dicelle par certain huissier dudict conseil fait faire exprès commandemens audict deffendeur restablir et reintegrer ledict mouton paier et gaiger ladicte amende<sup>264</sup> et pour lopposition par luy ad ce cree jour eüst este assigne pardevant nous aux plais y tenus le premier de septembre quinze cens soixante deux Que lors par Maistre Jacques Du Bois avocat pour Mahieu Du Crocq procureur dudict demandeur fut conclud affin que a bonne et juste cause lesdictz commandemens euissent este faitz et en les decretant seroit ledict deffendeur tenu reintegrer ledict mouton ou ung aultre sil estoit mort en estimation de soixante quatre patars pour en faire ce que de raison et oultre condempne en ladicte amende de soixante solz parisis requerant que par provision ladicte reintegrande ~~sil estoit mort~~ se feyt demandant despens Surquoy aux plays du quinziesme jour dudict mois de la part dudict deffendeur auroit au contraire este insiste tendu et conclud par Maistre Guislain Pisson avocat pour Franchois Du Bois son procureur ad ce que en ladicte poursieulte ledict demandeur fut ~~declare~~ declare non recepvable A tort avoit icelle intention yroit ledict deffendeur quicte delivre et absout des fins et conclusions contre luy prises Sy obtiendrait es despens disant pour moiens quil avoit ung bergier aiant sallaire pour garder son blancq bestial et le rendre et renseigner par compte lequel pouvoit avoir mene sondict blancq bestial sur aucunes terres et manoirs appartenans a aucuns particuliers dudict lieu de Pietres du consentement des proprietaires possesseurs ou occupeurs desdictes terres ou manoirs ce que luy estoit loisible faire et en avoit de tout temps ainsy este use et observe Que sy ledict bergier avoit recouvert du mouton en question prins et le ramene en la maison dudict deffendeur sy navoit icelluy deffendeur aucunement mespris autant quil ne le avoit fait prendre ne tirer hors de prisons et partant sy ledict bergier avoit excède les termes de raison et fait chose quy ne fut à faire<sup>265</sup> bien conniut audict demandeur agir contre luy ainsy que bon luy sambleroit sans sadreschier contre ledict deffendeur lequel avoit et a des terres a luy appartenans au terroir dudict Pietre et sy paioit taille contribuoit avecq les manans et habitans dudict Pietre ad cause de quoy devoit aussy

---

<sup>264</sup> Folio 214r°.

<sup>265</sup> Folio 214v°.



proufficter de la commodite et fruictz du pasturage fust es communes voiries et en tout ce quy estoit de la commodite dicelluy villaige de Pietre comme les aultres habitans et mazuriers Sy estoit icelluy deffendeur mazurier audict Pietre par le trespas de de son feu pere quy lavoit achete dung nomme Hennart selon que par les lettres pour ce faictes et passees pouvoit apparoir lesquelles avoient depuis este adhirees<sup>266</sup> et pour en recouvrer avoit convenu audict deffendeur den faire fulminer monition de occultes a l'execution de laquelle icelluy demandeur avoit confesse avoir lesdictes lettres nonobstant lesquelz moiens ledict demandeur eust pour replicques fait persister en ses fins et conclusions fondant icelles en ce quil apparistroit des droix possessions et saisines par luy cy dessus baptizees ensamble de ladicte spoliation et main de justice enfraincte pour raison de quoy y cheoit amende de soixante solz parisis selon la coustume de cedit pays et conte Darthois Sans quil fut loisible à ceulx tenans fiefz et heritaiges cottiers non mazuriers dudict Pietre demourans en ladicte seigneurie faire paistre leur blancq bestial sur les flegardz et chemins dudict Pietre et pareillement sur les terres scituees es mettes de ladicte seigneurie sauf sur celles quy leur appartenoient / nestoit par le congie dudict demandeur et ou aultrefois seroit advenu que aultres non mazuriers auroient use dudict pasturage ce avoit este clandestinement et au desceu dudict demandeur et ses officiers ou par grace et licence diceulx officiers Que ne pouvoit attribuer possession vaillable contre et au prejudice du droict<sup>267</sup> dicelluy demandeur deniant que ledict deffendeur fut mazurier audict Pietre ny que son pere le eust oncques este au contraire veriffiroit que feu Benoist Hennart duquel ledict deffendeur disoit sondict pere avoir achete ung mesure avoit toute sa vie et jusques a son trespas joy paisiblement de ladicte mesure proprietairement et comme tel servy tousiours a la justice dudict Pietre sans contredict plus de vingt cincq ans apres la vendition frauduleuse et simulee dicelle mazure dont se vantoit ledit deffendeur et depuis son trespas estoit ladicte mazure escheue par partaige que ledict Benoist avoit fait des son vivant a ses enfans de leur consentement a Mahieu Henniart son filz povre innocent quy en avoit tousiours joy et encoires faisoit presentement Et oyes lesdictes parties tant es moiens cy dessus que aultres par elles respectivement deduictz et alleghuiez leur euissions ordonne en servir par escript en forme de memoires et joindre a la justification diceulx ce que bon leur sambleroit A quoy elles auroient depuis furny et le tout par nous veu euissions par nostre sentence interlocutoire du vingt deuxiesme jour de decembre soixante trois ordonne ausdictes parties comme contraires en faitz veriffier iceulx après quelles auroient eu vision des memoires lune de laultre pour y servir d'additions quy faire le vouldroit et par instruire ledict proces comme de raison Et faisant droict sur la provision requise euissions icelle adjuge audict demandeur en ordonnant audict deffendeur restablir soubz la justice dudict Pietre la blanche beste en question ou la valleur dicelle sy elle nestoit recouvrable soubz caution que ledict seigneur demandeur seroit tenu bailler pour rendre et restituer ce que seroit dict en definitive dudict proces Sieuvant quoy lesdictes parties aueroient<sup>268</sup> respectivement respondu par additions aux faitz raisons et moiens contenus es memoires lung de laultre et sur tout pardevant commis de la court fait telles enquestes et productions que bon leur aueroit samble contre icelles servy de reproches et de salvations et eulx conclud finalement en droict oudict proces le vingt deuxiesme de janvier soixante cincq accordans icelluy estre par nous veu pour en appoincter comme de raison selon que es exploix actes

---

<sup>266</sup> adhirees: égarées.

<sup>267</sup> Folio 215r<sup>o</sup>.

<sup>268</sup> Folio 215v<sup>o</sup>.

et procedures de la Court estoit et est plus a plain contenu Scavoir faisons que veu ledict proces et tout considere nous a meure deliberation avons en decretant les commandemens mentionez es exploix ordonne et ordonnons audict Le Gillon deffendeur reintegrer soubz la justice de Pietre la blanche beste en question ou la valleur dicelle sy faict ne le a deschergans a pur et a plain la caution baillee par ledict demandeur pour jouir de la provision a luy adjugee Sy avons pour linfraction de la main de justice condempne et condempnons ledict deffendeur en soixante solz parisis damende avecq es despens dudict proces a nostre taxation En tesmoing de ce nous avons faict mettre le seel dudict Conseil ad ces presentes qui furent faictes et prononchees en jugement le vingt deuxiesme jour de janvier quinze cens soixante six

Commission dudict Conseil pour faire mettre a execution la susdicte sentence

Les Gouverneur President et gens du Conseil Darthois au premier huissier dudict Conseil sur ce requis salut Nous vous mandons et commectons que les lettres de sentence de nous donnees parmy lesquelles ces presentes sont infixees interinez et mettez a execution deu de point en point selon leur forme et teneur<sup>269</sup> En constraintant au furnissement dicelles ceulx quy pour ce seront a contraindre par toutes voyes et manieres de justice deues et raisonnables Ce faictes que deffault ny ayt de ce faire vous donnons pouvoir donne soubz le contreseel dudict Conseil le quatriesme jour de janvier quinze cens soixante six



Requestre Guillaume le Gillon pour pouvoir employer au proces susdict une enquete tenue a Pietre sur ung aultre proces de meisme matiere /

*En marge:* face le suppliant sa requeste en jugement pardevant ceulx du conseil en artois, ausquelz sa Majeste mande et commect de le pourveoir sur icelle (partie ouye) Selon quilz verront au cas convenir . faict a Malines le IIIe doctobre an LXVIII / signe Des marees

Au Roy

Remonstre humblement Guillaume le Gillon demourant a le noeufve capelle Comme il ait certain proces en deffendant sur reintegrande pardevant les president et gens de vostre conseil en Athois / allencontre de Guillaume Hangouart escuier Seigneur de Pietre / Pour raison que ledict Seigneur veult dire et maintenir que il nest loisible a aultres que masuriers dudict Pietre mener paistre leurs bestiaux sur le terroir dudict Pietre sans le consentement dudict Seigneur sur peine et amende de soixante solz parisis applicable audict Seigneur Au contraire soustient ledict Remonstrant que la faculte de pouvoir paistre audict terroir que a mazuriers ne concerne et ne sextend sinon pour et au regard de certain riet audict villaige de Pietre / auquel riet ne peuvent mener paistre bestiaux aultres que lesdictz masuriers , et au regard daultres lieux que ledict riet, lon y seroit alle tant ceulx dudict Pietre que et des circonvoisins voires ledict remonstrant et son feu pere de temps immemorial<sup>270</sup> Pour ce moien ledict Seigneur de Pietre pour avoir trouve le blancq bestial dicelluy remonstrant en aultre lieu que ledict riet naueroit en matiere de tenter ladicte reintegrande , et demander amende de soixante solz parisis En laquelle cause tant aueroit este procede que les parties seroient reiglees en enquestes et veriffication, A quoy ledict Seigneur a furny de sa part et a ledict remonstrant presentement a faire la sienne Et pour ce que pour les meismes droict et chose ledict remonstrant a aussy proces contre ledict Seigneur de Pietre pardevant les masuriers dudict Pietre / ou les parties ont fait grosse enquete, et y servy de reproces, ledict remonstrant pour eviter a frays superflus desireroit produire par copie signe desdictz mazuriers, et leur greffier lenqueste quil a fait pardevant lesdictz masuriers et avoir tel effect comme sy les

---

<sup>269</sup> Folio 216r°.

<sup>270</sup> Folio 216v°.

tesmoingz avoient estez oys en ladicte cause de reintegrande pardevant lesdictz de vostre conseil Darthois, Mais il doubte que les juges ne les veillent a ce recepvoir sans sur ce avoir vostre provision de justice en tel cas pertinente icelle treshumblement requerant Pourquoi ces choses considerees plaise a vostre Maieste luy decerner voz lettres patentes en forme de requeste civile adressant ausdictz president et gens de vostre conseil Darthois ausquelz soit mande sy leur appert des choses dictes ou sur tout tant que souffrir doibve En ce cas recoipvent et admettent ledict remonstrant et que vous plaise este admis et receu a pover produire audict proces de reintegrande lenqueste faicte pour ledict remonstrant pardevant lesdictz masuriers de Pietre soubz copie collationee par lesdictz masuriers et greffier quilz envoiront close et seelee, et avoir tel effect comme sy lesdictz tesmoingz de Pietre eussent este productz et oys pardevant lesdictz<sup>271</sup> du conseil en ladicte cause de reintegrande, attendu quil seroit question, de mesme droict, et dentre mesmes parties Consentant audict Seigneur de Pietre quil puisse faire le samblable sy faire veult pour lenqueste quil a faict audict Pietre pardevant ses masuriers . Nonobstant en tout les coustumes estat de la cause, ou rigueur de droict a ce contraire soubz telle refusion de despens quil appertiendra En ce faisant le submettrez a prier Dieu pour vostre noble prosperite /



Sensieuvent pluisieurs pieches quy ont estees productes audict proces de reintegrande contre Guillame le Gillon

Publication faicte a leglise Dauberch de la part du Seigneur de Pietre contenant deffence de ne faire pasturer par non masuriers leurs brebis et moutons sur ladicte seigneurie de Pietre / Pareillement de ne chasser tendre ny tirer a lievres volliles et giber par occasion quil y avoit sur ce placart du Roy Ne ceuillier glans es bois Et aussy commandement de relever les cours deauwes

On vous faict asscavoir par Guillame Hangouart Escuier Seigneur de Pietre des Pummereaulx etc tant par forme de raffressissement que par forme de nouvel edict et statut entant que mestier seroit, usant de lauctorite appertenant a ung Seigneur hault justicier et aussy des droictz franchises usaiges et coustumes appertenant a ladicte seigneurie de Pietre

Que nest et sera loisible a quelque personne soit dededens ladicte seigneurie de Pietre ou forain envoier<sup>272</sup> et faire paistre ses brebis ou moutons en icelle seigneurie sil nest masurier dudict Pietre sans fraulde ou dol et cappable de servir comme tel aux bancqs de ladicte seigneurie aiant faict les debvoirs A quoy sont tenus les masuriers dicelle seigneurie de Pietre A peril descheoir a chascune foys en lamende de soixante solz parisis et de reparer le dommaige

Ce bien entendu que ou lesdictz gardes et bestes ne seront prins en present meffaict neantmoins polra ledict Seigneur ou son lieutenant bailly poursieuvre la garde ou le maistre desdictes bestes pour lesdictes amendes enquoy chascun deulx et cestuy contre quy mieulx plaira audict Seigneur de Pietre adrecher sera escheu et auera fourfaict pour la cause dicte et pour chascune foys ladicte amende de soixante solz parisis

---

<sup>271</sup> Folio 217r°.

<sup>272</sup> Folio 217v°.

Pareillement on fait asscavoir de par ledict Seigneur que nul ne se ingere et advanche de chasser tendre ou tirer a lievres perdris faisans et aultres bestes et volliles de gibier esdictes deux terres et seignouries de Pietre et des Pummereaulx a peril aussy de soixante solz parisis damende avecq confiscation des bastons engins et harnas et que soubz pareille amende ung chascun aiant heritaiges tenus desdictz deux seignouries aient a relever les cours deauwes endedens quinze jours encha Et aussy que nul ne se ingere de coeuillier et abbatre glans es bois et quesnes dudict Seigneur soubz pareille amende

Ceste ordonnance bans rafreschissement et statutz ont este publiez en leglise dudict Auberch par jehan Morel / par la charge dudict Seigneur et de Charles le Febvre bailly dicelles seignouries apres avoir communicque aux bailly et juges desdictz lieux (ausquelz a este faicte ostention et exhibition des previlleges usaiges coustumes et ordonnances anchiennes dont cy dessous est fait mention ) le vingtsiesme jour de septembre XV c soixante et ung Tesmoings les seingz manuelz desdicts Sr bailly hommes et dudict Morel et sousignez Ainsy signe G Hangouart C le Febvre Mahieu de Dours jan Widebien jehan Morel



<sup>273</sup>Plusieurs attestations tenues et jointes audict proces

Comparut en sa personne jehan Morel lieutenant du villaige de le Neufve Cappelle eaigie de quarante sept ans ou environ Lequel apres serment sollempnel par luy fait es mains des nottaires royaulx soubz seigneur et sur les interrogatoires a eulx baillie de la part de Guillame Hangouart escuier Seigneur de Pietre etc a dict jure affirme et atteste pour verite quil a bonne memoire que au mois de septembre quinze cens soixante et ung en leglise Dauberch jour de dimenche apres la grande messe chantee de avoir publie certaines ordonnanches et deffences contenant plusieurs edictz et statutz pour le fait du pasturaige des brebis et moutons non permys aus manans et habitans dudict Pietre ny aux forains chirconvoisins quy ne sont masuriers dudict Pietre comme plus a plain est contenu et declare par lescript de ce faisant mention en une demye feuille de pappier en datte du vingtsixiesme jour de septembre oudict an soixante et ung seigne entre aultres seings de luy deposant et que le contenu audict escript aueroit este publie et lut motz apres aultres en leglise dudict Auberch par luy quy deppose le jour et an dessusdict Et ce a la requeste dudict Seigneur de Pietre pour donner advertence a ung chascun publiquement affin deviter cause dignorance Dont et desquelles attestation affirmation et choses dictes de la part dudict Seigneur de Pietre nous a este requis ces presentes a luy accorde pour valloir a son intention sy avant que de raison fait et ainsy atteste en la ville de le Bassee le vingt et ungiesme jour de janvier XV c soixante deux pardevant notaires royaulx soubz signez Ainsy signe Fascon De Faucompre



<sup>274</sup>Aultre attestation

---

<sup>273</sup> Folio 218r°.

<sup>274</sup> Folio 218v°.

Comparurent en leurs personnes jehan le Turcq eaige de quarante sept ans jehan Widebien eaigie de quarante deux ans jehan Warembours eaige de soixante trois ans jehan du Bos eaigie de XL ans jehan Vennin eaigie de quarante sept ans jacques Laden eaigie de quarante deux ans Rolland Wydebien eaigie de trente deux ans Pierre Mallebrancque eaigie de vingt quatre ans jacquemine Darras femme de Pierre du Pret eaige de cinquante six ans et jacques Rozeau eaigie de vingt trois le tout ou environ Tous labouriers mannouvriers manans et habitans de la seigneurie de Pietre , saulf ledict Laden quy est demourant en la seigneurie de le Venthye Lesquelz et chascun deulx respectivement par ensambles apres serment sollempnel par eulx faitz es mains des nottaires royaulx soubzsignez Et sur les interrogatoires a eulx baillyes de la part de Guillame Hangouart escuier Seigneur de Pietre etc Ont dict jure affirme et atteste pour verite Asscavoir lesdicts jehan le Turcq jehan Wydebien jehan Warembours et jehan du Bos quilz sont bien memoratifz que au mois de may quinze cens cinquante noef avant pasques sur ce que ledict Seigneur de Pietre avoit traictie et mys en cause Guillame le Gillon demourant a le neufve cappelle pretendant contre luy deux amendes de soixante solz parisis pour par deux et divers foys avoir prins ses blancqz bestiaux sur ladicte seigneurie de Pietre es gasquieres et camp de Chretienne Guillet Sievant ce et la cause appelee pardevant la justice dudict Pietre par jour de plais Afferment que icelluy le Gillon lors proposyt en deffence quil estoit daccord pour icelles amendes avecq ledict Seigneur de Pietre moiennant deux bottes de lin Ce que ledict Seigneur lors en personne denyoit et sur ce point icelluy le Gillon replicquant ledict appoinctement<sup>275</sup> disoit icelluy avoir este fait par ses grandes prieres en la maison dudict Seigneur de Pietre a Lille / Soubz condition quil promectoit audict Seigneur comme encoire il faisoit audict plais de plus souffrir ne faire mener ses moutons en et sur ladicte seigneurie de Pietre jusques la fin du mois dapvril enssieuvant ledict mois de mars cinquante noef a peril de paie les amendes de soixante solz parisis pour chascune foys que sesdictz bestiaux y seroient trouvez et pour plus serchiorer<sup>276</sup> lappoinctement mis en fait par ledict le Gillon disoit que oultre et pardessus lesdictes deux bottes de lin il devoit paier au bailly de ladicte seigneurie de Pietre six patars et au sergeant quatre patars que ledict le Gillon payt lors en jugement presens lesdictz attestans Affirent que ledict Seigneur declairyt lors audict le Gillon quil aymoist beaucoup mieulx laisser couller la cause quil avoit contre luy ad cause desdictes amendes que de accepter ledict apoinctement et ce affin de esclerchir et luy monstrier le droict de pasturaige et le privilege des mazuriers quil a en sadicte terre et seigneurie de Pietre Affin de donner exemple et contentement a plusieurs aultres forains quy accoustoient apres le fin dudict differend quy journellement volloient entreprendre sur le fait dudict pasturaige /Distent encoire quilz ont oy par plusieurs et diverses fois par ledict le Gillon faire offre audict Seigneur de Pietre de quelque nombre de pieche dor ou argent pour luy donner congie ou licence de pover faire paistre sesdictz blancqz bestiaux sur ladicte seigneurie de Pietre et a ces fins le faire mazurier Ce que ledict Seigneur de Pietre ne le vollut accepter pour obvier aux dhommaiges et interestz que ses subiectz et rentiers polroient souffrir sur leurs camps et advestures Et ce que ledict Seigneur le faisoit nestoit pour prouffiter des amendes Ains estoit pour garder le droict de ses subiectz mazuriers // Sy ont affirme tous<sup>277</sup> lesdictz comparans par ensamble que nonobstant lappoinctement dessusdict icelluy le Gillon ne se seroit abstenu de mener ou faire mener sesdictz blancqz bestiaux sur ladicte

---

<sup>275</sup> Folio 219r°.

<sup>276</sup> Serchiorer ?

<sup>277</sup> Folio 219v°.

seigneurie de Pietre chemins et flegardz Meisme sur les terre et heritaiges dudict Seigneur que tient en cesse<sup>278</sup> ledict jehan de Vennin sans avoir congie ou licence dudict jehan Vennin Affirmant par ledict jacques Laden que le bregier dudict le Gillon aueroit fait le samblable sur ses terres quil a audict Pietre et que nonobstant les remonstrance quil faisoit audict bergier de soy retirer hors de ladicte seigneurie naueroit vollut a ce acquiesser Ains y seroit demourer au grand regre dudict depposant Affirmans par lesdictz jehan de March et ladicte jacqueline Darras quilz ont veu par pluisieurs foys ledict le Gillon avecq son bregier venir garder sesdictes blancqs bestiaux sur ladicte Seigneurie de Pietre estant guerny icelluy le Gillon dune noyre picque dissant et affirmant par ledict jehan Vennin que le bregier dudict le Gillon nomme Nicollas du Quesne luy a par pluisieurs foy declare que ledict le Gillon son maistre luy commandoit de mener paistre ses blancqz bestiaux sur ladicte seigneurie de Pietre et quil y allyt hardiment et que pour ce il en feroit bien avecq le Seigneur Affirmans outre tous lesdictz attestans que sy les manans et habitans des villaiges chirconvoisins dudict Pietre avoient faculte de povoir mener leurs besteaux paistre en et sur ladicte seigneurie de Pietre sans estre mazuriers que ledict previllege porteroit grand dhommaiges et interestz aux manans et habitans aians mannoirs et terres audict lieu de Pietre eu regard au grand nombre de besteaux que les labouriers chirconvoisins tiennent et quil ne seroit nullement possible de y<sup>279</sup> amener pasturer sy grand nombre de besteaux sans faire grand dhommaiges sur les heritaiges et advestures quy sont audict terroir de Pietre jointct ad ce que grandz inconveniens eut pour ces causes sen polroient ensievir comme il est advenu pour ces meismes raisons en ladicte seigneurie de Pietre en la personne de Peronne Maumarye femme de Anthoine Sanche pour lors censier dudict Pietre Laquelle au contend du bregier de Anssel de March estant forain de ladicte seigneurie aiant mene sesdictz blancqs besteaux sur les champs dudict Anthoine Sanche et que ledict Anthoine Sanche ne volloit souffrir icelle femme estant presente et assistente avecq ledict Anthoine son mary fut par icelluy bregier tuee, et ledict feu son mary fort blechie comme a declare ladicte Peronne Sanche fille audict Anthoine et Peronne Maumarye Et jehan le Turcq quy ont eu bonne congnoissance dudict delyct dont et desquelles attestations affirmations et choses dites de la part dudict Guillame Hangouart escuier Seigneur dudict Pietre nous a este requis lettres quy sont ces presentes a luy accordees pour valloir et servir a son intention sy avant que de raison fait et ainsy atteste en la ville de le Bassee le vingt et ungiesme jour de janvier quinze cens soixante deux pardevant nottaires royaulx soubz signez / Ainsy signe Fascon j de Faucompre



#### Aultre Attestation

Comparurent en leurs personnes Nicollas Bourel labourier eaige de soixante quatre ans Grard le Roy eaigie de quarante six ans, jehan Warembourg eaigie de soixante trois ans Noel Vignoble eaigie de quarante<sup>280</sup> ans jehan le Turcq eaigie de quarante sept ans jehan Marcheigie de cinquante sept ans jehan Wydebien eaigie de

---

<sup>278</sup> en censse ?.

<sup>279</sup> Folio 220r°.

<sup>280</sup> Folio 220v°

quarante deux ans jehan de le Barre eaigie de trente trois ans jehan Vennin eaigie de quarante sept ans Pelonne Sanche vefve de feu Franchois Carpentier eaigie de soixante deux ans Peronne Bocquet vefve de feu Mahieu de Ghuery eaigie de soixante neuf ans Mariette Montaine vefve de feu jehan du Bois eaigie de quarante ans jacques Laden<sup>281</sup> eaigie de quarante deux ans et Pierre Mallebrancque eaigie de trente quatre ans le tout ou environ Tous labouriers et manouvriers manans et habitans en la terre et seignourie de Pietre Tant saulf icelluy de le Barre et jacques Laden<sup>281</sup> quy sont demourans si comme ledict de le Barre a le Clicquetrie paroisse de Herlies et icelluy Laden<sup>281</sup> a le Venthie Lesquelz et chacun deulx apres serment par eulx faitz es mains des notaires royaux soubz signez et sur les interrogatoires a eulx baillyes<sup>281</sup> de la part de Guillaume Hangouart escuier Seigneur dudict Pietre ont dict jure afferme et atteste pour verite tant particulierement que concordablement par ensambles quilz scevet que audict Seigneur de Pietre entre aultres ses biens terres et seignourie dudict Pietre luy compete et appertient la terre et seignourie dudict Pietre a luy succedez et escheubz par le trespas de feu Maistre Guillaume Hangouart son pere a son trespas president Darthois A cause de laquelle seignourie il a toute justice viccontiere et fonssiere / En laquelle seignourie de Pietre y a plusieurs manans quy sont mazuriers tenans heritaiges tenus dudict Seigneur de Pietre quy sont vulgairement nommez mazures A cause de quoy ilz sont privelegiez et ont la faculte de pour cachier mener et faire cachier leurs bestiaux<sup>282</sup> et par especial leurs brebis et moutons Sans que pour ce ledict Seigneur de Pietre leur puisse pretendre ny demander aulcunes amendes / Ce que ne peuvent faire les aultres quy ne sont mazuriers dudict Pietre Especiallement ceulx quy sont demourant hors de la seignourie dudict Pietre et que sy leurs bestiaux brebis et moutons y estoient trouvez icelluy Seigneur de Pietre par ses officiers les polroit faire prendre , pour y prendre et avoir par chacune foys quelles y seroient trouvees une amende de soixante solz parisis Comme lesdictz attestans ont de tout temps de leur congnoissance en avoir veu tousiours ainsy user par les Seigneurs dudict Pietre et comme ilz ont aussy oy rechiter le samblable avoir este fait par leurs predicesseurs Affermant davantaige par lesdictes Pelonne Sanche Peronne Bocquet et Marie Montaine concordablement par ensamble quelles scevent et comme elles ont aussy oy dire et maintenir par leurs predicesseurs que les manans dudict Pietre quy ne sont mazuriers que peuvent pareillement mener cachier ny faire cachier leurs moutons ou brebis sur la terre et seignourie dudict Pietre sans le gre ou licence dudict Seigneur A tel effect que sy ledict Seigneur ou ses officiers y trouvoit bestiaux a eulx appartenant escheroient en autel amende de soixante solz parisis que les aultres quy ne sont manans dudict Pietre Et ce scevent par ainsy en avoir veu tousiours user Affermans outre tous concordablement par ensambles que pour avoir le droict et privilege de pover mener paistre blancqs bestiaux sur le terroir et seignourie dudict Pietre plusieurs se sont fait mazuriers de ladicte seignourie et ne peuvent estre<sup>283</sup> mazurier que par le gre consentement et accord des seigneurs dudict Pietre Lesquelz mazuriers ont puissance et faculte de entendre au fait de la justice dudict Pietre Ce que ne peuvent faire ceulx quy ne sont mazuriers Affermant par ledict jehan de le Barre seul quil a oy dire a feu Martin de le Barre son pere pour lors demourant a Pummereaulx paroisse Dauberch quy tenoit grand troupeau de blancq besteaulx que auparavant que feu Maistre Guillaume Hangouart President Darthois Seigneur dudict Pietre luy eust baille et erigie en mazure certaine piece de terre quil tenoit de ladicte seignourie de Pietre,

---

<sup>281</sup> a eulx baillyes: par eux acceptés

<sup>282</sup> Folio 221r°

<sup>283</sup> Folio 221v°



se abstenoit de envoyer sesdictes blancqs besteaulx sur la seigneurie dudict Pietre Et que depuis ledict Martin de le Barre par le moyen de ladicte mazure avoit la faculte de povoir cachier ses brebis et moutons ce quil averoit fait tousiours meme depuis Scet que depuis ladicte pieche de terre en mazure averoit este vendue a Noel de le Barre et depuis encoires racepte par Pierre Haiart audict Noel de le Barre pour avoir la faculte de povoir mener et pasturer ses blancqs besteaulx sur la seigneurie dudict Pietre Sy ont affirme aussy par ensamble lesdictz Nicollas Bourel et jehan le Turcq que comme en leur jeunesse estans bregiers Asscavoir ledict Bourel en la maison de Thomas Boidin demourant en la paroisse de le Ventie et ledict le Turcq en la maison de jehan Toullouze aussy demourant en la paroisse de le Ventie Ilz averoient par plusieurs et diverses foys este prins avec leurs besteaulx estans pasturans sur le terroir dudict Pietre et / ce par les sergents et officiers de la seigneurie dudict Pietre / Lesquelz sergents pour ces causes pretendoient quelques amendes de soixante solz et ce du tout au (?) que lesdictz Tollouze et Boidin nestoient mazurier de ladicte seigneurie de Pietre et desquelles amendes<sup>284</sup> pour avoir main levee desdictes blancqs besteaulx Lesdictz Boidin et Toullouze pachifioient<sup>285</sup> pour les amendes avecq les bailly et officiers de ladicte seigneurie et estoit pour lors Seigneur du tmps dudict Boidin Mahieu Desplancques ancetre audict Seigneur de Pietre ad present et du temps dudict Toullouze ledict Maistre Guillaume Hangouart president Darthois // Scevent que pour ces causes et au meismes temps lesdictz Boidin et Toullouze ilz acheterent chascun une pieche de terre de ladicte Seigneurie de Pietre et furent icelles deux pieches de terre applicquies a mazures par le gre et consentement desdictz Seigneur Et lesquelz achapts se faisoient affin davoit samblable previlege que les autres mazuriers dudict Pietre / Comme a afferme le samblable Grard le Roy cy devant denomme par avoir oy rechiter le samblable proposition dessusdictes par ledict Thomas Boidin Sur le confort de ce dessusdict ladicte Mariette Montaine seulle affirme que elle estant en son josne eaigie demourant audict Pietre y avoit ung sergent audict lieu nomme jehan du Bos lequel elle aueroit depuis espouze avoir veu icelluy prendre par pluisieurs et diverses foys les blancqs besteaulx quil trouvoit paisant sur ladicte Seigneurie de Pietre appertenant a gens non mazuriers et comme il luy a depuis relate dicelles prises en estoit paye et contente Affermant aussy par ledict jehan de March dont il se recorde que feu Anssel de March son pere lors demourant en la cense de Lestree paroisse de le Ventie quil achepta ung lieu manoir tenu de ladicte seigneurie de Pietre Lequel il feyt amazurer et ce du tout pour avoir le previlege et droict de mazuraige quy estoit de povoir cachier et pasturer sur ladicte seigneurie de Pietre<sup>286</sup> ses blancqs besteaulx dissant et affirmant par ledict jehan du Bois ad present sergent dudict Pietre quil y a environ six a sept ans en vertu de son office de sergent il print ung mouton quil trouvyt paisant sur ladicte seigneurie appertenant a Pierre de le Becq demourant a Ligny le petit Lequel de le Becq aiant entendu que ledict Seigneur avoit les meismes privileges cy dessus declare vint le lendemain faire le contentement de Pierre Hennart lieutenant de ladicte seigneurie pour lamende et feyt le contentement de luy deposant pour sa prise Promectant que pour le temps advenir il deffendrait a ses bregiers de non plus mener ny cacher sesdictz brebis sur ladicte seigneurie de Pietre Ce que depuis icelluy de le Becq et ses bregiers ilz se seroient abstenu dont et desquelles attestations affirmation et choses dictes de la part dudict Guillaume Hangouart escuier Seigneur dudict Pietre nous a este requis lettres quy sont ces presentes pour luy valloir et servir a son

---

<sup>284</sup> Folio 222r°

<sup>285</sup> Du verbe « pachifier » : faire un accord

<sup>286</sup> Folio 222v°.

intention sy avant que de raison fait et ainsy atteste en la ville de le Bassee Le vingt et ungiesme jour de janvier quinze cens soixante deux pardevant notaires royaulx soubz seigneurz Ainsy signe Fascon j de Faucompre



#### Aultre attestation

Comparurent en leurs personnes jehan du Bos sergeant de la seignourie de Pietre eaigie de vingt huict ans Rolland Wydebien eaigie de trente deux ans / Pierre Mallebrancque eaigie de vingt quatre ans / et jacques Rozeau bregier a Grard le Roy eaigie de vingt trois ans le tout ou environ demourant a Pietre Lesquelz et chascun deulx concordablement par ensamble apres serment sollempnellement par eulx faicts es mains des notaires royaulx soubz signez et sur les interrogatoires a eulx baillies de la part de<sup>287</sup> Guillaume Hangouart escuier Seigneur de Pietre etc Asscavoir lesdictz jehan du Bos Rolland Wydebien et Pierre Malbrancque quilz sont recordz et memoratifz que au mois dapvril dernier passe Icelluy jehan du Bos en la presence desdictz dessusnommez aiant trouve le bregier de Guillaume le Gillon demourant a le Neufve Cappelle sur ung camp appartenant audict Seigneur de Pietre seant au terroir dudict lieu du long lissue de la maison et cense dudict Seigneur que tient jehan Vennin nomme le camp a le pierrette Pourquoi icelluy sergeant print et saisit ung mouton du troppeau des blancqs bestes appartenant audict le Gillon pretendans sur icelluy prendre une amende de soixante solz parisis pour ce quil nest permis en ladicte seignourie de Pietre que les forains labouriers non mazuriers en ladicte seignourie de Pietre y pover mener paistre leurs blancqs besteaux sur payne de ladicte amende Et Icelluy mouton et prinse remonstre par ledict sergeant ausdictz Wydebien Mallebrancque le menynt en la maison Grard le Roy censsier audict Seigneur de Pietre auquel il feyt commandement pour justice de le non rendre a personne que ce ne fut sans avoir cauxion pour ladicte amende Affermant par ledict jacques Rozeau bregier dudict Grard le Roy que environ quatre ou cinq jours apres ladicte prinse faicte estant en aucunes terres appartenant audict Seigneur de Pietre avecq son troppeau de blancq bestes ou estoit le mouton prins par icelluy sergeant appartenant audict le Gillon / Perchent venir ledict le Gillon son bregier et ung nomme Cornille Couvreur guerny de long bastons et eulx arrivez icelluy le Gillon demandit audict attestant sil navoit en son troppeau trop dune beste aquoy il feyt response quil en y avoit une que la justice de Pietre y avoit mis dont il navoit charge le rendre Ce oyant par ledict le Gillon et assistens sans aultres parolles entrerent au troppeau dudict attestant et recongnurent<sup>288</sup> ledict mouton Lequel ilz prindrent et leporterent sans le contentement de luy deposant ne prendre regard a ce que ledict mouton estoit mys audict troppeau par ladicte justice Dont et desquelles attestations affirmations et choses dictes de la part dudict Guillaume Hangouart escuier Seigneur dudict Pietre etc nous a este requis ces presentes a luy accordees pour valloir a son intention sy avant que de raison fait et ainsy atteste en la ville de le Bassee le vingt et ungiesme jour de janvier quinze cens soixante deux pardevant notaires royaulx soubz signez Ainsy signe Fascon j de Faucompre



---

<sup>287</sup> Folio 223r°.

<sup>288</sup> Folio 223v°.

### Aultre attestation

Comparurent en leurs personnes jehan le Turcq labourier demourant a Pietre eaigie de quarante sept ans et Loys Hennart aussy labourier demourant audict lieu eaigie de trente deux ans Lesquelz et chascun deulx respectivement apres serment solempnel par eulx faictz es mains des notaires royaulx soubz signez et sur les interrogatoires a eulx baillyes de la part de Guillame Hangouart escuier Seigneur de Pietre etc Ont dict jure affirme et atteste pour verite que ce jourdhuy vingt quatriesme jour de ce present mois de janvier quinze cens soixante deux ils se sont trouvez en la maison de Catherine de Raye vefve de feu jehan de le Lacherie demourante audict Pietre eaigie de soixante cincq ans comme elle a declare ausdictz attestans / estant fort debille de ses membres et du tout impotente / Que entre aultres interrogatoires par eulx faictz a ladicte Catheline a la requeste dudict Seigneur de Pietre / Leur a declare que ledict Seigneur a droict en sadicte seignourie de Pietre et dequoy elle<sup>289</sup> a veu user oy dire et maintenir de tous son temps et memoire / que nulz labouriers tenans blancqs besteaulx soient forains de ladicte seignourie ou manans ne peuvent faire mener ou faire mener paistre leursdicts blancq bestes sur les chemins flegardz terres et heritaigez tenus de ladicte seignourie de Pietre signament que silz ne sont mazuriers dudict lieu / et que ladicte Catheline laueroit tousiours ainsy ouy dire et maintenir a deffunct Pierre de Raye son pere quy termina il y a environ treize a quatorze ans et au jour de son trespas eaigie de quatre vingt ans / que icelluy Seigneur de Pietre avoit le previllege que dessus en sadicte seignourie et que personne ne pavoit y mener paistre ses blancqs bestes fut manant ou forain sil nestoit mazurier a paine descheoir en amende vers ledict Seigneur dont et desquelles attestations affirmation et choses dictes de la part dudict Seigneur de Pietre nous a este requis lettres quy sont ces presentes a luy accordes pour valloir a son intention sy avant que de raison faict et ainsy atteste en la ville de le Bassee le vingt quatriesme jour de janvier quinze cens soixante deux pardevant notaires royaulx soubz signez Ainsy signe Fascon j de Faucompre



### Aultre attestation

Comparurent en leurs personnes Martin Hennart eaigie de trente ans et Laurens Hennart son frere aussy eaigie de vingt sept ans le tout ou environ demourans Asscavoir ledict Martin en la paroisse Dauberch et ledict Laurens au Maisnil Lesquelz apres serment sollempnelz par eulx faictz es mains des notaires royaulx soubz seigneur et sur les interrogatoires a eulx baillyes de<sup>290</sup> la part de Guillame Hangouart escuier Seigneur de Pietre etc Ont dict jure atteste et concordablement affirme quilz sont memoratif que il y a environ six a sept ans eulx estans encoires demourans en la maison de Pierre Hennart leur pere pour lors lieutenant de ladicte seignourie de Pietre / jehan du Bos sergeant dudict lieu amenyt en la maison dudict Hennart son pere garny soubz sa main dun mouton quil disoit avoir prins au troppeau de Pierre de le Becq demourant a Lorgies le aiant trouve pasturant sur une gasquiere gisant en

---

<sup>289</sup> Folio 224r°.

<sup>290</sup> Folio 224v°.

ladicte seignourie de Pietre Pourquoi il pretendoit amende de soixante solz parisis Au moien que ledict Pierre de le Becq nestoit mazurier dicelle seignourie / Et icelluy mouton pour ces causes fut lors mys soubz les mains dudict Hennart pour justice Affirmant que ung jour ou deux ensieuvant ladicte prinse icelluy Pierre de le Becq aiant entendu le droict et privilege que ledict Seigneur de Pietre avoit audict lieu seroit venus devers icelluy Hennart pour le paier et satisfaire de ladicte amende affin davoit main levee dudict mouton De quoy il fut lors satisfait et ledict sergent pour sa prinse Mais ne scevent pour combien ny quelz deniers il desboursyt Dont et desquelles attetations affirmation et choses dites de la part dudict Seigneur de Pietre nous a este requis lettres quy sont ces presentes a luy accordees pour valloir et servir a son intention sy avant que de raison faict et ainsy atteste en la ville de le Bassee ce XXIIIle jour de janvier quinze cens soixante deux pardevant nottaires royaulx soubz signez / Ainsy signe Fascon  
j de Faucompre



#### Aultre attestation

Comparut en sa personne Thomas Corion bregier demt presentement en la maison de Mahieu Vignoble paroisse<sup>291</sup> Dauberch eaigie de cinquante ans ou environ Lequel apres serment par luy faict es mains des notaires royaulx soubz signez et sur les interrogatoires a eulx baillyes de la part de Guillame Hangouart escuier Seigneur de Pietre etc Que depuis quil a congnoissance et le moien de gagner sa vie Il se seroit tousiours instruit de garder les brebis et moutons et par plusieurs annees es villaiges chirconvoisins de la terre et seignourie dudict Pietre Sicomme audict lieu Dauberch a le cense de Lestree paroisse de le Venthie en la maison de jehan Fascon et en aultres pluisieurs lieux / pendant lequel temps il a tousiours entendu oy dire et reciter par ses maistres quil ne luy estoit loisible de mener ou faire mener paistre ses blancqs besteaulx sur la terre et seignourie dudict Pietre au moyen quilz estoient forains et non mazuriers de ladicte seignourie de Pietre Et que ledict seigneur de Pietre avoit tel privilege en ladicte seignourie que nulz ny aucuns labouriers tenans blancq besteaulx non mazurier de ladicte seignourie ne pvoient faire pasturer leursdicts blancq besteaulx sur les chemins flegardz et terres deppendantes dicelle seignourie sans en eucheoir en amende de soixante solz parisis ou cas quelles y fussent prins et trouvees dict aussy que Mahieu Vignoble ad present son maistre luy a tousiours interdict et deffendu de non mener sedictz blancq besteaulx sur ladicte seignourie Et ce ad cause quil nest mazurier audict lieu de Pietre Dont et desquelles attestation affirmation et choses dites de la part dudict Guillame Hangourt Seigneur dudict Pietre nous a requis ces presentes a luy accordes pour valloir et servir a son intention sy avant que de raison faict et ainsy atteste en la ville de le Bassee le vingt quatriesme jour de janvier quinze cens soixante deux pardevant notaire royaulx soubz signez Ainsy signe Fascon j de Faucompre /



---

<sup>291</sup> Folio 225r°.

<sup>292</sup>Aultre attestation

Comparut en sa personne Charles le Febvre, bailly de la terre et seignourie de pietre eaigie de trente quatre ans ou environ Lequel apres serment sollempnel par luy faict es mains des nottaires Royaulx soubz seigneur et sur les interrogatoires a eulx baillye de la part de Guillaume Hangouart escuier Seigneur de Pietre etc a dict jure affirme et atteste que environ le mois de mars quinze cens cinquante noeuf il estoit comme bailly tenant ses plais au jour ordinaire en ladicte seignourie de Pietre, Auquel lieu le Seigneur dudict lieu faisoit poursieulte contre Guillaume Le Gillon pour aulcunes amendes par luy fourfaictes touchant le pasturaige de ses blancqs besteaulx Les ayant faict mener paistre sur ladicte seignourie de Pietre Pourquoi ledict Seigneur pretendoit deux amendes de soixante solz parisis Et en appellant ladicte cause ledict Le Gillon en desfence mÿt en faict avoir appoinctement avecq ledict Seigneur pour deux aultres amendes paravant litigieux entre ledict Seigneur et Le Gillon Par lequel appoinctement en paiant deux bottes de lin audict Seigneur six patars audict attestant bailly / et quatre patars au sergeant pour sa prinse / Ledict Seigneur tenoit quicte ledict Le Gillon desdictes deux amendes et luy permectoit de faire mener sesdictes blancq besteaulx sur ladicte seignourie de Pietre jusques en la fin dapvril ensievant ledict appoinctement Lesquelz six patars et quatre patars furent lors payez dont ledict attestant sen tint content Affirmant davantaige que en faisant et proposant laccord par ledict Le Gillon il mÿt en faict de bouche que ledict Seigneur de Pietre luy avoit donne licence a sa priere et requeste de povoir mener sesdictz blancqs besteaulx sur ladicte seignourie de Pietre jusques a la fin dudict mois dapvril enssieuvant ledict mois de mars seulement A tel effect que sy sesdicts blancq besteaulx y estoient trouvez par apres promectoit paier audict Seigneur pour chascune foys quelles y seroient prinses une amende de soixante solz parisis Lequel accord a telle condition fut lors accepte par ledict Seigneur dont et desquelles attestation affirmation et choses dictes de la part dudict Seigneur nous a requis lettres quy sont ces presentes a luy accordees pour valloir et servir a son intention sy avant que de raison / faict et ainsy atteste en la ville de le Bassee le vingt cinquiesme jour de janvier quinze cens soixante deux pardevant notaires Royaulx soubz signez Ainsy signe Fascon j de Faucompre



<sup>293</sup>Aultre attestation

Comparurent en leurs personnes jehan Du Bois sergeant de la terre et seignourie de Pietre eaigie de XXVIII ans Rolland Widebien labourier eaigie de trente ans / Pierre Mallebrancque jeusne filz a marier eaige de vingt quatre ans Guerard le Roy eaige de XLV ans jehan De Mars eaige cinquante huit ans labouriers jehan Vennin eaige de quarante sept ans aussy labourier jacques Carlier bergier a Loys Hennart censier de la cense dudict Pietre eaigie de dix huit ans / Et jacques Rogeault bergier de Guerard Le Roy en la cense des Mottes eaigie de vingt trois ans le tout ou environ demourans en la seignourie dudict Pietre paroisse Dauberch sauf ledict Vemin qui

---

<sup>292</sup> Folio 225v<sup>o</sup>.

<sup>293</sup> Folio 226r<sup>o</sup>.

est de present demourant en la paroisse de Saily pays de lalleue Lesquelz et chacun deulx interroguiez separement sur les interrogatoires exhibees ausdictz notaires de la part de Noble homme Guillaume Hangouart escuier Seigneur dudict Pietre et apres serment par eulx fait ont dict jure atteste et pour verite affirme Asscavoir lesdictz Du Bois Widebien et Mallebrancque, quilz se recordent que au mois dapvril dernier olt<sup>294</sup> ung an iceulx Widebien et Mallebrancque furent requis dudict<sup>295</sup> Du Bois de venir avecq luy jusques certaine pieche de terre contenant XIII a XIII c appertenant audict Seigneur par achapt quil en a fait a Guerard Du Hot faisant front au chemin de le pierrette, tenant dun coste a demy bonnier de labour et de bout a aultres XIII c appertenant audict Seigneur et occupez pour lors par ledict Vemin / ce quilz feirent<sup>296</sup> et eulx illecq arrivez Ledict Du Bois leur monstra ung troupeau de blancq besteaulx appertenant a Guillaume le Gillon demourant en la paroisse de la Cappelle Noeufve Lequel paissoit sur iceulx XIII c de terre Et le bergier reposant sur le bout dudict camp Et ce fait ledict Du Bois fait son extreme devoir de prendre et arrester ledict troupeau pour lamende pour ce deue au Seigneur tellement quil apprehenda ung mouton dudict troupeau Lequel il emmena en la maison et place dudict Seigneur que tient en cense Guerard le Roy / Selon que de tout ce a aussy afferme ledict Du bois Attestans par les susdictz Du Bois Mallebrancque Widebien et Le Roy que aucuns jours apres icelle prinse auroient entendu du bergier dudict Guerard que ledict le Gillon auroit venu en personne requerir ledict mouton estant en son troupeau contre sa volente Combien quil leur remonstroit que nestoit a luy a le rendre Et a raison de quoy ont entendu que ledict le Gillon en a proces indecis<sup>297</sup> au conseil Darthois allencontre dudict Seigneur de Pietre Sy dient que icelle pieche de terre ou passoit le bestial dudict le Gillon dessus declare De laquelle ledict Seigneur en personne en a fait veue et ostention ausdictz attestans presens lesdictz notaires Est comme dict est contigue aux deux aultres pieches susdictes Affirmant outre par ledict Du Bois seul que depuis larrest fait dudict mouton il nauroit fait aultre arrest sur le bestial dudict le Gillon na este que le jour des Royx dernier quil auroit trouve<sup>298</sup> de rechief le bestail dudict le Gillon pasturant au jardin de ung Bernard de le Flye demourant audict Pietre duquel il auroit aussy prins une brebis de son troupeau / quy a este mise en justice audict Pietre pour lamende pretendue par ledict Seigneur Sy a dict ledict De Mars que tost apres que le mouton susdict auroit este arreste dudict Du Bois et mene au logis dudict Guerard se trouva luy attestant en la compagnie dudict le Gillon Auquel il demanda comment il avoit este sy ose de reprendre ledict mouton / veu que icelluy estoit en la main de la justice dudict Pietre pour luy en faire la raison / Lequel le Gillon luy foist responce quil navoit emmene ledict mouton Mais trop bien avoit assiste et accompaigne son bregier jusques au hot et troupeau dudict Guerard ou estoit ledict mouton Et que sondict bregier avoit chifle et que ledict mouton estoit retourne avecq son bergier Ledict Vennin a pareillement atteste apres luy avoir fait veue par ledict Seigneur de Pietre en la presence desdictz notaires desdictz Du Bois Mallebrancque et Widebien de la pieche de quatorze cens susdicte sur laquelle la prinse susdicte auroit este faite Que il na jamais donne congie ne licence audict Le Gillon ny a son bregier de povoir par luy chasser garder ou faire pasturer sondict blancq bestial sur icelle pieche de terre ny sur aucune aultre pieche de terre quil tenoit lors dudict

---

<sup>294</sup> Olt : ?.

<sup>295</sup> Folio 226v°.

<sup>296</sup> Feirent : firent.

<sup>297</sup> Proces indecis : procès en cours.

<sup>298</sup> Folio 227r°.

Seigneur Trop bien se recorde<sup>299</sup> que environ a ung an trois ou quatre jours au paravant quil ahenna ledict demy bonnier et quatorze cens au bout /tenans aux quatorze cens sur lesquelz le trouble sest ensievv bailla congie au bergier dudict le Gillon de faire paistre ses brebis sur lesdictes deux pieches Affirmans davantaige que combien quil ayt atteste a linstance dudict le Gillon pardevant Fredricq Wasselin et Noel Creton nottaires Royaulx du dix huitiesme de mars quinze cens soixante deux / ces motz / que sy<sup>300</sup> le blancq bestial dudict le Gillon auroit pasture sur ses terres aultres que sur celles dont il auroit donne congie dont il est cy dessus fait mention / Ce auroit este de son consentement et bon gre Pour esclaircir son intencion en ce et descherger sa conscience A dict quil nentend et na jamais entendu que ce devist<sup>301</sup> prejudicie au droict pretendu ~~et na jamais entendu que ce~~ par ledict Seigneur de Pietre son Maistre / par le proces quil a indecis au Conseil Darthois contre icelluy le Gillon Ains estoit seullement pour autant quil navoit baillie congie audict le Gillon ou sondict bergier Sy navoit aussy desfendu de chasser leur bestial dautant quil avoit promis audict Seigneur son maistre passe deux ans de ne baillier congie audict Gillon Attestans par ensamble par lesdictz Du Bois Widebien Malbrancque et Carlier que depuis la prinse susdicte ilz ont veu et voient journellement le bestial dudict le Gillon pasturer sur les seignourie chemins et flegardz dicelle Meismes sur les terres appertenans audict Seigneur Hangouart Affirmant davantaige par ledict Carlier quil a veu et void journellement les brebis et moutons de Nicollas Marsy Anthoine Frulleux Pierre Screve et aultres quy ne sont demourans sur ladicte seignourie de Pietre / paistre et faire pasturer leur bestial sur les terres dicelle seignourie Mesmes le auroit le bergier dudict Marsy vollu battre et faire desplaisir pasturant le bestial de son maistre sur lesdictes terres / novist<sup>302</sup> este quil fut de ce faire empesche par Pierre de le Herre censier desdictes terres Et quand audict jacques Roseau a aussy dict que trois ou quatre jours apres que ledict Du Bois eust amene en son troupeau le mouton dessusdict par luy arreste du troupeau dudict le Gillon Seroit venu a luy ledict le Gillon garny dune demye picque sondict bergier de sa macque et Cornille Couvreur dict Cottin garny dune fourque / Luy estant aux champs gardant son troupeau sur les terres dudict Seigneur<sup>303</sup> Lequel Gillon luy demanda sil navoit trop dune brebis que ledict Du Bois avoit amene a son logis Et syl ne luy volloit rendre icelle Lequel feist responce que ladicte brebis nestoit mal et aussy que nestoit a luy affaire a le rendre A quoy ledict Gillon replicqua disant quil volloit ravoir icelle Et en ce disant ledict bregier dudict Gillon estant entre au troupeau pour choisir ladicte brebis laquelle il conduit hors dudict troupeau Et aprochant pres dudict le Gillon lcelluy le saisist par le veaure<sup>304</sup> et apres le avoir liee le emmenerent de force Combien quil remonstroit audict Gillon que ce nestoit lintention dudict Du Bois Et scevent ce que dessus par les raisons preallegnies<sup>305</sup> dont et desquelles attestations affirmations et choses dictes de la part dudict Guillaume Hangouart Seigneur dudict Pietre nous a este requis enseignement Asscavoir ces presentes pour luy servir et valloir par tout ce que de raison fait et atteste le dix noeufiesme de may quinze cens soixante trois pardevant notaires Royaulx soubz signez Ainsy signe N Creton P Wastepatte



---

<sup>299</sup> Recorder : v. souvenir.

<sup>300</sup> Folio 227v°.

<sup>301</sup> Devist :

<sup>302</sup> Novist : Novice en sa profession.

<sup>303</sup> Folio 228r°.

<sup>304</sup> Veature (?).

<sup>305</sup> Preallegnies : dans les lignes précédentes.

Aultre attestation pour le Seigneur de Pietre et ledict proces  
contre Guillaume le Gillon

A tous ceulx que ces presentes lettres verront ou orront jehan de Montmorency Seigneur de Courrieres etc Chevallier de lordre du thoison dor Conseillier et chambellain du Roy nostre Sire gouverneur et capitaine des villes chasteaulx et chastellenies de Lille Douay Orchies et des appartenance salut Scavoir faisons que pardevant Nicollas de St Aubin et jehan Du Bois auditeurs commis et deputez ou nom dudict Seigneur Roy A prendre oyr et recepvoir les contractz convenances marchiez et obligations quy se font et passent soubz le seel du souverain bailliage dudict Lille Comparurent en leurs personnes <sup>306</sup>jehan Vennin labourier demourant a Pietre eaigie de quarante sept ans ou environ Et Chretiene Cuyillet vefve de feu Baulduin Cuignet eaigee de soixante quatre ans ou environ Lesquels comparans apres serment par eulx faict es mains desdictz auditeurs affirmerent et attesterent Asscavoir Ledict jehan Venin pardevant Noel Creton et F. le Vasselin notaires il soit dict par attestation que sy le blancq bestial de Guillaume le Gillon demourant a Neufve Chappelle ayt pasture sur les terres quil tient du Sr de Pietre scituees en la seigneurie dudict Pietre que ce aueroit este de son consentement et bon gre neantmoins apres lecture a luy faicte de ladite attestation et affirmation A affirme et affirme quil ne le a ainsy dict ne entendu ains pour esclarchissement de sadicte deposition et dire et affirme la verite / A affirme que il ne a jamais donne congie ne consentement audict Guillaume le Gillon ny a ses bergiers de envoyer et faire pasturer ses brebis et moutons sur les terres que il tenoit dudict Seigneur de Pietre Et ce sieuvant la promesse quil avoit faict a sondict maistre passe a deux ans de ne laisser paistre ledict troupeau sur sa teneur aultrement que depuis ung an deux ou trois jours paravant quil deposant ahenna deux pieches de terre lune contenant quatorze cens quy ne haborde au chemin et lautre demy bonnier habordant a lissue et au chemin du coste du bois du Biez nomme le camp a le pierette / Il dist au bregier dudict le Gillon que il pavoit bien amener pasturer ses moutons ou blanches bestes sur lesdictes deux pieches de terre Affirmant quil ne a jamais donne congie consentement ne agreation de faire paistre sesdictz blanches bestes sur aultres terres de <sup>307</sup>sa teneur que celles susdictes / Et que en la comprehension de ladicte cense quil tient dudict Seigneur de Pietre y a deux camps ou pieches de terre a labour nommez les camps a le pierette habordans au grand chemin menant au bellooy et au bois du Biez Dont lune desdictes pieches contenant demy bonnier est tirant vers le bois du Biez quy est lune des pieche sur laquelle il deposant a cy devant affirme pardevant lesdictz notaires davoir donne congie de faire paistre par le bergier dudict le Gillon deux ou trois jours auparavant quil ahenna icelle et lautre pieche nommee aussy le camp a le pierette habordant a ladicte yssue tirant du coste du riez de Pietre sur laquelle derniere pieche il deposant a entendu ladicte prinse dont a present il entend estre question avoir este faicte Affirmant quil a aultrefois dict au bregier dudict le Gillon quil euist avecq ses bestes a soy de partir et emmener sesdictes bestes pasturer jus<sup>308</sup> des terres quil tenoit dudict Seigneur de Pietre et lequel Seigneur luy a desfendu et quil deposant luy disoit quil ne luy donnoit le congie Ce non obstant ledict bregier ny a laisse de pasturer avecq sesdictes bestes

---

<sup>306</sup> Folio 228v°.

<sup>307</sup> Folio 229r°.

<sup>308</sup> jus des terres : en dehors des terres.



pluisieurs foys sur icelles Et soubz vinbre<sup>309</sup> que le bregier dudict le Gillon vint avecq sesdictes bestes pasturer esdictz lieux pluisieurs se advancent de faire le samblable de sorte que puis peu de temps il y avoit trois troupeaux de blanches bestes pasturans es champs ou ledict Vennin envoyoit ses vaches paistres les gardes desquelles ne sen volloient de partir pour la desfence que leur faisoient les filles dudict Vennin Ains respondoient quil les meneroient au gardin de il affirmant comme il a entendu de sesdictes filles Et ladicte Chretienne Cuillet que de toute sa memoire elle a oy dire et maintenir et veu user que nulz forains ny aultres fussent ilz demourans sur la<sup>310</sup> seignourie de Pietre se ilz ne sont mazuriers dicelle seignourie de Pietre ne peuvent envoyer ny faire paistre les brebis ou moutons en et sur ladicte seignourie chemins flegardz et heritaiges en tenus et ainsy le a veu user de toute sa vie en laquelle seignourie a este nee et tousiours demoure Sinon depuis trois ans quelle est venue demourer en ceste ville et a bonne memoire de feu Pierre Cuillet son pere en son vivant sergeant audict Pietre du temps de feu Mahieu Desplancques lors Seigneur de ladicte seignourie que dudict Seigneur de Pietre aprehendoit les moutons quil trouvoit paissans sur ladicte seignourie quy ne appertenoient a masuriers et estoit contente de son droict de prinse Affirmant que sievant ledict droit usance et privilege elle a veu de toute sa vie durant le temps quelle residoit aupres de le pierette vers le bois du Biez audict Pietre que les forains et fussent ilz tenant de ladicte seignourie de Pietre se gardoient de faire paistre leurs besteaux sur la jurisdiction de ladicte seignourie nestoit quilz fussent mazuriers et lors que lon en trouvoit aucuns sondict pere et aultres sergeans subsequens les apprehendoient comme dict est Et quelle a entendu aultrefois a sondict pere que ung nomme Herebroucq demourant en une cense seant audict Pietre et en tenue appertenant a Martin Becque et de present a Nicollas son nepveu quil ne pavoit pasturer ne faire pasturer son blancq bestial en et sur ladicte seignourie autrement que sur sa teneur Sans le congie dudict Seigneur de Pietre et lequel congie il requerroit pour la franchise de pasturer Comme elle deposante le a meismes ouÿ dire a ung Gadiffet le Roy et a ung Gillet Desbois censiers de ladicte cense apres ledict Herrebroucq et ne a<sup>311</sup> veu icelle deposante autrement user / saulf que depuis deux ou trois ans elle a entendu et veu que ledict Guillaume le Gillon sest ingere de envoyer paistre son blancq bestial sur ladicte seignourie par plusieurs foys nommement sur les camps appertenant a elle deposante sans le congie delle ny de son censier combien quelle deposante remonstroit audict bergier que il se departast de ladicte seignourie de Pietre autrement quelle le feroit prendre A quoy il respondit que il ne le feroit et que son Maistre volloit et commandoit que il y venist et davantaige quil aimoit aultant quil sufist prins que une aultrefois par ce que son maistre luy commandoit et volloit quil y venist Desquelles attestations et affirmations de la part de Guillaume Hangouart escuier Seigneur de Pietre a este requis ausdictz auditeurs avoir lettres quy sont cestes pour luy valloir ce que de raison En tesmoing de ce nous a la rellation desdictz auditeurs par leurs saingz manuelz mis a cesdictes presentes Avons icelles fait seel du seel dudict souverain baillage saulf le droict dudict Seigneur Roy et laultroy en tout Ce fut fait et passe le troiesme jour de may quinze cens soixante trois



---

<sup>309</sup> soubz vinbre : souvient ?

<sup>310</sup> Folio 229v°.

<sup>311</sup> Folio 230r°.

Extrait hors du registre aux causes des hommes masuriers de la seigneurie de Pietre touchant les procedures illecqz intentees par le Sr de Pietre demandeur contre Guillaume le Gillon deffendeur pour les pasturaiges des brebis et moutons dudict Gillon sur icelle seigneurie

Plays tenus par Charles le Febvre bailly presens jehan j<sup>312</sup>le Turcq Noel Vignoble et Nicollas Bourel hommes masuriers dudict Pietre le samedi VIIe jour de septembre XV c soixante

jehan Widdebien procureur du Seigneur de Pietre demandeur contre Guillaume le Gillon pour la prinse de deux moutons prins et trouves pasturans sur ladicte seigneurie et sur lamende pour ce deue et encourue aiant jour a huy

Par ledict procureur en ramenant a faict lesdictz adjournement et assignation de ce jour quy furent faictz dernièrement sicomme le vint sixiesme daoust oudict le Gillon estant en personne aux plays quy pour ce jour seruoient Pour a cedit jour respondre sur lesdictes prinse et amende pour ce deue conclud<sup>313</sup> affin davoit adjudication et paiement de soixante solz parisis pour avoir les brebis et moutons dudict le Gillon / estez veuz et trouvez pasturans en et sur ladicte seigneurie de Pietre au chemin par lequel on va au bois du Biez et au Belloy les meismes jour et heure de cesdictes prises en question Et ce en contrevenant aux uz coustumes preuileges statutz et ordonnance dicelle seigneurie meismes a la deffence a luy faicte par ledict Seigneur au mois de mars dernier passe Et par ledict le Gillon en personne a este declare quil sert a present de ses deffences ausurplus a requis coppie des repplicques dudict demandeur pour servir de dupplicques a XVme

Ledict procureur oudict nom demandeur contre ledict le Gillon sur quatre amendes Asscavoir les trois pour avoir este sesdictes brebis et moutons veuz et trouvez par trois divers jours et foys pasturans sur ladicte seigneurie de Pietre au prejudice et contravention des uz coustumes preuileges et statutz de ladicte seigneurie et de ladicte deffence a luy faicte par ledict Seigneur audict mois de mars dernier

<sup>314</sup>Antel expedition que dessus davantage appera que sesdictes bestes a laine ont estees sy souffissament veues gardees et menees pasturer en ladicte seigneurie que pour estre escheu esdictes trois amendes

Et quant a la IIIe amende pour non avoir releve ses cours deauwes estans allendroit de ses heritaiges tenus de ladicte seigneurie de Pietre au contemps<sup>315</sup> et contravention des uz et coustumes dessusdicte meismes de la publication sur ce faicte par ledict Seigneur au mois daoust de lan XV c cinquante noeuf Et dont appera que cest le droict fillet et cours deauwes venant du chemin au fosse des Laves Du samedi XXIXe de septembre audict an

Ledict procureur oudict nom demandeur contre ledict le Gillon sur la prinse des deux moutons en question et les quatre aultres amendes

Remises destat a VIIIe ledict procureur present

Du samedi Ve doctobre audict an

Ledict procureur audict nom demandeur contre ledict le Gillon

Ledict procureur contre ledict le Gillon

---

<sup>312</sup> Folio 230v°.

<sup>313</sup> Du verbe « conclure » : conclure.

<sup>314</sup> Folio 231r°.

<sup>315</sup> Contemps : s.m. mepris.

Par ledict procureur en personne veu la non compenche<sup>316</sup> dudict Gillon a requis dessusdict A tel prouffict quil sera deboute de dupplicques et ordonne lesdictes parties a memorier et joindre et a XVme

Du samedy XXIIIe de novembre audict an

Ledict procureur oudict nom demandeur contre ledict le Gillon en deux causes

Estat a XVme sans prejudice

Du samedy VIIe de decembre audict an

Ledict procureur oudict nom demandeur contre ledict le Gillon

Contre ledict le Gillon

Ledict le Gillon en personne a servy de dupplicques par escript / Et au contraire ledict procureur a soustenu<sup>317</sup> que ledict le Gillon ne sera admis a servir desdictes dupplicques veu quil ne a fait ses debvoirs den servir en temps deu et quil en sera deboute Ce fait admis et au moys

Après ledict le Gillon a requis davoit main levee des moutons en question en baillant caution soubz ceste seigneurie Pour aquoy furnir Micquiel de Ghery demourant audict Pietre sest constitue pleige et caution pour ledict le Gillon promectant paier et furnir au nom dudict Gillon tout ce enquoy il polra cy apres estre condempne tant pour principal que despens soubz lobligation de ses biens meubles cateulx et heritaiges de laquelle obligation ledict le Gillon le a promis acquictier et indempner obligation que dessus

Du XVIIIe de janvier XV c LX

Ledict procureur oudict nom contre ledict Gillon

Contre ledict Gillon

Estat a XVme les parties presens



Information par forme de attestation tenue par la justice de Pietre touchant le proces intente pardevant ladicte justice contre Guillaume le Gillon non masurier pour cause des pasturaiges de son blancq bestial sur ladicte seigneurie

Enqueste tenue et tesmoings jurez ouys et examinez en la seigneurie de Pietre par moy Charles le Febvre bailly de ladicte terre et seigneurie Et en la presence de jehan Warembourg Mahieu de Dours et Gregoire Bourel hommes masuriers dicelle seigneurie sur certain proces et different que le Seigneur dudict Pietre a en demandant allencontre de Guillaume le Gillon demourant ale Neufve Chappelle en matieres de fourfaictures et amendes et comme il sensieult

<sup>318</sup>Premiers

Grard le Roy labourier eaige de quarante cincq ans jehan de Gherry eaige de soixante neuf ans jehan Wydebien eaigie de trente trois ans Nicollas Bourel eaigie de soixante trois ans Loys Hennart eaigie de trente ans jehan le Turcq eaigie de quarante trois ans Micquiel de Ghery eaigie de trente deux ans jehan Barbet eaigie de soixante cincq ans Anthoine Benault eaigie de trente quatre ans Micquiel Castricque eaigie de cinquante ans Catherine Wicart vefve de feu jehan Toulouse

<sup>316</sup> Compenche, compensate s.f. compensation.

<sup>317</sup> Folio 231v°.

<sup>318</sup> Folio 232r°.

eaigie de cinquante cinq ans / Pierre de Mars eaigie de quarante quatre ans Noel Vignoble eaigie de quarante ans et jehan du Bois eaigie de vingt cinq ans le tout ou environ, tous labouriers demourans en la paroisse Dauberch saulf ledict Castricque a le Venthie / et Benault a ladicte Chappelle Lesquelz et chacun deulx interroghuiez separement sur les IIII XV et XVIes articles de lintendit servy par ledict Seigneur ont dict jure et affirme par leurs sermens que de tout temps dont ilz ont memoire ilz ont entendu et veu user que nulz forains ny aultres se ilz ne sont mazurier ne poeuvent envoyer ne faire paistre leurs brebis et moutons en ladicte seignourie de Pietre a peril de soixante solz parisis damende vers ledict Seigneur et en ont ainsy tousiours veu user et maintenir meismes interroghuiez comme dessus sur les VI VII et VIIIes articles dudict intendit ont affirme avoir veu et entendu que plusieurs mesures ont este faictes et erigees de nouvel a plusieurs personnes a ceste seulle fin que pour par eulx pouvoir envoyer leursdictes brebis et moutons pasturer en ladicte seignourie Et entre aultres a feu Martin de le Barre et a jehan Toulouse le troppeau duquel Toulouse auparavant quil fut masurier estoit prins et saisy a chascune foys quil estoit trouve par le sergeant dudict Pietre pasturer sur ladicte seignourie / en sorte <sup>319</sup>que ledict Toullouse estoit tenu en faire le content du Seigneur dudict Pietre et le sergeant comme ce a affirme ledict jehan le Turcq lequel lors estoit bregier dudict Toulouse Ainsy que a pareillement fait la vefve dudict Toulouse

Mahieu de Dours eaigie de quarante et ung jehan du Bois eaigie de vingt cinq ans tesmoingz jurez et oys sur le commencement dudict intendit et XVIIe article dicelluy lesquelz apres sermens par eulx faictz ont affirme par leur sermens quil ont bonnes memoires que depuis le mois de may dernier passe avoir veu le bregier dudict le Gillon quy gardoit et faisoit pasturer ses brebis et moutons sur ladicte seignourie de Pietre au chemin que maisne dudict Pietre au bois du Biez et aussy le jour de la Magdelaine dernier passe sur ung camp occupe par jan Vennin tenu de ladicte seignourie de Pietre quy este le jour heure et instant de la prinse des deux moutons en question Et que le carton dudict de Dours estoit avecq eulx nomme jehan Logelin

Pierre Flocquetel bergier eaigie de vingt cinq ans et jehan Quenette aussy bregier eaigie de trente ans le tout ou environ tesmoings jurez et oys sur ce que dessus dirent et affirmerent par leurs sermens que depuis ledict mois de may ilz ont veu eulx estans ensamble que le bregier dudict le Gillon gardoit et faisoit pasturer ses brebis et moutons en ladicte seignourie de Pietre au chemin dessusdict

Dirent encoires quilz ont par plusieurs aultres et divers jours et foys depuis ledict may veu ledict bregier dudict le Gillon quy gardoit et faisoit pasturer sesdictes brebis et moutons en ladicte seignourie et chemin auparavant la prinse des deux moutons en question quy fut ledict jour de la Magdelaine dernier passe

Sy a affirme ledict Flocquetel que depuis ledict mois de may dernier avoir veu le bregier dudict le Gillon quy gardoit et faisoit pasturer sesdictes brebis et moutons sur ung coing dheritaige occupe a tiltre <sup>320</sup>de cense par jacques Laden tenu de ladicte seignourie de Pietre non advesty joindant sans separation de hayes ne fossez a leurs advestures de grain

jacques Laden labourier eaigie de trente neuf ans et Marie Boucquet eaigie de quarante ans sa femme tesmoingz jurez et oys sur larticle precedente dirent et

---

<sup>319</sup> Folio 232v°.

<sup>320</sup> Folio 233r°.

affirmerent par leurs sermens quilz ont bonnes memoires que depuis ledict mois de may dernier avoir veu le bregier dudict le Gillon quy gardoit et faisoit pasturer sesdictes brebis et moutons sur le coing de lheritaige dessus declare

Ce fut ainsy faitz jure affirme et tesmoingnie par les dessusnommez pardevant moy Charles le Febvre bailly de ladicte seignourie de Pietre presens jehan Warembourg Mahieu de Dours Noel Vignoble Gregoire Bourel et Nicollas Bourel Hommes mazuriers dicelle seignourie le vingtiesme jour de aoust lan mil cincq cens soixante Ainsy signe C le Febvre



Copie de aultre enquete par forme dastestation tenu par ladicte justice de Pietre pour ledict proces illecq demeure contre Guillaume le Gillon

Enquete tenue et tesmoings jurez et oys pardevant Charles le Febvre bailly / presens Mahieu de Dours jehan Warembourg jehan le Turcq et Nicollas Bourel hommes masuriers de Pietre le vingtiesme de juing quinze cens soixante deux en certain proces que le Seigneur dudict lieu avoit en demandant contre Guillaume le Gillon demourant a le Neufve Chappelle sur aucunes amendes fourfaictes vers ledict Seigneur par ledict le Gillon et desquelz tesmoingz jurez et oys les noms surnoms et depositions sensievent

<sup>321</sup>Premiers

jehan de Mars labourier eaigie de cinquante sept ans  
Pierre Mallebrancque eaigie de vingt quatre ans  
Perone Sansse vefve de feu Franchois Carpentier eaigie de soixante deux ans  
Et Chretienne Quillet vefve de feu Bauduin Cuingnet eaigie de soixante trois ans le tout ou environ demourans audict Pietre

Lesquelz apres sermens par eulx faitz ont dict jure et affirme que de tout leur memoire ilz ont veu user que nulz forains ny aultres ne povoient envoyer ne faire paistre leurs brebis et moutons en ladicte seignourie de Pietre silz nestoient masuriers dicelle seignourie A peril de soixante solz parisis damende vers ledict Seigneur Et ainsy en ont veu user et maintenir meismes ladicte Peronne le a oy dire plus de cinquante foyz a Anthoine son pere eaigie a son trespas de quatre vingtz onze ou quatorze ans Sy ont lesdictes Chretienne et Peronne affirme quelles ont bonne memoire que Pierre Quillet pere a ladicte Chretienne luy estant sergeant dicelle seignourie de Pietre au temps de Mahieu Desplancques lors Seigneurs dudict Pietre bissaieul au Seigneur a present quil a prins par plusieurs foyz les brebis moutons ou vacques de ceulz quilz nestoient masuriers et quilz pasturoient sur icelle seignourie Et sievant lesquelles prinses ont faisoit le content de sondict pere pour lesdictes prinses Comme aussy ladicte Peronne a memoire que jehan du Bois aussy sergeant de ladicte seignourie du temps du grand pere / et pere dudict demandeur quil prendroit les bestes de ceulz quil nestoient masuriers <sup>322</sup>pasturans sur ladicte seignourie de Pietre par plusieurs foyz Et sievant ce ont faisoit le content dudict

---

<sup>321</sup> Folio 233v°.

<sup>322</sup> Folio 234r°.

Seigneur de leurs prises / Davantaige disoient que combien que lon eust terres tenues dudict Pietre que lon ne pouoit envoyer son bestial paistre sur ladicte seigneurie sil nestoit masurier dicelle sur paine damende Sy dirent que depuis dix neuf ans jehan de le Marre aussy sergeant dudict Pietre avoir memoire quil acachoit<sup>323</sup> ung troupeau de blancques bestes devers le boys du Biez quil avoit prins meisme ladicte Peronne demourant avecq sondict pere a la cense dudict Pietre elle a memoire que on y amena deux vacques et ung veau quilz avoient estez prins sur ladicte seigneurie et plus nen scevent

Ledict de Mars oy sur le VIIIe article des memoires dudict Seigneur A affirme quil a bonne memoire que feu Ansel de Mars son pere acheta une mesure sur le riez dudict Pietre A icelle seulle fin que pour envoyer paistre ses moutons et brebis sur ladicte seigneurie de Pietre

jehan Vennin labourier eaigie de quarante six ans tesmoing jure et oy sur le XVIIe article desdictes memoires lequel apres serment par luy fait a affirme que depuis la prise des deux moutons en question sur ce que le remonstrant ou bregier dudict Guillaume pourquoy il avoit fait pasturer sesdicts brebis sur Pietre et au chemin par lequel on va du bois du Biez au Belloy lcelluy bregier nomme Collenet du Quesne natif de Richebourg luy respondit que sondict maistre luy envoyoit et quil disoit va y hardiment je parleray au Seigneur de Pietre Combien que ledict bregier disoit souvent fois a sondict maistre quil ne faisoit seurement de y aller et quil seroit prins

<sup>324</sup>Mahieu de Dours et Nicollas Bourel ont affirme que ledict le Gillon a offert plusieurs foys audict Seigneur quelque chose pour luy permectre de envoyer sesdicts moutons pasturer sur ladicte seigneurie de Pietre ou pour le faire masurier dicelle Ce que ledict Seigneur ne volla accepter pour obvier aux inconveniens et garder son droict et des masuriers Et plus nen scet  
Ainsy signe C le Febvre Mahieu de Dours et marquez des marques desdictz Bourel Warembourg et le Turcq

Collation faicte a loriginal et trouve concorder par moy pardevant bailly dudict lieu de Pietre sousigne C le Febvre



Copie de lenqueste tenue par les bailly et hommes juges de la seigneurie de Pietre audict proces illecq intente contre Guillaume Le Gillon pour le fait des pasturaiges de son blancq bestial , Laquelle enqueste fut produicte en lenqueste du proces de reintegrande cy dessus mentione intente au conseil Darthois

Enqueste tenue et tesmoings jurez et oys pardevant Charles le Febvre bailly / presens jehan Warembourg Nicollas Bourel jehan le Turcq et Noel Vignoble hommes masuriers de Pietre le VIe jour de jullet XV c LXII a la requeste de Guillaume Hangouart escuier Seigneur de Pietre des Pummereaulx etc Sur certaines amendes

---

<sup>323</sup> (?)

<sup>324</sup> Folio 234v°.

fourfaites vers le Seigneur dudict Pietre par Guillaume le Gillon desquelz les noms surnoms et depposition diceulx sensieut

<sup>325</sup>Et Premiers

jacques Laden labourier eaigie de quarante deux ans et Marie Boucquet sa femme eaigie de quarante deux ans le tout ou environ Tesmoingz jurez et oys sur les XVIIe et XXVIIe articles des memoires dudict Seigneur et requis quilz en scevent Dirent et affirmerent apres sermens par eulx faitz avoir bonnes congnoissances et memoires quilz ont depuis et entre le may quinze cens soixante Et laoust audict an et aussy depuis ledict temps daoust jusques a ce present veu et trouve beaucoup et pluisieurs foys aucunefois par une sepmaine trois ou quatre foys et plus / les brebis et moutons dudict le Gillon gardez pasturans par le bregier dudict le Gillon sur les terres de Nicollas Becque occupees en cense par lesdictz depposans tenues dudict Pietre Combien que eulx depposans ne ont jamais donne congie audict Guillaume ne a son bregier de y faire paistre ledict blancq bestial Meismes lesdictz depposans leurs avoient deffendu de y garder et faire paistre leursdictz brebis et moutons Pour laquelle deffence ledict Guillaume ne son bregier ne y volloient et ne seront vullu abstenir de y venir ains au contraire y ont coutume de les y garder et faire paistre Comme aussy lesdictz depposans ont veu ausdicts temps pluisieurs et diverses foys le troupeau dudict le Gillon estre garde pasturans sur les terres occupees par jehan Vennin appartenant audict Seigneur et pluisieurs aultres terres tenues dudict Pietre Et sur les chemins et flegardz de ladicte seignourie de Pietre Et plus nen scevent

<sup>326</sup>jehan de le Herre filz de feu jehan labourier eaigie de trente trois ans ou environ tesmoing jure et oy sur les IIII et Ve articles de replicques dudict Seigneur Et requis quil en scet Dist et affirma apres serment par luy fait quil a bonne memoire davoit oy dire par pluisieurs foys audict jehan de le Herre son pere demourant a la cense de Tricquenel sur Pietre que nulz ne pavoit envoyer ne faire paistre son bestial sur ladicte seignourie de Pietre se il nestoit masurier Et que sil ne eust en grace du pere dudict Seigneur pour lors Seigneur dudict Pietre A raison quil estoit censier dicelluy Seigneur il ne y eust oze aller ne envoyer son bestial sur Pietre a cause quil nestoit mazurier

Dist aussy quil a encoires oy dire a sondict pere que Henry du Bacquerot lors censier des Mottes luy volloit empechier quil ne envoya sondict bestial sur Pietre A raison quil nestoit mazurier voiant ce icelluy jehan se trouva a Arras vers ledict Seigneur de Pietre affin davoit congie de aller sur ladicte seignourie Lequel luy dist quil y allast hardiment et quil luy donneroit le congie de y aller Meismes a veu que auparavant ledict congie donne que jehan de le Marre lors sergeant dudict Pietre venoit souvente fois a la maison de sondict pere Auquel on donnoit quelque pieche dargent chair et pain et que il depposant estimoit que cestoit affin que il suportast ledict troupeau de blancq bestes lors quil le trouvoit sur ladicte seignourie de Pietre Et plus nen scet

jenne Castrique femme a jehan Vennin eaigie de trente huict ans ou environ tesmoing juree et oye sur les XXIII XXV et XXVIIes articles des memoires <sup>327</sup>dudict Seigneur Et requise quelle en scet Dist et affirma apres serment par elle fait que

---

<sup>325</sup> Folio 235r°.

<sup>326</sup> Folio 235v°.

<sup>327</sup> Folio 236r°.

depuis deux ans encha elle a veu plusieurs foys les brebis dudict le Gillon quilz pasturoient tant sur les terres de Nicollas Becque occupees par jacques Laden que sur les terres par eulx occupees appertenantz audict Seigneur sans luy avoir donne congie de ce faire / saulf que sondict mary a donne congie audict le Gillon de aller sur deux pieches de terres et sur les aultres ne luy a donne congie ne deffendu Et pareillement sur plusieurs aultres terres tenues dudict Pietre / et que journallement les brebis et blancques bestes dudict le Gillon et aultres font journallement dommaige a leurs advestures

Dist aussy quelle estant avecq son mary a bonne memoire davoit veu le dixhuictiesme daoust quinze cens soixante quy estoit jour de dimenche le bregier de Nicollas Marsy nomme Daniel quy gardoit et faisoit pasturer ses brebis et moutons en ung camp et nouvelle esteulle sur Pietre appertenant a Pierre Parcquet demourant a le Venthie Auquel camp estoit encoires toute la disme que ledict Parcquet avoit laisse a Loys Hennart censier et fermier dicelle disme et que ledict Parcquet avoit anprismes laisse le jour precedent quy estoit samedy Sy dict que ledict bregier gardoit sesdictz moutons audict camp au milieu de ladicte disme Laquelle estoit encoires illecq toute esparsse par petitz moncheaulx Et avecq lequel bregier estoit le filz dudict Marsy Dist aussy quelle estant avecq sondict mary avoir veu et trouve une foys les vacques dudict Marsy pasturans en le camp sur Pietre meismes brousser et mangier <sup>328</sup>les gectons dune haye et nouvel taillys quy avoit estes nouvellement coppee au mars precedent Et que ledict Marsy est fort avantageu et dommaigeu a ses voisins Et plus nen scet

jacquemine Darras femme de Pierre du Pret eaigie de quarante huit ans tesmoing juree et oye sur les XXIII XXIII et XXVIIe articles desdictes memoires Et requis quelle en scet Dist et affirma apres serment par elle fait quelle a bonne memoire / Que entre le moys de may et la Magdelaine an soixante elle a veu souvent foys le bregier dudict le Gillon quy gardoit et faisoit pasturer ses brebis et moutons sur les terres tenues en cense par jehan Vennin tenues dudict Seigneur et a luy appertenantz et sur les terres de Nicollas Becque occupees par jacques Laden tenues dudict Seigneur / et sur les chemins et flegardz et aultres terres et heritaiges tenues dudict Pietre Meisme elle deposante allant au Belloy demanda audict bregier luy etant sur le chemin allant audict Belloy sil pavoit bien icy venir et sil avoit congie Lequel bregier luy respondit que oy et quil avoit congie Dist aussy que depuis ledict temps elle a veu plusieurs foys ledict bregier quy gardoit les brebis dudict le Gillon sur lesdictes terres et chemins dudict Pietre Meisme elle a veu une foys ledict Guillaume quy gardoit sesdictz brebis sur les terres dudict Becque estant garny dune picque Et plus nen scet

Robert Petillon labourier demourant en la paroisse dEstaires eaigie de soixante trois ans ou environ tesmoing jure et oy sur les III III V VI et VIIe articles desdictes replicques et sur les III V VII VIII XIII XV et XXVIIe articles desdictes memoires dudict demandeur Et requis quil en scet Dist et affirma apres serment par luy fait quil a bonne memoire quil a tousiours oy dire et maintenir et veu user que nulz ne pavoit envoyer paistre ses blancqs bestiaux en et sur ladicte seigneurie sil nestoit masurier dudict lieu <sup>329</sup>Ce quil scet par avoir demoure au hamel de Mauqhissart voisin de ladicte seigneurie de Pietre Dist aussy que au temps quil demouroit audict Mauqhissart oyt dire a beaucoup de bons laboureurs de allentour dudict Pietre quilz

---

<sup>328</sup> Folio 236v°.

<sup>329</sup> Folio 237r°.



se gardoient de aller sur Pietres craindant destre prins bien sachans quilz ny povoient par ce quilz nestoient masuriers comme ilz disoient audict deposant Et sy a aussy bonne memoire quil a oy dire a aucuns aultres labouriers que quant leurs blancqz bestialz pasturoit sur Pietre que cestoit sur leurs adventures et peril damende par ce quilz craindoient les sergens dudict Pietre et destre prins diceulx Sy dist aussy que pardevant Anthoine Sanse censier dudict Pietre fut quelque temps sans tenir nulles blancques bestes Et par ce moien pluisieurs labouriers forains quilz nestoient masurier dudict Pietre donnoient quelque gratieusete au pere dudict Seigneur / ou des chappons affin davoit congie de povoir envoyer pasturer leurs blancqs bestial sur ladicte seignourie de Pietre Lequel congie ledict Seigneur leur accordoit

Dist encoires ledict depposant quil scet que entre labouriers il nest coustume de envoyer paistre ses blancques bestes sur les marches lun de laultre ains ung chacun doibt faire paistre sesdictes blancques bestes sur les terres et seignouries ou quilz sont demourans couchantz et levans et que de toute sa congnoissance il en a ainsy veu user et maintenir

Dist aussy quil a oy dire que pardevant il y a eu en ladicte seignourie grandz inconveniens par les bregiers forains et entre aultre la femme dudict Anthoine fut homicidee dun cop de houlette que luy donna ung bregier sur la teste Et plus nen scet sur tout requis

Thomas Corion bregier demourant a la maison Mahieu Vignoble a Pummereaulx paroisse Dauberch eaigie de <sup>330</sup>soixante ans ou environ tesmoing jure et oy sur les IIII V VII VIII XIII et XVe articles desdictes memoires et Ve articles desdictes replicques Et requis quil en scet Dist et afferma apres serment par luy fait quil a tousiours oy dire maintenir et veu user depuis sa josnesse que nul ne peut envoyer ne faire pasturer ses brebis et moutons en et sur ladicte seignourie de Pietre sil nest mazurier dudict lieu / et comme il a oy dire a aulcunes anciennes gens

Davantaige dist que environ sept a huict ans luy demourant a la maison dudict Mahieu que jehan de le Marre lors sergeant dudict Pietre le a menachie et deffendu par pluisieurs foyz quil ne allist sur Pietre par ce que son maistre nestoit mazurier Comme aussy sondict maistre luy deffendoit journellement scachant et luy disant que nulz ne y povoit envoyer ses blancques bestes silz nestoient mazurier dudict lieu et comme encoires pour le present sen astient et luy deffend ledict Mahieu son maistre / combien quil soit tenant et rentier dudict Pietre Ce quil scet par avoir tout le temps de sa jeunesse demoure allentour dudict Pietre

Dist aussy quil nest usance ne coustume que les bregiers et troppeaulx des labouriers envoient pasturer sur les marches lun de laultre et que jamais nen a veu aultrement user Ains ung chascun doibt faire paistre ses blancques bestes sur ses limites et de tout sa congnoissance il nen a veu aultrement user et non point sur les terres que la ou ilz sont couchans et levans

Davantaige dist quil a oy dire a Ansel de Mars labourier demourant a la cense de Lestree demourant avecq ledict Ansel passe plus de trente ans quil allast hardiment sur Pietre et quil estoit masurier dudict Pietre Et plus nen scet

<sup>331</sup>Peronne Bosquet vefve de feu Mahieu de Gherry eaigie de soixante neuf ans tesmoing juree et oye sur les IIII V VII VIII XIII et XVe articles desdictes memoires Et requise quelle en scet Dist et affirma apres serment par elle fait que de tout sa

---

<sup>330</sup> Folio 237v°.

<sup>331</sup> Folio 238r°.

memoire elle a veu user et maintenir que nulz forains ne aultres ne pavoient envoyer ne faire paistre leurs brebis et moutons en ladicte seignourie de Pietre sil nestoient mazuriers dicelle seignourie a peril damende Meismes quelle a ainsy oy dire par pluisieurs foys a jehan Bosquet son pere eaigie a son trepas de quatre vingtz deux ans et termine environ a XXVII a XXVIII ans encha et pareillement le a oy aussy dire a sa mere eaigie a son trepas de quatre vingtz XII ans terminee sept ans depuis ledict Bosquet son mary

Dist aussy quelle a eu bonne congnoissance de Pierre Quillet et Pierre du Bacquerot pardevant sergeant de ladicte seignourie Lesquelz elle a veu par pluisieurs foys quilz prenoient les blancques bestes de ceulx quilz nestoient mazuriers de ladicte seignourie tant sur le riez dudict Pietre que sur les chemins Ce quelle scet par avoir tousiours demoure audict Pietre saulf sept ou huict ans et quilz estoient contentez de leurs prises comme elle scet par le avoir oy dire audictz sergeans

Sy dist et affirma aussy quelle a oy dire a pluisieurs aultres anchiennes gens que sesdicts pere et pere / telz que Anthoine Sanse eaigie de quatre vingtz onze ans et Benoit Henniart eaigie de quatre vingtz treize ans ou environ et termine depuis cinq ans / que nulz ne pavoit envoyer ne faire paistre sesdictz brebis sur Pietre sil ne estoient masurier dudict lieu a peril damende Lequel Benoit elle a veu tousiours demorer audict Pietre Meismes que depuis quarante huict ans elle le a tousiours veu demorer a sa maison sur ledict rietz de Pietre ou il est termine aiant tousiours joy et possesse de sa mesure surquoy ledict lieu estoit assis et le avoir veu servy comme masurier durant ledict temps aux bancqs dudict Pietre Et plus nen scet

<sup>332</sup>Nicollas Fascon eaige de vingt six ans ou environ tesmoing jure et oÿ sur les VII et VIII articles desdictes memoires et requis quil en scet Dist et affirme apres serment par luy fait quil a tousiours oy dire et maintenir et veu user que nulz ne peuvent envoyer ne faire pasturer leurs brebis et moutons en et sur ladicte seignourie silz ne sont masuriers dudict lieu Et meismes que pluisieurs mesures ont estees crees de nouvel ou achetees par pluisieurs gens pour ceste seulle cause Et entre aultres feuz Martin de le Barre et Pierre Hayart son beau filz Meismes que depuis trois ans encha il requist audict demandeur davoit grace que sadicte mesure fut coutumee Laquelle selon lappoinctement fait entre ledict demandeur et feu Hayart sur la ratraicte que en volloit ferre estoit desfranchie de masuraige par le deces dudict Hayart Et plus nen scet

Bertrand Caillet bregier demourant a Fromelles a la maison Lambert Sohier eaigie de soixante quatre ans tesmoing jure et oy sur les IIII V VII VIII XIII et XVe articels desdictes memoires et Ve articles desdictes replicques Et requis quil en scet Dist et affirma apres serment par luy fait quil a tousiours veu user et maintenir de toute sa josnesse que nulz ne pavoit envoyer ne faire paistre ses brebis et moutons en et sur ladicte seignourie de Pietre sil nestoit masurier dudict lieu / et comme il a aussy oy dire et maintenir a pluisieurs anchiennes gens Meismes luy demourant a la cense des Mottes sceant et tenue dudict Pietre avecq jehan du Bacquerot Il se gardoit et abstenoit de garder et faire pasturer les brebis dudict Bacquerot sur les chemins et rietz de ladicte seignourie de Pietre par ce que sondict maistre luy deffendoit et quil nestoit masuriers dicelle seignourie comme luy disoit sondict maistre

<sup>333</sup>Dist aussy ledict depposant que luy estant demourant comme bregier a la cense de Tricquenel gisant audict Pietre et en tenue Il se gardoit et abstenoit de faire

---

<sup>332</sup> Folio 238v°.

<sup>333</sup> Folio 239r°.

pasturer ses brebis et moutons sur ladicte seignourie de Pietre obstant quil scavoit que son maistre nestoit masurier Comme aussy il a veu de sa memoire plusieurs labouriers voisins dudict Pietre tant de le Chappelle Mauqhissart du Biez que daultrepart se gardoient et abstenoient de envoyer ou faire pasturer leurs blancques bestes sur Pietre obstant quilz nestoient masuriers dudict Pietre Meismes a veu aussy que quant les sergeans dudict Pietre venoient pour prendre les troppeaulx de ceulx quilz nestoient masuriers dudict Pietre les bregiers sen enfuyoient et se abstenoient de y venir

Dist aussy que les laboureurs ne envoient paistre leurs blancques bestes sur les marches lun de laultre parce quil nest coustume de ce faire ains ung chacun doit faire paistre sesdictes bestes sur les terres et seignouries ou ilz sont demourans couchans et levans et ainsy en a veu user et maintenir et luy meismes en a este prins sur Saintghin par che quil demouroit sur Fournes a la maison jacques le Clercq combien que ledict le Clercq avoit heritaige sur les dimaige Saintghin et en tenu

Dist aussy que environ vingt sept a XXVIII ans demourant avecq ledict Bacquerot et depuis a la cense du Biez il a veu ceulx de la Chappelle et Mauqhissart et entre aultres Pierre le Cocq du Belloy Laurens Hardoye et Anthoine Frusleu de ladicte Chapelle quilz se gardoient et abstenoient de envoyer faire paistre leursdictz moutons sur ladicte seignourie de Pietre Ains ne faisoient pasturer lesdictz moutons sinon sur les <sup>334</sup>Brullos jehan Boullen quy sont terres tenues de ladicte Cappelle et ne paissoient les bregiers desdessus nommez lesdictz brulos ne le coing du bois du Biez / La ou que finie ladicte seignourie de Pietre Trop bien il depposant dist que quelque foys les bregiers des dessusnommez se banderent pour venir par forche pasturer par toute la seignourie de Pietre aux chemins et riez Quoy voiant ledict deposant assiste de quelque aultre bregier rendirent paine de les rachasser et les feyrent retirer vers ladicte Chapelle Et que depuis il ne les a plus veu venir

Dist aussy que plusieurs gens ont achetez mesures a celle seule fin de povoir envoyer paistre leurs brebis sur Pietre et entre aultres Martin de le Barre demourant a Pummereaulx et Ansel de Mars censier de Lestree Et que auparavant quilz eussent achetez lesdictes mesures ilz ne y osoyent envoyer combien quilz euissent grantz troppeaulx et quilz demouroient assez pres dudict Pietre / Comme luy deposant scet bien par ce quil demouroit avecq ledict Martin paravant quil fut masurier Comme aussy luy demourant a la maison Mahieu Vignoble audict Pummereaulx il sen gardoit par ce que son maistre nestoit masurier combien quil fut rentier et tenant dudict Pietre

Sy a bonne memoire que jehan Toullouse demourant a Mauqhissart acheta une mesure sur Pietre affin davoir ladicte franchise de pasturage sur ladicte seignourie et que auparavant quil fut masurier ses brebis estoient prinses lors que on les trouvoit pasturans sur ladicte seignourie Quoy voiant ledict Toullouse dist audict depposant que avant ung mois il feroit tant quil seroit masurier dudict Pietre a ladicte fin de pasturage / Et plus nen scet

Grard le Roy labourier demourant audict Pietre eaigie de quarante cincq ans tesmoing jure et oy sur les IIII et Ve articles desdictes repplicques Et requis quil en scet Dist et affirma apres serment par <sup>335</sup> luy faict quil a bonne memoire davoir oy dire a jehan de le Herre son beau pere / que sil ne euist en grace du pere dudict Seigneur Il ne euist ose aller ne envoyer paistre ses blancques bestes sur Pietre obstant quil nestoit masurer Combien quil demouroit sur Pietre

---

<sup>334</sup> Folio 239v<sup>o</sup>.

<sup>335</sup> Folio 240r<sup>o</sup>.

Dist aussy quil a oy dire a Anthoine du Pas parci devant bregier audict jehan / que Henry du Bacquerot lors censsier des Mottes volloit empeschier quil ne envoia ne fait pasturer son bestial sur Pietre obstant que ledict jehan nestoit masurier Et plus nen scet

Mariette Montaigne vefve de jehan Cappellier et auparavant de jehan du Bois eaigie de quarante six ans tesmoing juree et oys sur les IIII et Ve articles desdictes memoires Dist et affirma apres serment par elle fait avoir bonne memoire quelle a tousiours oy dire et maintenir et veu user que nulz ne peult envoyer ne faire paistre ses brebis et moutons en et sur ladicte seignourie de Pietre sil nest masurier Oist que auparavant quelle eust espouse ledict du Bois Il luy disoit quil avoit prins plusieurs foys les brebis et moutons de ceulx quilz nestoient masuriers trouvez pasturans sur ladicte seignourie et les amenoit es prisons dudict Pietre / et estoit a chacune foys contente et satisfait de sa prinse Et plus nen scet

Marguerite Bosquet vefve de feu jehan Blondel eaigie de soixante unze ans ou environ tesmoing juree et oye sur les VIIe VIII XXIII et XXVe articles desdictes memoires Et requis quelle en scet dist et affirma apres serment par elle fait quelle a bonne memoire<sup>336</sup> que plusieurs gens ont achetez mesures sur Pietre A celle fin seulement de envoyer son bestial pasturer sur la dicte seignourie de Pietre Et en aultres jehan Toulouse Martin Delebarre Ansel de Mars Thomas Boidin et Nicollas Morel pere de Nicollas Meismes elle a veu aultrefois que on a deffendu et prins regard que nulz ne vint sur Pietre sil nestoit masurier dudict lieu Dist aussy quelle a bonne memoire que plusieurs aultres gens ont pretendu davoit mesures a celle seule fin dudict pasturage Et entre aultres le censier du Biez que rendit grand paine de acheter la mesure grand fache Dist que depuis quarante ans elle a demoure audict Pietre et veu que Benoit Henniart a tousiours joy continuellement de sa mesure et pour tel le a veu servir aux bancqs dudict Pietre jusques a son deces et que encoires pour le present Mahieu filz dudict Benoit joy de ladicte mazure

Dist aussy quelle a bonne memoire que la femme Anthoine Sanse fut tuee dung bregier pour ce quelle le volloit enchasser arriere du chemin comme aussy fut fort batu ledict Anthoine et ses enfans Et plus nen scet

jehan du Bois le josne eaigie de trente six ans tesmoing jure et oy sur le Ve article desdictes replicques Et requis quil len scet dist et affirma apres serment par luy fait que depuis cinq a six ans quil est sergeant dudict Pietre et auparavant il a tousiours prins regard sur ceulx quilz nestoient masuriers dudict Pietre Affin de les prendre sil les trouvoit pasturans sur Pietre Et entre aultres a prins le bregier dudict le Gillon Croy bien il en a veu aucuns aultres point trop souvent que incontinent quilz lapperchevoient Ils sen fuyoient pasturer vers les bois du Biez Et de fait environ six ans il print le troupeau de Pierre de le Becque<sup>337</sup> au camp de Mahieu de Dours tenu de ladicte seignourie Lequel print pour lamende et prinse ung mouton / et lamena a la cense dudict Pietre es prisons et fut contente de son droit de prinse par le filz dudict Pierre de le Becque Et plus nen scet

---

<sup>336</sup> Folio 240v°.

<sup>337</sup> Folio 241r°.

Callynne de Raye vefve de feu jehan de<sup>l</sup> rachie eaigie de soixante six ans demourant audict lieu Laquelle apres serment par elle faict a affirme que de tout son temps et josnessne elle a demoure audict Pietre et allentour et quelle a tousiours oy dire maintenir et veu user que nulz forains ny aultres ne poeuvent faire paistre leurs brebis et moutons en ladicte seigneurie silz ne sont masuriers tant sur les chemins riez que heritaiges tenus de ladicte seigneurie et que ladicte franchise et privilege de masuraige appertient seullement aux masuriers dudict Pietre Et plus nen scet

Martin Hennart labourier eaigie de vingt huict ans tesmoing jure et oy sur les IIII V VI XIII XIII et XVe articles desdictes replicques et III et XIIIe articles desdictes memoires dist et affirma apres serment par luy faict quil a bonne memoire que de tout son temps que ceulx de Lorgies du Biez Ligny le Cappelle Mauqhissart Venthies Auberch et aultres lieux circonvoisins se sont gardez et abstenu de faire paistre leurs bestialz en ladicte seigneurie de Pietre Ce quil scet par avoir tout son temps garde les brebis de Pierre Hennart son pere censier dudict Pietre au jour de son trespas

Dist aussy que depuis six ans ou environ jehan du Bois sergeant dudict Pietre print le troupeau de Pierre le Becque demourant au Biez que pasturoit sur Pietre<sup>338</sup> au camp de Mahieu de Dours demourant audict lieu Lequel sergeant fut paye de sa prinse et depuis ne a jamais plus veu venir le troupeau dudict de le Becque sur Pietre Et plus nen scet

Laurens Hennart filz de feu Pierre eaigie de vingt six ans tesmoing jure et oy sur les articles dessusdictes et requis quil en scet Dist et affirma apres serment par luy faict quil a bonne memoire que ceux du Biez Ligny le Chapelle Mauqhissart et aultres lieux circonvoisins se gardoient et abstiennent de envoyer paistre leurs bestiaux sur Pietre Et ainsy en a veu user et maintenir tout le temps de sa josnesse Dist aussy quil a bonne memoire que jehan du Bois sergeant dudict Pietre print les blancques bestes de Pierre de le Becque pasturans sur Pietre a raison quil nestoit masurier et fut ledict sergeant contente de sa prinse Et plus nen scet

Collation faicte a loriginal et trouve concoder par moy parcidevant bailly dudict Pietre soubsigne Ainsy signe C Lefebvre



Transaction faicte en lan quinze cens trente et ung entre le Seigneur de Pietre dune part Pierre le Gillon et jehan Toulouse daultre touchant le proces intente au conseil dartois touchant les pasturages que les blancqs bestiaux desdictz Gillon et Toulouse faisoient sur la seigneurie de Pietre Et promesse de non plus faire ferre ledict pasturage

Les gens du conseil provincial d'Arthois A tous ceulx qui ces presentes verront salut Scavoir faisons que le jourdhuy dacte de ces presentes comparurent<sup>339</sup> pardevant nous oudict conseil en leurs personnes Me Guillaume Hangouart Seigneur de Pietre Conseiller de Lempereur nostre Sire et son president Darthois dune part Et jehan Toulouse demourant a le Venthies pays de Lalleuwe et Pierre le Gillon demourant a

---

<sup>338</sup> Folio 241v°.

<sup>339</sup> Folio 242r°.

la Neufve Chapelle daultre part Par lesquelz a este dict et recongnu comme proces fut aparant mouvoir dentre eulx sur ce que ledict Seigneur de Pietre avoit en vertu de nostre commission faict faire par Gilles Derin huissier ordinaire dudict conseil commandemens ausdictz Toulouse et Pierre le Gillon que pour le temps advenir il ne euissent a envoyer et faire paistre par eulx ou leurs bergiers et serviteurs leur blancq bestial en et sur ladicte seignourie de Pietre en regard que par privileges anchienne usance et coustume nul ne a auctorite de ce pover faire que les hommes et juges mazuriers dicelle seignourie de Pietre du nombre desquelz nestoient et ne sont lesdictz Toulouse et le Gillon et au surplus que chascun de eulx euist a paier audict Seigneur vingt amendes chascune de soixante solz parisis et dix livres pour le dommaige et interest par eulx faict et infere en ses plantes et herbages / lesquelz comparans pour éviter ledict proces ont dicelluy appointe et transige comme il sensieult C'est a scavoir que ledict Seigneur de Pietre a quictie ausdictz jehan Toulouse et Pierre le Gillon et chascun de eulx toutes et quelconques les amendes et interestz quilz peuvent avoir fourfaict et sont tenus a la cause dicte envers ledict Seigneur moiennant une amende de soixante solz que chascun de eulx luy ont paye et dont il sen tient content et passe quictance Et ausurplus ont lesdictz jehan Toulouze et Pierre le Gillon secondz comparans promis et par ces presentes promectent de pour ladvenir eulx cesser et deporter de faire ne envoyer et souffrir leurs bregiers et serviteurs faire paistre en ladicte seignourie de Pietre leurdict blancq bestial / nest que par aucun <sup>340</sup> moien ilz deviennent juges masuriers dicelle seignourie de Pietre et ce soubz paine de soixante solz parisis a chascune foys que leur dict blancq bestial y aura este mene paistre et outre de reparer le dommaige quy seroit par ce faict audict Seigneur et aultres Et avecq ce ont accorde paier les despens et mises de justice que il peut avoir tire et desbourse a raison du commencement de ladicte poursieute Ce que accepte consenti et accorde Ledict Seigneur de Pietre Oyes par nous lesdictes declarations consentemens accordz et choses dictes Avons lesdictes parties et chacunes dicelle condempne et condempnons de leur consentement au paiement furnissement et entretenement des choses cy dessus specifiees <sup>341</sup> *En tesmoing de ce avons mis a ces presentes le seel dudict conseil* Qui furent faictes passees et recongues oudict conseil le seiziesme jour de septembre lan mil cinq cens trente et ung / Signees sur le reply M. de Moncheaulx commis pour labsence du greffier et scelles du seel d'Arthois de cyre vermeil



Minute D'accord offert par le Seigneur de Pietre a Guillaume le Gillon pour appointie de tous differens auparavant le proces intente au conseil Darthois sur la reintegrande<sup>342</sup> du mouton par luy reprins de la justice de Pietre Lequel accord ne sorty effect par ne avoir ledict Gillon le voulu accepter a raison dequoy sensieult la sentence deffinitive cy desus copie au proufit dudict Seigneur de Pietre

A tous ceulx qui ces presentes lettres verront ou orront Charles Lefebvre icy Comparurent en leurs personnes Guillaume Hangouart Escuier Seigneur de Pietre des Pummereaux dune part Et Guillaume le Gillon labourier demourant a le Neufve

---

<sup>340</sup> Folio 242v°.

<sup>341</sup> Le texte en italique est en marge sur le document original.

<sup>342</sup> Reintegrande : reintegration.

Chappelle daultre part Par lesquelz a este dict et recongnu comme proces fut pendant entre eulx pardevant la justice dudict Pietre <sup>343</sup> estant en estat de y servir de reproches sur ce que le sergeant de ladicte seignourie avoit le vingtiesme jour de juillet an quinze cens soixante prins et saisis deux moutons au troppeau dudict Guillaume le Gillon trouve pasturant en et sur ladicte seignourie de Pietre tant et pour lamende de soixante solz parisis pour ce deue que telz dommages et interestz qui en polroient avoir ensievny comme aussy y avoit auparavant ledict troppeau este plusieurs foys mene et garde paistre En contrevenant partant aux privileges ancienne usance coustume et ordonnances dicelle seignourie Par lesquelles il nest loisible a quelque personne soit de de dens ladicte seignourie de Pietre ou forain envoyer et faire paistre ses brebis et moutons en icelle seignourie sil nest masurier dudict pietre sans fraulde ou dol<sup>344</sup> et capable de servir comme tel aux bancqs de ladicte seignourie aiant fait les debvoirs a quoy sont tenus les masuriers dicelle seignourie de Pietre a peril de escheoir a chascune fois en lamende de soixante solz parisis et de reparer le dommaige comme desdictz privileges ordonnances et coustumes Ledict Gillon congnoit luy avoir bien apparu tant par la remonstrance et attestation que luy en ont faitz les tesmoingz productz en lenqueste dudict proces par le dict Seigneur, que par les tiltres et enseignemens a luy exhibez du nombre desquelz juges masuriers ne est ledict Gillon Et lequel nonobstant le dessusdict proces ne la promesse et appointement que il avoit fait le vingt huitiesme de mars quinze cens cinquante neuf avant pasques audict Seigneur de Pietre cestant lors poursievny audict lieu pour aultres prises de ses moutons saisis pasturans peu auparavant ledict mars en ladicte seignourie que il nenverroit ne suffiroit sesdictz moutons pasturer en icelle seignourie sur paine de ladicte amende de soixante solz parisis me esmeu<sup>345</sup> par les refreschissemens statutz et publications que sur ce ledict Seigneur de Pietre en avoit fait a leglise Dauberch es <sup>346</sup>mois de septembre des ans quinze cens soixante et soixante et ung ne se estoit abstenu de envoyer souffrir et faire paistre sondict blancq bestial en et sur ladicte seignourie de Pietre chemins flegardz terres et heritaiges tenus dicelle seignourie tellement que environ le my avril de cest an quinze cens soixante deux le sergeant dudict Pietre prinst et saisist ung mouton au troppeau dudict Gillon trouvant ledict troppeau pasturant sur les terres dudict Seigneur de Pietre tenues en cense par jehan Vennin Lequel icelluy sergeant amena et mist en la cense dudict Seigneur a Pietre ou y fut garde et nourry par le censier dicelle cense jusques a ce que quatre ou cinq jours apres ladicte prinse ledict Guillaume le Gillon assiste de deux personaiges reprint ledict mouton qui estoit alle paistre avec le troppeau dudict censier sur les terres dicelluy Vennin appartenans audict Seigneur de Pietre Pour raison desquelles emprinses et fourfaictures et de la rescousse reprinte et infraction de la main de justice que avoit fait ledict Gillon Lesdictz comparans estoient apparans de entre en proces lung contre laultre pardevant Messieurs les president et gens du conseil provincial Darthois ou aultre justice competente Pour a quoy obvier ont dicelluy different appointie et transgie comme il sensieult Cest asscavoir que ledict Seigneur de Pietre a quictie et quicte oudict Gillon toutes et quelconcques les amendes dommaiges et interestz que il peut avoir fourfait et est tenu pour les causes dictes moiennant la somme de treize livres quinze solz flandres que il luy sera tenu paier Surquoy ledict comparant prendra a sa charge les mises tant de information

---

<sup>343</sup> Folio 243r°.

<sup>344</sup> Dol : s.m. Tromperie ayant pour but de detourner quelqu'un d'un acte avantageux.

<sup>345</sup> me esmeu : à moi estime.

<sup>346</sup> Folio 243v°.

attestation enqueste que aultres sur ce que dessus ensieuyes Et quant aux proces cy dessus mentionne estant pardevant ladicte justice de Pietre en estat de reproces Ont pareillement appoinctie et transigie moiennant la somme de six livres quinze solz parisis que ledict Gillon a paie comptant audict <sup>347</sup>Seigneur de Pietre Sur laquelle some se prenderont premierement toutes mises et despens de justice et procedures Et au surplus ledict Guillaume le Gillon a Recongnu reparer et restably recongnoist et restablist par cestes le droict dudict Seigneur de Pietre touchant les emprinses et choses cy dessus mentionnees Revocquant tous troubles par luy commis au contraire des droictz possessions et saisines dudict Seigneur de Pietre Et sy a promis et promet de a ladvenir cesser et se deporter et abstenir de envoyer faire et souffrir par luy ou ses bregiers et serviteurs paistre sondict blancq bestial en et sur ladicte seigneurie de Pietre Nest que par aulcun moien il devienne juge mazurier dicelle seigneurie Et ce soubz paine de soixante solz parisis damende pour chascune foys que ses brebis et moutons aueront pasture en et sur ladicte seigneurie de Pietre rietz chemins voies flegardz communs terres et heritaiges en tenus et y gisans et outre ce estre tenu tenu de reparer le trouble et paier les dommaines et interestz qui en seroient ensieuvy Tout ce que dessus lesdictz Seigneur de Pietre et Guillaume le Gillon ont respectivement chascun en son regard passe consenty accorde accepte et promis entretenir furnir et accomplir sans jamais aller au contraire Soubz lobligation de leurs biens et heritaiges et ceulx de leurs hoirs presens et advenir vers tous Seigneurs et justices Meismes ledict Gillon de recongnoistre a ses despens ces presentes selon la forme et teneur et en tous ses pointz pardevant messieurs du conseil Darthois Monsieur le Gouverneur de Lille ou ses lieutenans auditeurs et notaires roiaux et pardevant toutes justices et seigneuries toutes et quanteffois que requis en sera Renonchant a toutes choses contraires a cestes meismes au droict disant generale renonciation non valloir Ce fut ainsy faict et passe audict Pietre le dixiesme jour de juing quinze cens soixante deux



<sup>348</sup>Nouvelle chartre de la seigneurie de Pietre contenant certaines ordonnances publiees en lan quinze cens trente et ung

A Tous ceulx qui ces Presentes Lettres Verront ou orront Guillaume Hangouart licencie es loix Seigneur de Pietre et des Pummereaulx Conseiller de Lempereur notre Seigneur et son president Dartois salut Scavoir fays que pour reprimer et corriger les delictz et exceptz quy se commectent et porront commectre en ladicte terre et seigneurie de Pietre que je tiens en haulte justice moienne et basse de messieurs les Doien et chapitre de St Ame en Douay et ressortissant presentement pardevant les gouverneur president et gens du conseil dudict Arthois comme gardiens commis aususditz Seigneur Doyen et chapitre Et laquelle paravant les guerres de lan quinze cens vingt et ung resortissoit pardevant monsieur le bailly Damiens aussy soubz ladicte qualite de gardien commis par le Roy de France et dillecq en la court de parlement a Paris et clerement donner a congnoistre en quelles amendes et fourfaictures escheront les delincquans en usant de lautorite

---

<sup>347</sup> Folio 244r°.

<sup>348</sup> Folio 244v°.



appertenant a ung Seigneur hault justicier et aussy des droictz franchises auctoritez usaiges et coustumes appertenant a ladicte seigneurie de Pietre Ay par ces presentes rafreschy et de nouveau pour autant que mestier seroit Ordonne et statue les pointz et articles quy sensieuent

Premiers quiconcques frappera aultruy frappera aultruy a sang par ire<sup>349</sup> en ladicte seigneurie de Pietre il eschera vers ledict Seigneur de Pietre en lamende de soixante solz parisis Et cesluy quy sera battu a sang sil ne vient denunchier endedens quinze jours apres le cas commis eschera en lamende de vingt solz parisis

Qui frappera aultruy de main garnie en ladicte seigneurie il eschera aussy en lamende de sept solz six deniers parisis

<sup>350</sup>Cestuy quy retiendra a tort lheritaige daultruy ou quy fera poursieulte de quelque heritaige pardevant la loy de ladicte seigneurie de Pietre soit par partie formee ou autrement cestuy qui dechera ou auera tort eschera en lamende de soixante solz parisis au prouffict dudict Seigneur de Pietre

Ceux quy feront aucune fouyne picqueront ou havront<sup>351</sup> sur les regectz frons et flegardz de ladicte seigneurie de pietre copperont sartront<sup>352</sup> ou emporteront les bois hallotz et hayes y croissans ou es prez et gardins soit appertenant audict Seigneur de Pietre ou aux masuriers et aultres qui droict y peuvent avoir escherront en lamende de soixante solz parisis au prouffict dicelluy Seigneur de Pietre et seront tenus reparer le dommaige

Quiconcques enfraindra la main de ladicte justice de Pietre en portant et transportant sans congie dudict Seigneur ou de son bailly les ablais<sup>353</sup> et advestures de aucun heritaige ou biens saisiz pour relief non faict et paie Rente aussy non paiee ou quelconque aultre cause et en quelque maniere que ce soit fust a la requeste dudict Seigneur de Pietre ou de quelque aultre partie telz infracteurs et facteurs escherront au prouffict dudict Seigneur de Pietre en lamende de soixante solz parisis Avecq seront tenus de restablir lemport pourveu que ladicte saisine et main mise ayt este deuement signisfiee au possesseur ou possesseurs de telz heritaiges ainsy saisys

Quiconcque pesquera le poisson du Seigneur de Pietre ou daultruy sy cest par nuit en sera pugny comme de larchin / et sy cest de jour eschera en lamende de soixante solz parisis et sera tenu reparer le dommaige Et sy quelcun y pesquoit pose quil ne print riens a tout harnas<sup>354</sup> ou tira a tout arcqs et bougions<sup>355</sup> ou culverine<sup>356</sup> eschera en vingt solz damende

---

<sup>349</sup> Par ire, par iray : par colère.

<sup>350</sup> Folio 245r°.

<sup>351</sup> Havrer : Piocher.

<sup>352</sup> Sartront : Defricheront.

<sup>353</sup> Ablais : blé coupe encore sur le champ.

<sup>354</sup> Harnas : filet de pêche.

<sup>355</sup> Bougion = ? bougon : grosse flèche.

<sup>356</sup> Culverine : couleuvrine.

Que toutes bestes a cornes pourcheaulx brebis moutons et aultres qui seront trouves en josne tailles de bois appertenans <sup>357</sup>audict Seigneur de Pietre ou aultre en dessoubz leaige de trois ans polront estre prinses et emparquies ou la garde dicelles pour lamende de soixante solz parisis Et en dessus lesdictz trois ans et en adverstures quy ont este semees de cincq solz parisis et es prez et jardins dudict Seigneur ou daultroy de trois solz Et en chascun desquelz cas se debvra reparer le dommage Ce bien entendu que ou lesdictes gardes et bestes ne seroient prinses en present meffaict neantmoins polra ledict Seigneur ou son bailly poursuyr la garde ou le maistre desdictes bestes pour lesdictes amendes enquoy chascun de eulx et cestuy contre quy mieulx plaira audict Seigneur de Pietre adrescher sera escheu et auera fourfaict pour la cause dicte et pour chascune foys ladicte amende de soixante solz parisis Saulf que au regard des blanches bestes de ceulx qui ne seront masuriers lamende y sera telle que sera cy apres declare

Que nest et sera loisible a quelque personne soit de dedens ladicte seignourie de Pietre ou forain envoyer et faire paistre ses brebis ou moutons en icelle seignourie sil nest mazurier dudict Pietre sans fraude ou vol et capable de servir comme tel aux bancqz de ladicte seignourie aiant faict les devoirs a quoy sont tenus les masuriers dicelle seignourie de Pietre a peril de escheoir a chascune foys en lamende de soixante solz parisis et de reparer le dommage

Quiconcque sera appellant de la justice de ladicte seignourie de Pietre et sera par le superieur dit mal appellant eschera en lamende de soixante solz parisis au prouffict dudict Seigneur de Pietre pareillement quant il y renuncheroit ne fust quil eust renunchie souffisamment endedens sept jours et sept nuictz

Item Quiconcques fera pasturer ses brebis en nouvelles esteulles <sup>358</sup> eschera en lamende de soixante solz parisis au prouffict dudict Seigneur de Pietre et sera tenu reparer le dommage Et pour ce <sup>359</sup>polront estre les gardes ou bestes saisies ou le maistre poursuy ainsy que bon samblera audict Seigneur de Pietre Et est a entendre que lesdictes nouvelles esteulles se appellent depuis que les gavelles sont lyees jusques au troisiemes jour enssievant

Item Sil y a quelque personne soit de justice ou aultre fors les officiers dudict Seigneur de Pietre quy fait exploict de justice es limites de ladicte seignourie de Pietre sans le consantement et assistance dudict Seigneur ou de son bailly ou lieutenant eschera et pour chascune foys au prouffict dudict Seigneur de Pietre en lamende de soixante solz parisis

Item que tous ceulx qui doibvent rente seignouriale audict Seigneur de Pietre seront tenus le paier au jour du siege publie a peril de lamende de deux solz selon quil est statue et ordonne par la chartre contenant la loy de ladicte seignourie de Pietre donnee par feu Bertoulz Sires de Baillieul en son viavant Seigneur de ladicte seignourie de Pietre en lan mil deux cens quarante du mois de decembre Laquelle repose originellement en la tresorie des chartres de Messieurs les prevost doyen et chapitre de Saint Ame en Douay

---

<sup>357</sup> Folio 245v°.

<sup>358</sup> Esteulle, esteule : s.f. paille, chaume.

<sup>359</sup> Folio 246r°.

Et au surplus en ce que nest cy dessus speciffie y seront gardees et observees les loix et constitucions de ladicte chartre dudict an mil deux cens quarante Les usaiges et coustumes de anchienete observees en icelle seignourie et ou par ce ne se trouveroit decision y seront gardees au faict des dictzes amendes les coustumes du baillage Damiens ou pour juge provincial avoit ladicte seignourie de Pietre paravant lesdictes guerres de lan quinze cens vingt et ung son ressort ainsy que dessus

Tous lesquelles choses et chascune dicelles moy Seigneur de Pietre dessusnomme veulx statue <sup>360</sup> ordonne et commande par cestes a tous ceulx quy ce regardera et pour autant que le puis faire en justice et raison estre gardees et observees soubz les paines et amendes que dessus et quest contenu esdictz cas non specifies par lesdictz chartre usaiges et coustumes de Pietre et Damiens respectivement Sy donne en mandement et commande et ordonne aux bailly ou son lieutenant hommes de fiefz juges mazuriers et cottiers de ladicte seignourie de Pietre de selon ce eulx conduire et rigler en faict de calenge<sup>361</sup> accusation et judicature En faisant retenue et protestation expresse de chambgier et muer le tout ou en partie et aultrement y ordonne touteffois quil me plaira et sy avant quil me sera loisible et licite par droict et coustume de pays En tout et partout saulf lhonneur le droict et justice de mes superieurs En tesmoing de ce ay pendu mon seau a ces presentes et mis mon seing manuel soubz le ploy Le premier jour doctobre lan mil cincq cens trente deux ainsy signe G Hangouart Sur le ploy au coste dextre est escript ce quil sensieut Le deuxiesme de febvrier an trente deux le contenu en cestes a este publie en leglise Dauberch par Philippe du Hamel par le charge de Pierre le Febvre bailly de Pietre apres avoir ete communicque aux juges dudict lieu Tesmoing le saing manuel dudict le Febvre bailly comme dict est le cincquiesme jour de febvrier oudict an trente deux Ainsy signe P le Febvre et son scellees en double queue de parchemin dun seel de chire rouge



Information faicte et tenue par Franchois le Clercq huissier du conseil Dartois et Anthoine Fascon notaire son adioinct sur plusieurs mesus<sup>362</sup> fourfaictures damendes emprinses que aultrement faictz par Nicollas Marsy en ladicte seignourie de Pietre tant pour envoyer son blancq bestail pasturer en ladicte seignourie que aultrement

Information faicte et tenue et tesmoings oys jurez et examinez En la terre et seignourie de Pietre le <sup>363</sup>quatriesme jour de mars quinze cens cinquante quatre Par moy Franchois le Clercq huissier darme de lempereur notre Sire Tant de son grand conseil de Mallines Que de son conseil provincial Dartois de la residence de la ville de le Bassee Et prins avecq moy pour adjoinct Anthoine Fascon notaire dicelluy Seigneur Empereur Et procureur postulant en ladicte ville de le Bassee et villaiges circonvoisins Et ce a la requeste de Guillaume Hangouart escuier Seigneur de Pietre des Pummereaux etc pour certain messus forfaictures et entreprinses contre droict de seignourie que aultrement fays par un nomme Nicollas Marsy labourier demourant a

---

<sup>360</sup> Folio 246v°.

<sup>361</sup> Calenger : emprisonner.

<sup>362</sup> Mesus : s.m. mefaits.

<sup>363</sup> Folio 247r°.

le Neufve Chappelle tant par luy que ses bestiaux Comme polra apparoir par les depositions des tesmoins dont les noms et surnoms sensieult

#### Premier

jehan Widdebien labourier demourant audict Pietre eaigie de trente ans ou environ tesmoing jure oy et interroge en ladicte information Et requis ce quil en scet dit et depose par son serment Que environ quinze jours dacte de ceste Ainsy que ledict deposant retournoit de Ligny le petit du logis de sa mere pour revenir en sa maison trouva et veyt ledict Nicollas Marsy gardant ses brebis quy estoient et pachioient sur un camp et pieche de terre appartenant a jehan le Blancq tenu de la seigneurie dudict Pietre tellement que ledict depposant oyt quelque murmure et haultaines parolles tellement quil se esmeult de y aller Et de faict y alla extimant et craindant que ne sufist que ledict Marsy adrescha a son frere Et luy estant illecq arrive veyt que le bregier de la cense des Mottes nomme Nicollas estoit bleschie au viaire<sup>364</sup> et sur le pauch<sup>365</sup> de la main dextre de sorte que sang en yssit<sup>366</sup> Lequel bregier declara audict depposant que ledict Nicollas Marsy le avoit ainsy battu et bleschie Au contempt<sup>367</sup> de ce que ledict bregier remonstroit et disoit audict Marsy quil faisoit<sup>368</sup> mal de ainsy venir garder ses bestiaux et paistre sur ladicte seigneurie de Pietre Et quil ne pavoit ce faire par les coustumes dudict Pietre Comme ledict depposant affirme lesdictes coustumes estre telles que nul ne poeult amener ny faire paistre sur la seigneurie dudict Pietre quil ne soit masurier audict Pietre Sur paine de soixante solz parisis damende Afferme aussy sur ce interroguie quil oyt dire au meisme instant audict Nicollas Marsy et proferer telles parolles adreschans audict bregier au contempt<sup>369</sup> que dessus actend bougre je te auray ceste foys ou une aultre foys et te mectray a mort soit au jourdhuy ou demain de sorte que audict instant ledict deposant veyt icelluy Marsy garny dun baston invasible<sup>370</sup> nomme espieu en disant et usant desdictes menaches le tout au contempt que dessus Icelluy Marsy garny dudict baston poursievoit tousiours ledict bregier Lequel fut constraint pour eviter le dangier de son corps de soy retirer et de faict se retira vers sa maison et aultre chose nen scet sur tout requis Ledict a signe ceste sa deposition

jehan de le Flye josne filz a marier de jacques de le Flye demourant audict Pietre / eaigie de dix neuf ans ou environ tesmoing jure et oy en ladicte information et requis ce quil en scet dict et depose par son serment que depuis trois mois encha dacte de cestes il a veu ledict Nicollas Marsy par lespace de cincq foys signament les deux fois en personne mener paistre et garder ses blancqs bestiaux tans sur les heritaiges et camps de terre deffunct jehan le Blancq que sur les terres et camps de jehan Lombart quy sont tenus de ladicte seigneurie de Pietre Et sy affirme ainsy avoir veu ledict Marsy lesdictes foys en personne comme dict est en la presence de Anthoine Boidin<sup>371</sup> tesmoing cy apres denomme lequel le veoit avecq luy depposant dune Lune des foys estoit environ y a quinze jours que lors ledict bregier fut battu et bleschie par ledict Nicollas Marsy Et la derniere foys fut depuis ladicte bleschure Et les aultres

---

<sup>364</sup> Viaire : s.m visage.

<sup>365</sup> Pauch de la main : paume de la main ?

<sup>366</sup> De sorte que le sang en yssit : De sorte que le sang en coula.

<sup>367</sup> Au contempt : au mepris.

<sup>368</sup> Folio 247v°.

<sup>369</sup> Contempt : mepris.

<sup>370</sup> Invasif : offensif.

<sup>371</sup> Folio 248r°.

foys afferme les avoir veu certain temps auparavant ladicte bleschure en la presence de Marie le Leu sa mere Et les trois aultres foys a veu et percheu que Pierquin<sup>372</sup> bregier audict Marsy a mene paistre et garder sur lesdictz heritaiges les blancqz bestiaux dudict Marsy Afferme aussy sur ce interroque que puis environ quinze jours aultrement du jour nest recors<sup>373</sup> ainsy que ledict depposant estoit cerchant de le laigne a ferre feu veyt que le bregier de la cense des Mottes nomme Nicollas Venoit avecq ses blancqz besteaux pour les mener paistre sur certain camps et pieche de terre dudict deffunct jehan le Blancq veyt que sur icelluy camp y estoit icelluy Nicollas Marsy avecq ses blancqs besteaux quil faisoit paistre audict camp outre le gre et vollunte dudict bregier des Mottes et du censier de ladicte cense des Mottes Et incontinent que icelluy Marsy perchent ledict bregier des Mottes volloir venir faire pareillement paistre sesdictz bestiaux audict camp comme il luy estoit loisible de faire par les coustumes de Pietre et non audict Marsy quy est demourant a le Neufve Chappelle hors de ladicte seigneurie de Pietre Icelluy Marsy garny dune houlette<sup>374</sup> ferree a lun des bout De laquelle il poursievyt et courrut apres ledict bregier des Mottes tellement quil le ratainct et le frappa deux coups lung sur la teste et lautre sur le pauch de la main dextre de sorte que de la violence desdictz coups ladicte houlette fut rompue et cassee en deux pieche Et non content desdictz oultraiges et bastures se retira en la maison jehan Lombart querir ung espieu duquel il estoit garny Et luy retourne sur ledict camp poursievit de rechief ledict bregier des Mottes le appellant bougre disant par luy que sy le povoit tenir et trouver ledict bregier quil le tueroit<sup>375</sup> disant par ledict Marsy quil estoit sur ledict camp et quil y avoit encoires este et quil y viendroit encoires en son despit<sup>376</sup> et au despit du Seigneur de Pietre Et autre chose nen scet Icelluy depposant a marquie ceste sa deposition



jacques le Blancq filz de jehan labourier demourant audict Pietre eaigie de vingt trois ans ou environ tesmoing jure et oy en ladicte information Et requis de ce que en scet dict et afferme par son serment Que puis certain temps encha il a veu et percheu<sup>377</sup> le troupeau des brebis et blancqs bestiaux dudict Nicollas Marsy demourant a le Neufve Chappelle Duquel il a bonne congnoissance par ce que cest son circonvoisin paistre le nombre de dix foys dont le noeuf foys le bregier dudict Marsy les gardoit et menoit paistrer Et la dixiesme foys quy a este depuis quinze jours les a veu paistre mener et garder ledict Nicollas Marsy en personne Et ce sur la seigneurie dudict Pietre et comprehension dicelle Interroguie sil ne scet a parler daucunes menaches voies de faict et bastures faictes par icelluy Nicollas Marsy au bregier des Mottes dict quil nen scaveroit depposer par ce quil estoit absent estant en la ville Darras Sinon quil a bien oy dire depuis audict Nicollas quil ne se sousye point de mener sesdictz blancqs bestiaux paistre en ladicte seigneurie de Pietre Et est tout ce quil en scet sur tout requis

Ledict depposant a signe ceste sa depposition

---

<sup>372</sup> Blanc dans le texte.

<sup>373</sup> Recors : récit.

<sup>374</sup> Houlette : s. f. bâton de berger muni d'un fer en demi cylindre à son extremite, ce fer servant à prelever et lancer des mottes aux montons qui s'ecartent de manière à les ramener vers le troupeau.

<sup>375</sup> Folio 248v°.

<sup>376</sup> Despit : s. m. mépris humiliation.

<sup>377</sup> A veu et percheu : A vu et aperçu.



Anthoine Boidin labourier demourant a Mauquissart paroische de le Venthie / eaigie de vingt cincq ans ou environ tesmoing jure et oy en ladicte information et requis ce quil en scet dict et afferme par son serment que depuis certain temps encha aultrement du <sup>378</sup>jour nest recors il a veu et percheu tant ledict Nicolas Marsy en personne que son bregier mener paistre et garder ses brebis par l'espace de quatre foys en et sur la seigneurie de Pietre dont la premiere foys fut y a environ quinze jours lors ledict Nicollas les menoit luy meismes paistre sur un camp et pieche de terre appartenant a jacques le Blancq quil tient en cense que lors il batit et blescha le bregier des Mottes dont lesdictes deux foys que ledict Marsy les gardoit en personne estoit avecq luy deposant et les veoit pareillement ung nomme jehan de le Flye tesmoing precedent / Veyt aussy au mesme instant que le bregier des Mottes venoit a tout son troupeau paistre audict camp comme il pouvoit faire par les coustumes dudict Pietre percheut que ledict Nicollas Marsy frapport et lanchoit dune houlette apres ledict bregier des Mottes Et ce au contempt de ce que icelluy bregier des Mottes volloit mener ses brebis audict camp comme il pouvoit faire comme dict est Et est tout ce quil en scet Ledict deposant a signe cestes sa deposition

Du cinquiesme jour de mars quinze cens cinquante quatre par ledict huissier et son adjoint audict Pietre



Bernard de le Flye josne filz a marier manouvrier demourant audict Pietre eaigie de vingt cincq ans ou environ tesmoing jure et oy en ladicte information et requis ce quil en scet dict et depose par son serment quil a bonne congnoissance dun nomme Nicolas Marsy labourier demourant a le Noeufve Chappelle Lequel il a veu l'espace de trois foys tant ledict Nicollas Marsy que son bregier garder et faire paistre ses blancqs bestiaux sur ung camp et pieche de terre tenus de la seigneurie de Pietre <sup>379</sup>et sur la comprehension dicelle contre les privileges et coustumes dudict Pietre quil affirme estre telles que nulz forains ne peuvent paistre ne faire paistre leurs blancqs bestiaux ny aultres sur ladicte seigneurie sans congie du Seigneur A paine de encourir en amende de soixante solz parisis et reparation de lieu Dont la seconde foys fut environ y a quinze jours dacte de cestes que lors ledict deposant veyt et avecq luy Marie Leureux sa mere et jacques de le Flye son frere tesmoing precedent / Le bregier des Mottes nomme Nicollas quy venoit a tout son troupeau de blancqs bestiaux quy volloit venir faire paistre sur ledict camp comme il luy est loisible de faire comme masurier dudict Pietre De quoy ferre il fut empeschie par ledict Nicollas Marsy en personne de sorte que ledict Nicollas vint violement garny dune houlette ferree au bout de laquelle ferrÿt et lancha et de fait frappa plusieurs coups sur ledict bregier de sorte quil fut bleschie et fut partant constraint de soy retirer et mettre en fuyte pour raison desdictes battures et oultraiges craindant plus grand dangier de son corps usant par ledict Marsy en le pouchieuvant tousiours de telles parolles actend he bougre filz de ribaude et aultres parolles je te auray je te monstray que jay deux brach Afferme que

---

<sup>378</sup> Folio 249r°.

<sup>379</sup> Folio 249v°.

le troiesme foys quil a veu paistre lesdictes brebis a este depuis ladicte basture et oultraiges dessusdictz ou estoit present et quy le voit pareillement ladicte Marie le Leu mere dudict depposant et son frere jacques tesmoing precedent Afferme oultre que la premier foys quy estoit devant ladicte basture estoit avecq luy et quy le veoit pareillement la femme de Antoine Boidin et sadicte mere et ledict jacques son frere et est tout ce quil en scet sur tout requis

Ledict depposant a declare quil ne scet lire ne escrire partant ne scaveroit signer ceste sa deposition



<sup>380</sup>Marie le Leu vefve de feu jacques de le Flye demourant audict Pietre eaigie de soixante trois ans ou environ tesmoing juree et oye en ladicte information et requis ce quelle en scet dit et afferme par son serment quelle a veu et percheu par trois foys diversement ledict Nicolas Marsy paistre et mener ses blancqs bestiaux et les faire paistre sur ladicte seignourie de Pietre Et ce depuis certain temps encha Signament la deuxiesme foys depuis quinze jours encha Que lors sur ce que le bregier de la cense des mottes masurier dudict Pietre volloit venir a tout son troppeau de bestes paistre sur ledict camp et pieche de terre ou estoit ledict Marsy comme il pavoit faire, comme aussy tous masuriers dudict Pietre et nulz aultres sieuvant les coustumes dudict Pietre sur paine et amende de soixante solz parisis / Laquelle coustume ladicte depposante afferme estre telle Touffefois il fut de ce empeschie par laggression que luy faisoit violement ledict Marsy de sorte que icelluy Marsy garny dune houlette ferree au boult de laquelle il fery et frappa pluisieurs coups sur ledict bregier tellement quil fut bleschie a sang en la teste et au pauch de la main dextre Et la troiziesme foys a este depuis ladicte basture Et la premiere foys desdictes trois foys fut depuis ung mois encha quy estoit devant la bleschure ou estoit present ledict jacques de le Flie son fils tesmoing precedent ladicte depposante a declare quelle ne scet lire ne escrire partant ne scaveroit signer ceste sa deposition



Benoit Henniart labourier demourant audict Pietre eaigie de quatre vingtz treize ans tesmoing jure et oys en ladicte information et requis ce quil en scet<sup>381</sup> dict et afferme par son serment quil a bonne congnoissance de Nicollas Marsy demoutant a le Neufve Chappelle Lequel il a veu et percheu ledict Marsy en personne garder et faire paistre ses brebis sur la seignourie de Pietre Et ce depuis quinze jours encha contrevenant partant par luy aux coustumes et usances dudict Pietre Laquelle ledict depposant afferme estre telle / quil nest loisible ne permis a personne forains ny aultres dudict Pietre mener ny faire paistre leurs bestes sur ladicte seignourie de Pietre sil nest homme masurier dudict lieu de Pietre a paine de encourir et escheoir pour chascune foys en amende de soixante solz parisis Et aultres choses nen scet sur tous requis

Ledict depposant a signe ceste sa deposition



---

<sup>380</sup> Folio 250r°.

<sup>381</sup> Folio 250v°.

Nicollas Bonnel josne filz a marier gardant les brebis de Henry du Bacquelerot censier de la maison des mottes eaigie de vingt et ung an ou environ tesmoing jure et oy en ladicte information et requis ce quil en scet Dit et deppose par son serment quil a bonne congnoissance de Nicollas Marsy Lequel il a veu et percheu les brebis dudict Nicollas Marsy par trois foys paistre sur la seignourie de Pietre Signamment la seconde foys les gardoit ledict Marsy en personne Que lors icelluy depposant sur ce quil vouloit mener paistre son troppeau sur certain camp ou estoit ledict Marsy Icelluy Marsy demanda audict deposant ou quil alloit Aquoy icelluy deposant luy respondict quil alloit faire paistre ses brebis audict camp luy disant et declarant quil y pavoit mieulx faire paistre ses dictes brebis que icelluy Marsy parceque ledict deposant et son maistre est censier et masurier audict Pietre et non ledict Marsy Lequel declara lors audict deposant quil ne viendroit pinct paistre sur ledict camp Que lors en disant lesdictes parolles icelluy Marsy garny dune houlette quil avoit en sa main ferree au bout de laquelle il frappa plusieurs foys sur ledict depposant Tant sur la teste pauch que aultres parties de son corps tellement quil fut blesche a sang Et ce au contempt de ce que ledict deposant en usant des privileges et coustumes dessusdictes volloit faire paistre sesdicts bestiaux de sorte que de la violence desditz coups ladicte houlette fut rompue en pieches Et non content de ce sen alla soudain en la maison jehan Lombart Auquel lieu il print ung espieu duquel il commencha a poursievir ledict depposant le appellant bougre et aultres parolles villaines / Disant actend je te tueray de sorte que ledict depposant se mist en fuite pour eviter le dangier de son corps Afferme que la seconde foys quil veyt ledict deposant sur ledict Pietre fut lors quil depposant fut battu / La dernier fois depuis ladicte batture et bleschure ou estoient presens jehan de le Marre sergeant de ladicte seignourie de Pietre et jacques de le Flie Et la premiere foys fut auparavant ladicte bleschure ou estoit ledict jehan de le Flye / tesmoing precedent Et aultres chose nen scet sur tout requis

Ledict depposant a declare quil ne scet lire ne escrire partant ne scaveroit signer ceste sa deposition

Collation faicte a loriginal de ladicte information par nous huissier et adjoint soubz signe et trouve concorder / Ainsy signe Fascon F. le Clercq



<sup>382</sup>Commision de commandemens contre Guillaume le Gillon Nicollas Marsy et Martin Haiart non masuriers aians envoie leurs moutons pasturer sur la seignourie de Pietre

Les Gouverneur President et gens du conseil Darthois Au premier huissier dudict conseil sur <sup>383</sup>ce requis salut Expose nous a Guillaume Hangouart escuier Seigneur de Pietre des Pummereaux que luy compete et appartient en propriete a bon et juste tiltre a declare quant mestier sera ladicte terre et seignourie de Pietre en laquelle il a toute justice haulte moienne et basse et plusieurs beaulx droix preeminent et prerogatives et entre aultres que par privilege et anchienne usance coustume edictz et ordonnances publiees Refranchies et autrement nulz aultres que les mazuriers de

---

<sup>382</sup> Folio 251r°.

<sup>383</sup> Folio 251v°.



ladicte seignourie ne peuvent mener ny envoyer pasturer leurs blancqs bestiaux es mectes dicelle seignourie a paine de soixante solz parisis damende a luy a aplicquier et de paier linterest que lesdictz bestiaux auroient faitz en faisant lesdictz pasturages Orest il que Guillaume le Gillon labourier demourant a le Neufve Cappelle Nicollas Marsy aussy labourier demourant audict Neufve Cappelle bailliaige de Lens et Martin Haiart labourier demourant en la seignourie des Pummereaulx ou aultres a leur adveu se sont ingerez et advanchiez ingerent et advanchent denvoyer pasturer leurs blancqs bestiaux es mectes de ladicte seignourie de Pietre combien quilz ne soient masuriers dicelle seignourie et ce par plusieurs et diverses foys et journees en commectant pour chacune foys amende de soixante solz parisis envers ledict exposant avecq rendre et restituer linterest commis Asscavoir ledict Gillon jusques au nombre de cinquante amendes et lesdicts Marsy et Haiart jusques a la quantite de douze amendes chascun et chascun deulx six florins carolus pour les dommaiges et interest Saulf en tout juste extimation Lesquelz troubles et emprinses les turbateurs dessusdicts non volu reparer reintegrer et recongnoistre que a tort ilz avoient ce fait Et sy ont aussy este refusans delaians et en demeure de paier icelles amendes a tort et sans cause au grand prejudice dicelluy exposant et plus sera sans sur ce avoir provision Requerant icelle actendu la diversite des jurisdictions Sy comme bailliaige de Lens et ladicte seignourie des Pummereaulx quy est tenue avecq celle de Pietre en toute haulte justice moienne et basse des Doien et Chappitre St Ame en Douay dont<sup>384</sup> nous sommes gardiens commis Pourquoi nous vous mandons et commandons que a la requeste dudict exposant faictes expres commandement ausdicts turbateurs et chascun deulx et aultres quil appertiendra et dont requis serez quilz aient incontinent et sans delay a reparer lesdicts troubles et passer condamnation quilz ne pouroient ne debvoient ce faire avecq ce quilz aient a paier toutes lesdictes amendes de soixante solz parisis audict exposant Ensemble reffunder et paier tous desdictz interestz sy cessent doresnavant de plus faire le samblable a paine desdictes amendes et de reparer les troubles et interestz que lon feroient Et outre respondre par lesdictz turbateurs a telle requeste et conclusion que voudra ledict exposant contre eulx requerre et prendre au jour servant Et proceder en outre comme de raison Et pour ce quil est besoing adjourner en ceste partie aucuns demourant hors des mectes de nostre jurisdiction Prions et requerons en aide de droict a tous Seigneurs juges justiciers et officiers quil appertiendra que lesdicts adjournemens et exploictz il leur plaise faire ferre ou souffrir par vous estre faitz et en ce tant faire pour nous quilz voudroient que feissions pour eulx ce que ferions volontiers en pareil cas requis Et en cas quilz soient de ce faire refusans faictes les adjournemens et exploictz dessusdictz en parlant a leurs personnes se trouvez et apprehendez poeuvent estre es mectes de nostre jurisdiction sinon en parlant a leurs procureurs parens amys facteurs negociateurs et entremecteurs de leurs besoingnes et affaires Ou par cry publicque a la breteque<sup>385</sup> de la plus prochaine bonne ville du lieu de leur resedence estant de nostre jurisdiction Assignant aux portaulx de leglise copie de ceste commission et de vostre exploict Par-dessus ce leur insignant par semblable copie et vostre missive affin quilz nen pretendent cause dignorance tellement quil soit vray samblablement que lesdictz<sup>386</sup> adjournemens et exploictz soient venus a leur notice et congnoissance Et lesquelz exploictz faitz par la maniere que dict est sera dantel effect et valleur comme se faictes estoient a leur personnes ou vrays domicile et pour telz ou cas dessusdict les avons auctorisez et

---

<sup>384</sup> Folio 252r°.

<sup>385</sup> Breteque : emplacement public où se font ordinairement les proclamations et les affichages.

<sup>386</sup> Folio 252v°.

auctorisons en rescripvant de ce que faict en aurez de ce faire Vous donnons  
pouvoir<sup>387</sup> donne soubz le contreseel dudict conseil le vingt septiesme jour doctobre  
quinze cens soixante cincq



Rellation de lhuissier aiant mis ladicte commission a execution

A mes treshonorez et doubtez Seigneurs Messieurs les gouverneur president et gens  
du conseil Darthois Franchois Forcheville huissier extraordinaire dudict conseil  
resident en la ville de le Bassee bien vostre en tout mesdicts treshonorez et doubtez  
Seigneurs Plaise vous scavoir que en vertu de la commission de commandemens de  
vous donner au marge de laquelle ce present mon rescript est atache et pour icelles  
internier et mettre a execution a la requeste de Guillaume Hangouart escuier  
Seigneur de Pietre des Peumereaux impetrant dicelle le vingtiesme jour du mois de  
novembre quinze cens soixante cincq me suis transporte en la paroisse de Neuve  
Cappelle et Auberch aux domicile et par devers les personnes de Guillaume le Gillon  
et Nicollas Marsy demourant audict Capelle Martin Haiart demourant a Peumereaux  
paroisse Dauberch et apres assistance par moy requise parlant aux personnes  
dudict le Gillon et Marsy a la femme dudict Haiart pour labsence de son mary je  
auroie fait lecture de ladicte commission mot apres aultre faisant a chascun deulx  
tous les commandemens contenus en icelles a quoy se seroient rendus opposans  
Ce fait leur auroie donne et assigne jour a estre et comparoir dudict mois audict an  
pardevant vous mesdictz<sup>388</sup> Seigneurs audict conseil aux plaix du mardy  
vingtseptiesme jour dudict mois audict an pour dire leur cause dopposition En oultre  
proceder selon raisson tesmoing mon saing manuel chy mis le jour et an dessusdict  
Ainsy signe F de Forcheville



Reconnoissance Guillaume le Gillon et Nicollas Marsy de ne  
faire et souffrir leur blancq bestial pasturer en et sur la seigneurie  
de Pietre

A tous ceulx qui ces presentes lettres verront ou orront Maximilian Villain baron de  
Rassenghien Yzenghien francq Seigneur de St jausteene conseiller du Roy nostre  
Sire gouverneur et capitaine des villes chasteaux et chastellenies de Lille Douay  
Orchies et des appartenances salut Scavoir faisons que pardevant Rogier le Pers et  
Franchois le Guillebert auditeurs commis et deputez ou nom dudict Seigneur Roy a  
prendre oyr et recepvoir les contractz convenances marchiez et obligations qui se  
font et passent soubz le seel du souverain bailliaige dudict Lille Comparurent en  
leurs personnes Guillaume le Gillon et Nicollas Marsy labouriers demourans a la  
Neufve Chapelle Lesquelz comparans recongnurent comme proces fut meu et  
presentement pendant pardevant messieurs les president et gens du conseil  
Darthois entre Guillaume Hangouart escuier Seigneur de Pietre et eulx comparans  
sur ce que ledict Seigneur de Pietre avoit en vertu de commission emanee dudict

---

<sup>387</sup> pouvoir: s.m. pouvoir.

<sup>388</sup> Folio 253r°.

conseil faitte par Franchois de Forcheville huissier dudict conseil, commandement ausdictz Guillaume le Gillon et Nicollas Marsy comparans que pour le temps advenir ilz ne euissent a envoyer et faire paistre par eulx ou leurs bergiers et serviteurs leurs blancqz bestial en et sur ladicte seignourie de Pietre au regard que par privileges anchiens<sup>389</sup> usance et coustume nul ne a auctorite de ce pover faire que les hommes et juges masuriers dicelle seignourie de Pietre du nombre desquelz nestoient et ne sont lesdictz comparans Et au surplus que ilz euissent a paier audict Seigneur de Pietre asscavoir ledict le Gillon vingt amendes et ledict Marsy douze amendes de soixante solz parisis Darthois chascune faisant soixante sept patars six deniers tournois pour avoir aultant de foys envoye leurdicts blancqs bestiaux pasturer es mectes de ladicte seignourie de Pietre / lesquelz comparans pour éviter audict proces congnoissans leur tort ont promis et promectent par ces presentes de pour ladvenir cesser et depporter de faire ne envoyer et souffrir leurs serviteurs et bregiers faire paistre en ladicte seignourie de Pietre tant es flegardz chemins rietz voiries et communes que sur les terre et heritaiges en tenus et y gisans leurdicts blancqs bestiaux nest que par aulcun moien legitime ilz devieugnent juges masuriers dicelle seignourie de Pietre et ce soubz paine de soixante solz parisis monnoye Dartois portant comme dict est soixante patars six deniers tournois a chascune foys que leurdictz blancqz bestiaux y auront este menez paistre par eulx ou leursdictz bergiers et serviteurs et outre de reparer le dommaige que seroit pour ce faitte congnoissans en tout ce que dessus est dict Lesdictz comparans le droict dudict Seigneur de Pietre contre lequel ilz promectent ne aller jamais au contraire davantaige lesdicts comparans congnoissent avoir faitte commis ordonne et estably et par ces presentes commectent ordonnent et establisent leurs procureurs generaulx et certains messagiers especiaux de jehan Buisine jehan Doresmieulx Raoul Gosson Martin le Watier Franchois et jehan le Turcq / ausquelz procureurs et a chascun deulx ou lun deulx seul et pour le tout ilz ont donne pover especial et irrevocable de pour eulx et en leurs noms comparoir pardevant lesdictz Seigneurs president et gens dudict conseil dartois et par tout ailleurs ou mestier sera Et recongnoistre les droix<sup>390</sup> possessions et saisines dudict Seigneur de Pietre designes et baptises en ladicte commission en forme de commendement emanee dudict conseil a la requeste dudict Seigneur de Pietre cy dessus mentionnee et executee comme dessus est dict contre lesdictz comparans par ledict Franchois de Forcheville huissier dicelluy conseil accorder que ledict Seigneur de Pietre soit maintenu et garde en sesdictz droix possessions et saisines par luy baptisees par ladicte commission de commandement tant pour le droict principal que amendes interestz et choses y mentionnees avecqz condempnation dicelles amendes Et ses conclusions luy estre en tout et de tous pointz adjugees Et generalmente et especialement de es choses dictes et les deppendences aultant faire dire accorder et aultrement besoingnier comme faire et dire polroient lesdictz comparans constituans sy en propres personnes y estoient ia fust il que le cas requist ou desirast mandement plus especial Promectant lesdictz comparans par leur foy et serment tenir et avoir pour agreable ferme et estable a tousiours tout ce que par lesdictz procureurs ou lung deulx sera en ce que dict est et quy en deppend faitte dict accorde et aultrement besoingne soit sontre eulx ou aultrement meismes de paier le jugie sy mestier est soubz lobligation de leurs biens vers tous Seigneurs et justices renonchans a toutes choses contraires ad ces presentes En tesmoing de ce nous a la relation desdictz auditeurs par leurs seingz manuelz mis a cesdictes presentes

---

<sup>389</sup> Folio 253v°.

<sup>390</sup> Folio 254r°.

avons icelles fait seeller du seel dudict souverain baillaige Saulf le droict dudict Seigneur Roy et laultroy en tout Ce fut fait et passe le vingtroisiesme jour de septembre quinze cens soixante sept



Ausquelles lettres son infixees les lettres quy sensievent

<sup>391</sup> Les Gouverneur President et gens du Conseil provincial Dartois A tous ceulx qui ces presentes lettres verront salut Comme Guillaume Hangouart escuier Seigneur de Pietre nous eust fait exposer que a luy competoit et appartenoit en proprite a bon et juste tiltre ladicte terre et seignourie de Pietre en laquelle il avoit toute justice haulte moienne et basse plusieurs beaulx droix preeminences et prerogatives et entre aultres que par privilege et anchieune usance coustume edictz et ordonnance publiees rafraischies et aultrement nulz aultres que les masuriers de ladicte seignourie ne povoient mener ny envoyer pasturer leurs blancqs bestiaux es mectes dicelle seignourie a paine de soixante solz parisis damende et de paier linterest que lesdictz bestiaux auroient fait en faisant lesdictz pasturages Or estoit il que Guillaume le Gillon labourier demourant a la Noeuve Chappelle / Nicolas Marsy ausy labourier demourant audict Neuve Chappelle et Martin Haiart demourant au villaige des Pummereaulx ou aultres a leur adveu se seroient ingerez et advanchez denvoyer pasturer leurs blancqs bestiaux es mectes de ladicte seignourie de Pietre combien quil nestoient masuriers dicelle seignourie et ce par plusieurs et diverses foys et journees en commectant pour chacune fois amende de soixante solz parisis envers ledict Seigneur de Pietre avecq rendre et restituer linterest commis Asscavoir ledict le Gillon jusques au nombre de cinquante amendes et lesdictz Marsy et Haiart jusque a la quantite de douze amendes chascun / et chascun deulx six carolus pour les dommaiges et interest saulf en tout juste extimation Lesquelz troubles et emprinses lesdicts Gillon Marsy et Haiart navoient voulu reparer reintegrer et recongnoistre que a tort ilz avoient ce fait Et sy avoient aussy este reffusans delaians et en demoure de paier icelles amendes a tort et sans cause a raison dequoy auroit icelluy Seigneur impetrant sur ledict expose obtenu nostre commission et en vertu dicelle par certain huissier dudict conseil fait ferre commandement ausdictz Gillon Marsy et Haiart de part le Roy nostre sire et nous pour justice et a chascun deulx quilz euissent a reparer lesdictz troubles et passer condempnation quilz ne povoient ne devoient ce faire <sup>392</sup> avecq ce de paier toutes lesdictes amendes de soixante solz parisis / ensamble reffunder<sup>393</sup> et paier tous lesdictz interetz Et de cesser doresnavant de plus faire le samblable a paine desdictes amendes et reparer les troubles et interestz ausquelz commandement iceulx Gillon Marsy et Haiart se seroient opposez / et partant leur auroit este assigne jour audict conseil aux plaix du vingtseptiesme de novembre quinze cens soixante cincq Prendant lors ledict demandeur conclusion par maistre jacques du Bois advocat pour jehan Venant son procureur affin que a bonne et juste cause lesdicts commandements euissent este faitz et en les decretant seroient lesdictz deffendeurs et chascun deulx pour le tout condempnez reparer les troubles cy dessus declarez et paier lesdictes amendes enquoy ilz estoient escheuz vers ledict demandeur chascune de soixante solz parisis pour raison desdictes

---

<sup>391</sup> Folio 254v°.

<sup>392</sup> Folio 255r°.

<sup>393</sup> Reffunder : rembourser.

troubles par eulx commis le tout depuis sept a huict ans ou dumoing depuis vingt ans encha en regard a l'introduction de ceste poursuite Ensemble que lesdictz deffendeurs et chascun deulx pour le tout fussent aussy condempnez en six carolus pour le dommaiges et interestz desdictes troubles et que doresnavant cessoissent de plus faire le samblable a paine descheoir vers icelluy demandeur en pareilles amendes et de reparer l'interest demandant despens dommaiges et interestz Surquoy ledict Gillon et Marsy seroient entrez en deffence et tant procede quil y auroit eu appoinctement de veriffier par le moien desquelles procedures ladicte cause auroit este entretenue jusques a huy dacte de cestes que en jugement Jehan Buisine procureur desdits Gillon et Marsy en vertu de pover especial a luy donne insere en certaines lettres d'appoinctement entretenu entre lesdictes parties faictes et passees soubz le seel de la gouvernance de Lille le vingtroiziesme de septembre dernier auroit recongnu <sup>394</sup> le contenu esdictes lettres d'appoinctement estre veritable Consenty et accorde ledict Seigneur demandeur estre maintenu en sesdicts droix possessions et saisines tant pour le droict principal que amendes et interestz avecq condempnation desdites amendes Et ausurplus sadicte conclusion estre adjuge audict demandeur et de paier despens quil consentoit taxer saulf diminution le tout cy avant que faire pover en vertu dudict pover Ce que ledict Venant procureur dudict demandeur auroit accepter Selon que au registre de la court estoit et est plus plain contenu Scavoir faisons que veu lesdictz accord et acceptation ensemble ledict pover parmy lequel ces presentes son infixees Avons audict demandeur adjugie et adjugeons sadicte conclusion allendroict desdits le Gillon et Marsy les condempnant au furnissement dicelle et esdictes despens a taxer comme dessus le tout conformement audict pover En tesmoing de ce nous avons fait mettre le seel dudict conseil a ces presentes quy furent faictes et donnees en jugement le premier doctobre quinze cens soixante et sept



Reconnoissance de Martin Haiart de ne faire paistre ses moutons sur la seigneurie de Pietre

A tous ceulx qui ces presentes lettres verront ou orront Baulde Cuvillon licencier es droix Conseillier du Roy nostre Sire Et lieutenant par sa Maieste commis par provision en la gouvernance de Lille et des appartenances salut Scavoir faisons que le jourdhuy pardevant nous Comparut en sa personne Martin Haiart filz de feu Pierre labourier demourant au villaige des Pummereaulx Lequel comparant recongnut comme proces fut meu et presentement pendant <sup>395</sup> pardevant Messieurs les president et gens du conseil Darthois entre Guillaume Hangouart escuier Seigneur de Pietre et luy comparant Sur ce que ledict Seigneur de Pietre avoit en vertu de certaine commission emanees dudict conseil fait faire par Franchois de Forcheville huissier dudict conseil commandement audict Martin Haiart comparant que pour le temps advenir il ne eust a envoyer et faire paistre par luy ou ses bregiers et serviteurs son blancq bestial en et sur ladicte seigneurie de Pietre en regard que par privileges anchienne usance et coustume nul ne a auctorite de ce pover faire que les hommes et juges masuriers dicelle seigneurie de Pietre du nombre desquelz nestoit et nest ledict Martin Haiart Et au surplus quil eust a paier audict Seigneur de Pietre

---

<sup>394</sup> Folio 255v°.

<sup>395</sup> Folio 256r°.

douze amendes de soixante solz parisis Darthois chascune faisante soixante sept patars six deniers tournois / pour avoir autant de fois envoye sesdicts blancqs bestiaux pasturer es mectes de ladicte seigneurie de Pietre Lequel comparant pour eviter ledict proces congnoissant son tort a promis et promet par ces presentes de pour ladvenir cesser et deppoter<sup>396</sup> de faire ne envoyer et souffrir ses bergiers et serviteurs faire paistre en ladicte seigneurie de Pietre tant es flegardz chemins rietz voiries et communes que sur les terres et heritaiges en tenus et y gisans sondict blancq bestial nest que par aucun moien legitime il devieugne juge masurier dicelle seigneurie de Pietre et ce soubz paine de soixante solz parisis monnoie Darthois portant comme dict est soixante sept patars six deniers tournois a chascune foys que sondict blancq bestial y aura este mene paistre par luy ou sesdictz bregiers et serviteurs et outre de reparer le dommaige quy seroit pour ce fait congnoissant en tout ce que dessus est dict ledict comparant le droict dudict Seigneur de Pietre contre lequel il promet ne aller jamais au contraire Davantaige ledict Martin Haiart comparant congnoit avoir fait commis ordonne et estably et par ces presentes commect ordonne et establist ses procureurs generaulx<sup>397</sup> et certains messagiers especiaux de jehan Buisine jehan Doresmieulx Raoul Gosson Martin le Wattier Franchois et jehan le Turcq Ausquelz ses procureurs et a chascun deulx et lun deulx seul et pour le tout il a donne pouvoir especial et irrevocable de pour luy et en son nom comparoir pardevant lesdicts Seigneurs president et gens dudict conseil Dartois et par tout ailleurs ou mestier sera et recongnoistre les droix possessions et saisines dudict Seigneur de Pietre designez et baptisez en ladicte commission en forme de commandement emanee dudict conseil a la requeste dudict Seigneur de Pietre cy dessus mentionnee et executee comme dessus est dict contre ledict comparant par ledict Franchois Forcheville huissier dicelluy conseil accorder que ledict Seigneur de Pietre soit maintenu et garde en sesdictz droictz possession et saisines par luy baptisees par ladicte commission de commandement tant pour le droict principal que amendes interestz et choses y mentionnes avec condempnation dicelles amendes et despens sur ledict comparant au tax de la court Et ses conclusions luy estre en tout et de tous pointz adjugees et generalmente et especialement de es choses dictes et les dependences autant faire dire accorder et autrement besongnier comme faire et dire polroit Ledict comparant constituant sy en sa propre personne meisme y estoit ia fust il que le cas requist ou desirast mandement plus especial Promectant ledict comparans par sa foy et serment tenir et avoir pour agreable ferme et estable a tousiours tout ce que par lesdictz procureurs ou lun deulx sera en ce que dict est et quy en deppend fait dict accorde et autrement besongnie soit contre luy ou autrement Meismes de paier lejugie se mestie est soubz et par lobligation de tous ses biens et heritaiges et ceulx de ses hoirs presens et advenir quil submect et obleige quant ad ce envers tous Seigneurs et justices Renonchant comme dessus a toutes choses <sup>398</sup> contraires ad ces presentes Meisme au droict disant generale Renonciation ne avoir lieu sy lespecialle ne precede En tesmoing de ce nous avons ces presentes fait seeller de nostre seel Ce fut fait le vingtroisiesme jour de novembre quinze cens soixante cincq



---

<sup>396</sup> Deppoter: renoncer.

<sup>397</sup> Folio 256v°.

<sup>398</sup> Folio 257r°.

Ausquelles lettres sont infixees les lettres quy sensievent

Les gouverneur President et gens du conseil provincial Darthois A tous ceulx que ces presentes lettres verront salut Comme Guillaume Hangouart escuier Seigneur de Pietre Des Pummereaulx nous eust fait exposer que a luy competoit et appartenoit en propriete ladicte terre et seigneurie de Pietre en laquelle il avoit toute justice haulte moienne et basse et plusieurs beaulx droix preeminences et prerogatives et entre aultres que par privilege et anchienne usance coustume edictz et ordonnances publiees rafreschies et aultrement nulz aultres que les masuriers dicelle seigneurie ne pouoient mener ny envoie pasturer leurs blancqs bestiaux es mectes de ladicte terre et seigneurie a paine de soixante solz parisis damende a luy applicable et de paier linterest que lesdicts bestiaux feroient en paissant Ce neantmoins Guillaume le Gillon labourier demourant a le Neufve Chappelle Nicollas Marsy y demourant aussy et Martin Haiart demourant en la seigneurie Des Pummereaulx ou aultres a leur adveu sestoient ingerez et advanchez et journellement se ingeroient denvoier pasturer leurs blancqz bestiaux es mecte dicelle seigneurie de Pietre Combien quilz nen estoient masuriers en commectant partant pour chascune foys amende de soixante solz parisis Lesquelz troubles et emprinses ilz navoient vollen reparer ny payer lesdictes amendes et interestz que lesdicts bestiaux avoient fait A raison de quoy icelluy impetrant eust obtenu nostre commission narree de ce que dessus et en vertu dicelle par Franchois de Forcheville huissier dudict conseil fait ferre commandemens ausdictz <sup>399</sup>turbateurs et a chascun deulx quilz euissant incontinent et sans delay a reparer lesdicts troubles et passer condempnation quilz ne pooient ny devoient ce faire aussy paier Asscavoir ledict le Gillon le nombre de cinquante amendes et lesditz Marsy et Haiart douze / chascune de soixante solz parisis / et chascun deulx six carolus pour lesdictz dommaiges et interestz et quilz cessassent de plus faire le samblable Et pour lopposition par eulx a ce cree jour eust este assigne a comparoir pardevant nous oudict conseil aux plais y tenus le vingtseptiesme de juillet de cest an XV c soixante cincq / que lors pour ledict impetrant par Maistre jacques du Bois advocat pour jehan Venant son procureur aueroit este conclud aux fins que dessus demandant despens dommages et interetz Surquoy Franchois Dubois procureur desdicts le Gillon et Marsy a este pourveu du delay dabsence et quant audict Haiart eust le jourdhuy dacte de cestes fait recongnoistre par jehan Buisine son procureur tout le contenu en certain appointement entreveu entre ledict Seigneur impetrant et ledict Haiart donne de Baulde Cuvillon endacte du vingtroisiesme de novembre estant veritable et ce en vertu du pouvoir especial par luy donne audict Buisine inserre esdictes lettres d'appointement accordant outre audict impetrant toutes ses conclusions luy estre adjugees Ce que ledict Venant oudict nom eust accepte Selon que es exploix et registre de la court estoit et est plusaplain contenu Scavoir faisons que veu ledict apoinctement parmy lequel ces presentes sont infixees accord et acceptation avons adjudgie et adjugeons audict Seigneur impetrant ses fins et conclusions entant quil touche audict Haiart Condemnant icelluy Haiart a reparer les troubles paier les amendes et interestez faitz en son regard avecq es despens En tesmoing de ce nous avons fait mettre le seel dudict conseil a ces presentes quy furent faictes et donnees en jugement le huictiesme jour de janvier quinze cens soixante cincq



---

<sup>399</sup> Folio 257v°.

<sup>400</sup>Reconnoissance faite par Mahieu de Dours et Marie joye sa femme que eulx leurs hoirs et aians cause de la mesure par eulx acquise de jehan le Febvre tenant au riet de Pietre et au coing du chemin menant dudict riet au bois du Biez et a lheritaige Pelonne Bocquette Ne pareillement pour raison de aultres mesures quilz polroient cy apres acquerir ne envoiront et souffriront leurs brebis et moutons pasturer sur la seigneurie de Pietre Nest quilz soient demourans en icelle seigneurie

**A tous ceulx** qui ces presentes lettres verront Martin le Wattier bailly de la terre et seigneurie de Pietre commis par Guillaume Hangouart escuier Seigneur dudict Pietre des Pummereaulx etc salut Scavoir faisons que en la presence de Grard le Roy jehan le Turcq et Noel Vignoble juges mazuriers dicelle seigneurie de Pietre Comparut en sa personne jehan de Varembourg demourant audict Pietre paroisse Dauberch ou nom et comme procureur especial de jehan le Febvre et jehenne Hennicot sa femme demourantz audict Auberch souffissamment fonde par lettres de procuracy passee pardevant nottaires royaulx a la Venthie en datte du vingtroisiesme jour de febvrier quinze cens soixante cinq dont et desquelles lettres est apparu aux bailly et hommes dessusnommez pour faire ce quil sensieult Lequel comparant en vertu du povoir a luy donne par lesdictes lettres procuratoires sest dessaissy et desherite en nostre mains par rain et baston en la maniere accoustumee du nombre de trois centz trois quartrons de terre a usage de gardin seant en ladicte paroisse dAuberch faisant front au riet dudict Pietre tenant a la terre Peronne Bocquet et daultre sens au chemin allant du rietz au bois du Biez tenus de mondict Seigneur de Pietre Et ce en ensievant la vente que en aueroient fait <sup>401</sup>lesdictz le Febvre et sa femme sesdictz M<sup>es</sup> au prouffict de Mahieu de Dours et Marie joye sa femme demourant audict Pietre moiennant les deniers a Dieu un <sup>402</sup>couletier principaulx deniers charges devisees et conditions portees plusaulong par icelles lettres de vendition Suivant quoy du gre accord et consentement dudict procureur la saisine et possession reelle fonsiere et actuelle desdictz trois cens trois quartrons de terres portees par ladicte procure a este faite et bailee ausdictz de Dours et sa femme Pour par eulx leurs hoirs ou aiant cause en joyr heritablement et a tousiours conformement aux charges et conditions declarees en icelles lettres procuratoires A condition que lesdictz de Dours sa femme auctorizee souffissamment de son mary leurs hoirs ou aiant cause ne polront pretendre ne avoir aucun droict de faire pasturer leurs brebis et moutons en et sur ladicte seigneurie de Pietre rietz flegardz chemins voiries communes ne heritaige en tenus en vertu desdictz mazures et trois cens et demy ne pour raison des aultres mesures que lesdictz Mahieu de Dours et Marie joye sa femme et chacun deulx polroient cy apres conjointement ou separement acheter et acquerir ou quy leur polroient escheoir a quel tiltre que ce fut Nest que lesdictz de Dours et sa femme leurdictz hoirs et aians cause soient actuellement par domicile fix et sans fraulde residens et demourans en ladicte seigneurie de Pietre le tout nonobstant droict loy stil privilege et coustume au contraire a quoy ilz on renonchie et renonchent par ces presentes et a toutes choses contraires ad cestes Meismes au droict disant generale Renonchiacion ne valloir sy

---

<sup>400</sup> Folio 258r°.

<sup>401</sup> Folio 258v°.

<sup>402</sup> Il semble ici que le copiste a oublié un mot



lespecialle ne precede Promectans tout ce que dessus et qui sensieult et cestes Recongnostre a leurs despens par devant messieurs les President et gens du conseil Darthois et partout ailleurs ou et lors que requis en seront<sup>403</sup> Lesquelles dessaissine et saine(saisine) ont este dictes et jugies par lesdictz hommes a nostre semonce et conjure estre bien et deuement faictes et les solempritez en tel cas requises gardees et observees tant que pour souffrir Saulf tous droictz qui en ce peult avoir droict Promectant par ledict procureur lesdictes dessaisine saissine et choses dictes tenir entretenir et garandir contre et envers tous a tousiours Soubz lobbligation de tous les biens et heritaiges de sesdicts M<sup>es</sup> quil a quant ad ce soumis et obligiez envers tous seigneurs et justices Renonchant a toutes choses contraires ad ces presentes En tesmoing de ce nous avons mis a ces presentes chascun nostre seel Qui furent faictes et expedies oudict Pietre le troisisme jour de juing XV c soixante sept



Recongnissance de Pelonne Sanse vefve de feu Franchois Carpentier / et de Mahieu et Michiel Carpentier ses filz que eulx leurs hoirs et aians cause Des mesures quilz ont tenus de la seignourie de Pietre ne feront paistre leur blancq bestial es mectes de ladicte seignourie Nest quilz soient demourans en icelle

A tous ceulx qui ces presentes lettres verront Martin le Wattier bailly de la terre et seignourie de Pietre deuement constitue par noble Seigneur Guillaume Hangouart escuier Seigneur dudict Pietre des Pummereaulx etc salut Scavoir faisons que par devant moy et en la presence de Grard le Roy jehan le Turcq et Noel Vignoble hommes rentiers et juges mazuriers dicelle Sgrie de Pietre Comparurent en leurs personnes Pelonne Sanse vefve de feu Franchois Carpentier Mahieu Cartpentier Michiel Carpentier et Magdelaine Pollet sa femme demourans a Pietre paroisse Dauberch saulfz ledict Mahieu à Beaucamp Et recongnurent lesdictz comparans et chascun deulx sans division icelle femme Magdelaine souffissamment auctorisee dudict Michiel son mary quand ad ce comme elle a declare Que moiennant aucuns plaisirs et amitez que leur a este fait<sup>404</sup> par ledict Seigneur de Pietre et aultres bonnes et justes considerations ad ce les mouvans / A ceste cause lesdictz comparans avoient consenty et accorde , et par ces presentes consentent et accordent audict Seigneur de Pietre que eulx comparans leurs hoirs et aians cause des mesures que ilz ont tenues de ladicte seignourie de Pietre ne polront envoyer faire et souffrir leurs blancqz bestiauxz brebis et moutons pasturer en ladicte seignourie de Pietre chemins flegardz rietz terres et heritaiges en tennus et y gisantz Nest que lesdictz camparans leurs hoirs et aians cause dicelles mesures soient actuellement par domicile fix et sans fraulde demourans en ladicte seignourie Et ce nonobstant droict loy stil coustume privilege ou chose quelconcq au contraire a quoy Ilz ont renonchie et renonchent par cestes / Meismes au droict disant generale Renonchiacion ne valloir sy lespecial ne precede promectant par tous lesdictz comparans et chascun deulx sans division comme dict est lcelle femme de lauctorite predicte tout ce que dessus est dict tenir et entretenir sans jamais aller au contraire soubz lobbligation de tous leurs biens et heritaiges et ceulx de leurs hoirs presens et

---

<sup>403</sup> Folio 259r°.

<sup>404</sup> Folio 259v°.

futurs Meismes recongnoistre ces presentes pardevant tous Seigneurs et justice ou requis seront a leurs despens / et den faire ferre nottes aux venditions quilz ou leurs hoirs en polroient faire dicelles mesures Renonchant par leur foy et serment a toutes choses contraires ad ces presentes En tesmoing de ce nous avons mis ad ces presentes chacun nostre seel quy furent faictes et passees en la ville de le Bassee lieu par nous emprunte le quatriesme jour doctobre quinze cens soixante et sept



Recongnoissance Marguerite Bocquette Noel Vignoble et sa femme que a raison des mesures quilz ont ne sera use de pasturaige sur Pietre nest en cas de residence en ladicte seignourie

A tous ceulx qui ces presentes lettres verront Martin le Wattier bailly de la terre et seignourie de Pietre <sup>405</sup>Commis par Guillaume Hangouart escuier Seigneur dudict Pietre salut Scavoir fay que pardevant mon bailly dessusnommez et en la presence de Grard le Roy et jehan le Turcq hommes juges masuriers de ladicte seignourie de Pietre Comparurent en leurs personne Marguerite Bocquette vefve de feu jehan Blondeau Noel Vignoble et jehenne Becque sa femme auctorisee dudict Noel son mary laquelle auctorization elle a prins et declare avoir pour agreable tous demourans a Pietre Et recongnurent tous lesdictz comparans et chascun deulx que pour et a raison de plusieurs plaisirs amities et advanchemens que leur a este fait par ledict Seigneur de Pietre et aultres bonnes et justes cause considerations ad ce les mouvantz Ilz ont consenty promis et accorde et par ces presentes consentent et accordent que eux comparans leurs hoirs et aians cause des mesures quilz ont tenues de ladicte seignourie de Pietre ne polront envoyer faire et souffrir leurs brebis et moutons pasturer en ladicte seignourie de Pietre chemins flegardz rietz terres voiries et heritaiges en tenus et y gisans Nest que lesdictz comparans leurs hoirs et aians cause dicelles mesures soient actuellement par domicile fix et sans fraude residens et demourans en ladicte seignourie de Pietre Tout ce que dessus lesdictz Marguerite Bocquette Noel Vignoble et jehenne Becque ont congnu de leur pure et franche volente estre veritable et promis entretenir sans jamais aller au contraire le tout nonobstant droict loy stil coustumes privilege et chose quelconque au contraire Aquoy ilz ont renonchie et renonchent par cestes Meismes au droict disant generale Renonchiacion ne valloir sy lespecialle ne precede Promectant recongnoistre cestes par tout ou requis seront Et de ce en estre faicte notte et memoire conformement ad ce que dessus es lettres de venditions quilz ou leurs hoirs et aians cause polroient faire dicelles mesures Renonchantz a toutes choses contraires ad cestes Surquoy lesdictz juges masuriers semons ont dict tous debvoirs en ce que dessus estre sy <sup>406</sup>souffissamment faictz que pour souffrir En tesmoing de ce nous avons mis ad ces presentes chacun nostre seel Qui furent faictes accordees et congnes en ladicte seignourie de Pietre le vingt septiesme jour dapril quinze cens soixante et huit //



Lettres dadheritement dung lieu maison mesure et heritaige vendus par Mahieu joye et ses enfans a jehan Lucart et Marie le Grand sa femme seant sur le

---

<sup>405</sup> Folio 260r°.

<sup>406</sup> Folio 260v°.

riet de Pietre Contenant promesse par lesdictz acheteurs que eulx leurs hoirs et aians cause ne polront a raison de ladicte mesure ny daultres mesure faire pasturer leurs brebis et moutons sur Pietre Nest quilz soient residens en ladicte seignourie

A tous ceux qui ces presentes lettres verront Laurens Henniart lieutenant de la terre et seignourie de Pietre commis par Martin le Wattier bailly de noble homme Guillaume Hangouart escuier Seigneur de Pietre des Pummereaulx de la mairie de Gondcourt Hauteval etc salut Scavoir faÿ que pardevant moy lieutenant dessusnomme et en la presence de Grard le Roy Mahieu de Dours et jehan le Turcq hommes juges et masuriers dicelle seignourie de Pietre Comparurent en leurs personnes Mahieu joie et jehenne le Louf sa femme Pierre joie josne filz a marier Nicollas joie Marie et Marguerite joie josnes filles a marier Ladicte Marie eagiee de vingt deux ans ou environ et ladicte Marguerite eagiee de dix huict ans ou environ Assistees de jehan joye leur oncle et Pierre de Mars tous iceulx du surnom de joye frère et sœurs ensamble enfans de feu Mahieu et recongnurent lesdictz comparans que pour leurs prouffictz apparans mieulx faire que laisser de avoir vendu bien leallement justement et sans quelque fraude a jehan Lucart et a Marie le Grand sa femme quy a ce present le cognurent avoir achete desdictz premiers comparans de six pars <sup>407</sup>les cinq de sept a huict cens de terre tant gardinaige que terre a labour en trois pieches meubles catelz et heritaiges sans y rien excepter retenir ne reserver et sans aussy aultrement livrer par mesure et le tout prestement prenant asscavoir ung lieu manoir amase de maison et aultres edifices, aboutant dung sens au riet de Pietre daultre sens a le terre Claude le Maistre, Et daultre sens a le terre jacques Laigniel Item encoire une pieche de terre tenant ledict jardin, tenant dun sens a le terre dudict jacques Laigniel et de deux aultres sens a le terre dudict Claude le Maistre Item encoire une pieche de terre alabeur tenant dung sens au chemin quy maisne dudict riet de Pietre au ponchiel Torel Daultre sens a le terre dudict Claude le Maistre / et daultre sens a le terre Mahieu de Dours, et le tout seans au hamel dudict Pietre et tenu de ladicte seignourie a le charge de le rente du Seigneur tant seulement sans nulle aultre charge ne empeschement , mesme quitte et descharge du cours dicelle rente jusques a ce jour / Ce marchie faict moiennant quatre gros de denier a Dieu ung gros au coultier Trente pattars de carite / et pour le principal du marchie la somme de quarante livres de gros francq argent que lesdictz comparans vendeurs ont congnut avoir eu et receu en bons deniers comptans dudict jehan Lucart et en ont deschergier la loy / et affin que ledict marchie puist sortir son plain et entier effect Lesdictz vendeurs ont rapporte en la main de moy lieutenant presens lesdicts hommes lesdictz cinq pars de six prins ausdictez pieches de sept a huict cens de terre et se sont desheritez desvestis et dessaisis bien et par loy / et apres que nous lieutenant et hommes fusmes comptens de noz sallaires de ma main le transportay es main dudict jehan Wicart et Marie le Grand sa femme et les adheritay vesty et saisy desdictz cinq pars de six / de sept a huict cens de terre pour en joyr par eulx leurs hoirs ou aians cause perpetuellement et a tousiours a telle charge de rente que ladicte terre peult debvoir vers le Seigneur dudict Pietre<sup>408</sup>Et a este ledict adheritement baille a le charge et comme aussy ledict jehan Wicart et Marie le Grand sa femme a ce auctorisee de sondict mary Laquelle auctorite elle a prins pour agreable ont promis consenty et accorde et par ces presentes promectent consentent et accordent tant en consideration que auparavant lachat desdictz lieu mesures et heritaiges ilz nestoient tenant ne justiciables a la loy dudict Pietre et que

---

<sup>407</sup> Folio 261r.

<sup>408</sup> Folio 261v°.

partant ledict Seigneur de Pietre nestoit tenu ensievant les droictz usance coustume et privilege de ladicte seignourie de consentir la vendition et adheritement que aussy pour aultres raisons et considerations a ce les mouvans que pour raison desdictes mazures ou mesure et heritaiges par eulx achetez ou aultres mesures quilz pouroient cy apres achetez ou leur pouroient escheir et appertenir ou aultrement posséder a quelque tiltre que ce fut eulx et leurs hoirs ou aians cause dicelles mesures et heritaiges ne pourront envoyer ne souffrir leurs brebis et mouttons pasturer en et sur ladicte seignourie de Pietre savelonnières chemins flegardz riez terres bois en tenus a eulx comparans et leursdicts hoirs et aians cause non appertenans nest que lesdictz comparans leursdictz hoirs ou aians cause dicelle mesure soient actuellement et par domicil demourans et residens sur icelles mesures / et non obstant droict loy coustume et privilege ou coustume generale ou particuliere ou choses quelzconques quil pouroient estre au contraire meismes au droict disant generale Renonciation ne valloir sy lespecialle ne precede Ce fut faict et passe a loy le quinzième jour de decembre an quinze cens soixante dix sept



Congie donne a Martin Haiart demourant en la seignourie des Pummereaulx de pouvoir faire pasturer ses bestiaux en la seignourie de Pietre sans y faire dommage et jusques au rappel

je Guillaume Hangouart Seigneur de Pietre congnoy par cestes avoir donne congie grace et licence a Martin Haiart labourier demourant a Pummereaulx a sa requeste Et que moy Martin Haiart congnoy avoir <sup>409</sup>requis dudict Seigneur de Pietre ladicte grace congie et licence de pouvoir faire paistre mon blancq bestial es mettes de ladicte seignourie de Pietre , et ce seulement jusques au rappel dudict Seigneur de Pietre ses hoirs ou aians cause A condition que je Martin Haiart dessusdict ay promis et promais par cestes que mondict blancq bestial ne sera mene paistre et ne paistrera sur les flegardz chemins voiries rietz et communes de ladicte seignourie de Pietre ne sur les heritaiges appertenans audict Seigneur de Pietre Et aussy que ilz ne feront aucun dommage ne interest aux biens terres heritaiges et personnes des manans vassaulx rentiers et tenans de ladicte seignourie de Pietre, et que ne pastureront sur les heritaiges desdictz rentiers tenans et habitans contre leur gre ou de celuy de leurs censiers A peril que sy par moy mes bergiers serviteurs et bestiaux est ou sera contrevenu aux pointz et conditions dessusdictes ou a aucunes dicelles je seray tenu et promais satisfaire audict Seigneur de Pietre pour chascune foys que contravention y aura Lamende de soixante solz parisis monnoye reale Darthois faisant soixante sept patars six deniers tournois Et oultre ce sy aucun dommage et interest y avoit de le reparer Congnoissant et promectant davantaige de ne pouvoir pour ladicte joyssance et possession de pasturage pour quelz laps de temps et longue possession que jen polroie avoir en joy et possesse acquerir droict diceluy soit par prescription ne aultrement. Aussy de rendre cest accord et pappier audict Seigneur de Pietre ses hoirs ou aians cause incontinent que ilz me aueront declare ou faict declarer le rappel desdictz congie et grace Renonchant a toutes choses contraires a cestes mesmes au droict disant generale renonciation ne valloir sy la specialle ne precede Promectant de recongnoistre cestes et toute le contenu a mes despens pardevant messieurs les president et gens du conseil Dartois nottaires

---

<sup>409</sup> Folio 262r°.

reaulx<sup>410</sup> et par tout ou et touteffois que requis en seray par icelluy Seigneur de Pietre sesdictz hoirs ou aians cause Ce fut ainsy faict passe recongnu et accorde et promis entretenir par lesdictes parties chascun en son regard pardevant nous Martin le Wattier bailly de ladicte seigneurie de Pietre et notaire real es presences de jehan le Turcq et Noel Vignoble juges masuriers dicelle <sup>411</sup>seigneurie Tesmoings mon seing cy mis avecq ceulx desdictz Seigneur de Pietre et Martin Haiart le douziesme jour de janvier an quinze cens soixante cincq cesdictes presentes faictes en double Lung a scavoir cestuy pour ledict Seigneur de Pietre et laultre pour ledict Martin Haiart Ainsy signe G Hangouart M le Wattier Martin Haiart



Reconnoissance de Melchior du Pont labourier demourant a Fauqhissart es de ce que ses brebis et moutons avoient estes menez pasturer en la seigneurie de Pietre

je Melchior du Pont labourier demourant a Fauqhissart paroisse de le Venties Congnoy ne avoir appointie avecq Guillaume Hangouart Seigneur de Pietre pour plusieurs amendes de soixante solz parisis chascune que avoie encourues vers luy pour les pasturages que mes brebis et moutons avoient faict en ladicte terre et seigneurie de Pietre de laquelle seigneurie je ne suis masurier pour la somme de vingt patars flandres que ledict Seigneur de Pietre ma de grace modere et quictie pour telle somme, a le paier par moy et quil a donne a son lieutenant et garde de la prison a son sergeant et a son serviteur, demourant moiennant ce quicte desdicts amendes chepages<sup>412</sup> prises gouverne et garde des bestes qui avoient este prises pour lesdictes emprinses et fourfaictures Restablissant par moy le droict dudict Seigneur de Pietre Et promectant par moy par cestes de pour ladvenir cesser de deporter de faire ne envoyer et souffrir mes bregiers et serviteurs faire paistre en ladicte seigneurie de Pietre tant es flegardz chemins rietz voiries et communes que sur les terres et heritaiges en tenus et y gisans mondict blancq bestial brebis et moutons nest que par aucun moien legitime je devienne juge masurier dicelle seigneurie de Pietre et soye actuellement demourant sur lesdictes mesures dont <sup>413</sup>deviendroie heritier et ce soubz paine de soixante solz parisis monnoie Dartois portant soixante sept patars six deniers tournois a chascune foys que mondict blancq bestial brebis et moutons y auront este par moy ou mesdictz bergiers et serviteurs mene paistre et de reparer les dommaiges qui seroient pour ce faitz Promectant le contenu de cestes entretenir sans jamais aller au contraire soubz lobligation de tous mes biens, et reconnoistre pardevant messieurs les president et gens du conseil Dartois monsieur le gouverneur de Lille ou son lieutenant auditeurs reaulx bailly et hommes de fiefz et juges masuriers de ladicte seigneurie de Pietre et par tout ou requis seray a mes despens Ce fut ainsy par moy recongnu promis et accorde le dix huictiesme jour daoust an quinze cens soixante sept Tesmoing mon seing cy mis ainsy signe Melchior du Pont



---

<sup>410</sup> Reaulx : royaux.

<sup>411</sup> Folio 262v°.

<sup>412</sup> Chepages : droit du geolier.

<sup>413</sup> Folio 263r..

Promesse et reconnoissance faicte par Clare Roussel vefve de feu Pierre Hennart et Martin Hennart son filz que ilz n'ont plus de front audevant de la mesure par eulx achetee de Anthoine Sanse seant sur le riet de Pietre Aussy que eulx et leurs hoirs et aians cause dicelle mesure et aultres quil leur polroient appertenir ne polront a raison dicelles mesure faire paistre leurs blancqs bestiaux sur ladicte seignourie

Nous Clarette Roussel vefve de feu Pierre Hennart et Martin Hennart filz desdictz feu Pierre et de ladicte Clarette congnoissons avoir promis et accorde promettons et accordons par cestes de nostre pur et franche volonte pour certaines bonnes raison et considerations que a raison des mesures que nous avons et que nous et chascun de nous polrions a ladvenir acquerir avoir joyz et posséder a quelque tître que ce soit et puist estre en la terre et seignourie de Pietre en tenues et y gissans <sup>414</sup> nous ne polront ne souffrirons paistre et faire paistre noz brebis moutons et blancq bestial en et sur ladicte terre et seignourie de Pietre chemins et flegardz riez terres et heritages en tenus mouvans et y gissans ne pareillement noz hoirs et aians cause <sup>415</sup> dicelle mesures a nous appertenant et lesquelles par quelque tître nous polroient cy apres advenir et appertenir Congnoissons davantage nous et chacun de nous ne avoir et ne nous appertenir nul front contre les mesures que avons confrontans sur le riet de Pietre qui furent pardevant a Anthoine Sanse en son vivant censier de Pietre / tenans dun sens aux heritaiges et maison de Andrieu de le Marre dict Druchon filz de feu Andrieu / et daultre sens a la maison et heritaiges des hoirs de feu Hellin de le Lacherie a luy escheues par les trespas de Calaine de Raye sa feuere mere fille de Guillaume de Raye / et par le deches de Pelonne de Raye soeur de ladicte Calaine Et ce en consideration que ledict feu Pierre Hennart apres lachat faict desdictes mesures aux hoirs dicelluy Anthoine Sanse avoit par aucune fouynes de fosse ragrandissement en quelque endroit et en aultre remplissement / aussy plantaige de haye et aultrement largement retire et applicque a luy et a son heritaige Ledict front Tout ce que dessus promettons nous et chascun de nous entretenir vers ledict Seigneur de Pietre ses hoirs et aians cause et toutes gens / et reconnoistre pareillement cestes et tout le contenu pardevant messieurs les president et gens du conseil Dartois Monsieur le gouverneur de Lille ou son lieutenant auditeurs et notaires reaulx bailly lieutenant hommes de fiefz juges et masuriers de ladicte seignourie de Pietre et par tout ou requis serons Ce fut ainsy faict et par nous recongnu promis et accorde le dixiesme jour de janvier an quinze cens soixante huict Tesmoing noz seingz cy mis Ainsy signe Marque de ladicte Clarette Roussel Martin Hennart



<sup>416</sup> Promesse faicte par Anthoine Fruleux demourant a la Neufve Chappelle que les censiers du Seigneur de Pietre et nulz aultres puissent faire pasturer leurs blancqs bestiaux sur les terres que

---

<sup>414</sup> Folio 263v°.

<sup>415</sup> Le mot "cause" est barré sur le manuscrit.

<sup>416</sup> Folio 264r°.

ledict Fruleux a gissans en ladicte seignourie de Pietre estant en estat de povoir estre pasturees par ledict bestial

Sachent tous que pardevant moy Innocent aux Cauches notaire publicq resident a Lille en presence des tesmoing soubz scriptz / Comparurent en leurs personnes Anthoine Frulleux filz de feu Anthoine labourier demourant a le Neufve Chappelle // dune part Et Guillaume Hangouart Seigneur de Pietre daultre part Lesquelz comparans recongnurent Asscavoir ledict Anthoine Fruleux / avoir permis et accorde / permect et accorde audict Seigneur de Pietre / pour et en considerations de aulcuns plaisir que il luy a fait et aultres causes raisonnables ad ce le mouvant / Que ledict Seigneur de Pietre ses censiers et bregiers puissent et polront durant la vie dudict Anthoine librement et franchement faire paistre leurs brebis et moutons en et sur les terres et heritaiges que icelluy Anthoine a gisans et tenues de ladicte seignourie de Pietre / A condition neantmoings de par ledict Seigneur de Pietre ses censiers et bregiers ne y faire aucun dommaige ne interest / En oultre a promis et promect icelluy Anthoine Frulleux de ne donner congie licence ne permission a personne de ce faire fors comme et seloncq que dict est dessus Tout ce que dessus ledict Anthoine a promis de tenir et entretenir en la forme et maniere que dict est soubz lobligation de ses biens vers tous Seigneur et justices Ce fut fait a Lille le cinquiesme de decembre quinze cens soixante et unze En presence de Mahieu Roussel serviteur audict Seigneur de Pietre et Jehan le Turcq demourant audict Pietre tesmoingz ad ce requis Ainsy signe l. aux Cauches



<sup>417</sup>Samblable promesse fait par Catherine Franchomme vefve de feu Nicollas du Bron et Pelonne du Bron sa fille pour le temps de leur vie et sy avant que eulx mesmes ne aient besoing desdictes pasturages pour leurs vaches ou aultre bestiaux

Nous Catherine Franchomme vefve de feu Nicollas du Beron et Peronne du Beron fille desdictz Nicollas et Catherine Franchomme demourans en la terre et seignourie de Pietre meismement moy Caterine tant en mon nom que au nom et moy faisant fort de ladicte Peronne ma fille Congnoissons en consideration de plusieurs plaisirs amyties et assistences que ledict feu Nicollas du Beron et nous avons eu et receu de Guillaume Hangouart escuier Seigneur de Pietre et aultres bonnes raisons et considerations ad ce nous mouvans Avoir promis consenty et accorde promectons consentons et accordons irrevocablement par cestes audict Seigneur de Pietre que luy et ses censiers tant presens que advenir de ses censes quil a en sadicte seignourie de Pietre puissent et polront seulx et nulz aultres faire paistre tout le temps de nostre vie et de la vie de chascune de nous deux leurs brebis et moutons en et sur les unze mencaudees de fief quy ont appertenu audict feu Nicollas du Bron gisans a Pietre et en tenus Et ce touteffois et quantes que lesdictes unze mencaudees seront en estat propice destre pasturees par blancq bestial Et que nous noz hoirs ny les aians cause de nous et de nosdicts hoirs ne donnerons et ne polrons donner congie permission ne aggregation a personne quelconque soit noz censiers ou aultres de envoyer ferre ou souffrir pasturer leurs blancqs bestiaux du vivant de

---

<sup>417</sup> Folio 264v°.

nous deux et de chascune de nous sur lesdictes unze mencaudees de fief A condition neantmoins que ledict Seigneur de Pietre et ses censiers ne feront par eulx leurs bergiers et blancqs bestiaux et le pasturaige diceulx aucun dommaige aux advestures seves et choses estans et croissans sur ledict fief A condition aussy que nous Catherine et Peronne ou lune de nous deux ne aions nous mesmes du blancq bestial a nous appertennans et que pour icelluy<sup>418</sup> nostre blancq bestial ou pour aultres bestes a nous appertennans naions besoing dudict pasturaiges Tout ce que dessus nous Catherine Franchomme et Peronne du Bron Meismement moy Catherine au nom et moy faisant fort en tout ce que dessus de ladicte Peronne ma fille promettons a tousiours entretenir furnir et accomplir par nous noz hoirs censiers et aians cause en la maniere et comme dessus est dict soubz lobligation de tous noz fiefz biens terres et heritaiges et ceulx de noz hoirs presens et futurs que avons quand ad ce soumis et obligie submectons et obligeons vers tous seigneurs et justices Renonchant a tous droictz loix stil ou coustume de pays et a toutes choses contraires a ceste Meismes au droict disant generale Renonchiation ne valloir sy lespecialle ne precede Renonchant pareillement par moy Catherine Franchomme a la loy velleiaine laquelle me a este donnee a congnoistre par les lieutenant et hommes de fiefz et juges masuriers de ladicte seigneurie de Pietre Promectans nous et chascune de nous cestes recongnoistre a noz despens pardevant messieurs les president et gens du conseil Dartois notaires roiaux dudict Conte Dartois et partout aillieurs quil appertiendra et requis serons En tesmoing de quoy nous avons icy mis noz seingz manuelz avecq les seings de Leurens Hennart lieutenant de bailliy de ladicte seigneurie de Pietre / Gard le Roy jehan le Turcq et Mahieu Carpentier hommes de fiefz et masuriers de ladicte seigneurie icy aussy mis a nostre requeste pour plus grande approbation de verite Ce que nous lieutenant et hommes de fiefz et masuriers dudict Pietre dessusnommez par devant lesquelz lesdictes Catherine Franchomme et Peronne du Bron ont comparu recongnu promis accorde passe et ratiffie tout ce que dessus avons aussy signe de noz seingz manuel le seisiesme jour de juing lan quinze cent soixante dix huict Ainsy signe Leurens Hennart Gard le Roy jan le Turcq Mahieu Carpentier Caterine Franchomme et Peronne du Bron



Recongnoissance faite de ce que dessus pardevant notaires  
royaux

<sup>419</sup>Comparurent en leurs personnes Caterine Franchomme vefve de feu Nicolas du Beron et Peronne du Beron sa fille eaigie demourant a Pietre paroisse Dauberch Lesquelz et chascun deulx pour le tout sans division, recongnurent et declarent que pour pluisieurs plaisirs amitie et assistance que ledict feu Nicollas du Beron et eulx aueroient receu de Guillaume Hangouart escuier Seigneur de Pietre des Pummereaulx etc et aultres considerations ad ce les mouvans Avoir comparus pardevant Laurens Hennart lieutenant dudict Pietre en la presence de Gard le Roy jehan le Turcq et Mahieu Carpentier hommes de fiefz et masuriers dicelle seigneurie le seisiesme jour de juing dernier passe Et par devant eulx, promis consenty et accorde audict Seigneur de Pietre luy et ses censiers tant presens et advenir de ses censes quil a en icelle seigneurie de Pietre puissent et polront faire paistre tout le temps de la vie dicelles comparantes Leurs brebis et moutons eus et sur unze

---

<sup>418</sup> Folio 265r°.

<sup>419</sup> Folio 265v°.



mencaudees de fiez qui ont appartenu audict feu Nicolas du Beron et de present a ladicte Peronne gisans en ladicte seigneurie de Pietre et en tenus Et ce touteffois et quantes que lesdictes unze mencaudees seront en estat propice destre pasturees par blancq bestial et que lesdictz comparans ne leurs aians cause ne deveront ne polront donner congie permission ne agreation a personne quelque soit leurs censiers ou aultres de envoyer faire souffrir pasturer leurs blancqs bestiaux du vivant desdictes comparantes et de chascune dicelles sur lesdictes unze mencaudees de fiez Soubz condition neantmoins que lesdictz Seigneur de Pietre et censiers ne feront par eulx leurs bregiers et blancq bestiaux aucuns dhommaiges es advestures seves et choses estans et croissans sur ledict fief A condition aussy que lesdictes comparantes naient elles mesmes aucunes blanches bestes a elles appartenantes et que pour icelles ou aultres bestes a elles appartenant naient besoing dudict pasturages selon que du tout peut <sup>420</sup>plus aplain aparoir par lacte par eulx faicte et passee pardevant lesdictz lieutenant et hommes mazuriers Et congnoissantz par lesdictes comparantes le consentement et accord de pasturaige faict audict Seigneur de Pietre selon que dessus est dict avoir este pour aulcunes justes considerations et quelles le veullent du tout entretenir sans jamais aller au contraire Pour ceste cause elles avoient et ont par ces presentes Recongnu Ratiffie omologhue et eu pour agreable Ledict accord et consentement de pasturage faict pardevant la justice dudict Pietre Promectant le entretenir apres que lecture leurs en aueroit este faicte du tout selon sa forme et teneur sans jamais aller au contraire Soubz lobbligation de tous leurs biens et heritaiges presens et futurs quelles ont soumis et obligie vers tous seigneurs et justices Renonchans a tous droictz loix ou coustumes de pays ad ce contraire faict et recongnu en la ville de la Bassee le dix septiesme jour de juillet quinze cens soixante dix huict pardevant Notaires Royaulx soubsignez Ainsy signe Caullier et M le Wattier



Recongnissance faicte par Ansel de Mars que la donation que Pelonne de Raye sa mere luy a faict dung lieu mesure et jardin seant sur le riet de Pietre a este a condition que ladicte Pelonne polra vendre les meubles et cateulx et chergie ledict heritaige en cas quelle en ait besoing Aussy promesse que eulx et leurs aians cause dicelle mesure ne polront ferre pasturer sur Pietre leurs blancqz bestiaux a raison de ladicte mesure ny daultres quilz polroient avoir nest quilz soient residens sur Pietre

je Ansel de Mars filz de Pelonne de Raye Congnoy par cestes que en faisant par madicte mere donnation transport et adheritement a mon prouffict pardevant lieutenant de bailly et hommes juges masuriers de la terre et seigneurie de Pietre Le vingtueusiesme jour de decembre an quinze cens soixante dix huict De tous et quelzconques ses biens meubles catelz et heritaiges presens et advenir a prendre<sup>421</sup> apres le trespas de madicte mere et non amchois Il fut dict et conditione et estoit a telle intention et entant que besoing fut je le consens et accorde par cestes que je seray tenu de paier et promais paier en apprehendant ladicte donnation en tout ou en partie toutes les debtes que madicte mere devera au jour de son trespas

---

<sup>420</sup> Folio 266r°.

<sup>421</sup> Folio 266v°.

avecq ses testament obseques et funerailles / et aussy que elle polra vendre et alier lesdictz meubles et cateulx ainsy que il luy plaira Meismes chergier en cas quelle en ayt besoing lesdictz lieu et heritaiges Renonchant par moy a toutes choses contraires a cestes Meismes au droit disant generale Renonchiation ne valloir sy lespecialle ne precede Comme aussy avons madicte mere et moy consenty et accorde et le consens et accorde de rechief par cestes au Seigneur de Pietre que moy madicte mere et ma femme de laquelle je me fais fort my noz hoirs ou aians cause desdictz lieu mesures et heritaiges ne polrons pour raison diceulx lieu mesures et heritaiges ne de aultres heritaiges et mesures que polrons cy apres acquester et avoir a nous appertenans a quelque tltre que ce soit faire pasturer noz brebis et moutons en et sur ladicte seignourtie de Pietre terres flegardz rietz communes ny heritaiges en tenus et y gisans Nest que nous nosdicts hoirs et aians cause soions actuellement et par domicile fix et sans fraulde residens en et sur ladicte seignourie de Pietre En temoing dequoy jay ceste signe de mon saing manuel avecq les seingz de Grard le Roy Laurens Hennart et Mahieu Carpentier icy aussy mis a ma requeste pour plus grande approbation de verite Le quinziesme jour dapvril an quinze cens soixante dixnoeuf Ainsy signe Laurens Hennart Grard le Roy Ansel de Mars Mahieu Carpentier



Pouvoir de lieutenant de la seignourie des Pummereaulx sur Pierre Screve avecq linvitation tant de ne donner congie de relever fossez picquier et fouyr / ne relever luy mesmes que aultres conditions

je Pierre Screve demourant en la seignourie des Pummereaulx appertenant a Guillaume Hangouart Seigneur de Pietre et dudict Pummereaulx Congnoy avoir requis et accepte de <sup>422</sup>estre lieutenant de ladicte terre et seignourie des Pummereaulx tant par octroy et commission dudict Hangouart Seigneur des Pummereaulx que de Martin le Wattier notaire real demourant a la Bassee bailly dicelle seignourie des Pummereaulx commis par ledict Hangouart Promectant par serment dhomme de bien par moy fait presentement es mains dudict Seigneur des Pummereaulx de bien et leallement macquitter au fait dudict office de lieutenant en y bien gardans les droitz auctorite seignourie et preeminence dudict Seigneur mon maistre sans donner congie et licence a personne qui soit de pouvoir fouyr picquier hauwer remplir fossez et floc lceulx relever parer ou renduver<sup>423</sup> / oster ne remuer gretz et cachees, faire bersaulx<sup>424</sup> bourloyres<sup>425</sup> espincher copper abbattre, ne aultre chose quelconque contre les droitz de haulte justice moienne et basse franche regalle et aultres appertenans audict Hangouart Seigneur des Pummereaulx a peril de estre tenu a la reparation amendes et aultres choses que pour cause dudict accord par moy fait et emprinses quelconques pour ce ensieueves polroient estre deues par moy et lesdictz entreprendans et turbateurs Ains promais et congnois mondict office de lieutenant se extendre seulement pour leallement recevoir les werps dessaisines rapportz dheritaiges bailler adheritemens et faire saisines arrestz et samblables actes judiciaires pour cause de poursieultes de parties

<sup>422</sup> Folio 267r°.

<sup>423</sup> Rendever : réparer les douves.

<sup>424</sup> Bersault : terrain sur lequel se pratique le tir à l'arc.

<sup>425</sup> Bourloire : terrain sur lequel on pratique le jeu de bourle.

ou doffice prises de personnes bestes calenges<sup>426</sup> damendes et conservation du droict de justice et des droictz de mondict Seigneur et des parties contractantes et disposantes, Meismes promais de advertir ledict Seigneur des Pummereaulx mon maistre de toutes lesdictes poursieultes et choses par moy faictes et a faire pour le fait de mon office en temps brief pour tant plus et mieulx conserver par luy les droictz de sadicte seignourie justice et bien de ses rentiers et subiectz Promectant aussy de faire serment de lieutenant comme dessus et aux restrictions que dessus present et es mains dudict Wattier et de Grard le Roy jehan le Turcq jehan le Febvre Thomas Catricque et Martin Hennart aux bans plaidoiabls appartenant audict Hangouart Seigneur des Pummereaulx assis sur le riet des Pummereaulx dict le riet du joncquoy presens quelque<sup>427</sup> bon nombre des rentiers de ladicte seignourie Promectant davantaige de ne picquier moy meismes fouyr hauwer relever aultrement que a eauwe de mars et sans touchier aux frontz et crettes des flotz et fossez, ne aucunement entreprendre et laisser ou parmettre entreprendre et touchier audictz rietz chemins rues et droictz dudict Hangouart Seigneur des Pummereaulx mon maistre Seigneur dicelle seignourie par lequel suis maintenans admis et lieutenant comme dessus est dict Promectant tout ce que dessus entretenir sans jamais aller au contraire / et recongnoistre a mes despens par tout ou requis seray dudict Hangouart mon maistre et a mes despens Ce fut par moy ainsy fait Recongnus et promis satisfaire et accomplir et recongnoistre pardevant notaires roiaux et partout ou il appertendra Le dixiesme dapvril quinze sens soixante dix apres pasques Tesmoing mon seing cy mis avecq les saingz de Martin Hennart demourant audict Pummereaulx et jehan le Turcq demourant audict Pietre cy aussy mis a ma requeste en approbation de verite Aussy sans pouvoir substituer aultre lieutenant en mon lieu ne servir aussy en ladicte seignourie des Pummereaulx pour aultre bailly lieutenant ne officiers que de la part dudict Hangouart mon maistre Comme aussy je Guillaume Hangouart Seigneur desdicts Pummereaulx ay icy mis mon seing manuel en tesmoing dudict pouvoir de lieutenant de la seignourie des Pummereaulx donne audict Pierre Screve iceluy durant neantmoings seulement jusques a mon rappel et aux limitations et conditions cy dessus reprinses contenues et par ledict Screve promises et acceptees Ledict dixiesme jour dapvril XV c soixante dix apres pasques Ainsy signe G Hangouart P Screve jan le Turcq Martin Hennart

Tout le contenu de la parge precedente et feuillet premier de ceste feuille a este de rechief leu entendu et promis furnir et entretenir en tous ses pointz par moy Pierre Screve Le dixiesme jour de mars an quinze cens soixante douze Tesmoing mon saing cy mis Ainsy signe Pierre Screve



<sup>428</sup>Limitations et restrictions du pouvoir de lieutenant baillie a Laurens Hennart censier de Pietre et seignourie de Pietre et des Pummereaulx

Je Laurens Hennart Congnoy que le pouvoir de lieutenant a moy baillie par Martin le Wattier bailly de Pietre approuve et confirme par le Seigneur dudict Pietre et tout

---

<sup>426</sup> Calenger : apprehender au corps (Dictionnaire rouchi-français).

<sup>427</sup> Folio 267v°.

<sup>428</sup> Folio 268r°.

pouvoir a moy donne par ledict Seigneur a este et est avecq condition restriction et limitation que je ne polray donner comme jay promis et promais par cestes de ne donner a personne quelconcque congie et licence de picquier fouyr relever hauwer planter remuer gretz parer ne renduver faire bersaux et bourloires / espinchier copper abbatre arbres garder et faire paistre brebis moutons et aultres bestiaux ne faire aultres emprinses es terres et seigneurie de Pietre et des Pummereaulx rietz chemins Sablonnieres fossez voies ruielles flegardz frontz terres et heritaiges en tenus et y gisans Meismes de ne recevoir ne bailler desheritemens et adheritemens faire rapportz dheritaige ny aultres œuvres de dessaisines et saisines de werps sans en advertir ledict Seigneur de Pietre et avoir eu auparavant sur ce charge particuliere et par escript de luy tant a raison de la diversite des droictz seignouriaux rentes seignouriales arrentemens soubz rentes droict de rataicte par puissance de fiefz que aultres privileges droictz et coutumes luy competans et aians lieu esdictes seignouries Le tout a peril de estre moy mesme tenu vers ledict Seigneur de Pietre aux amendes dommaiges sommes interestz reparations et restablissemens enquoy les personnes seroient redevables vers ledict Seigneur de Pietre En tesmoing dequoy jay icy mis mon seing manuel le dixiesme jour du mois de may an quinze cens soixante dix noeuf Ainsy signe Leurens Hennart



<sup>429</sup>Pouvoir de sergeant donne a jehan Morel pour les seignouries de Pietre et des Pummereaulx

Je seigneur de Pietre sousigne Certiffie a tous, avoir commis et commais par cestes sergeant en mes seignouries de Pietre et des Pummereaulx jehan Morel laisne demourant a la Neufve Cappelle luy donnant tout tel pouvoir que a sergeant deument cree compete et appertient et est usite esdictes seignourie aux gaiges de trente patars par an et jusques a mon rappel ordonnant a mes bailly lieutenant hommes de fiefz et masuriers le recepvoir et a tous rentiers et subiectz desdictes deux seignourie le tenir pour tel Apres serment quil aura fait en tel cas pertinent es mains desdictz lieutenant et hommes juges masuriers de Pietre que je commais ad ce fait le douziesme daoust quinze cens soixante dix noeuf Tesmoing mon saing cy mis Ainsy signe G Hangouart /

Le vingtiesme jour daoust an quinze cens soixante dix noeuf Ledict jehan Morel a fait serment de sergeant es mains de nous Martin Hennart lieutenant et hommes masuriers de la seignourie de Pietre sousignez de se bien et leallement conduire audict office et en tout partinnement comme a bon et leal sergeant appertient fait soubz noz seingz manuelz les jour et an susdictz Ainsy signe Laurens Hennart, Gard le Roy Mahieu Carpentier et Henry le Turcq



Pouvoir en brief de bailly recepveur ou sergeant

Je tel Seigneur de etc Pour le bon rapport que ma este fait de la personne de tel etc Ay icelluy commis et ordonne commais et ordonne par ceste bailly ou lieutenant

---

<sup>429</sup> Folio 268v°.

Recepveur sergeant etc de ma seignourie de etc luy donnant tout tel et samblable povoir que a bailly ou etc deument commis peult et doibt competer et appertenir Et ce moiennant serment pertinent quil a faict ou sera tenu faire es mains de telz que je comais ad ce de soy leallement conduire et acquictier audict office selon droict et raison et les uz stilz coustumes ordonnances et privileges de ladicte seignourie et ce jusques a mon rappel<sup>430</sup> Luy donnant povoir de recevoir et faire venir ens par saisines clams<sup>431</sup> arretz et toutes aultres voies judiciaires et raisonnables qui tout ce qui me est et sera deu de rentes seignourialles et fonssieres soubz rentes arrentement reliefz droictz seignourialz et aultres redevanches fonsieres a cause de ladicte seignourie droictz et choses en deppendans Et generalmente tout tel et samblable povoir que a recepveur deument ordonne et commis doibt et peut competer de droict uz stil et coustume Et ce moiennant serment etc



Povoir et serment de responsable de masurier et homme de fief de Martin Malbrancque au nom de Marguerite Bocquette sa belle tante

Ce jourdhuy comparut Marguerite Bocquette vefve de feu jehan Blondel Laquelle comparante recongnut avoir faict commis et denomme son responsable des fief et mesure que elle tient de la seignourie de Pietre de Martin Mallebrancque son beau nepveu et censier luy donnant povoir de en son nom servir en ladicte seignourie de Pietre et tel que a responsable en tout et par tout compete et appertient Lequel Martin suivant ce a faict serment de bien et leallement soy acquictier au faict de la justice judiciaire et commission susdictes comme en tel cas appertient Comme aussy ce dict jour comparans Grard le Roy censier des Mottes et Mahieu Carpentier demourans a Pietre ont faict serment Asscavoir Ledict Grard de responsable commis par ledict Seigneur de Pietre du fief que icelluy Seigneur de Pietre acheta des curateurs de feu josse Lenoyr comprins au bail de ladicte cense des Mottes et ledict Carpentier de masurier pour le mesure quil luy appertient gisant en ladicte seignourie de Pietre et en tenue Ce fut faict pardevant moy Laurens Hennart lieutenant de bailly en la presence de jehan le Turcq jacques Laignel et Noel Vignoble hommes de fief masuriers et juges de ladicte seignourie de Pietre Lesquelz semons de moy lieutenant ont dict les debvoirs et solempnitez en<sup>432</sup> telz cas requisse estre deument observees / Qui en approbation de verite avons icy mis noz seingz manuelz le huictiesme jour doctobre quinze cens soixante treize Ainsy suie Laurens Hennart Grard le Roy jehan le Turcq Noel Wygnoble jacques Laigniel Mahieu Carpentier et Martin Mallebrancque



Congie donne a jehan Morel de tendre a perdris sur les seignouries de Pietre et Des Pummereaulx

---

<sup>430</sup> Folio 269r°.

<sup>431</sup> Clame : s.f réclamation en justice.

<sup>432</sup> Folio 269v°

je Guillaume Hangouart escuier Seigneur de Pietre congnoy avoir donne et accorde grace et congie à jehan Morel bailly de le Cappelle de tendre a perdris sur mes seignouries de Pietre et de Pummereaulx jusques a lentrete du mois de mars prochain A condition de ne retenir nulles vielles perdris / ains de les laisser voller et aussy de ne faire nul dommaige ny interest aux camps advestures<sup>433</sup> et heritaiges de moy ny daultroy Et que ledict Morel pardessus les deux couppes<sup>433</sup> de perdris quil ma envoie sera tenu de moy en donner et envoie encoires une coupe de jeusnes bonnes et grasses endedens ung mois encha A paine destre tenu a amende comme sil avoit chasse tendu et prins sans grace, Ce entendu que a faulte de menvoier endedens ledict mois la coupe de perdris susdicte je en polray faire acheter aux despens dudict Morel et du pris estre creu sur mon simple dict et affirmation En tesmoing desquelles grace et congie requis et accordez et acceptez aux conditions sudictes nous Seigneur de Pietre et des Pummereaulx et jehan Morel susnommez avons icy mis noz seingz manuelz Le quatorziesme jour de septembre an quinze cens soixante quatorze Ainsy signe G. Hangouart et jehan Morel

je jehan Morel congnoy avoir requis et obtenu grace dudit Seigneur de Pietre et des Pummereaulx de tendre sur sesdictes seignouries aux charges devises et conditions cy dessus / pour cest an quinze cens soixante quinze luy<sup>434</sup> donnant quatre couples de jeusnes grasses perdris lors quil luy plaira les avoir Tesmoing mon seing cy mis Le douziesme jour daoust an quinze cens soixante quinze et de cesser de tendre a le chandeleur Ainsy signe jehan Morel



Aultre congie donne a jehan Morel de tendre et chasser faisans, lievres et perdris sur les seignouries de Pietre et des Pummereaulx Apres le St Remy XVc LXXIX

je Guillaume Hangouart escuier Seigneur de Pietre et des Pummereaulx Congnoy avoir donne et accorde grace congie et licence A jehan Morel lieutenant de bailly de le Neufve Cappelle de tendre et chasser a lievres, faisans, et perdris sur mes seignourie de Pietre et des Pummereaulx depuis le saint Remy prochain jusques au premier jour de febvrier en sieuvant et non plus longuement Aux devises et conditions quy sensieuvent Premier que il ne polra tuer ne retenir nulles vielles perdris ains quil sera tenu les laisser voller Item quil ne fera nul dommaige interest ny desplaisir a moy ne aultroy de mes rentiers ne aultre quelz quilz soient en leurs personnes camps advestures biens et heritaiges Item que il ne polra tendre et chasser devant solleil levant ne apres icelluy couchie Item que il ne polra mener aultroy avecq luy ne donner avant congie a aultroy pour tendre et chasser esdictes seignouries Item que je demeure en mon entier de povoir moy mesmes tendre et par aultroy tirer et chasser et donner congie a tous ceulx quil me plaira de tendre tirer et chasser esdictes seignouries Pour lequel povoir et congie donne audict Morel Il sera tenu de me donner endedens<sup>435</sup> quinze jours apres ledict Saint Remy soit quil prendre quelque chose ou non une couple de grosses et grasses jeusnes perdris Laquelle je polray moy meismes achetee en cas que nen soie livre endedens ledict

---

<sup>433</sup> Couples

<sup>434</sup> Folio 270r°.

<sup>435</sup> Folio 270v°.

temps et du pris estre cru sur mon simple dict et affirmation Et oultre ce sera encoires tenu de me paier et delivrer de toutes et chacune prises quil fera le tierch de la prise que est et sera une perdis de trois perdis quil prendra Et ainsy a ladvenant du surplus du nombre de chacune prise dont moy ou mon commis ad ce choisirons tousiours a chacune prise le premier de trois perdis lune / puis ledict Morel en choisira deux puis apres moy ou mondict commis encoire une aultre et ainsy alternativement Et quant aux lieuvres ou faisans que ledict Morel prendra je auray de deux lieuvres lung et de deux faisans lung Aiant par moy comme dict est le choys premier Ce entendu que sil ne prenoit ou tiroit que ung lieuvre ou ung faisant durant le temps dudict congie je luy paieray et satisferay les deux tierch de la valleur par arbitrage de mes commis Ausquelles fins ledict Morel sera tenu de apporter toutes lesdictes prises et bestes tout a linstant quelle seront faictes au Laurens Hennart lieutenant de ma seigneurie de Pietre et Mahieu Carpentier ad ce par moy commis pour par eulx ou lung deulx choisir et prendre mon droict Sans par ledict Morel povoir au paravant ce divertir ailleurs ne receler une seule vollille lievre et beste A paine que toutes les prises volliles et bestes quil aura recele et non amene a congnoissance a moy ou mesdictz commis me appertiendront entierement Pour toutes lesquelles charges devises paine et conditions entretenir ledict Morel sera tenu faire derechief promesse et recongnoissance pardevant ledict Laurens lieutenant et trois masuriers de madicte seigneurie de Pietre le tout aussy a peril de paier en cas de contravention ausdictes cherges et conditions ou aulcunes dicelles tant au Roy que a moy et a cestuy quil appartiendra les <sup>436</sup>amendes deues tant par les placcars de sa Majeste et les coustumes que en vertu des edictz et statuz par moy pardevant publiez pour lesdictes deux seigneurie En tesmoing desquelles graces congie et licence requises et acceptees par moy jehan Morel et promises comme je promais par ceste de entretenir paier et acomplir aux cherges devises paines et conditions susdictes et par moy Seigneur de Pietre et des Pummereaulx susdictes accordees et convenues Avons chascun de nous respectivement icy mis noz seingz manuelz Avecq les seings de Laurens Hennart lieutenant / Grand le Roy Mahieu Carpentier et Henry le Turcq hommes juges masuriers de ladicte seigneurie de Pietre Icy aussy mis a nostre requeste pour plus grande approbation de verite Pardevant lesquelz lieutenant et hommes masuriers je jehan Morel ay faict les promesses ratiffication et recongnoissance cy dessus mentionnez comme de la verite de ce et de tout le contenu de cestes Nous lieutenant et hommes masuriers dessusdictz et soubsignez en tesmoignes par nosdits seingz cy mis Ce fut ainsy faict le dix huictiesme jour de septembre an quinze cens soixante dix neuf

je jehan Morel congnoy avoir requis et obtenu grace dudict Seigneur de Pietre de tendre sur sesdictes seigneuries de Pietre et des Pummereaulx depuis le saint Remy prochain jusques au premier jour de febvrier en sieuvant aux mesmes paiemens livrisons charges paines et conditions cy dessus faictes et contenues pour la grace a moy accordee pour lan XV c soixante dix neuf tesmoing mon saing icy mis le <sup>437</sup>

<sup>438</sup>Recongnoissance soubz seing manuel faite par jehan de la Barre des droictz de la seigneurie des Pummereaulx selon la

---

<sup>436</sup> Folio 271r°.

<sup>437</sup> Blanc dans le manuscrit.

<sup>438</sup> Folio 271v°.

reconnoissance faicte par pluisieurs aultres rentiers et manans  
dicelle seignourie

Je Jehan de le Barre rentier et tenant de la seignourie des Pummereaulx appartenant a Guillaume Hangouart Seigneur de Pietre Congnoy par cestes apres avoir bien et meurement veu leu tenu et examine tous et chascun pointz et tout le contenu de la reconnoissance passee en ladicte seignourie de Pietre par Pierre Screve Martin Hennart jehan le Febvre Thomas Castricque et Martin Haiart pardevant jehan de Faucompret et Martin le Wattier notaires reaulx residens a la Bassee le dix neufiesme en aoust quinze cens soixante sept, que le tout est veritable, et fays moy mesmes en mon endroit les mesmes reconnoissances promesse et restablissemens en tout et de toutz pointz Promectant icelles lettres et toutes choses et pointz y contenus avecq cestes reconnoistre pardevant lesdictz notaires roiaux a la Bassee endedens quinze jours encha pour en estre fait une mesme lettre et acte Ce fut ainsy par moy fait recognu et promis le dixiesme jour de septembre an quinze cens soixante sept Avecq cestuy de moy Guillaume Hangouart Seigneur des Pummereaulx en approbation dudict accord Ainsy signe G Hangouart et jehan de le Barre



Quittance faicte a Jan Parquet de la recepte des despens par luy deubz pour le proces widie<sup>439</sup> contre luy touchant les fouynes emportz de gretz et aultre troubles et tortz par luy commis contre les droictz de la seignourie des Pummereaulx  
Ensamble reconnoissance faicte par ledict Parquet des droictz de ladicte seignourie

Je Guillaume Hangouart Seigneur de Pietre congnoy<sup>440</sup> avoir receu de jehan Parquet labourier demourant a Aubers / la somme de douze livres flandres pour sa portion de despens que luy ay modere par grace , et quil me devoit a raison de certain proces que javoie eucontre luy au conseil Darthois touchant aucunes fouynes emportz de pluisieurs gretz et emprinses par luy faitz a tort et indeuement sur les chemins et flegardz de ma seignourie des Pummereaulx Et quant aux amendes que lesdictz Parquet Michiel Mesurolles et leurs consors me doibvent et ont este vers moy condempne par messieurs du conseil Dartois pour lesdictes emprinses fouynes et emportz de gretz ne les laisse encoires en suspens pour en estre par moy ou mes successeurs faicte la demande Lors que bon nous semblera Et que je jehan Parquet promais bien et leallement satisfaire audict Seigneur de Pietre et hoirs selon que icelles amendes sont deues par les sentences desdictz Seigneurs du conseil et Reconnoissance par foy faicte Promectant de ne demander recouvrier desdictz douze livres sur leglise Dauberch ne personnes quelconques attendu que ledict proches a este soustenu par moy de mon propre mouvement et faulte a tort et indeuement / Cognoissant par cestes ie Pierre Parquet tant en qualite de gliseur dudict Auberch que aussy de rentier de ladicte seignourie des Pummereaulx appartenant audict Hangouart de laquelle je avoie et ay pluisieurs heritaiges tenus , que icelle seignourie des Pummereaulx compete et appartient audict Hangouart / et

---

<sup>439</sup> Procés widie: procès terminé.

<sup>440</sup> Folio 272r°.



que en icelle il a toute justice et seignourie haulte moienne et basse en tous droictz preeminence amendes et aultres choses Sy luy appertienent les flegardz rietz rues chemins et voiries es mettes de sadicte seignourie Esquelz nest loisible a moy ne personne quelconcque picquier fouyr ne haver, remplir les flos et fossez / Iceulx relever aultrement et plus avant que a eauwe <sup>441</sup>de mars, ne parer ou renduver contre et du coste desdictz chemins flegardz bordz et fondz diceulx Ne sur lesdictz frondz bordz et crettes planter arbres en aultres lieux que ceulx accoustumez et nulle part plus avant que a ung pied et demy pres de ladicte eauw de mars / Oster ne remuer les gretz pavetz et chaussees ne pareillement faire aucune chose tant pour faire fossez rietz diceux ne aulcunement entreprendre en sorte que soit le tous sans le gre congie et licence dudict Hangouart Seigneur des Pummereaulx a paine de soixante solz parisis damende pour chascune foys que on feroit le contraire des choses dictes et que emprinses seroient faictes sur ladicte seignourie a applicquier la moictie a Messieurs de Saint Ame en Douay Et aultre moictie audict Hangouart Seigneur des Pummereaulx Et en faire reparation estans moy Parcquet et aultres rentiers de la dicte seignourie tenus de entretenir en bon et souffissant estat lesdictz chemins rues flos fossez cours deauwes et chaussees a noz despens toutefois et quantes que sera publie et enioinct de ce faire par ledict Seigneur des Pummereaulx en se reiglant au fait desdictz relevemens et entretenemens selon que dessus est dict a peril de samblables amendes applicables comme dessus Ce bien entendu que ie Parcquet mes hoirs et aians cause peuvent et polront allendroict des chemins de ladicte seignourie des Pummereaulx planter arbres a pied et demy pres de eauwe de mars des fossez estans allentour de mes heritaiges Saulf sur le riet des Pummereaulx dict le riet du joncquoy sur lequel riet ne les frontz diceluy nous ne povons ne polrons planter Et iceulx arbres abattre quand nous samblera distance que dessus est dict / restablissant et revocquant par moy tous troubles et emprinses faictes au contraire des droictz recognoissance appoinctement et accord susdict Promectant cestes et tout le contenu de cestes entretenir furnir et accomplir et recognoistre par tout ou que requis seray dudict Seigneur de Pietre ses hoirs et aians cause <sup>442</sup>mesmes les passer de nouveau touteffois et par tout que requis en seray Soubz obligation de mes biens renonchant a toutes choses contraires a cestes mesmes au droict disant generale Renonchiation ne valloir sy lespecialle ne precede En tesmoins dequoy nous avons icy mis noz saingz manuelz avecq cestuy de jehan Fascon Guillaume de Ruys et jehan Magnel icy mis a nostre requeste en approbation de verite le vingt quatriesme jour de may an quinze cens soixante dix Ainsy signe G Hangouart, Guillaume de Ruys jehan Parcquet et jehan Magnel



Recongoissance de Martin Haiart davoit releve sans grace deux fossez en la seignourie des Pummereaulx

Comparut en sa personne Martin Haiart labourier et rentier demourant en la terre et seignourie des Pummereaulx Lequel comparant recognut de sa pure libre et franche volunte comment il estoit apparant entrer en proces contre Guillaume Hangouart escuier Seigneur de Pietre et de ladicte seignourie des Pummereaulx etc Pour raison que luy comparant avoit envoie le mois doctobre an quinze cens soixante dix huit

---

<sup>441</sup> Folio 272v°.

<sup>442</sup> Folio 273r°.

releve et faict relever de son auctorite privee indeue et desraisonnable et sans le grace gre congie et licence dudict Hangouart Seigneur des Pummereaulx par pluisieurs et diverses iournees et non moins que de quatre journees deux fossez abordant a ses heritaiges En emprendant par tant sur les droictz auctorite possessions et saisines dudict Seigneur des Pummereaulx et dicelle sa seigneurie en laquelle il a toute justice et seigneurie haulte moienne et basse et tous droictz appertenans a icelle A raison dequoy ledict comparant seroit escheu vers ledict Seigneur des Pummereaulx <sup>443</sup>en pluisieurs amendes de soixante solz parisis chascune monnoie realle Dartois faisant vingt sept deniers flandres le sol et non moins que de quatre amendes a applicquier moictie audict Hangouart Et laultre moictie a messieurs de Saint Ame en Douay lung desquelz fosset par luy releve contenant environ quatre vingt piedz / est gisant entre le riet des Pummereaulx dict le riet du joncqouy et la maison et heritaige appertenant audict comparant et ou il reside a cause de Magdelaine le Blancq sa femme fille de feu Allard et de demiselle Marie le Gillon qui fut fille de feu Jehan le Gillon commenchant ledict fosse depuis le coing de la ruielle dicte la ruielle du bos et Pietre et allant dillecq du long ledict riet jusques a la ruielle dicte la ruielle des Hennicquo et laultre fosset releve est gisant entre ladicte ruielle du bois de Pietre et lheritaige dudict comparant a cause de sadicte femme commenchant audict coing du riet des Pummereaulx en allant du long ladicte ruyelle du bois de Pietre en longueur environ de cent vingt piedz Pour auquel proces obvier faire deue recongnissance restablissement et reparation desdictes troubles empeschemens et emprinses ledict Martin Haiart comparant congnoissant son tort en tout ce que dessus est dict et veullant user de bonne foy a congru est congnoit par cestes competer et appertenir audict Hangouart Ladicte terre et seigneurie des Pummereaulx Laquelle est France regalle de Roy Et que en icelle ledict Hangouart a toute justice et seigneurie haulte moienne et basse en tous droix preeminences amendes de soixante solz parisis monnoye realle Darthois de vingt sept deniers flandres le solt et aultres endessus et endessous et aultres choses Sy luy appertienent les rietz flegardz waresquayx flolz fossez reiectz rues <sup>444</sup>chemins et voiries es mectes de sadicte seigneurie des Pummereaulx, esquelz nest loisible audict Martin Haiart comparant ne a personne quel quil soit picquier fouyr ne hauwer, remplir fouir ne relever les flolz et fossez, ne iceulx applicquier a prouffict particulier, Ne iceulx fossez relever et nettoier, Ne aussy fouyr parer ne renduver sur contre et du coste desdictz chemins flegardz bordz et crettes, Ne planter arbres en aultres lieux que ceulx accoustumez, et nulle part plus avant que ung pied et demy pres de leauwe mars des flolz et fossez Ne oster et remuer les gretz pavetz cailloux et chauches, Ne pareillement faire aulcunes chose tant pour faire fossez reiectz diceulx Ne aulcunement emprendre en sorte que soit le tout sans le gre congie et licence dudict Hangouart Seigneur des Pummereaulx a paine de soixante solz parisis monnoye dicte damende pour chascune foys que on feroit le contraire des choses dictes et que emprinses seroient faictes sur ladicte seigneurie a applicquier moictie audict Hangouart Seigneur des Pummereaulx Et laultre moictie a messieurs de St Ame en Douay Et outre ce de en faire reparation Estant ledict Martin Haiart et tous aultres rentiers et tenant de ladicte seigneurie tenus et obligiez entretenir en bon et souffissant estat lesdictz chemin rues flolz waresquayx fossez cours deauwe gretz chaussees a leurs despens touteffois et quantes et lors que sera publie et enioinct de ce faire par ledict Seigneur des Pummereaulx En se reiglant au faict desdictz relevemens et entretenemens selon que dessus est dict a peril de samblable

---

<sup>443</sup> Folio 273v°.

<sup>444</sup> Folio 274r°.

amende applicable comme dessus Et moiennant ce que dessus ledict Hangouart Seigneur des Pummereaulx present et acceptant ceste reconnoissance et accord dudict Haiart consent que ledict Martin puisse planter <sup>445</sup>sur lesdictz bordz frontz et crettes arbres es lieux accoustumez a ung pied et demy pres de ladicte eauwe de mars (Saulf sur le riet des Pummereaulx, sur lequel riet ne les frontz dicelluy il ne polra planter) et iceulx arbres abbattre toutes et quantefois que bon luy samblera Sans touteffois donner empeschemens au passage des chemins et en remectant et refectionnant deux mois apres ladicte abbattission les flegardz fossez frontz gretz cauchies et chemins en bon estat Sans rien amoindrir ne empirer Et sy a revocque et restablÿ, revocque et restablist par ceste Ledict Martin Haiart tous troubles empeschemens et emprinses faictes au contraire des droictz reconnoissance et appointment susdit Promectant ne plus faire le samblable ains de tousiours bien et leallement furnir et entretenir par luy ses hoirs et aians cause tout ce que dessus est dict soubz lobligation de tous ses biens presens et futurs et ceulx de ses hoirs vers tous Seigneurs et justices Renonchant a toutes choses contraires a cestes Meismes au droict disant generale renonchiation non valloir sy lespecialle ne procede Et non obstant droict loy stil ou coustume a ce contraire a quoy il a deroghie et renonchie / deroghe et renonche par ces presentes Et au regard des quatre amendes et aultres que ledict Martin congnoit avoir fourfaict vers ledict Seigneur des Pummereaulx et congnoit luy debvoir et promet paier a son bon plaisir pour lesdictz relevemens de fossez par luy faictz et aultres emprinses environ ledict mois doctobre dernier lcelluy Martin sen est soumis et submect a la bonne grace dudict Seigneur des Pummereaulx Lequel Seigneur pour ce present et comparant et acceptant ladicte reconnoissance affin de tant plus favourablement traicter avecq ledict Martin les a en son regard par graces toutes quictees Promectant davantaige ledict Martin Haiart reconnoistre ces presentes a ses despens <sup>446</sup>selon leur forme et teneur et en tous ses pointz pardevant Messieurs les president et gens du conseil provincial Darthois notaires royaulx dudict Arthois bailly et hommes de ladicte seigneurie des Pummereaulx et par tout aillieurs ou requis sera dudict Seigneur de Pietre Et pour lesquelles reconnoissance faire ledict Martin Haiart a commis denomme et estably commecte denomme et establist ses procureurs et messagies generaulx et especiaulx de Maistre Adrien de Belvalet licencie es loix jehan Venant Raoul Gosson Anthoine et jehan Doresmieulx Marcq Gazet Maistre jacques Doresmieulx Charles le Febvre Anthoine le Roux Mahieu Carpentier Henry le Turcq et Claude Chuÿne Ausquelz procureurs dessusnommez et a chacun deulx seul et pour le tout portans ces lettres ledict constituant a donne et donne pouvoir absolu et irrevocable de pour et en son nom aller et comparoir pardevant les Seigneurs dessusnommez et en chascun desdictz lieux reconnoistre ces presentes selon leur forme et teneur et tous sesdictz pointz et ce aux despens dicelluy constituant Promectant ledict constituant avoir pour agreable tenir ferme et estable a tousiours tout ce que par sesdictz procureurs ou lun deulx touchant ce que dessus sera fait et besoingne Soubz lobligation de ses biens et heritaiges vers tous Seigneurs et justices Renonchant a toutes choses contraires ad ces presentes Tout ce que dessus je Martin Haiart apres le avoir meurement leu ouy lire et fort bien examine et entendu congnoy avoir recongnu passe promis et accorde et le reconnois passe promais et accorde par cestes tant en mon nom prive que au nom et moy faisant fort de Magdelaine le Blancq ma femme Et sy promais tant pour moy et en mondict nom prive que pour et au nom et moy faisant fort de madicte femme de a tousiours par moy entretenir et

---

<sup>445</sup> Folio 274v°.

<sup>446</sup> Folio 275r°.

faire entretenir par madicte femme furnir et accomplir selon sa forme et teneur et en tous ses poinctz<sup>447</sup> sans povoir jamais aller par nous noz hoirs et aians cause au contraire Promectant aussy le recongnoistre et faire recongnoistre ratiffier mesmes passer de nouvel par moy et icelle Magdelaine le Blancq ma femme a noz despens pardevant lesdictz Seigneurs president et gens du conseil Darthois et aultres comme dessus est dict Lors quil plaira audict Seigneur Hangouart Seigneur des Pummereaulx le tout soubz lobligation de tous et chascuns noz biens meubles cateulx et heritaiges et de chascun de nous et ceulx de noz hoirs presens et futurs vers tous Seigneurs et justices Ausquelles fins je ay desmaintenant pour lors auctorise et auctorise par ceste madicte femme Et sy ay par ceste faict et fais les mesmes denominations et establissemens et donne les povoirs irrevocables de procureurs ainsy et comme il est porte cy dessus en cesdictes presentes En tesmoing dequoy jai icy mis mon saing manuel avecq les seings de Allard le Prevost et Laurens Hennart demourant a Pietre icy aussy mis a ma requeste pour plus grande approbation de verite le vingtroiziesme jour de septembre an quinze cens soixante dix noeuf Ainsy signe A le Prevost Martin Haiart

En marge : Ceste recongnoissance at aussy este passee pardevant Marcq de le Rue nottaire et tesmoin demt a Lille le 18 de may 1580



Clause propices pour accorder les congies de relever fossetz en la seigneurie des Pummereaulx selon que on congnoist que les personnes sont raisonnables, ou inclines a usurper sur les bordz et flegardz pour ragrandir les fossetz sur les chemins et augmenter leurs camps abordans a iceulx fossez au prejudice et incommodite du publicq Pour relever / et ce faisant renduwer contre et du coste du front et flegard Et aussy planter et parer sur ledict front

je tel etc laboureur rentier et manant de la seigneurie des Pummereaulx, Congnoy avoir requis et requiers<sup>448</sup> par ceste grace congie et licence a Guillaume Hangouart escuier Seigneur de Pietre et de ladicte seigneurie des Pummereaulx de relever ung fossetz estant entre mon camp et heritaige Contenant etc Et le chemin de ladicte seigneurie des Pummereaulx menant etc Et aussy de povoir en faisant ledict relevement renduwer en planiant honnestement endedens ledict fossetz contre et du coste du bord front et flegard / et iceluy bord et front povoir honnestement planier et parer pour plus commodement faire ledict relevement Lesquelles graces et congies Ledict Seigneur des Pummereaulx me a accorde a condition que je seray tenu et ay promis et promais par ceste de ne en riens amoindrir ne ralagir empredre ne empirer en sorte que soit lesdictz fossetz reiectz crettes bordz frontz flegardz cauchies voies et chemins

Aussy que je refectioneray bien et deument ainsy quil est et sera besoing lesdictz frontz flegardz cauchies et chemins de la terre procedant dudit relevement

---

<sup>447</sup> Folio 275v°.

<sup>448</sup> Folio 276r°.

Et sy apres que lesdictes refections et amendemens de frontz flegardz cauchies et chemins seront faitz il y a trop de brays<sup>449</sup> et terre ne les pouray par grace par moy requise et accordee comme dessus ruer et mener sur mes camps et heritaiges

Aussy que je seray tenu et ay promis de avoir tout ce que dessus et comme dessus est dict releve refectione et acheve endedens trois mois encha

Et de faire deue ostention desdictz fossetz frontz flegardz cauchies et chemins a Laurens Hennart lieutenant des seignouries de Pietre et des Pummereaulx Grard le Roy et Mahieu Carpentier demeurant à Pietre ad ce commis par ledict Seigneur ou aux deulx diceulx tant auparavant par moy faire ou faire ferre lesdictz relevemens et besongnez que aussy incontinent apres que le tout sera fait et acheve Pour par eulx pouvoir bien entendre et faire rapport audict Seigneur des Pummereaulx de mon acquit en tout ce que dessus<sup>450</sup> Le tout a peril de paier par moy audict Seigneur des Pummereaulx amende de soixante solz parisis faisant vingt cinq deniers flandres le sol en cas que moy ou ceulx lesquels je emploieray ausdictz relevemens et besongnie en y aions en tout furny et satisfait en la maniere et comme dessus est dict et oultre ce estre tenu a la reparation et tous interestz

Promectant recongnoistre ceste a mes despens par devant messieurs les president et gens du conseil Darthois nottaires roiaux dudict conte Dartois bailly lieutenant et hommes de ladicte seignourie des Pummereaulx et partout il appertiendra et requis seray En tesmoing dequoy jay icy mis mon seing manuel avecq les seingz de telz icy cy aussi mis a ma requeste pour plus grande approbation de verite Le<sup>451</sup>

je Guillaume Cousin censier de jehan le Preudhomme escuier Seigneur du Creux de sa cense et heritaiges quil a gisant en la seignourie des Pummereaulx tenus de Guillaume Hangouart escuier Seigneur dicelle seignourie des Pummereaulx Cognoy avoir requis et requiers par ceste tant en mon nom que au nom et par la charge dudict Seigneur du Creux mon maistre grace congie et licence audict Hangouart Seigneur des Pummereaulx quil le me a accorde de povoir relever deux fossez estans entre les heritaiges dicelle cense et les chemins dicelle seignourie Asscavoir lung diceulx fossetz estant au chemin menant icy Et laultre estant abordant au chemin menant icy A condition de ne en rien amoindrir ne ralargir entreprendre ny empirer en sorte que ce soit Lesdictz fossetz rietz frontz bordz flegardz cauchies et chemins Ains seullement parer honnestement lesdictz frontz pour plus convenablement faire lesdicts relevemens Aussy de bien refectioner de la terre lesdicts frontz flegardz cauchies et chemins Et le tout avoir acheve endedens trois mois

Le tout a peril de paier amende de soixante solz parisis pour chascune chose et emprinse<sup>452</sup> qui seroit faicte au contraire de ce que dessus et de chascun point applicable la moictie audict Hangouart et laultre moictie a Messieurs de chappitre de saint Ame en Douay Et oultre ce estre tenu a la reparation et tous interestz

Pour relever fossetz seulement a eauwe de mars sans renduver endedens contre et du coste des frontz et flegardz ny planier ne parer sur lesdictz frontz

Après la clause commençant lesquelles graces etc

---

<sup>449</sup> Bray: limon.

<sup>450</sup> Folio 276v°.

<sup>451</sup> Blanc sur le manuscrit.

<sup>452</sup> Folio 277r°.

Ains que seray tenu et ay promis de faire ledict relevemens seulement a eauwe de mars et tenir ledict fosset de la meisme largeur quil est a present et point de moindre ne plus grande largeur Et sans pouvoir par moy ny cestuy que je emploieray audict relevement fouyr ne desduver renduver ne desrivier du louchet ny aultrement audict fosset sur contre ny du coste du bord frontz flegardz et chemin / ne fouyr planier ne parer en sorte que soit sur contre ny du coste diceulx bordz frontz flegardz et chemins Ains seulement faire ledict relevement en ruant avecq ruffles<sup>453</sup> et louchetz les brais et mort ains hors diceulx fossez



Pour abbattre arbres appartenans aux heritiers des terres abordans aux flegardz

je jehan de le Barre rentier de la terre et seigneurie des Pummereaulx et censier demourant en la cense de le clicquetrie a Herlies Congnoy avoir requis et requiers par ceste grace et licence a Guillaume Hangouart escuier Seigneur de ladicte seigneurie des Pummereaulx que ledict Seigneur ma accorde de pouvoir abbattre a blanche taille et a noyr cul les arbres a moy appartenans croissans sur le front du fosset estant entre mon heritaige et le chemin de ladicte seigneurie allant icy et de desrauder pour y planter aultres nouveaulx plantins au lieu diceulx a ung pied et demy pres de leauwe de mars

<sup>454</sup>A condition que je seray tenu de faire ledict desrodement bien et honnestement sans par ladicte abbatisson et desrodementz donner empeschement aux passages des chemins

Aussy que je remettray et refectioneray deux mois apres ladicte abbatisson les flegardz fossetz frontz cauchies gretz et chemins en bon estat et tel quil estoient auparavant ladicte abbatisson, sans riens amoindrir empirer reprendre ne diminuer, lesquelz bois je seray tenu de avoir tout abbatu en lespace de quinze iours apres que ie y auray commencie, et aussy avoir acheve tout ledict desrodement endedens six sepmaines ensievantz icelluy abbat

Comme aussy seray tenu de faire deue ostention desditz plantains fossetz frontz flegards gretz cauchies et chemins a Laurens Hennart Gard le Roy cy comme dessus

Congie requis par jehan de le Barre de abbattre et replanter arbres en la seigneurie des Pummereaulx sur un front de chemin abordant a ung camp a luy appartenant

je jehan de le Barre censier de la Clicterie / congnoy avoir requis grace et congie au Seigneur de Pietre de abbattre aulcuns arbres seans au front du chemin de sa seigneurie des Pummereaulx en desrodant et fouyant audict flegard et chemin par ladicte abbatisson et replantisson Sans neantmoins amoindrir en riens ledict flegard chemin et fossetz ains les remettre en bon deu et premier estat Tesmoing mon saing cy mis le quatorziesme de juing quinze cens soixante dix Ainsy signe jan de le Barre



---

<sup>453</sup> Ruffle: espèce de pelle en fer.

<sup>454</sup> Folio 277v°.

Congie requis par Martin Hennart de relever fossez en la seigneurie des Pummereaulx a condition de ne amoindrir en riens les frontz flegardz et chemins mesmes de jecter la terre sur lesdicts chemins pour lamendement diceulx sy besoing est

je Martin Hennart labourier et brasseur demourant <sup>455</sup>en la seigneurie des Pummereaulx cognoy avoir requis et requiers par ceste grace et congie a Guillaume Hangouart escuier Seigneur de Pietre et des Pummereaulx de relever certains fossez estans allendroit de certains miens heritaiges seans en ladicte seigneurie des Pummereaulx et en tenus haboutans au chemin quy maisne de lommet au molin de Mally Ce que ma este accorde par ledict Seigneur de Pietre de faire mesmes iceulx parer honnestement du coste dudict chemin sans neantmoins amoindrir riens des frontz flegardz et chemins meismes de y jecter la terre sur lesdictz chemins pour lamendemens diceulx sy besoing est Tesmoing mon seing cy mis le dixiesme doctobre quinze cens soixante douze Ainsy signe Martin Hennart



Grace requise de povoir faire des bersaulx et bourloires au riet des Pummereaulx dict le riet du joncquoy

Nous Michiel de le Ruyelle Martin Hennart Martin Hayart et Anthoine le Febvre tous manans et rentiers de ladicte seigneurie des Pummereaulx Congnoissons avoir requis et requerons a Guillaume Hangouart escuier Seigneur de Pietre et dudict des Pummereaulx Lequel nous a accorde la grace congie et licence de faire deux bersaulx de arcqs a main et arbalestre ensamble une bourloire au riet des Pummereaulx au lieu ou parcidavant appert y avoir eu bersaulx et bourloires faitz par congie dudit Seigneur des Pummereaulx ou ses predecesseurs Et en ce promettons nous conduire honnestement et adommagier le moing que sera possible les herbes et terres dudict riet et sans en riens preiudicier aux plantins Promectant nous et chascun de nous recongnoistre ceste touteffois que requis serons pardevant les bailly et hommes dudit Hangouart Seigneur des Pummereaulx aulx bancqz a luy appertenans et faitz par feu son pere Cui dieu absolve audevant du <sup>456</sup>grand tilleul sur ledict riet des Pummereaulx aultrement dict le riet du joncquoy et par tout aillieurs ou requis serons Tesmoingz noz seingz cy mis avecq ceux de Grard le Roy et Pierre Screve cy aussy mis a nostre requeste pour approbation de verite le vingt cinquesme jour de janvier an quinze cens soixante douze Ainsy signe P Screve Martin Hennart Grard le Roy M de le Ruyelle Martin Hayart



Congie requis par Anthoine le Febvre de povoir faire aucunes fossez au flegard entre sa maison a Pummereaulx la chauchie pour obvier a la deterioration du flegard et cauchie

---

<sup>455</sup> Folio 278r°.

<sup>456</sup> Folio 278v°.

je Anthoine le Febvre rentier de la terre et seignourie des Pummereaulx et y demourant Congnoy avoir requis grace congie et licence a Guillaume Hangouart escuier Seigneur de Pietre et des Pummereaulx que ledict Seigneur ma accorde de pouvoir faire aucunes fossez au flegard estant entre mon heritaige et ma maison ou que je demeure et les cauchies pour obvier a la deterioration desdictz flegardz et cauchies En tesmoing dequoy jay icy mis mon seing manuel avecq cestuy de Pierre Screve et Grard le Roy cy mis aussy a ma requeste pour plus grande approbation de verite le noeufliesme jour de janvier an quinze cens soixante treize Ainsy signe P Screve Anthoine le Febvre et Grard le Roy



Congie de relever par Henry Carlier et Thomas Bonnel certains fossez en la seignourie des Pummereaulx Et par Noel Guilbert ung fosse en la seignourie de Pietre A condition de ne relever aultrement que a eaue de mars / Sans fouyr entreprendre amoindrir ne touchier aux frontz flegardz et chemins

Nous Henry Carlier et Noel Guilbert Congnoissons <sup>457</sup> avoir requis congie et grace au Seigneur de Pietre et des Pummereaulx de relever certains fossez estans allendroit de certains heritaiges que nous avons a nous appertenant a scavoir, moy Carlier en ladicte seignourie des Pummereaulx haboutans au chemin menant de la maison des enfans Anthoine Vignoble et du tilleul estant audict chemin appertenant audict Seigneurs des Pummereaux au logis Mahieu Vignoble et au mollin de Mailly Et a moy Guilbert Haboutant mondict heritaige au chemin du becquet Poullain menant du riet de Pietre a mauqhissart Ce que nous a este accorde par ledict Seigneur de Pietre et par nous este accepte a condition de ne relever aultrement que a eauwe de mars sans fouyr entreprendre amoindrir ne touchier aux frontz flegardz et chemins susdicts Tesmoing noz seingz cy mis le sixiesme de novembre quinze cens soixante douze Ainsy signe Henry Carlier

je Thomas Bonnel rentier et censier demourant a Pummereaulx Congnoy avoir requis grace et congie et que ma este accorde par le Seigneur de Pietre et des Pummereaulx de relever une frette estant sur le riet des Pummereaulx et haboutant aux heritaiges des enfans de feu Anthoine Vignoble censier de le Clicquetrie A condition de ne riens amoindrir ne entreprendre sur ledict riet ne les frontz dicelluy Tesmoing mon saing cy mis avecq ceulx de Grard le Roy et Pierre Screve cy mis a ma requeste pour approbation de verite le treisiesme jour de juing an quinze cens soixante quatorze Ainsy signe Thomas Bonnel Pierre Screve et Grard le Roy



Congie requis par Martin Hennard de pouvoir oster aucuns gretz a ung puich estant en terre au chemin de la seignourie des Pummereaulx au devant de la porte de jehan Preudhomme

---

<sup>457</sup> Folio 279r°.



Seigneur du Creux pour lesdictes pierres employer a faire cauchie  
en ladicte seigneurie sans gaster le chemin et puich ny le remplir

je Martin Hennart rentier demourant en la seigneurie de <sup>458</sup>des Pummereaux  
congnoy avoir requis grace et congie a Guillaume Hangouart escuier Seigneur dudict  
des Pummereaux de oster et lever aucunes pierres de gretz a ung puich estant en  
terre devant la porte de la cense de jehan Preudhomme Seigneur du Creux au mitain  
du chemin pour lesdictes pierres employer a faire cauchie aux chemins de ladicte  
seigneurie ce que ledict Seigneur me a accorde aux conditions susdictes et de ne  
gaster ledict chemin et puich ains le remettre bien couvert sans remplir A condition  
aussy que ledict Seigneur de Pietre fera visiter ledict puich avant que touchier par  
moy fait le seiziesme de juillet quinze cens soixante quinze Tesmoing mon saing icy  
mis Ainsy signe Martin Hennart



Reconnoissance faicte par Guillaume Cousin censier de jehan le  
Prudhomme Seigneur du Creux de ce quil avoit fouy en la ruyelle  
dicte ruielle des povres gisant a Pummereaux entre lheritaige dudict  
Preudhomme et lheritaige des hoirs de feu Pierre Screve Ensamble  
du congie requis par ledict Cousin de relever certain fosse et parer  
sur le front

je Guillaume Cousin labourier demourant en la terre et seigneurie des Pummereaux  
Congnoy que de ce que jay puis peu de temps fait indeuement et sans le gre et  
congie de Guillaume Hangouart escuier Seigneur dudict Pummereaux certaine  
fouyne en la ruielle dicte des povres seant audict Pummereaux haboutant au chemin  
menant du riet des Pummereaux au puich dudict Pummereaux Tenant daultre sens  
a lheritaige de jehan Preudhomme escuier Seigneur du Creux daultre a lheritaige  
des hoirs jacques Screve daultre a lheritaige des hoirs Thomas Catricque Laquelle  
ruielle ne appartient a personne privee y aiant heritaige contigu ains est des voies  
publicques dicelle seigneurie et servant de passage Parquoy veullant user de bonne  
foy vers ledict Hangouart Seigneur des Pummereaux jay revocque <sup>459</sup>et revocque  
par cestes ledict trouble / promectant de ne plus faire le samblable Et sy ay au regard  
de tout ce que dessus et de ces presentes recongnu et recoignoy les droicts  
possessions et saisines dudict Seigneur des Pummereaux Et quant aux amendes  
que jay et congnoy avoir fourfaict et encouru vers ledict Seigneur des Pummereaux  
par lesdictes fouynes troubles et emprinses je me suis remis a la bonne grace  
dicelluy Seigneur Lequel sur la requeste a luy par moy faicte et en faveur que suis  
nouvellement venu resider en ladicte seigneurie le mes a de sa grace quicte par  
cestes Tout ce que dessus promais entretenir et ne plus picquier fouyr ne hauwer en  
ladicte ruielle et aultres lieux publicques sans le conge et licence dudict Seigneur des  
Pummereaux Et de reconnoiste cestes a mes despens ou seray requis de luy  
Davantaige je Guillaume Cousin estant a present censier de jehan Preudhomme  
escuier Seigneur du Creux en sa cense et gisant en ladicte seigneurie des  
Pummereaux Congnoy avoir requis congie audict Guillaume Hangouart escuier  
Seigneur desdictz Pummereaux quil ma accorde de relever certains fossez dicelle

---

<sup>458</sup> Folio 279v°

<sup>459</sup> Folio 280r°.

cense abordans aux chemins dicelle seignourie des Pummereaulx A condition de ne amoindrir et empirer les frontz et flegardz faisans lesdict relevemens ains y seulement parer lesdictz frontz pour convenablement faire lesdictz relevemens ceste annee En tesmoing de quoy jay icy mis mon seing manuel avecq le seing de Grard le Roy et Leurin Hennart cy mis a ma requeste pour approbation de verite le vingtroisiesme de juillet XV c soixante seize Ce entendu que jay promis et promet de reparer et remectre au premier estat lesdictes fouynes faictes en la ruelle des povres cy dessus mentionee comme le tout estoit auparavant ledict trouble par moy fait , et ce faire et avoir bien et deument acheve endedens six sepmaines encha date de ce jourdhuy XXIIIe de juillet XV c LXXVI Ainsy signe Leurin Hennart Guillaume Cousin Grard le Roy



<sup>460</sup>Congie requis par Guillaume Cousin censier de jan le Preudhomme Seigneur du Creux de relever aucuns fossez en la seignourie des Pummereaulx

je Guillaume Cousin censier de jehan Preudhomme escuier Seigneur du Creux en sa cense gisant en la seignourie des Pummereaulx congnoy avoir requis congie a Guillaume Hangouart escuier Seigneur desdicts Pummereaulx qui le m'a accorde de relever certains fossez estans entres les heritaiges dicelle cense et les chemins dicelle seignourie des Pummereaulx A condition de ne amoindrir et empirer les frontz et flegards en faisant lesdictz relevemens Ains y seulement parer lesdictz frontz pour convenablement faire lesdictz relevemens ceste presente annee / et de amender et refectioner de la terre desdictz fossez les chemins sil est besoing Et promais ainsy me reigler Abordans lesdictz fossez Asscavoir lung au chemin menant du tilleul estant devant ladicte cense au puich des Pummereaulx Et laultre au chemin menant dudict tilleul et cense a Ligny et Lorgies En tesmoing dequoy jay ici mis mon seing manuel avec les seingz de Grard le Roy et Leurin Hennart cy mis a ma requeste pour approbation de verite Ce neufsiesme jour de septembre an quinze cens soixante dix sept Ainsy signe Guillaume Cousin Leurin Hennart et Grard le Roy



Congie requis par Mahieu de Dours et Pierre Chombart de relever aucuns fossez en la seignourie de Pietre A condition de ne amoindrir les frontz et flegardz et refectioner de la terre les chemins

Nous Mahieu de Dours et Pierre Chombart demourans a Pietre cognoissons avoir requis gre et congie au Seigneur de Pietre de relever certains fossez appartenant audict Seigneur frontans au chemin, asscavoir cestuy <sup>461</sup>a relever par moy de Dours au chemin du ponchel Thorel contre mon camp contenant environ cinq a six cens dheritaige par moy acquis des hoirs de feu Ansel de Mars et cestuy a relever par moy Chombart confrontant aussy audict chemin et tenant a lheritaige Claude Bauduin et jacquemine de Mars fille de Pierre tenant dun sens a lheritaige de Mahieu

---

<sup>460</sup> Folio 280v°.

<sup>461</sup> Folio 281r°.

de Dours Ce que nous a este accorde de relever par ledict Seigneur de Pietre ensamble les fossez habordans aux heritaiges de moy de Dours et le grand chemin de Pietre menant au bois du Biez le tout a condition de ne amoindrir ni empirer les frontz flegardz et chemins abordans ausdictz fossez Ains de ruer la terre desdictz fosses et relevemens sur lesdictz chemins et les refectioner saulf que avons requis grez et que nous a este accorde de ruer la terre dont lesdictz chemins nauront besoing sur nos heritaiges fait ce vingtroisiesme jour doust quinze cens soixante dix Comme aussy ay requis congie relever aultre fosse appertenant audict Seigneur de Pietre estant entre le chemin du bocquet Poullain et le camp de moy de Dours qui fut pardevant aux hoirs de feu Maistre jehan Petillon aux conditions susdictes Ainsy signe Mahieu de Dours et Pierre Chombart



Pouvoir sur Laurens Hennart de accorder de relever des fossez a Pietre

Ceux qui demandent relever des fosses a Pietre aient a comparoir devant Laurens Hennart lieutenant et trois mazuriers requerir et obtenir ledict congie a condition de jeter toute la terre sur le chemin sil est besoing / et sans ramoinrir les frontz ny ralargir les fossez contre les chemins Et que ledict Leuren avecq jehan le Turcq ou Grard le Roy aient visiter louveraige devant le faire et apres quil sera fait a peril des amendes fait ce huict de may quinze cens soixante dix sept Ainsy signe G. Hangouart

<sup>462</sup>Rappel dudict pouvoir

Depuis ce que dessus jay revocque ce present pouvoir de Leurin pour ce jourdhuy en avant ordonnant que ledict Leuren ne puisse donner nulz congie depuis ce jour de relever Ains seulement recevoir les requisitions visiter avecq Grard ou Mahieu Carpentier et Henry le Turcq les lieux et moy advertir pour les accorder ou refuser comme il sera de raison fait ce XXVe de may XV c soixante dix neuf Ainsy signe G. Hangouart



Congie requis par jacques Laigniel de pouvoir prendre de largille au riet de Pietre A condition de remplir la fosse quil fera et aultres fossez estans audict riet

je jacques Laigniel dict grand jacques rentier et demourant a Pietre Congnoy avoir requis grace congie et licence au Seigneur de Pietre de pouvoir fouyr et tirer de largille au riet dudict Pietre appertenant audict Seigneur ce que il ma accorde a condition de remplir tost bien et souffissamment la fosse que feray pour ladicte argille / ensamble quelque portion daultres fossez pardevant faictes aussy par sondict congie lesquelles ne furent bien remplis Ce que promais faire et entretenir Tesmoing mon seing cy mis le vingttroisiesme jour daoust an quinze cens soixante dix Ainsy signe jacques Laigniel

---

<sup>462</sup> Folio 281v°.



Congie requis par Mahieu de Dours de relever certain fosset et abbatre et desroder aucuns bois montans sur le frond dudict fosset au chemin deriere la brasserie dudict Pietre

je Mahieu de Dours labourier et brasseur demourant a Pietre Congnoy avoir eu requis et requiers au Seigneur de Pietre grace qongie de relever certains fossez abordans tant a mes mesures sur le riez de Pietre que aux chemins du ponchel Thorel et du becquet Poullain Et aussy de povoir abbatre et desroder certains bois<sup>463</sup> que jay contre lesdictes mesures rietz et chemins Ce quil ma accorde de faire A condition de ne amoindrir ne empredre les frontz flegardz et chemins Ains de tout bien amender et reparer endedens deux mois Tesmoing mon seing cy mis Le premier jour de septembre quinze cens soixante douze Ainsy signe Mahieu de Dours



Congie requis par Andrieu de le Marre dict druchon / de prendre de largille sur le riet de Pietre

je Andrieu de le Marre dict druchon, Congnoy avoir requis et requiers par cestes grace et congie au Seigneur de Pietre qui le m'a accorde de povoir faire certaine fosse sur le riet de Pietre et dicelle prendre quelque quantite dargille pour refectioner ma maison que jay scituee audevant dudict riet a condition que je seray tenu et promais de remplir ladicte fosse ensamble deux aultres fossez et vallees que Gard le Roy ou jehan le Turcq me ordonneront sur ledict riet endedens quatre jours apres Ladicte argille tiree a perilde estre ledict congie tenu pour nul et non fait et de paier les amendes comme aiant fouy sans congie / Ce fut ainsy fait congny et promis le douziesme jour de juing quinze cens soixante treize Tesmoing mon saing cy mis avecq ceulx dudict Gard le Roy et Laurens Hennart cy mis a ma requeste pour approbation de verite Et de prendre la terre pour remplir ladicte fosse et deux vallees sur mes heritaiges et le tout faire sans en riens adommaigie les plantins dudict riet et avoir le tout que dessus acheve endedens quinze jours Ainsy signe Andrieu de le Marre Gard le Roy et Laurens Hennart



<sup>464</sup>Congie requis par Michiel de Guery et jacques Barbet de povoir relever aucuns fossez en la seignourie de Pietre A condition de jecter au chemin aultant de terre quil en faudra pour refectioner ledict chemin Et le surplus mener sur leurs heritaiges

Nous Michiel de Guery et jacques Barbet beau freres Congnoissons avoir requis grace et congie du Seigneur de Pietre qui le nous a accorde de povoir relever certain

---

<sup>463</sup> Folio 282r°.

<sup>464</sup> Folio 282v°.

fosse appartenant audit Seigneur de Pietre contre le grand chemin de Pietre allant aux petites Sablonnières dudict Pietre et sept cens ou environ de terre a pret et jardin appartenant a moy Michiel que icelluy Barbet tient en cense / et aussy ung aultre fosse appartenant audit Seigneur de Pietre gisant entre et contre le chemin du bos de Pietre et une pieche de terre a labour contenant environ le tierch de cinq cens appartenant et tenue en cense comme dessus Le tout a condition de ne riens touchier amoindrir ne emprendre sur les frontz flegardz lez et costez desdictz chemins et de jecter toute la terre sur iceulx chemins Sauf que sil ny avoit besoing de toute la terre pour la refection desdictz chemins Ledict Seigneur de Pietre nous a accorde par grace de jecter le surplus de ladicte terre sur lesditz champs Promectant ce que dessus entretenir a paine de paier les amendes de avoir emprinses faictes et fouy sans congie en cas de contravention a aucuns desditz pointz et de reconnoistre cestes par tout ou requis seront mesmes pardevant bailly lieutenant et hommes de fiefz et masuriers de la seigneurie de Pietre Tesmoing noz saingz cy mis le neufiesme jour de septembre an XV c soixante quatorze avecq les seingz de jehan Magnel et jan Pierre demt a Lille mis a nostre requeste pour approbation de verite Ainsy signe jacques Barbet et jehan Magnel

<sup>465</sup>Reconnaissance faicte par jacques du Retz et Pelonne du Bron sa femme de ce quil avoient faict relever sans congie du Seigneur de Pietre ung fosset appartenant audit Seigneur de Pietre entre le grand chemin et les deux fossez de ladicte Pelonne et promesse de paier le relief de bail

Nous jacques du Retz le jeusne demourant a Auberch fils de jacques et Pelonne du Bron fille de feu Nicollas femme dudict jacques du Retz le jeusne deument et agreablement auctorisee Congnoissons que au mois de janvier dernier nous nous sommes ingere de nostre auctorite privee indeue et desraisonnable de faire relever par divers iours sans le gre congie et licence de Guillaume Hangouart escuier Seigneur de Pietre par certain manouvrier demourant en ladicte seigneurie certain fosse estant entre le grand chemin dicelle seigneurie de Pietre menant du riet au belloy et les heritaiges des deux fiefz escheuz a icelle Pelonne par le trespas de sondict pere tenu dicelle seigneurie de Pietre Enquoy faisant nous avons contrevenu et emprins contre les droictz possessions et saisines dudict Seigneur de Pietre le troublant en icelles et pour ce sommes escheu et encouru vers luy en plusieurs amendes de soixante solz parisis monnoie roiale Dartois chascune faisant ledict solz parisis Dartois vingt sept deniers flandres et qui revient a six livres quinze solz flandres pour chascune amende et oultre ce sommes de droict et raison tenu de reparer et restablir ledict trouble Surquoy veullant user de bonne foy vers ledict Seigneur de Pietre et estans bien et deument informez de nostre tort et des droictz possessions et saisines susdictes dudict Seigneur de Pietre nous avons revocque repare et restably revocquons reparons et restablissons par cestes ledict trouble Promectans par nous de ne plus faire le samblable Et sy avons au regard de tout ce que dessus et de ces presentes recongnu et reconnoissons les droictz possessions et saisines <sup>466</sup>dudict Seigneur de Pietre congnoissans ycelluy estre partout ruier<sup>467</sup> en sadicte terre et seigneurie de Pietre et y avoir toute justice haultre moienne et basse et tous droictz appartenans a icelles justices tant par coustumes generalles Darthois

---

<sup>465</sup> Folio 283r°.

<sup>466</sup> Folio 283v°.

<sup>467</sup> Ruier: s.m ; celui qui ses charge des rues et chemins.

que coustumes particulieres et localles dicelle seignourie et que ne povons ny personnes quelconcques fouyr relever picquier hauwer ne prendre terre es fosses estans et abordans entre tous chemins dicelle seignourie et lesdictz deux fiefz ne aussy en et sur nulz aultres fossez abordans aux chemins de ladicte seignourie ny sur les chemins flegardz frontz voies rietz et Sablonnieres dicelle Sans le gre congie et licence dudict Seigneur de Pietre soubz paine desdictes amendes et destre tenu a la reparation Et au regard des amendes par nous deues pour raison du trouble susdict nous nous en sommes remis et soumis a la bonne grace dudict Seigneur de Pietre Lequel sur la requeste a luy par nous faicte nous les a quictie pour ceste foys Saulf une amende portant six livres quinze solz flandres que nous congnoissons luy debvoir et promettons luy bien paier a son bon plaisir davantaige je jacques du Retz congnoy debvoir et promais paier audict Seigneur de Pietre a son bon plaisir la somme de dix livres deux solz deniers<sup>468</sup> pour le relief du bail que je luy suis redevable a cause du mariaige par moy contracte avecq ladicte Pelonne depuis quelle a este heritiere desdictz deux fiefz Et quant au relief quy estoit deu audict Seigneur de Pietre par ladicte Pelonne par le deches dudit Nicollas du Bron lcelluy a este paie et satisfait Tout ce que dessus nous jacques du Retz et Pelonne du Bron promettons bien et leallement entretenir paier furnir et accomplir a tousiours sans jamais aller au contraire / et recongnoistre a noz despens pardevant les baillifz lieutenant hommes de fiefz et eschevins des chasteaux ville et seignourie de Warneston et des villaige terres et seignouries de Auberch et de Pietre Notaires roiaux du pays et conte Dartois et partout aillieurs ou il appertiendra et requis serons Renonchans a toutes choses contraires a cestes Meismes au droict disant generale Renonchiation ne valloir sy lespecialle ne precede En tesmoing de quoy avons icy mis noz seingz manuelz Avecq les seingz de Laurens Hennart<sup>469</sup> lieutenant de baillif de ladicte terre et seignourie de Pietre Grand le Roy Mahieu de Dours Mahieu Cartpentier jacques Laigniel et Pierre Malbrancque hommes juges masuriers de ladicte terre et seignourie de Pietre etc aussy mis a nostre requeste pour plus grande approbation de verite Ce que nous lieutenant et hommes juges masuriers dudict Pietre dessusnommez pardevant lesquelz lesdictz jacques du Retz le jeusne et Pelonne du Bron sa femme ont comparu recongnu promis passe et ratiffie tout ce que dessus avons aussy signe de noz saingz manuelz le<sup>470</sup> du mois an quinze cens soixante dix noeuf



Quictance faicte par le Seigneur de Pietre audict du Retz de lamende cy dessus promise

je Guillaume Hangouart escuier Seigneur de Pietre En consideration que jacques du Retz le josne recongnoissant de troubles cy dessus mentionez estoit au temps dudict trouble nouvellement marie et par consequent ne pouvoit sy bien scavoir les droictz privileges et coustumes de ladicte seignourie je ay par grace de ma propre liberalite et moimement gratuit moiennant neantmoingz ladicte recongnoissance quictie et quicte par cestes ausdictz du Retz et sa femme les six livres quinze solz flandres de

---

<sup>468</sup> Oubli du nombre de deniers.

<sup>469</sup> Folio 284r°.

<sup>470</sup> Blanc dans le texte.

lamende par moy retenue et quil avoit par icelle recongnissance promis me paier  
Tesimoing mon seing cy mis le



Recongnissance faicte par Martin Haiart des amendes et  
interestz par luy deues au Seigneur de Pietre pour avoir este ses  
besteaulx trouves faisans dommaiges es bois dudict Seigneur de  
Pietre

je Martin Haiart laboureur manant et rentier dmt en la terre et seignourie des  
Pummereaulx Congnoy debvoir <sup>471</sup>et promais paier a Guillaume Hangouart escuier  
Seigneur de Pietre et dudict des Pummereaulx la somme de six livres quinze solz  
flandres pour une amende de soixante solz parisis monnoye roiale Dartois de vingt  
sept deniers flandres le solz pour avoir este trouvez le treiziesme jour doctobre an  
quinze cens soixante dix sept trois de mes veaulx pasturans au bois de Pietre en la  
taille et jeusne taillys qui fut coppe en liver<sup>472</sup> dudict an quinze cens soixante dix sept  
qui estoit jour de dimenche au matin ce voians pluisieurs gens de bien de la  
seignourie de Pietre lesquelz retournoient ledict matin de leglise Dauberch qui men  
ont souffissamment informe Laquelle somme de six livres quinze solz je promais  
paier audict Seigneur de Pietre a son bon plaisir Et quant aux dommaiges et interestz  
de ce que dessus ensamble de pluisieurs aultres amendes et interestz que ne  
polroie debvoir pour avoir mesdictz veaulx pourcheaulx et aultres bestiaulx este par  
aultres foys audict jeusne taillys et sur aultres terres et heritaiges dudict Seigneur de  
Pietre et de ses rentiers et tenans et que polroie debvoir en sorte et pour quelque  
cause que ce fut Ledict Seigneur de Pietre et les parties interessees demoureroit en  
leur entier de m'en poursuivre la ou lors et ainsy que ilz trouveront expedient moy  
aussy estant sur ce en mon entier de mes deffences Promectant ceste recongnistre  
a mes despens pardevant messieurs les President et gens du conteil Darthois  
notaires roiaux dudict Conte Dartois baillys lieutenant et hommes juges desdictes  
seignourie de Pietre et des Pummereaulx En tesmoing de quoy jay ceste signe de  
mon seing manuel le quatriesme jour de novembre an quinze cens soixante dix sept  
Ainsy signe Martin Haiart



Recongnissance faicte par Noel Vignoble et sa femme que leur  
camp tenant au pret et camp Lannoy appertenant au Seigneur de  
Pietre doibvent passage de pied car carrette chevaux et aultres  
besteaulx du Seigneur dudict Pietre et ses censiers pour aller  
audict pret camp et bois Lannoy

Comparurent en leurs personnes Noel Vignoble labourier <sup>473</sup>et jehenne Becque sa  
femme dms a Pietre Lesquelz et chacun deulx icelle femme souffissamment auctorisee  
dudict Vignoble son mary Congnoissent avoir parcidevant recongnu pardevant  
Charles le Febvre bailly de la terre et seignourie de Pietre et juge masuriers dicelle

---

<sup>471</sup> Folio 284v°.

<sup>472</sup> L'hiver.

<sup>473</sup> Folio 285r°.

seignourie Comment les six cens trois quartrons de terre prins en treize cens dont la reste appertienent aux hoirs de feu jehan Caudrelier Lesquelz six cens trois quartrons ilz acquirent de Charles Becque frere a ladicte jehenne doibvent passage de car chevaulx carettes vaches et bestes pour aller par le Seigneur dudict Pietre ses hoirs ou aians cause censiers et fermiers en leurs pretz camp et bois Lannoy Laquelle recongnissance a este faicte par lesdictz conjointz comme dict est dont ilz en on bonne memoire pluisieurs annees auparavant quilz vendirent lesdictz six cens trois quartrons de terre a jehan le Febvre par eschange daultre pieche / et auparavant quilz conjointz eussent eu nulle intention ne pourparle de vendre audict le Febvre lesdictz six cens trois quartrons Tout ce que dessus lesdictz comparans ont congnu de leurs pure et franche volunte estre veritable, faict et congnu oudict Pietre pardevant Martin le Wattier bailly commis par Guillaume Hangouart escuier Seigneur dudict Pietre / en la presence de Gard le Roy et jehan le Turcq hommes juges masuriers de ladicte seignourie de Pietre Le vingt septiesme jour dapvril quinze cens soixante et huict Ainsy signe M le Wattier jehan le Turcq et Gard le Roy



Recongnissance Maillin de Hennin des plantins contre sa maison achete de jehan Druchon laquelle maison ledict Hennin a depuis vendu a Betre le Roy

Comparut en sa personne Maillin de Hennin labourier dmt à Pietre Lequel comparant declara que en lan quinze cens soixante dernier Il aueroit plante pluisieurs plantes sur le <sup>474</sup>flegard du chemin quy maisne dudict Pietre aux savlonnieres depuis sa porte jusques a la moictier de son gardin Et faict quelque petit fosse depuis ledict plantin jusques en fin de sondict gardin vers lesdictes savelonnieres Et pour quelque portion de haye quil a replante sur ledict heritaige outre et plusavant que son heritaige ne sextend Ce que faire ne pavoit sans gre du Seigneur dudict lieu ou a peril de soixante solz parisis damende de chascune plante fouyne et fosse Partant en recongnissant le droict dudict Seigneur Il a promis et par ces presentes promet de desplanter lesdictes plantes et de retrenchier ladicte haye au volume de laultre haye et remplir ledict fosse Et parmitant Ledict Seigneur aussy a ce present en personne Luy a quicte lesdictes amendes pourveu que cy apres il ne puisse ferre plus samblable plantison sur et a peril de soixante solz parisis damende de chascune fouyne Soubz lobligation de ses biens et heritaiges Renonchant a toutes choses contraires Ce fut ainsy faict passe et recongnu a loy Pardevant Charles le Febvre bailly jehan le Turcq jehan Warembourg Noel Vignoble et Mahieu de Dours hommes masuriers dudict Pietre le mardy onziesme jour de may quinze cens soixante et onze

Collation faicte a loriginal et trouve concorder par moy Ainsy signe Charles le Febvre



---

<sup>474</sup> Folio 285v°.



Reconnoissance faite par Pierre de Mars de ce quil avoit plante une haye sur le riet de Pietre audevant de sa maison avecq promesse de le desplanter et oster

Nous Guillaume Hangouart Seigneur de Pietre et Pierre de Mars congnoissons nous avoir accorder ensamble touchant certain different apparant tomber en litige sur ce que je Pierre avoie comme ainsy le reconnoy par ceste avoir planter une haye sur le riet de Pietre audevant de mon heritaige et de ma fille depuis le coing et fosse et front de lheritaige Mahieu joye allant jusques a lheritaige de Mahieu de Dours Enquoy faisant<sup>475</sup> je avoie et ay empris quelque portion dudict riet endedens mondict heritaige et fait emprinse sur icelluy contre les droictz dudict Seigneur de Pietre Dont veillant moy Pierre de Mars en ce user de bonne foy reconnoy avoir indeuement fait ladicte emprinse et promet et me fay fort en recoignoissant le droict dudict Seigneur de Pietre de endedens trois ans oster ou faire oster toute ladicte haye et icelle ou aultre remettre et ferre planter plus avant sur mon heritaige a droicte lingne et volume du front de fosse dudict Mahieu joye et du fosse dudict Mahieu de Dours Ce entendu que au regard de ladicte haye qui est audevant de la fenestre du logis dudict Pierre de Mars icelle ne sera ostee que jusques a ce et lors que ledict Seigneur de Pietre le vaudra avoir ostee / comme je Pierre de Mars promaict et me fay fort de le oster et faire oster touteffois que il plaira audict Seigneur de Pietre En prometant oultre par moy de Mars reconnoistre ce a mes despens pardevant messieurs le president et gens du conseil Dartois et ailleurs ou que requis seray et le tousiours entretenir soubz lobligation de tous mes biens Ce fut ainsy fait et accorde le quinziesme daoust quinze cens soixante et deux audict Pietre presens Mahieu de Dours jehan Warembourg Noel Vignoble Nicolas Bourrel Gregoire Bourel et jehan le Turcq juges masuriers dudict Pietre et de jehan Windebien et Tonnequin Lienart tesmoingz noz seingz et desdicts masuriers et aultres Ainsy signe G. Hangouart Mahieu de Dours Pierre de Mars jan Warembourg jehan le Turcq Gregoire Bourel et Noel Vignoble



Reconnoissance de Pierre Carlier de ce quil avoit abbatu avecq aultres ung fresne au bois du Seigneur de Pietre Avecq promesse de satisfaire les amendes et interestz

je Pierre Carlier demourant a Ligny congnoy par ceste que de ce que javoie dernièrement en lan quinze cens soixante sept abbatu et emporte avecq jehan Bouillet<sup>476</sup> Pierre Bouillet freres, Martin Waucquier jacques de le Marre Toussains Prevost Denis de Grugon et Anthoine Ghesquiere tous demourans audict Ligny le Petit paroisse de Lorgies de nostre auctorite privee indeue et desraisonnable et sans le congie du Seigneur de Pietre / Ung fresne au bois de Pietre appartenant audict Seigneur je ay veillant user de bonne foy reconnu et reconnoys mon tort et revoque ledict trouble et emprinse prometant ne plus faire le samblable a peril des amendes reparations et punitions pour ce legittement deues Et sy avons nous dessusdictz turbateurs paie pour les amende et reparation du trouble susdict par moderation et grace que ledict Seigneur nou en a fait la somme de douze livres

---

<sup>475</sup> Folio 286r°.

<sup>476</sup> Folio 286v°.

flandres / A condition que nous tous et chacun de nous sera tenu recongnoistre amplement les choses susdictes par tout ou requis serons oudict Seigneur de Pietre et a noz despens en ample et seure forme a son appaisement a peril de povoir par luy ad ce contraindre et poursuivre les deffaillans ou refusans aux despens diceulx refusans / ensamble Poursuivre tous les interestz et reparations contre lesdictz deffaillans jusques a la plaine satisfaction Ce fut ainsy fait recongu restably et promis par moy subsigne le quatorziesme jour de decembre an quinze cens soixante huict tesmoing mon seing cy mis avecq cestuy de jehan de le Barre icy aussi mis a ma requeste et dudict Seigneur de Pietre en approbation de verite Ainsy signe G Hangouart Pierre Carlier jehan de le Barre



Lettres pour le Seigneur de Pietre touchant le renuchement fait par ceulx du surnoms Castricques dune haye Au prouffict du Seigneur dudict Pietre

A tous ceulx qui ces presentes lettre verront ou orront Charles le Febvre bailly de la terre et Seignourie de Pietre seant en la paroisse Dauberch Pour Guillaume Hangouart escuier Seigneur de ladicte seignourie de Pietre etc <sup>477</sup>salut Scavoir fay que pardevant moy bailly dessusnomme et en la presence de Pierre Hennart jehan Blondel et Henry le Turch hommes masuriers et juges de ladicte seignourie de Pietre Comparurent en leurs personnes jehan Thomas et Marguerite Castricque vefve de feu Pierre de le Plancque frere et sœur heritiers de deffunct jehan Castricque le josne eulx et chacun deulx faisans et portans fors de Pierre Parcquet et jehenne Castricque seur ausdictz comparans et heritiere dudict feu jehan Castricque avecq iceulx Et recongnurent et chascun deulx respectivement Comment pardevant ledict deffunct Castricque se eust oppose a certaine commission en forme de complaincte donnee du conseil provincial de la chambre Darthois obtenue de la part dudict Seigneur de Pietre Pour avoir pretendu par icelluy la somme de six livres paris monnoye de flandres pour lamende que ledict deffunct avoit fourfait davoit desplante et emporte ung cherigier en certaine haye despine estant entre le jardin dudict Seigneur et desdictz comparans a present venant dudict feu jehan A raison de ce pluisieurs procedures se sont ensievies audict grand conseil Cest ainsy que ce jourdhuy lesdictz Castricque comparans se sont accordez et appointiez avecq ledict Seigneur en la forme et maniere que cy apres est declare Cest asscavoir que iceulx comparans et chascun deulx eulx faisans fors que dessus ont renonchie et par ces presentes renonchent au prouffict dudict Seigneur a ladicte haye estant entre ledict jardin desdictz Seigneur et comparans meismes ont promis et promectent par ces presentes de paier a icelluy Seigneur ladicte somme de six livres et de faire du tout le content diceluy a son appaisement ensamble les fraictz et despens quilz ont este soustenus audict proces tant de ung coste comme daultre le tout a leurs despens Et moiennant ce ledict Seigneur est tenu delaissier lesdictz comparans joyr dudict jardin a eulx escheu par le trespas dudict feu ainsy que ledict deffunct en a en son vivant joy et possesse <sup>478</sup>Promectantz par lesdictz comparans ce que dessus entretenir sans jamais y contrevenir, Meismes de jamais riens pretendre quereler ne demander en ladicte haye ne es bois estans en icelle Soubz lobligation de tous leurs

---

<sup>477</sup> Folio 287r°.

<sup>478</sup> Folio 287v°.

biens et heritaiges et ceulx de leurs hoirs presens et advenir envers tous seigneurs et justices Renonchans a toutes choses contraires a ces presentes tellement que lesdictz hommes sur ce de moy semons dirent par loy que a toutes les choses dictes et a chascunes dicelles furent faictes dictes et adioustees toutes les sollempnitez de loy en tel cas requises selon la coustume dudict lieu Le tout tant que pour souffrir faictes passees et ainsy recongnues audict lieu de Pietre le cincquiesme jour de febvrier anno quinze cens soixante et ung Ainsy signe soubz le ploy au cost dextre C. le Febvre



Recongnissance Pelonne Bocquette vefve de Mahieu le Ghuery touchant le puich publicq estans au commencement de son heritaige joindant le riet de Pietre , et des grez dudict puich par elle donnez pour faire les passetz du clochier Dauberch

A tous ceulx qui ces presentes lettres verront ou orront Martin le Wattier bailly de la terre et seignourie de Pietre salut Scavoir faisons que es presences de jehan Warembourg Henry Bacquerot et jehan le Turcq hommes mazuriers dicelle seignourie Comparut en sa personne Pelonne Bocquette vefve de feu Mahieu de Guery, laquelle comparante recongnut de sa pure et franche volonte comment pardevant elle avoit a tort de son auctorite privee et sans le congie gre et licence de Guillaume Hangouart escuier Seigneur dudict Pietre des Pummereaulx icy donne congie aux margliseurs de leglise Dauberch de oster et emporter pluisieurs beaulx grandz haultz et largez gretz <sup>479</sup>Lesquelz estoient allentour faisans le burg<sup>480</sup> de certain puich tout machonne pareillement de grez estant enclos et enclave au commencement et endedens du jardin de elle comparante seant sur le riet de la seignourie de Pietre contenant environ trois cens et demy dheritaige prins en sept centz dont les aultres trois cens de demy ont pardevant appertenu a petit jehan de le Ruelle ad cause de Mariette Bocquette sœur de elle comparante fille de feu jehan depuis vendus et appertenus a Noel Vignoble / et de present a Mahieu de Dours Tenant le lieu et jardin de ladicte Pelonne daultre coste au jardin des hoirs de feu Pierquin Raie Enquoy faisant ladicte comparante congnt avoir fourfaict vers ledict Seigneur de Pietre amendes de soixante solz parisis chascune / Et outre ce estre tenue a la reparation dudict trouble et restablissement attendu que ledict puich comme par cestes congnoit est publicq et commun aux habitans de ladicte seigneur<sup>481</sup> de Pietre A ceste cause ladicte comparante veullant user de bonne foy en tout ce que dessus elle reconnoit son tort Restablissant par cestes le droict et trouble dessusdict Promectant le remettre et reparer comme il estoit auparavant en bon estat sans jamais plus ferre le samblable, ny chose quy puist tourner au preiudice du droict qui appertient sur et audict puich au manans rentiers et habitans de ladicte seignourie de Pietre / aussy de paier audict Seigneur de Pietre les amendes pour ce deues et de recongnistre a ses despens tout ce que dessus et cestes par tout ou et lors que requis sera par ledict Seigneur de Pietre ses hoirs ou aians cause Et a lentretenement et furnissement des choses dictes Ladicte comparante a submis et oblige tous ses biens et heritaiges et ceulx de ses joirs presens et futurs Renonchant a toutes choses contraires ad ces presentes En

---

<sup>479</sup> Folio 288r°.

<sup>480</sup> Burg : mur qui entoure un puits.

<sup>481</sup> Seignourie.

tesmoing de ce avons mis ad ces presentes chascun nostre seel quy furent faictes et passees audict Pietre le onziesme jour de may quinze cens soixante six / Ainsy signe soubz le ploy au coste destre M. le Wattier

<sup>482</sup>Lettres pour le Seigneur de Pietre contenant le reconnoissance faicte des edifices dun lieu demoly estant sur mazure par jehan de Guery et Mahieu de Dours demourans audict Pietre

A tous ceulx qui ces presentes lettres verront ou orront Charles le Febvre bailly de la terre et seigneurie de Pietre commis par Guillaume Hangouart escuier Seigneur dudict Pietre etc salut Scavoir fay que pardevant moy bailly dessusnomme et en la presence de Benoit Henniart Pierre Hennart jehan le Pesqueur et Pierre de Mars hommes mazuriers dudict Pietre Comparurent en leurs personnes jehan de Guery et Mahieu de Dours demourans audict Pietre Lesquelz comparans de leurs franchises et liberalle volunte sans aucune constrainte Recongnurent comment que pardevant ilz avoient a eulx appartenans par achat quilz en avoient fait aux hoirs de feu Maistre jehan Petillon en son vivant Docteur en theologie demourant a Arras Tout ung lieu manoir amase de maison manable grange porte estables et aultres edifices que estoit mesure seant audict Pietre tenant au rietz dudict lieu au lieu Mahieu de Dours et au lieu de Pierre de Mars lequel lieu lesdictz comparans le aueroient demoly mesmes emporte les edifices dicelluy sans le gre et consentement du Seigneur de Pietre Ce que nulz masuriers dudict Pietre peuvent faire sur paine descheir en amende et de reparer le lieu en tel estat quil estoit auparavant ledict demolissement Apres que iceulx comparans ont entendu par aucuns anciens masuriers de ladicte seigneurie de Pietre que pardevant nulz mazuriers dudict Pietre ne povoient faire demolissement de quelque portion dediffices dun lieu estant sur une mesure tenue de ladicte seigneurie sans le gre et consentement dudict Seigneur sur paine deschoyr en amende pour ce deue et de faire restituer et restablir le lieu en tel estat quil estoit paravant ledict demolissement Partant en reconnoissant le droit dudict Seigneur de Pietre danchiennete observe audict Pietre <sup>483</sup>et confessant leur tort pour avoir fait le demolissement dudict lieu ont ce jourdhuy promis et par ces presentes promectent paier et furnir audict Seigneur lamende pour ce deue sievant laccord que leur a fait cedit jourdhuy ledict Seigneur combien quil pouvoit se bon luy sambloit faire restablir et restituer les edifices dudict lieu par lesdictz comparans et le remectre en tel estat quil estoit auparavant ledict demolissement de laquelle reparation ledict Seigneur a ce present sen est tenu pour content pour ceste foys Et a ce faire paier et furnir lesdictz comparans ont obligie leurs biens meubles cateulx et heritaiges et ceulx de leurs hoirs presens et advenir envers tous seigneur et justices Renonchans a toutes choses contraires a ces presentes Ce fut ainsy fait et passe a loy aux bancqs de ladicte seigneurie de Pietre le samedy douziesme jour de may anno quinze cens cinquante quatre



Reconnoissance de Andrieu de le Marre dict Druchon de navoir plus de front sur le riet de Pietre contre le lieu mesure et heritaige qui fut a ses pere et mere tenant au riet de Pietre et a lheritaige

---

<sup>482</sup> Folio 288v°.

<sup>483</sup> Folio 289r°.

des vefve et hoirs de feu Pierre Hennart Ne pareillement contre la mesure jardin et heritaige par luy acquis de Gilles Mortreul qui fut pardevant a Jehan Druchon et Marguerite Buisines sa femme tenant au lieu dessusdict dudict Andrieu et daultre sens a lheritaige Henry du Bacquelerot

A tous ceulx qui ces presentes lettres verront ou orront Martin le Wattier Bailly de la terre et seigneurie de Pietre salut Scavoir faisons que en la presence de Jehan Warembourg Jehan le Turcq et Noel Vignoble hommes masuriers et rentier dicelle seigneurie Comparurent en leurs personnes Gilles Mortreul et Marie Herreng sa femme / Et recongnurent lesdictz comparans et chascun deulx sans division icelle femme souffissamment auctorisee dudict Gilles son marry quand ad ce Que pour leur prouffict apparant mieulx faire que laisser parmy et moiennant <sup>484</sup> quatre gros de denier a dieu au vin quarante huict gros dix gros au coultier a ladicte femme quarante gros et de principaulx deniers la somme de cent quatre vingtz douze livres de vingt gros la livre francqz deniers quilz ont confesse avoir eu et receu de Andrieu de le Marre dict Druchon dont ilz se sont tenus et tiennent pour contentz A ceste cause lesdictz comparans icelle femme de lauctorite predite avoient et ont par ces presentes vendu au droict et singulier prouffict dudict de le Marre / le nombre de cinq cens et demy dheritaige en ce comprins une mesure contenant environ ung cent dheritaige confrontant sur le riet de Pietre tenant a Henry du Bacquerot Daultre audict acheteur et a Michiel Castricque tenu de la seigneurie dudict Pietre / Pour desdictz cinq cens et demy dheritaige ainsy quilz se comprennent et extendent sans y riens excepter reserver ne livrer par mesure joyr user et posséder par ledict Andrieu acheteur ses hoirs ou aians cause desmaintenant en avant heritablement et a tousiours A la charge de la rente seigneuriale tant seulement / Deschargez de toutes aultres charges et arrieraiges jusques ad ce jourdhuy Et veullantz par lesdictz comparans vendeurs icelle vendition sortir son plain et enthier effect, ilz se sont desdictz cinq centz et demy dheritaige dessaisy et desherite par rain et baston en la maniere accoustumee en mes mains presens lesdictz mazuriers Et du gre accord et consentement desdictz vendeurs avons baillie la saisine et possession desdictz cinq cens et demy dheritaige audict Andrieu de le Marre Pour par luy ses hoirs ou aians cause en joyr au tltre que dessus heritablement et a tousiours Lesquelles dessaisine et saisine ont este dictes et jugies par lesdictz hommes a nostre semonce et conjure, estre bien et deuement faictes, et les solempnitez en tel cas requises gardees et observees tant que pour souffrir a loy signamment de ceste seigneurie saulz tous droix Apres que ledict de le Marre acheteur avoit et a par ces presentes congneu et congnoit navoir plus de front sur ledict riet pour raison de ladicte mesure <sup>485</sup> ne pour le lieu manoir jardin mesure et heritaige que il a confrontant sur ledict riet procedans de feuz ses pere et mere tenant a la mesure dessusdictes par luy achetee En consideration et recongnissance que tant sesdictz feuz pere et mere que luy aussy et ledict Gilles Mortreul vendeur ont par leurs plantins de hayes carpentaiges edifices bois et aultrement joy et prins largement le droict de front que il leur polroit compecter sur ledict riet appartenant audict Seigneur de Pietre Promectans par lesdictes parties A scavoir par lesdictz vendeurs icelle vendition dessaisine saisine et choses dictes tenir entretenir conduire garandir contre et envers tous a tousiours / et par ledict de le Marre acheteur jamais aller au contraire dicelle recongnissance et choses dessusdictes soubz lobligation de tous leurs biens et heritaiges et ceulx de

---

<sup>484</sup> Folio 289v°.

<sup>485</sup> Folio 290r°.

leurs hoirs presens et futurs Renonchans a toutes choses contraires ad ces presentes En tesmoing de ce avons mis ad ces presentes chascun nostre seel Qui furent faictes et passees en la ville de le Bassee Lieu par nous emprincte le dernier jour dapvril quinze cens soixante et six



Congie requis par jehan le Febvre de povoir demolir ung lieu amase sur la mesure a luy appertenant confrontant au riet de Pietre

je jehan le Febvre Congnois par cestes que la vente et demolissement que jay faict de certaine maison estant sur un jardin contenant trois cens et demy de terre ou environ gissant en la seigneurie de Pietre et en tenus confrontant au riet et tenant au chemin qui maisne au bois du Biez et daultre coste a lheritaige Pelonne Bocquette / a este par consentement et accord a moy faict a ma requeste par Guillaume Hangouart Seigneur de Pietre par ce que lon ne peult demollir mesures sans le congie et consentement dudict Seigneur <sup>486</sup>de Pietre a peril de soixante solz parisis et de reparer le trouble et demolissement Promectant cestes recongnoistre par tout ou requis seray a mes despens Tesmoing mon saing cy mis ce onziesme jour de mars quinze cens soixante cincq Ainsy signe j. le Febvre



Congie requis par Mariette de Guery de povoir demolir et oster ung lieu amase sur une mesure a elle appertenant confrontant sur le grand chemin de Pietre et promesse de ne faire pasturer blancqz bestailles sur ladicte seigneurie ne en y residant

je Mariette de Ghuary demourant presentement a Auberch aiant peu auparavant toute ma vie demeure en la terre et seigneurie de Pietre / de povoir demolir certaine mesure que avoie a moy appertenant en ladicte seigneurie de Pietre et en laquelle maison je avoie long temps demeure assise au front du grand chemin menant aux Sablonnieres de Pietre, et a la ruelle du bois de Pietre laquelle maison et edifices ont este par moy donnez a mon nepveu jacques de Ghuerÿ demourant a Hantay Congnoissant n'avoir peu aultrement sans ladicte grace a moy accordee desmazier et desmollir ladicte mesure soubz paine de soixante solz parisis et de reparation comme je lay tousiours ainsy entendu de mes ancestres et anchiens de ladicte seigneurie En tesmoing de quoy jay icy mis mon seing manuel avecq ceulx de jehan le febvre et jacques Laigniel presens Lesquelz jay aussy accorde et promais audict Seigneur de Pietre que moy mes hoirs et aians cause dicelle mesure ne polrons et ne polront envoyer et faire paistre leurs brebis et moutons en et sur ladicte seigneurie de Pietre nest que ilz soient actuellement par domicile fix et sans fraulde demourans en ladicte seigneurie de Pietre Ce fut ainsy congny promis et accorde comme dict est tesmoing mon saing cy mis et desdictz Laigniel et le Febvre aussy mis a ma requeste pour approbation et tesmoignage de verite le vingtroisiesme jour daout

---

<sup>486</sup> Folio 290v°.

quinze cens soixante dix Ainsy signe Mariette de Guery j. le Febvre et jacques Laigniel



<sup>487</sup>Reconnoissance de Mahieu de Dours brasseur demourant en la seigneurie de Pietre et Martin Hennart brasseur en la seigneurie des Pummereaulx des afforaiges de boire par eulx deubz au Seigneur dicelles seignouries

je Mahieu de Dours cognoy devoir a Guillaume Hangouart Seigneur de Pietre ung demy tonneau de double keute<sup>488</sup> a cause des keute servoise et breuvages que ie luy cognoy devoir et estre vers luy tenu pour son droict de afforaige que ay vendu et debite en sadicte seigneurie de Pietre pour le temps que ie y ay demoure / Promectant ceste entretenir et reconnoistre a mes despens ou que requis seray sy besoing est Tesmoing mon seing cy mis ce vingneufsiesme jour de septembre an quinze cens soixante quatre Ainsy signe Mahieu de Dours

je Martin Hennart brasseur dmt en la terre et seigneurie des Pummereaulx cognoy devoir et promais paier a Guillaume Hangouart Seigneur des Pummereaulx ung demy tonneau de double keute pour son droict dafforaige que je cognoy luy devoir et est deu conformement aux coustumes generalles du pays et conte Dartois et aultrement a cause des servoises keutes et breuvaiges que jay debite et vendu en sadicte seigneurie des Pummereaulx pour le temps que ie y ay demoure / Promectant ce que dessus entretenir et reconnoistre en tous ses pointcz par tout ou requis seray et a mes despens tesmoing mon seing cy mis ce cinquiesme iour de may XV c soixante sept Ainsy signe Martin Hennart

je Mahieu de Dours brasseur dmt a Pietre cognoy devoir et promais paier au Seigneur de Pietre une quartelette de keute que luy doibs et cognoy devoir a cause des keutes par moy brassees et vendues en ladicte seigneurie de Pietre pour son droict dafforaige a luy deu , conformement et selon la coustume generale Dartois Ainsy faict et recognu et promis paier le IIIle daoust XV c soixante neuf tesmoing mon seing cy mis / Signe Mahieu de Dours



---

<sup>487</sup> Folio 291r°.

<sup>488</sup> Keute : Sorte de bière.

<sup>489</sup>Lettre missive de Noel Creton huissier du conseil Dartois contenant reconnaissance de ce quil avoit exploitie en la seigneurie de Pietre sans avoir requis obeissance et assistance

Mademoiselle sy humblement que faire puis a vostre bonne grace me recommande / aiant entendu que avez prins de mauvaise part certain adjournement quy auroit este fait en vostre terre et seigneurie de Pietre sans avoir requis assistance a vostre bailly ou son lieutenant audict lieu Toutefois pour vous en dire la verite ne veulx ignorer que aucuns iours passez en retournant de la ville de le Bassee a le Venchie feis quelque adjournement sur la personne de jehan le Maire lun de voz subiectz dudict Pietre non scachant en verite quil y avoit bailly ou lieutenant plus pres que vostre bailly de Herlies Car aultrement sy je euisse sceu que avies commis Pierre Hennart pour lieutenant audict Pietre me fusse trouvez vers luy pour luy requerre assistance comme il est requis et que aultrement ne vouldroie exploitier Parquoy mademoiselle ie vous prie que pour ceste fois vous en volloir contenter sans me en bailler facherie / me submeçant en tous endroitz a mon pover vous fay tout service vous assurant aussy que suis celuy qui en tous endroitz vouldroie garder voz droictz et haulteurs et me employer comme lun de voz serviteurs a ce que vous plairoit me commander comme congnoit Dieu Auquel je prie estre vostre garde de le venchie ce XXIIIe iour de septembre XV c cinquante et ung en la presence dudict Hennart Plus bas estoit escript vostre humble serviteur prest Noel Creton huissier / Et sur le doz a Madamoiselle Catherine le Cocq vefve de feu Messire Guillaume Hangouart en son vivant Chevalier Seigneur de Pietre president Dartois A Pietre



Recongnissance jehan de le Barre et aultres de paier au Seigneur de Pietre les rentes seigneurialles des lieu et heritz quy furent a feu Lambin Vignoble nonobstant le laps de XX ou XXX ans quil polroit estre encourus sans que les auroient este paiees

Nous soubsignez heritiers possesseurs occupeurs et aians cause des lieu jardin et heritaige ensievant quy <sup>490</sup>fut en temps passe a feu Lambin Vignoble tenant au chemin quy maisne au puich des Pummereaulx contenant comprins terre a labour environ douze cens trois quartrons ou environ Congnoissons debvoir et promettons paier a Guillaume Hangouart escuier Seigneur des Pummereaulx dont ladicte terre est tenue le nombre de dix neuf annees de la rente seigneuriale desdictz douze <sup>491</sup>trois quartrons portant cincq gros cincq deniers flandres par an et ce touteffois et quantes quil plaisra audict Seigneur des Pummereaulx / nonobstant quelque laps de temps prescription fut de vingt ou trente ans ne chose quelconque quil polroit estre encourru ny a ladvenir encourir et entretenir au contraire Tesmoing noz seingz cy mis le XXVIe de novembre XV c soixante quatorze Ainsy signe jehan de le Barre jheromme Vignoble Pierre de le Plancque Vincent de Roubay



---

<sup>489</sup> Folio 291v°.

<sup>490</sup> Folio 292r°.

<sup>491</sup> Le mot « cens » semble avoir été omis.



Commission et reconnoissance a mon prouffict faicte par Mahieu de Dours brasseur de Pietre sur ce que il avoir recule la devanture de sa maison et brasserie sur le riet de Pietre Et constitution de ung chappon de recrue de rente seignourialle sur ledict lieu

Les Gouverneur President et gens du conseil Dartois Au premier huissier dudict conseil sur ce requis salut Expose nous a Guillaume Hangouart escuier Seigneur de Pietre et Pummereaulx en soy complaignant adfin de saisine et de novellite que a vray et justice<sup>492</sup> tiltre a declarez plusadplain en temps et lieu luy compete et appertient ladicte terre et seignourie de Pietre en laquelle tenementz dicelle il a toute justice et seignourie Haulte maoienne et basse et pluisieurs prerogatives Et nest loisible a personne quelle soit sans le gre et expres consentement dudict exposant fouyr picquier ou hauwer sur les flegardz chemins rietz ny les applicquier ou partie diceulx a prouffict <sup>493</sup>particulier sur paine et amende de soixante solz parisis pour chacune foys Applicable audict Seigneur exposant Et de reparer les troubles dequoy joir user et posséder est ledict exposant en toutes bonnes possessions et saisines affirmatives negatives et mixes desquelles et de toutes possessions pertinentes a ladicte matiere a declarer comme dessus il et ses predicesseurs desquelz il a le droict et cause ont joy et possesse par tel et sy long temps quil nest memoire du commencement ny du contraire Aumoings par temps souffissans et vaillable pour bonne possession et saisine Avoir acquis garder et retenir paisiblement publicquement Et par les derniers ans et exploictz au veu et sceu de Mahieu de Dours brasseur demourant a le Venthie et de tous aultres quy ce ont vullu veoir et scavoir Ce nonobstant ledict de Dours ou aultres a son adveu dont il a eu le fait pour agreable sest ingere et advanchie de son auctorite prive indeue et desraisonnable depuis dix mois signamment puis an et jour encha en regard a ladatte de ceste complaincte recule la porte et esquis dung lieu manoir et brasserie quil a a luy appertenant seant audict Pietre haboutant et confrontant sur le riet et grand chemin dudict Pietre par lequel on va au bois du Biez / tenant daultre sens au chemin dict le chemin du ponchel Thorel enquoy faisant il auroit emprins en largeur sur ledict riet et grand chemin trois piedz Et en longueur cincquante trois piedz Le tout ou environ En troublant et empeschant ledict exposant en sesdictz droictz possessions et saisines et commettant vers luy amende de soixante solz parisis Lesquelz troubles et empeschemens il nauroit vullu reparer reintegrer et restablir paier ny gagier ladicte amende A tort sans cause indeuement et de nouvel Sicomme il dict requerant sur ce nostre provision Parquoy nous vous mandons et commettons que a la requeste dudict exposant ou de son procureur adjournez a certain brief jour et heure que declarerez Ledict turbateur et aultres quil appertiendra et dont requis serez A estre et comparoir pardevant vous audevant et au plus prez de ladicte brasserie pour tous lieux contentieux et illecq tenus maintenus et gardes de <sup>494</sup>par le Roy nostre sire et nous pour justice ledict complaignant ou procureur pour luy en sesdictz droictz possessions et saisines et diceulx le faictes jouyr user a pur et a plain en ostant tous troubles ou empeschement faictz mis ou donnez au contraire en faisant commandement audict turbateur et aultres quil appertiendra et dont requis

---

<sup>492</sup> j.uste.

<sup>493</sup> Folio 292v°.

<sup>494</sup> Folio 293r°

seray que incontinent et sans delay ilz reestablishent les troubles dessusdictz, Paie et gaige ladicte amende Se cessent de plus faire le samblable Et en cas dopposition la nouvellite ostee et la chose contentieuse desdictes parties prinses et mise en la main du Roy nostre Seigneur comme souverain reestablishement fait deuement preallablement donnez et assignez jour competant aux parties lune contre lautre a estre et comparoir pardeuant nous audict conseil / Pour tant sur le principal que sur la recedence de la matiere respondre et proceder comme de raison Et sy lesdictz adjournez ou aucuns deulx ne comparent pardeuant vous audict jour lieu et heure que leur auerez assigne ou fussent defaillans de a vosdictz commandemens obeir Et que par ce deffault fut par vous luy donne readjournez lesdict deffailans a comparoir comme dessus pardeuant nous pour ledict deffault veoir conformer Et ledict complaignant ou procureur pour luy plus amplement maintenir et garder en sesdictz possessions et saisines Et pour ce que ledict turbateur et demourant hors des mectes de nostre jurisdiction prions et requerons en ayde de droict a tous seigneurs juges justicies et officiers quil appertiendra que lesdictz adiournemens et exploictz il leur plaise ferre faire ou souffrir par vous estre faitz Et en ce tant faire pour nous quilz voldroient que fissions pour eulx ce que ferions volluntiers en pareil cas requis Et en cas quilz soient de ce faire refusans faites les adjournementz et exploictz dessusdictz en parlant a sa personne se trouve et apprehende peult estre es mectes de nostre jurisdiction sinon parlant a son procureur parens amis facteurs negociateurs et entremecteurs de ses besoingnes et affaires ou par cry publicque a la bretecque a la plus prochaine <sup>495</sup>bonne ville du lieu de sa residence estant de nostre jurisdiction affigeant aux portaulx de leglise copie de ceste commission et de vostre exploict pardessus ce luy insignuant par samblable coppie et vostre missive Affin quilz nen pretendz cause dignorance tellement quil soit vray samblable que lesditz adjournementz et exploictz soient venus a leur notice et congnoissance Et lesquelz exploictz faitz par la maniere que dict est soient dautel effect et valleur comme se faitz estoient a leurs personnes ou vrais domicilles Et pour telz ou cas dessusdictz les avons auctorise et auctorisons en rescripvant de ce que fait en aurez de ce faire vous donnons povoir donne soubz le contreseel dudict conseil le quatriesme jour de juillet quinze cens soixante six



#### Rellation de ladicte commission

A mes treshonnorez et doubtez Seigneurs messieurs les gouverneur president et gens du conseil Darthois Franchois Forcheville huissier extraordinaire dudict conseil resident en la ville de la Bassee bien vostre en tout mesditctz treshonnorez et doubtez Seigneurs Plaise vous scavoir que en vertu de la commission et complaincte en cas de nouvellite de vous donnee au marge de laquelle ce present mon rescript est attache et pour icelle mectre a execution a la requeste de Guillaume Hangouart escuier Seigneur de Pietre Pummereaulx etc impetrant dicelle le vingt sixiesme jour du mois de juillet quinze cens soixante six me suis transporte en la paroisse de le Venthie vers la personne de Mahieu de Dours et apres assistance par moy requise en parlant a sa personne le adjournay donnay et asseignay jour a estre et comparoir pardeuant moy sur et au plus pres du lieu mensione en ladicte commission pour tous

---

<sup>495</sup> Folio 293v°.

lieux contentieux au vingt neufiesme jour ensieuvant huict heure du matin attendant noeuf pour veoir mectre a execution ladicte commission selon la forme et teneur Lequel men fist <sup>496</sup>responce que pour eviter a despens il accorderoit et consentoit Ladicte commission estre mise a execution soy tenant content du jour lieu et heure Ce fait en la presence de jehan de le Herre et jacques Laigniel tesmoins a ce par moy appelez et apres que se seroit presente pardevant moy Grard le Roy demourant a Auberch, souffissamment fonde de lettres de procuratoire quil men fist apparoir en la presence que dessus je tiens maintiens et garday de par le Roy nostre sire et de vous, mesdictz Seigneurs pour justice Ledict le Roy audict nom et comme procureur dudict impetrant es droictz possession et saisine baptisee par ladicte commission et diceulx le feis jouir user a pur et aplain obstant tout trouble et empeschement fait et donne au contraire sy feys ausdictz adiournez tous les commandemens mentionnez en ladicte commission et restablir le trouble sesser plus faire le samblable a quoy se seroit rendu opposant Restablissant neantmoins par seigne dun baston en ma main comme constraint / comme il disoit au moien dequoy je aueroie oste la nouvellite et choses contentieuse desdictes parties prises et mises en la main du roy nostre Sire comme souverain tant et sy longuement que aultrement en seroit ordonne donnant et assignant jour a chascun deulx a estre et comparoir pardevant vous mesdictz Seigneurs audict conseil aux plais du mardy dixiesme jour du mois de septembre ensieuvant pour tant sur le principal que sur la recedence aller et proceder selon raison Tesmoing mon seing manuel cy mis Les jour et an dessusdictz Ainsy signe F. de Forcheville



<sup>497</sup>Reconnoissance dudict Mahieu de Dours sur la commission susdicte Aussy promesse de navoir plus de front contre ledict lieu et jardin Et de tenir ledict heritz et lheritz achete des hoirs jan Petillon y joindant chascun en une seulle mazure

A tous ceulx qui ces presentes lettres verront ou orront Baulde Cuvillon escuier licencie es droix Conseillier du Roy nostre sire et lieutenant commis par sa Maieste en la gouvernance de Lille et aux appertenances salut Scavoir faisons que le jourdhuy pardevant nous Comparurent en leurs personnes Guillaume Hangouart escuier Seigneur de Pietre des Pummereaulx etc dune part et Mahieu de Dours brasseur demourant audict Pietre daultre part et Recongnurent comment ilz estoient entrez en proces et different pardevant Messieurs les president et gens du conseil provincial Darthois sur ce que ledict Seigneur de Pietre disoit et maintenoit que il avoit toutes justice haultre moienne et basse avecq tous droix appartenant a icelles et estoit par tout ruyer en sadicte seignourie de Pietre sil napparisoit du contraire et quil nestoit loisible a personne quelconcque entreprendre sur les flots flegardz riez chemins et plaches publiques dicelle seignourie ne y picquier hauwer ne fouyr ne les applicquier ou partier diceulx a prouffict particulier sans le gre et expres consentement dudict Seigneur de Pietre sur paine de soixante solz parisis de vingt sept deniers flandres le solz damende pour chascune foys applicable audict Seigneur et de reparer les troubles Sy estoit il que audict Mahieu de Dours competoit certain lieu et gardin quy est une brasserie nommee le brasserie de Pietre tenue dicelle seignourie et y gisant par luy achete de Nicollas le Roy quy en avoit le droict

---

<sup>496</sup> Folio 294r°.

<sup>497</sup> Folio 294v°.

de Pierre de Mars et Peronne de Beusart sa femme fille de Nicollas Lequel Nicollas de Beusart le avoit achetee de feu Robert Prevost et icelluy Prevost de feu Guillaume Hangouart en son vivant Seigneur dudict Pietre conseiller de Lempereur nostre sire et son president Darthois pere dudict premier comparant Confrontant sur le riet et grand chemin de Pietre par lequel on va au bois du Biez tenant daultre sens au chemin du ponchiel <sup>498</sup>Thorel et daultre part au lieu et jardin que ledict de Dours a achete des hoirs de feu Maistre jehan Petillon filz de feu Grard Docteur en theologie pour le present demoly et applicquiez par icelluy de Dours au jardin de ladicte brasserie Lequel Mahieu de Dours sestoit advanchie et ingere depuis ung an et demy encha ou environ de son auctorite prive indeue et desraisonnables reculer la porte et escais<sup>499</sup> de ladicte brasserie et en ce faisant emprins en largeur sur ledict riet appartenant audict Seigneur de Pietre environ trois piedz et en longueur allant depuis le commencement du coing dudict riet et de sesdictz edifices jusques a la grande fosse de ladicte brasserie environ cinquante trois piedz en longueur Duquoy faisant avoit encouru vers ledict Seigneur amendes de soixante solz parisis et estoit tenu a la reparation surquoy lesdictes parties comparantes estans bien et deument advertis de ladicte emprinse en la forme et grandeur que dessus Derisans aussy dinsterest<sup>500</sup> et mettre fin audict proces se sont accordez ensamble en la forme et maniere quil sensieult asscavoir que ledict Seigneur de Pietre a octroie consenty et accorde et par ces presentes octroie accorde et consent audict Mahieu de Dours pour luy ses hoirs ou aians cause tout ce quil peut avoir este par luy emprins sur ledict riet en faisant le recullement desdictes portes et escais Lequel riet en tout ou partie il loist audict Seigneur de Pietre enclorre ou baillier en rente sy bon luy samble comme appert par bons tiltres et possessions Pourveu que ledict Mahieu de Dours a promis et sest soumis promect et se oblige que luy ses hoirs ou aians cause seront tenus paier chascun an a perpetuite audict Seigneur de Pietre et ses successeurs pour ladicte emprinse ung chapon au terme de Noel de recreue de rente fonsiere et Seignouriale avecq les douze patars flandres que doibt ledict lieu jardin et brasserie et a condition expresse que ledict Mahieu ses hoirs et aians cause ne polront plusavant que ce que dict est entreprendre sur ledict riet et <sup>501</sup>chemins ne y pretendre front ny aultre droit pour raison de ladicte brasserie et heritaige y appendant fut soubz tiltre de estre masurier ou aultrement et de tenir ladicte brasserie lieu jardin et heritaige y appendant en une seule mesure et a condition que luy sa femme de laquelle il se fait fort leurs hoirs ne leurs aians cause dicelle mesure ne polront en vertu dicelle mesure joyr et user de privilege de faire paistre leurs brebis et moutons en et sur ladicte seignourie de Pietre nest quilz soient actuellement residens et demourans en ladicte seignourie Reconnoissant ledict de Dours les droictz et possessions dudict Seigneur de Pietre comme dessus est dict en tout et de tous pointz Promectant jamais aller au contraire Aussy de reconnoistre cestes a ses despens pardevant messieurs les president et gens du conseil Dartois et par tout aillieurs ou requis sera / et moiennant ce ledict Seigneur de Pietre tient quicte et deschergie ledict Mahieu de Dours de ung cappon par an de rente fonsiere que est dict luy estre deu par les lettres de la vendition et arrentement fait par feu le Seigneur de Pietre son bisayeul dudict lieu et jardin quy fut audict maistre jehan Petillon filz de feu Grard presentement appartenant comme dict est audict de Dours dattees du dixneufiesme doctobre mil quatre cens quatre vingt seize estant es mains

---

<sup>498</sup> Folio 295r°.

<sup>499</sup> Esquay, escai : coin.

<sup>500</sup> ?

<sup>501</sup> Folio 295v°.

et possessions dudict de Dours Pareillement des arrieraiges dicelluy cappon Lequel ledict Seigneur de Pietre comparant ne feuz ses pere grand pere ny bisaieul en leurs vivans Seigneurs de Pietre nont jamais receu comme ainsy soit que ledict chappon ne est et ne fut jamais escript et couchie par escript sur les briefs terriers et coelloirs de ladicte seignourie par faulte de ne avoir eu (comme fait a estimer) par iceulx Seigneurs de Pietre le double desdictes lettres darrentement comme de ce appert aux briefs renouvellez en lan mil cincq cens vingt sept et en est bien informe ledict de Dours tant par ostention et exhibition a luy faicte desdictz briefz et lettriages que autrement Tout lequel lieu jardin et heritaige procedans dudict feu Maistre jehan Petillon<sup>502</sup> seant comme dict est sur le riet de Pietre Ledict Mahieu de Dours promet tenir de ladicte seignourie aussy en une seulle mesure aussy de paier ledict chappon de recreue de rente seignouriale sur ladicte brasserie jardin et heritaige y appendant comme dict est conformement aux droictz uz stilz et coustumes dicelle seignourie Tout ce que dessus lesdictz comparans chascun en son regard ont promis et promectent entretenir furnir et accomplir sans jamais aller au contraire nonobstant droix loix stilz ou coustume a ce contraire aquoy ilz ont derogie et renonchie / derogent et renonchent mesmes au droict disant generale Renonchiation ne valloir sy lespecialle ne precede soubz lobligation de leurs biens et heritaiges envers tous seigneurs et justices davantaige ledict Mahieu de Dours a fait denomme contitue et estably et par ces presentes fait denomme constitue et etablit ses procureurs generaulx et messagiers especiaulx de Maistre Raoul Gosson jehan Doresmieulx jehan Buisines Charles le Febvre Martin le Wattier Anthoine le Roux et jehan le Turcq Ausquelz et a chascun deulx seul et pour le tout portant cesdictes presentes Il a donne et donne pover especial absolu et irrevocable de pour luy et en son nom aller et comparoir pardevant lesdictz seigneurs president et gens dudict conseil Darthois et par tout aillieurs ou mestier sera / et reconnoistre les droix possessions et saisines dudict Seigneur de Pietre de signez et baptisez en la commission en cas de saisine et de novellite emanee dudict conseil a la requeste dudict Seigneur de Pietre et executee contre ledict de Dours par Franchois Forcheville huissier dudict conseil touchant le proces et different dessus mentionne / accorder que ledict Seigneur de Pietre soit maintenu et garde en sesditz droictz possessions et saisines par luy baptisees par ladicte commission conformement selon icelle commission et laccord et appointement susdict et de reconnoistre tout le contenu de cestes en chascun point et pareillement<sup>503</sup> de ladicte commission et accorder condempnation damende et despens aux tax de la court / Et generalmente et especialement de autant et tellement faire dire reconnoistre accorder consentir et autrement besongnier touchant les choses susdictes et ce quy en deppend comme feroit et dire polroit ledict de Dours se present en personne y estoit ia fust il que le cas requisist ou desirast mandement plus especial Promectant avoir pour agreable tenir ferme et estable a tousiours tout ce que par sesdictz procureurs ou lung deulx chascun en son regard touchant ce que dessus et quy en deppend sera fait et besongne Soubz pareille obligation que dessus Renonchantz a toutes choses contraires a ces presentes En tesmoing de ce nous avons ces presentes fait seeller den nostre seel Ce fut fait le cinquesme jour de mars anno quinze cens soixante six

Ausquelles lettres sont infixees les lettres quy sensieuvent

---

<sup>502</sup> Folio 296r°.

<sup>503</sup> Folio 296v°.

Les gouverneur president et gens du conseil provincial Darthois A tous ceulx qui ces presentes lettres verront salut Comme Guillaume Hangouart escuier Seigneur de Pietre des Pummereaulx ayt obtenu nostre commission de complainte en cas de saisine et de novellite Narree que a vray et juste tiltre luy competoit et appartenoit ladicte terre et seignourie de Pietre en laquelle et es tenemens dicelle Il avoit toute justice et seignourie haulte moienne et basse et pluisieurs prerogatives Et nestoit loisible a personne sans le gre et expres consentement dudict complainant four picquier ou hauwer sur les flegardz chemins et rietz ny les applicquier ou partie diceulx a prouffict particulier sur paine et amendes de soixante solz parisis pour chascune foys applicable audict Seigneur complainant et de reparer les troubles de quoy joyr user et posséder estoit en toutes bonnes possessions et saisines affirmatives negatives et mixtes Desquelles et de toutes possessions pertinentes a ladicte matiere Il et ses predicesseurs ont jouy et possede par tel et sy long temps quil nest <sup>504</sup> memoire du commencement ny du contraire Aumoing par temps souffissant et vaillable pour bonne possession et saisine avoir acquis garder et retenir paisiblement publicquement et par les derniers ans et exploitcz au veu et sceu de Mahieu de Dours brasseur demourant a le Venthie et de tous aultres quy ce avoient voullu veoir et scavoit Ce nonobstant ledict de Dours ou aultres a son adveu et dont il avoit eu le fait pour agreable sestoit ingere et advanchie de son auctorite prive indeue et desraisonnable depuis dix mois signament depuis an et jour encha en regard de lintroduction de ceste poursieulte reculer la porte et esquais dun lieu manoir et brasserie quil avoit a luy appartenant seant audict Pietre haboutant et confrontant sur le rietz et grand chemin dudict Pietre par lequel on va au bois du Biez tenant daultre sens au chemin dict long chemin du ponchel Thorel en quoy faisant il auroit emprins en largeur sur ledict riez et grand chemin trois piedz et en longueur cinquante trois piedz le tout ou environ En troublant et empeschant ledict complainant en sesditz droix possessions et saisines et comectant vers luy amende de soixante solz parisis Lesquelz troubles et empeschemens il nauoit volu reparer reintegrer ny restablir paier ny gaiger ladicte amende a tort sans cause indeuement et de nouvel pour ces causes Ledict demandeur auroit par certain huissier dudict conseil fait mettre ladicte commission a execution selon ses termes allencontre dudict deffendeur Auquel pour lopposition par luy ad ce cree jour fut assigne pardevant nous au plaix dudict conseil le dixiesme de septembre quinze cens soixante six Que lors par maistre jacques du Bois advocat pour jehan Venant procureur dudict demandeur a este conclud affin destre remys maintenu et garde tant au droict que amende et ledict deffendeur condempne restablir le trouble Requerant la recedence en cas de proces demandant despens Surquoy ledict deffendeur seroit entre en deffence et lesdictes parties en apres riglees a memorier et joindre / et le jourdhuy datte de cestes jehan Buisine procureur dudict Mahieu de Dours deffendeur en vertu de povoir especial a luy donne <sup>505</sup> insere en certaines lettres dappoinctement entreveue entre lesdictes parties faictes et passees soubz le seel de la gouvernance de Lille le cincquiesme de mars oudict an soixante six / auroit recongu et contenu esdictes lettres dappoinctement estre veritable consenty et accorde Ledict Seigneur demandeur estre maintenu et garde en sesditz droix possessions et saisines et icelluy de Dours deffendeur condempne reparer ledict trouble avecq en amende et despens quil accordoit taxer saulf diminutions Le tout sy avant que faire pouvoit en vertu dudict povoir Ce que ledict Venant procureur dudict demandeur auroit accepte Selon que au registre de la court estoit et est plusaplain contenu Scavoit faisons que

---

<sup>504</sup> Folio 297r°.

<sup>505</sup> Folio 297v°.

veu lesdictz accord et acceptation ensamble ledict povoir parmy lequel ces presentes sont infixees avons ledict Seigneur de Pietre maintenu et garde maintenons et gardons de par le Roy nostre sire et nous pour justice en sesdictz droix possessions et saisines tant pour le droict principal que amende levant a son prouffict la main de justice apposee a la chose contentieuse Condemnant ledict Mahieu deffendeur reparer le trouble et esdictz despens a taxer comme dessus En tesmoing de ce nous avons faict mettre le seel dudict conseil a ces presentes quy furent faictes et donnees en jugement le vingtroisiesme de septembre quinze cens soixante sept



#### Attestation contre ledict de Dours touchant le differend susdict

Comparurent en leurs personnes Grard le Roy labourier eaige de cinquante ans / jehan le Turcq aussy labourier eaigie de cinquante ans Noel Vignoble eaige aussy de cinquante ans Anthoine et Anthoine Binault freres enfans de feu Chretien, manouvriers eaigez asscavoir laisne de quarante deux ans et le puisne de trente ans Mahieu Roussel eaigie de cinquante deux ans Marguerite Bocquet vefve de feu jehan Blondel eaigie de soixante six ans Pelonne Bocquet vefve de feu Mahieu de Guery eaigie de soixante treize ans le tout ou environ<sup>506</sup> tous demourans en la terre et seigneurie de Pietre saulf ledict Roussel qui demeure presentement a Lille Lesquelz apres serment par eulx solempnellement faict es mains des notaires reaulx soubzsignez et interroguiez separement sur linterrogatoire exhibee ausdictz notaires de la part de Guillaume Hangouart escuier Seigneur de Pietre des Pummereaulx Ont dict jure et pour verite affirme que ce jourdhuy date de ceste a la requeste dudict Seigneur de Pietre Ilz se sont transportez audevant de la maison et brasserie appartenant a Mahieu de Dours seante audict Pietre / auquel lieu apres avoir fait visitation des carpentaiges Sicomme porte estables esquais et edifices seans audevant du rietz dudict Pietre Iceulx attestans et chascun deulx, ont trouve et trouvent que ledict Mahieu de Dours a faict reculer ladicte porte estables esquais et edifices au mois doctobre quinze cens soixante cincq comme ledict de Dours leur aueroit aussy ce jourdhuy confesse trois piedz ou environ plus avant en largeur et environ cinquante trois piedz en longueur plus avant sur ledict rietz que ilz ne avoient este passe plus de vingt trente et quarante ans voires de temps immemorial Affirmans pareillement quilz ont bonne memoire que ledict de Dours ne aultres brasseurs dont il a acquis ledict lieu ne ont jamais plante nulz arbres ne aussy espinche ne eu a eulx appartenant audevant desdicte porte estables esquais et edifices ne aucunement emprins sur ledict riet audevant desditz porte estable esquais et edifices aparavant le reculement et emprinse susdicte faicte par ledict de Dours Ains se sont tousiours les predecesseurs dudict de Dours et icelluy de Dours meismes contentez de joyr de ladicte brasserie lieu edifices et comprehension passe plus de trente a quarante ans et plus en la forme et maniere quelle estoit ediffiee et assize aparavant ledict reculement qui estoit ainsy que feuz les grandz pere grande mere et pere dudict Seigneur de Pietre a present en leurs vivans Seigneurs dicelle seigneurie le avoient vendu et livre mesmement ont lesdictz tesmoingz affirme que sur<sup>507</sup> le flegard estant devant lesdictz porte estables esquais et edifices confrontans audict riet / il ya eu de toute anchienete huict gros arbres

---

<sup>506</sup> Folio 298r°.

<sup>507</sup> Folio 298v°

ommeaulx qui ont tousiours appartenu audict Seigneur de Pietre et a ses predecesseurs qui ont tousiours este espinche au prouffict diceulx Seigneurs de Pietre sans nul contredict que meisme Ledict Seigneur de Pietre a iceulx ommeaulx vendus au may passe sans contredict de personne et sans que jamais ledict de Dours ne aultres aient jamais espinche lesdictz ommeaulx et ny a jamais eu de leur memoire audevant dudict lieu porte esquais et edifices de ladicte brasserie aultres arbres ne plantins que lesdictz ommeaulx quy appartenoient audict Seigneur de Pietre auquel appartient aussy ledict riet Aians lesdictes Marguerite et Pelonne Bocquet bonne memoire de avoir de tout leur temps entendu que feu Mahieu Desplancques en son vivant Seigneur de Pietre aueroit aultrefois faire ferre construire et edifier sur ledict riet deux maisons que il loua vendit et arrenta Affermans tous lesdictz attestans que les Seigneurs de Pietre y ont de toute anchiennete fait planter arbres a leur prouffict sans que audict riet et chemins on puisse prendre argille fouyr et entreprendre ne iceulx ou partie diceulx applicquier a prouffict particulier sans le congie dudict Seigneur de Pietre a peril damende Sy ont afferme que de tout le temps quilz ont memoire ilz ont entendu que audict Hangouart et ses predicesseurs compete et appartient icelle terre et seignourie de Pietre en laquelle il a toute justice haulte moienne et basse en tous droix et amendes de soixante solz parisis et aultres a telle justice appartenans Disent que jacques Laigniel dict grand jacques ne a demeure en ladicte seignourie de Pietre que environ depuis six ou sept ans et jehan Warembourg environ depuis dix a douze ans Scavent lesdictz affermans les choses susdictez par avoir tousiours et de grande anchiennete demoure en ladicte seignourie Meismes lesdictz Binault demoure avecq leurdict pere quy estoit conchierge de la maison seignouriale et espinche eulx meismes lesdictz huict ommeaulx au prouffict dudict Seigneur de Pietre / et ledict Roussel <sup>508</sup> demoure passe plus de vingt ans en la cense de Pietre avecq sa sœur quy estoit censiere / dont et desquelles attestations affirmations et choses dictes Ledict Seigneur a requis lettres ausdictz notaires a luy accordees ces presentes pour servir a son intention sy avant que de raison fait et atteste audict Pietre le unzieme de janvier quinze cens soixante et six pardevant lesdictz notaires Ainsy signe De Faucompre M le Wattier



Commission restablissement et recognoissance jehan Herreng filz de Nicollas demourant a Fauhissart touchant la disme deue au Seigneur de Pietre contre levesque Darras et le cure Dauberch Asscavoir de noef garbes Les deux audict Evesque une audict cure et les six aultres audict Seigneur de Pietre

Les gouverneur President et gens du conseil Darthois Au premier huissier dudict conseil sur ce requis salut Expose nous ont messire Franchois de Richardot Evesque Darras Sire jehan Despretz cure Dauberch et Guillaume Hangouart Escuier Seigneur de Pietre des Pummereaulx etc en eulx complaignant en cas de novellite que a vraie et juste tiltre a declare plus a plain en temps et lieu Leur compete et appartient certain droict de disme quy se prend coeulle et lieve au villaige et terroir de Pietre de la seignourie dudict lieu et pays allenviron tel que de chascun cent de garbes bottes

---

<sup>508</sup> Folio 299r°.



et waratz<sup>509</sup> des biens et ablays<sup>510</sup> quy croissent et viennent a meurison sur les terres de ce charges leur en appertient les huit garbes bottes ou waratz et endessoubz a lequipolent<sup>511</sup> dont les noeuf venans au droict de ladicte disme Ledict Seigneur Evesque en prend les deux icelluy cure une / et ledict Seigneur de Pietre les six aultres Et ne peuvent les detempteurs possesseurs ou occuiseurs desdictes terres ainsy chargez dudict droict de disme aulcune<sup>512</sup> chose transporter hors des champs sans prealablement avoir par eulx mis en digeaux<sup>513</sup> ou monchaulx<sup>514</sup> egaulx Les garbes bottes ou waratz de ce provenans et ce faict sommer ou evocquier deurement Lung des fermiers ou commis desdictz exposant pour aller prendre et lever leurdict droict de disme A paine en chascun desdictz cas escheoir envers iceulx complaignans au paiement du double de ladicte disme suivant le placart decerne par sa Maieste pour les fraudes quy se commectoient au paiement dedictes dismes journallement Et de ce joyr user et posséder sont lesdictz exposans en toutes bonnes possessions et saisines affirmatives negatives et mixtes Desquelles et de toutes possessions pertinentes a ladicte matiere a declarer comme dessus Ilz ou leurs predecesseurs desquelz ilz ont le droict et cause ont joyr et possede par temps suffissant et vaillable pour bonne possession et saisine avoir acquis garder et retenir paisiblement publicquement et par les derniers ans et exploictz Au veu et sceu de jehan Herreng filz de Nicollas demourant audict Mauqhissart et de toutz aultres qui ce ont voullu veoir et scavoit Ce nonobstant ledict jehan ou aultre a son adveu et dont il a eu le faict pour agreable sest ingere et avance en la saison daoust dernier Signamment puis an et jour encha du regard a la datte de ceste presente complaincte despoullie amoeublir emmener et encarier ladvesture de grain aiant creu et venu a meurison sur quatre cens de terre prins en une pieche de six cens tenus de la seigneurie dudict Pietre gisans au dela du grand chemin dicelle seigneurie du coste de la cense dudict Seigneur de Pietre tenant au fosse des Lays daultre part a lheritaige du Seigneur de Pietre et daultre sens a lheritaige de Thonin Boidin dict Gallant aiant porte ladicte advesture cincq cens waratz Pour quoy en appertient ausdictz complaignans pour leurdictz droict a ladvenant de huit du cent quarante warat en valleur chascun warrat de trois solz six deniers neantmoins en auroit este trouve seulement sur ledict camp<sup>515</sup> apres lemport faict laissie par ledict jehan quinze warratz partant auroit emporte du droict diceulx exposans vingt et cincq Item auroit pareillement emmene et encarie ladvesture de lin aiant creue et venue a meurison sur deux cens de terres parfaict de la pieche de six cens cy dessus aiant porte cinquante garbes de lin dequoy il a seulement laissie et que a este trouve sur le camp apres lemport faict une garbe partant auroit emporter du droict desdictz exposans trois garbes en valleur chascune garbe de sept patars le tout saulf juste estimation et sans avoir evocque les fermiers ou commis desdictz complaignans ou aucns deulx pour aller prendre et lever leurdict droict de disme comme est tenu faire suivant ledict placart en les troublant et empeschant partant en leurdictz droictz possessions et saisines et commectant vers eulx pour non avoir fait ladicte evocation le paiement du double de ladicte disme Lesquelz troubles et empeschemens il nauroit volu reparer reintegrer et restablir paier ny gaiger ladicte

---

<sup>509</sup> Waratz: mélange de paille et roseaux.

<sup>510</sup> Ablays : blés.

<sup>511</sup> Equipolent : équivalent.

<sup>512</sup> Folio 299v°.

<sup>513</sup> Digeaux : ensemble de 10 gerbes rassemblées sur le sol et posées à la verticale.

<sup>514</sup> Monchaulx : meulles.

<sup>515</sup> Folio 300r°.

double disme A tort sans cause indeuement et de nouvel Requerans sur ce nostre provision Pourquoi nous vous mandons et commectons que a la requeste desdictz exposans ou de leur procureur adjournez a certain brief jour et heure que declarerez ledict turbateur et aultres quil appertiendra et dont requis serez a estre et comparoir pardeuant vous sur et au plus pres desdictz six cens de terre Pour tous lieux contentieux et illecq tenez maintenez et gardez de par le Roy nostre Sire et nous pour justice lesdictz complaignans ou procureur pour eulx en leursdictz droictz possessions et saisines Et diceulx les faictes joyr user et posséder a pur et a plain en ostant tous troubles et empeschemens faitz mis ou donnez au contraire en faisant commandement audict turbateur et aultres quil appertiendra et dont requis serez que incontinent et sans delay ilz restablissent les troubles <sup>516</sup> dessusdictz Paient et gaigent le double de ladicte disme Se cessent de plus faire le samblable Et en cas dopposition la nouvellite ostee et la chose contentieuse desdictes parties prinse et mise en la main du Roy nostre Sire comme souverain Restablissent fait deuement prealablement Donnez et assignez jour competent aux parties lune contre lautre a comparoir pardeuant nous audict conseil Pourtant sur le principal que sur la recredence de la matiere respondre et proceder comme de raison Et sy lesditz adjournez ou aucuns deulx ne comparoient pardeuant vous audict jour lieu et heure que leur aurez assigne ou fussent deffailant de a vosdictz commandemens deffailir Et que par ce deffault fut par vous contre eulx donne Radjournez lesdictz deffailans a comparoir comme dessus pardeuant nous pour ledict deffault veoir confermer Et lesdictz complaignans ou procureur pour eulx plus amplement maintenir et garder en leursdictz droix possessions et saisines et proceder en oultre comme de raison Et pour ce quil est besoing adjourner en ceste partie aucuns demourans hors des mectes de nostre jurisdiction prions et requerons en ayde de droict a tous seigneurs juges justiciers et officiers quil appertiendra que lesdictz adjournemens et exploictz il leur plaise faire ferre ou souffrir par vous estre faitz et en ce tant faire pour nous quilz voudroient que fissions pour eulx ce que ferions volontiers en pareil cas requis Et en cas quilz soient de ce faire reffusans faictes les adjournemens et exploictz dessusdictz en parlant a leurs personnes se trouvez et apprehendez peuvent estre es mectes de nostre jurisdiction sinon en parlant a leurs procureurs parens amys facteurs negociateurs et entremecteurs de leurs affaires Ou par cry publicque a la bretecque de la plus prochaine bonne ville du lieu de leur residence estant de nostre jurisdiction Assignant aux portaulx de leglise copie de ceste <sup>517</sup> commission et de vostre exploict Pardessus ce leur insignant par samblable copie et vostre missive affin quilz nen pretendent cause dignorance tellement quil soit vray samblable que lesdictz adjournemens et exploictz soient venus a leur congnoissance Et lesquelz exploictz faitz par la maniere que dict est seront Daultel effect et valleur comme se faitz estoient a leur personnes ou vrais domicilles Et pour telz ou cas dessusdict les avons auctorise et auctorisons en rescrivant de ce que fait en aurez de ce faire vous donnons povoir donne soubz le contreseel dudict Conseil Le vingtroisiesme jour de mars quinze cens soixante cinq //



#### Rellation de ladicte commission

---

<sup>516</sup> Folio 300v°.

<sup>517</sup> Folio 301r°.

A mes treshonnorez et doubtez Seigneurs messieurs les Gouverneur president et gens du conseil Darthois Franchois de Forcheville huissier extraordinaire dudict conseil resident en la ville de la Bassee bien vostre en tout mesdictz treshonnorez et doubtez Seigneurs Plaise vous scavoir que en vertue de la commission de complainte en cas de nouvellite de vous donnee au marge de laquelle ce present mon rescript est joinct et pour icelle mettre a execution a la requeste de messire Franchois de Richardotz Evesque Darras Sire jehan Desprez cure Dauberch et Guillaume Hangouart escuier Seigneur de Pietre Pummereaulx impetrans dicelles le quatorziesme jour du mois de juing quinze cens soixante six me suis transporte au hameau de Mauqhissart paroische de le Venthie au domicile jehan Herreng et apres assistance par moy requisse en parlant a sa personne le adjournay donnay et asseignay jour a estre et comparoir pardevant moy sur le riet de Pietre pres du lieu contentieux au lundy ensieuvant dixseptiesme jour dudict mois six heures attendant sept du matin pour veoir mettre a execution ladicte commission selon sa forme et teneur <sup>518</sup>Auquel jour lieu et heure comparurent et se presenterent pardevant moy Guerard le Roy demourant audict Auberch comme procureur dudict Seigneur Evesque et dudict Seigneur de Pietre et cure souffissamment fonde de lettres de procuration quil men feist apparoir dune part / et ledict adjournez en personne daultrepart quy en seroit tenu content du lieu jour et jeure a luy assignez En la presence de jehan le Turcq et Hellin de le Lacherie demourant audict Auberch tesmoingz a ce par moy appelez je tins maintins et garday de par le Roy nostre sire et de vous mesdictz seigneurs pour justice ledict procureur audict nom et comme procureur desdictz impetrans es droictz possession et saisine baptisee par ladicte commission et diceux le feys jouyr et user a pur et a plain ostant tous troubles et empeschemens fais mis et donnez au contraire sy feys audict adjourne toutz le commandemens repris et specifiez par ladicte commission de restablir le trouble y mentionne cesser plus faire le samblable a quoy se seroit oppose restablissant neantmoins par syne dung baston en ma main comme constraint ainsy quil disoit au moien dequoy je aueroie oste la nouvellite et chose contentieuse desdictes parties prinse et mises en la main du Roy nostre sire comme souverain, tant et sy longnement que aultrement en sera ordonnez leur donnant et asseignant jour a estre et comparoir pardevant vous mesdictz seigneurs audict conseil aulx plais du mardy vingtcincquesme jour dudict mois audict an pour tant sur le principal que sur la recredence de la matiere aller et proceder selon raison Tesmoing mon seing manuel chy mis le jour et an dessusdictz Ainsi signe F de Forcheville



<sup>519</sup>Lettres de reconnoissance des droix possessions et saisines pour Monseigneur de Pietre et aultres faite par jehan Herreng touchant la disme de Pietre sur la commission susdicte

**A tous ceulx qui ces presentes lettres** verront ou orront Maximilien Villain Baron de Rassenghien Izenghien francq seigneur de St jansteene Conseillier du Roy nostre Sire Gouverneur et capitaine des villes chasteaulx et chastellenies de Lille Douay Orchies et des appertenances salut Scavoir faisons que pardevant jehan

---

<sup>518</sup> Folio 301v°.

<sup>519</sup> Folio 302r°.

Bourgeois et Nicollas le Grand auditeurs commis et deputez ou nom dudict Sr Roy A prendre oyr et recepvoir les contractz convenances marchies et obligations qui se font et passent soubz le seel du souverain bailliaige dudict Lille Comparut en sa personne jehan Herreng filz de Nicollas demourant a Mauqhissart paroisse de le Ventie Lequel recongnut et declara comme il estoit traictie pardevant messieurs les president et gens du conseil Darthois a la requeste de Monseigneur Levesque Darras messire jehan Despretz cure Dauberch et Guillaume Hangouart escuier Seigneur de Pietre en vertu de certaine commission donnee dudict conseil en matiere de complaincte en cas de saisine et de novellite en datte du vingtroisiesme jour de mars quinze cens soixante cincq Et executee par Franchois de Forcheville huissier dudict conseil resident a le Bassee Sur ce que lesdictz dessusnommez maintenoient leur estre deu certain droit de disme qui se prend coeulle et leve au villaige et terroir de Pietre et pays allenviron tel que de chascun cent de garbes bottes et warratz des biens et ablays quy croissent et viennent a meurison sur les terres de ce chergiez leur en appertient les huict garbes bottes et warras et endesoubz a lequipolent dont des noeuf venant au droict de ladicte disme Ledict Seigneur Evesque en prend les deux icelluy cure une et ledict Seigneur de Pietre les six <sup>520</sup>aultres Ce nonobstant ledict comparant ou aultre a son adveu dont il aueroit eu le fait pour agreable se seroit ingere et advanchie de en laoust dernier signamment puis an et jour encha en regard a la datte de ladicte commission de complaincte despoullier ameublir et enmener ladvesture de grain aiant cru et venu a meurison sur quatre cens de terre prins en une pieche de six cens tenus de la seigneurie dudict Pietre gisant audela du grand chemin dicelle seigneurie du coste de la cense dudict Seigneur de Pietre tenant au fosse des lais Daultrepart a lheritaige dudict Seigneur de Pietre et daultre sens a lheritaige de Thonin Bauduin dict Gallant aiant porte ladicte advesture cincq cens warras Parquoy en appertenoit ausdictz complaignans pour leurdict droict a ladvenant de huit du cent quarante warras en valleur chascun warras de trois solz six deniers neantmoing en aueroit este trouve seulement sur ledict camp apres lemport fait laissie par ledict jehan quinze warras Partant aueroit emporte dudroict diceulx complaignans vingt cincq warras Item aueroit pareillement enmene et encarrie ladvesture de lin aiant cru et venu a meurison sur deux cens de terre parfaict de la pieche de six cens cy dessus aiant porte cinquante garbes de lin dequoy il aueroit seulement laissie et que a este trouve sur le camp apres lemport fait une garbe Partant aueroit emporte du droict desdictz complaignans trois garbes en valleur chascune garbe de sept patars le tout sauf juste extimation Et sans avoir evocque les fermiers et commis desdictz dessusnommez et aulcuns deulx comme il estoit tenu suivant le placart de sa Maieste pour prendre et lever leurdict droict Surquoy ledict comparant veullant user de bonne foy Recongnissant son tort vers les dessusnommez il a revocque et par ces presentes revocque et restably lesdictz troubles Promectant de plus faire le samblable Ains de a ladvenir bien paier et furnir ladicte disme a ladvenant de huict garbes bottes ou warratz ou aultres chose que ce soit croissans et venans a meurison <sup>521</sup>sur lesdictz six cens de terre olres<sup>522</sup> quelles fuissent froissees<sup>523</sup> desriglees ou aultrement mesmement reconnoit tous les deux possessions saisines allegations et pointz quelzconcques baptisees par lesdictz dessusnommez Evesque

---

<sup>520</sup> Folio 302v°.

<sup>521</sup> Folio 303r°.

<sup>522</sup> Olres : lors ?

<sup>523</sup> Froisser : terme d'agriculture. Changer l'ordre établi par l'usage ou la condition du bail dans l'espèce de grains qu'on doit semer (Dictionnaire du Rouchi)

Cure Dauberch et Seigneur de Pietre contenus en ladicte commission de complainte parmy laquelle ces presentes sont infixees Et pour plus grand effect a fait denomme constitue et etably ses procureurs de Raoult Gosson jehan Doresmieulx jehan Buisine et Charles le Febvre Ausquelz procureurs et a chascun deulx seul et pour le tout portant ces presentes Ledict comparant a donne et donne pouvoir especial absolu et irrevocable de pour luy et en son nom aller et comparoir pardevant messieurs les president et gens du conseil provincial Darthois et illecq en sondict nom ratiffier recognoistre et approuver les droix possessions et saisines baptizees par lesdictz complaignans / en ladicte commission de complainte et leurs conclusions leur estre adjugees tant pour le droict principal restablissement comme aultrement Promectant avoir pour agreable tenir ferme et stable a tousiours tout ce que par sesdicts procureurs ou lung deulx sera fait et besoingnie soubz lobligation de tous ses biens meubles cateulx et heritaiges et ceulx de ses hoirs presens et futurs vers tous Seigneurs et justices renonchant a toutes choses contraires ad ces presentes En tesmoing de ce nous a la relation desdicts auditeurs par leurs saingz manuelz mis a cesdictes presentes Avons icelles fait seeler du seel dudict souverain bailliaige Saulf le droict dudict Seigneur Roy et Laultroy en tout Ce fut fait et passe le dixneufiesme jour de juing quinze cens soixante six

Les mesmes jour et an et pardevant auditeurs que dessus Antoine le Boidin et jehenne Parcquet vefve de feu jehan le Boidyn / chascun par ung restablissement particulier et sur commission samblables et de mesmes dattes a celles dessus coppiee Recongnurent samblable droict de disme au prouffict du Seigneur de Pietre quy en a leue lettres du bailliaige de Lille



<sup>524</sup>Lettres de recongnissance pour Guillaume Hangouart Escuier Seigneur de Pietre Contenant que icelluy Seigneur donnoit grace a le vefve jehan de Thoulouze et son filz de povoir faire paistre leurs blancqz bestial sur ladicte seignourie de Pietre jusques a son rappel

A tous ceulx qui ces presentes lettres verront ou orront Maximilien Villain barron de Rassenghien Izenghien francq Seigneur de St jansteene Conseillier du Roy nostre sire Gouverneur et capitaine des villes chasteaulx et chastellenies de Lille Douay Orchies et des appertenances Salut Scavoir faisons que pardevant Philippes Hochart et Arnoult Wincre auditeurs commis et deputez ou nom dudict Seigneur Roy A prendre oyr et recevoir les contractz convenances marchiez et obligations qui se font et passent soubz le seel du souverain bailliaige dudict Lille Comparurent en leurs personnes Catherine Wicart vefve de feu jehan Thoulouze filz de feu jehan et Mahieu Thoulouze filz de ladicte Catherine tant en leurs noms prives que es noms et eulx faisant fors de Michiel et Robert Thoulouze Lion Pottier et jennette Thoulouze sa femme Philippes le Grand et Catherine Thoulouze femme dudict Philippes Fredricq Pourcheau Annette Thoulouze sa femme Lesditz du surnom Thoulouze freres et sœurs enfans de ladicte Catherine quelle a eu dudict feu jehan son mary Et recongnurent comme lesdictz jehan Thoulouze pere et filz et Catherine Wicart

---

<sup>524</sup> Folio 303v<sup>o</sup>.

avoient parci devant acquis et obtenu tant par achat et eschambge faicte avecq feu Henry le Turcq et aultres que grace de feu Monseigneur Guillame Hangouart escuier Seigneur de Pietre Conseillier de Lempereur et son president Darthois certaine mesure contenant environ cincq a six cens tenue de ladicte Seignourie de Pietre Confrontant a le ruielle du mollin de Pietre, tenant daultre sens a le ruielle du Bruisle Daultre sens a le terre des filles Toussains le Misre / et daultre a le terre a labour contenant dix a unze cens appartenant aussy a ladicte vefve A condition quilz seroient tenus de endedens vingt quatre ans apres lesditz achatz eschambze, et grace quy fut es ans quinze cens trente six et trente sept resider sur le lieu et mesure ou soy desheriter au prouffict<sup>525</sup> de homme resident sur ledict lieu ou demourer privie du droict de masurier quant aux bestes et pasturaiges dicelles en et sur ladicte seignourie de Pietre Or est il que lesditz jehan Thoullouze pere et filz leurs femmes et enfans aians droict de ladicte mesure ne avoient furny a ladicte condition et ne venu resider endedens lesditz vingt quatre ans sur ladicte mesure ne en ladicte terre et seignourie de Pietre Parquoy desirans demourer heritiers de ladicte mesure Sans estre tenus de eulx en desheritier au prouffict de homme resident audict Pietre comme ilz seroient tenus faire sy bon sambloit a Guillame Hangouart escuier a present Seigneur de Pietre demourant audict Lille et veullant vers luy user de bonne foy ilz ont recongneu et reconnoissent tout ce que dessus estre de tous pointz veritable Et reconnoissent par ceste eulx faisans fors que dessus que eulx et ceulx dont ilz se sont fais fors ne ont nul droit de pover envoier faire ou souffrir leurs moutons et brebis pasturer en et sur ladicte seignourie de Pietre chemins flegardz rietz communes terres et heritaiges tenus dicelle seignourie ne avoir nulz droix sur ladicte ruelette du mollin et du Bruisle Mais ilz ont requis et requerent par ceste grace congie et licence audict Seigneur de Pietre quy pour ce present et comparant acceptant tout ce que dessus Leur a accorde de pover envoier leurdict blancq bestial pasturer es mectes de ladicte seignourie de Pietre jusques au rappel dudict Seigneur de Pietre de ses hoirs et aians cause tant seullement Et sans faire nulz dommaiges ne interestz aux mannans rentiers et censiers de ladicte seignourie Et a condition de eulx deporter et obtenir et faire abstenir leurs bergiers et serviteurs desdictz pasturaiges touteffois et quantes et incontinent que il plaira audict Seigneur de Pietre ses hoirs et aians cause le tout a peril de paier les amendes pour ce deues et reparer tous troubles et paier dommaiges et interestz Consentans aussy et promectans ladicte Catherine Wicart et Mahieu Thoullouze et eulx faisans fors que dessus / Que pour les pasturaiges que eulx et leurs predicesseurs heritiers successeurs censiers bergiers serviteurs et aians cause peuvent avoir faict et use feront et useront a ladvenir par quel loing et immemorial laps de temps que ce fuist ilz ne polront pretendre avoir ne<sup>526</sup> aquerir droit de propriete possession saisine prescription ne aultres quelzconcques Renunchans a toutes choses contraires Meismes au droit disant generale Renonchiation non valloir sy lespecialle ne precede Renonchant aussy par ladicte Catherine Wicart a la loy velleane Laquelle luy a este donnee a congnoistre Et nonobstant droit loy stil ou coustume de pays et choses quelz concques ad ce contraires A quoy ilz ont deroghie et deroghent par ces presentes Promectans tout ce que dessus entretenir furnir et accomplir et faire entretenir soubz lobligation de tous leurs biens et heritaiges vers tous seigneurs et justices Et le reconnoistre et faire reconnoistre ratiffier et passer de nouvel se mestier est par tous les dessusnommez desquelz ilz se sont fais fors pardevant messieurs les president et gens du conseil provincial Dartois / les bailly hommes de

---

<sup>525</sup> Folio 304r°.

<sup>526</sup> Folio 304v°.

fiefz et masuriers de ladicte seigneurie de Pietre notaires roiaux dudict pays Darthois Et par tout ailleurs ou il appertendra et requis seront dudict Seigneur de Pietre le tout a leurs despens Et pour effectuer lesdictes reconnoissances et comparoir pardevant lesdictz seigneurs president et gens dudict conseil Darthois et aultres dessusnommez Lesdictz Catherine Wicart et Mahieu Thoullouze ont denomme leurs procureurs irrevocables de maistre Adrien Belvalet esquier licencie es loix advocat postullant audict conseil Darthois jehan Venant Raoult Gosson Claude et Mahieu Chuine pere et filz jehan et jehan le Turcq pere et filz Thonnequin Bruneau le josne Ausquelz procureurs dessusnommez et a chascun deulx seul et pour le tout portant ces lettres lesdictz contituans ont donne et donnent plain pouvoir auctorite et mandement especial absolut et irrevocable de pour eulx et en leur noms et es noms de ceulx dont ilz se sont fays fors aller et comparoir pardevant lesdictz presidents et gens dudict conseil provincial Darthois et aultres gens de loy et lieux dessusnommez et illecq par jour ordinaire extraordinaire en jugement ou dehors faire les reconnoissances dessusdictes et generalmente et especiallement de en tout ce que dessus et quy en depend aultant et tellement faire et besoignier comme lesdictz constituans feroient sy presens en personne y estoient ja fust il que le cas requisist ou desirast mandement plus especial Promectant avoir pour agreable tenir <sup>527</sup> ferme et estable a tousiours tout ce que par lesdictz procureurs ou lun deulx sera en ce que dessus et quy en depend fait et besoingne Soubz lobligation chascune pour le tout de leurs biens meubles cateulx et heritaige et ceulx de leurs hoirs presens et futirs vers tous seigneurs et justices Renonchans a toutes choses contraires a cesdictes presentes En tesmoing de ce nous a la relation desdictz auditeurs par leurs saingz manuelz mis a cesdictes presentes Avons icelles fait sceller du seel dudict souverain bailliaige Sauf le droict dudict Seigneur Roy et Laultroy en tout Ce fut ainsy fait et passe le vingt sixiesme jour de septembre quinze cens soixante et onze



Commission de nouvelle contre aucuns aians abbatu deux fresnes a Pietre

Les Gouverneur Presidents et gens du conseil Darthois Au premier huissier <sup>528</sup> dudict conseil sur ce requis salut Expose nous a Guillaume Hangouart esquier Seigneur de Pietre des Pummereaulx etc en soy complaignant en cas de saisine et de nouvelle que a vraye et justice tiltre a declare plus a plain quant mestier sera entre ses aultres biens et heritaiges luy compete et appertient ladicte terre et seigneurie de Pietre Se constituant en maison manable pretz terres labourables bois a coppe ordinaire Avecq en toute justice et seigneurie haulte moienne et basse Esquelz bois nest loisible aucuns ou aucun copper ny abbatre aucuns fresnes chesnes berneaulx marieus ny aultre espece de bois sans le gre congie ou licence dudict exposant ses officiers et commis a paine de fourfaire a son prouffict les amendes indites par la coustume de reparer les troubles estant ledict exposant de ce ainsy joye user et posseder mesmement d'estre paye desdictes amendes lors que les cas se y seroient offers en toutes bonnes possessions et saisines affirmatives negatives et mixtes pertinentes et servans a ladicte matiere de temps immemorial Signamment par les derniers ans et exploictz au veu et sceu de jehan Boulet Pierre Boulet son filz / Pierre Boulet frere

---

<sup>527</sup> Folio 305r°.

<sup>528</sup> Berneaulx marieus : ?

dudict jehan Pierre Carlier <sup>529</sup>Anthoine Ghuesquier et de tous aultres qui ce ont voulu veoir et scavoir ce nonobstant les dessusdictz ou aultres a leur adveu dont ilz ont eu le fait pour agreable se sont ingerez et advancez contre le gre et volunte dudict exposant et de ses officiers signamment Lesdictez jehan et Pierre Boulet pere et filz / Pierre Boulet frere dudict jehan/ Pierre Carlier Antoine Ghuesquiere depuis certain temps aumoins puis an et jour encha en regard a la datte de ceste complaincte de copper et abbatre esdictz bois de Pietre ung fresne vaillable quatre carolus Sy auroient pareillement encoire coupee et abbattu lesdictz jehan et Pierre Boulet pere et filz ung aultre fresne en iceulx bois de Pietre vaillable que dessus le tout saulf juste estimation Lesquelz deux fresnes ilz auroient emmene et fait transporter ou bon leur auroit samble troublant ledict exposant en sesdictz droictz possessions et saisines et commectant vers luy deux amendes chascune de soixante solz parisis Lesquelz troubles et empeschement les dessusdictz nauoient voulu reparer reintegrer et restablir paier ny gaiger lesdictes amendes a tort sans cause indeuement et de nouvel / Pourquoi nous vous mandons et commectons que a la requeste dudict exposant ou de son procureur adjournez a certain brief jour et heure que declarerez lesdictz turbateurs et aultres quil appertiendra et dont requis serez a estre et comparoir pardevant vous audevant desdictz bois du coste vers orient Pour tous lieux contentieux et illecq tenez maintenez et gardez de par le Roy nostre sire et nous pour justice ledict complainçant ou procureur pour luy en sesdictz droix possessions et saisines et diceulx le faictes joyr et user a pur et a plain en ostant tous troubles ou empeschemens faitz mis ou donnez au contraire en faisant commandement ausdictz turbateurs et aultres quil appertiendra et dont requis serez que incontinent et sans delay Ilz restablissent les troubles dessusdictz paient et gaigent les amendes Se cessent de plus faire le samblable et en cas dopposition La nouvellite ostee et la chose contentieuse desdictes parties prinse et mise en la main du Roy nostre sire comme souverain Restablissement fait deuement preallablement donnez et assignez jour competent aux parties lune contre lautre a estre a comparoir pardevant nous audict conseil pour respondre et procede comme de raison Et sy lesdictz adjournez ou aucun deulx ne <sup>530</sup>comparoient pardevant vous aux jour et heure que leur avez assigne ou fussent deffaillans de a vosdictz commandemens obeir et que par ce deffault fut par vous contre eulx donnee readjournez lesdictz deffaillans a comparoir comme dessus pardevant nous pour ledict deffault veoir conservier Et ledict complainçant ou procureur pour luy plus amplement maintenir et garder en sesdictz droictz possessions et saisines en proceder comme de raison Et pour ce quil ya aucuns demourans hors des mectes de nostre jurisdiction Prions et requerons en ayde de droict a tous seigneurs juges justiciers et officiers quil appertiendra que lesdictz adjournemens et exploictz il leur plaise faire ferre ou souffrir par vous estre faitz et en ce tant faire pour nous quilz voudroient que feissions pour eulx ce que ferions voluntiers en pareil cas requis Et en cas quilz soient de ce faire refusans faictes les adjournemens et exploictz dessusdictz en parlant a leurs personnes sy trouvez et apprehendez preuvent estre es mectes de nostre jurisdiction sinon en parlant a leurs procureurs parens amys facteurs negociateurs et entremecteurs de leurs besoingnez et affaires ou par cry publicque a l breteque de la plus prochaine bonne ville du lieu de leur residence estant de nostre jurisdiction Affigiant aux portaulx de leglise copie de ceste commission et de vostre exploict Pardessus ce leur insignant par samblable copie et vostre missive affin quilz nen pretendent cause dignorance tellement quil soit vray semblable que

---

<sup>529</sup> Folio 305v°.

<sup>530</sup> Folio 306r°.



lesdictz adjournemens et exploictz soient venus a leur notice et congnoissance Et  
lesquelz exploictz fait par la maniere que dict est seront daultel effect et valleur  
comme sy faictz estoient a leurs personnes ou vrais domicile et pour telz ou cas  
dessusdict les avons auctorise et auctorisons Et outre quilz soient tenuz de  
respondre a la demande des amendes portes par les placcars de sa Maieste Sur le  
fait des amendes desdictz bois pour estre applicquier selon ledict placcart En  
rescripvant de ce que fait en auez de ce fais vous donnons povoir donne soubz le  
contreseel dudict Conseil le penultiesme dapvril quinze cens soixante huit

<sup>531</sup> Lettres du bailly de Pietre aiant saisy certains boys montans au petit Tricquenel a la requeste des heritiers de feue jacquemie Cousin en son vivant femme de Pierre de Langle sequestre lesdicts bois et mis en prisons les chartons Lesquelz enfraignant ladicte saisine et main de justice se ingeroient les abbattre et enmener Duquel sequestre et emprisonnement ledict de Langle se porta pour appellant

Monseigneur en vostre bonne grace supplie estre recommande vostre bon plaisir sera de scavoir que en ensieuvant la saisine par moy faicte en vostre presence de aucuns bois abbatu estans a la cense de la vefve Passion comme censiere et occuperesse dicte la cense du Tricquenel a la requeste de Pierre et Robert Cousin freres et heritiers de jacqueline Cousin leur sœur au jour de son trespas femme de Pierre de Langle de le Venchie ausquelz de Langle et sa femme ledict Triquenel appartenoit par acquestz Sur ce quilz quereloient et demandoient la juste moictie diceulx bois allencontre dudict de Langle je ay fait par le sergent de vostre seignourie et en vertu de commission requisitoire signifier ladicte saisine audict de Langle et en cas dopposition luy aueroit assigne jour apres avoir prins obeissance la ou il appartenoit au samedy premier jour de ce present mois de juing la ou lesdicts Cousin aueroient conclud ainsy que bon leur aueroit samble / aquoy jehan Bauduin procureur pour et au nom diceluy de Langle se aueroit oppose et offert de faire apparoir de procuracy a XVne en sieuvant Sieuvant ce et sicomme le samedy VIIIe jour de cedict present mois Ledict de Langle ses ingere et advanche par aucuns <sup>532</sup>manouvriers et gens a journees de faire venir querir et enmener ledict bois saisis combien que je euisse fait deffence que personne ne y eust a touchier sur paine de cent florins carolus a applicquier la ou il appartenoit comme poez scavoir jusques a ce que le droit en seroit veu Partant lesdictz Cousin se sont retire vers vostre justice de vostre seignourie de Pietre a laquelle ilz ont requis ( apres quilz ont promis de le acquicter et despeschier de ce quilz polroient messe et messusez<sup>533</sup>) de volloir prendre et apprehender au corps les chartons enmenans ledict bois ce que je feys veant quilz avoient enfraint la main mise de justice et les mÿs es mains de Pierre Hennart vostre censier de Pietre / Veant ce ledict Pierre de Langle pour et affin que de les eslargir de prison se seroit le jour dhuy trouve vers moy requerant avoir eslargissement de leurs personnes en baillant bonne caution pour paier et furnir tout ce aquoy ilz polroient estre condempnez Dont pour y furnir ledict de Langle se constitua pleige et caution pour lesdictz cartons que de les ramener es prisons dudict Pietre ensamble de paier et furnir tout ce quilz polroient estre inquietez et adommaigez pour cause dudict emport dicelluy bois Neantmoins lesdictz Cousin ne eulx veullans contenter ont requis que ledict bois fust mis en lieu saulf et sceur a leurs despens ce que je leur accorday Ce temps pendant jehan Baudin procureur dudict de Langle veant que lon volloit mettre ledict bois en lieu sceur et saulf pour le droit des parties et luy samblant que ledict de Langle ne pouvoit faire son prouffict dicelluy bois aueroit dict et declare quil appelloit de nous / et offrant de relever son appel en temps deu et quant besoing sera Aquoy la partie a contredict Neantmoins ne y avons plus touchie veu ladicte appellation Partant mondict Seigneur vous en adverty scavoir se il seroit besoing que nous eussions a proceder avant audict cas et

---

<sup>531</sup> Folio 338v°.

<sup>532</sup> Folio 339r°.

<sup>533</sup> Messe et messusez : ?

de mectre ledict bois en lieu saulf non obstant ladicte appellation ou de laisser le tout en surceanche vous suppliant a ces fins que de en avoir vostre advis et responce pour et affin que de nous y plus sagement riglier A tant je supplie le createur vous maintenir en sa Ste grace de Herlies ce Xe de juing an XV c cinquante cincq Plus bas estoit escript Le tout vostre humble serviteur Charles le Febvre Et sur le dos A Monseigneur de Pietre escuier Guillaume Hangouart Resident a Lille



<sup>534</sup> Advis de Me Pierre Miroul conseiller pensionnaire de la ville de Lille touchant la saisine sequestration emprisonnement et appellation susdicte

Veues les missives du bailly de Pietre touchant la deviene de lemport fait du bois saisy par luy a la requeste de Pierre et Robert Cousin freres ladvis est que la justice aiant fait constituer prisonner<sup>535</sup> les chartons enmenans ledict bois en present meffaict a bien besongnie pour avoir lamende de soixante solz parisis pour infraction de la main de justice Et ne pvoient estre eslargis que en restablistant et reintegrant ladicte main de justice Parquoy ont lesdicts de la justice bien ordonne de sequestre lesdictz bois en lieu sceur soubz icelle justice tant selon droict que les coutumes Darthois et de Pietre a ce propos veues Et est lappel au contraire interiecte par Pierre de Langle frivol et non fonde Et la ou il le vaudra relever lesdicts de la justice comme appelez et lesdicts Cousin comme intimez soustiendront lesdicts besongniez et ordonnance par les raisons susdictes Enquoy par ce que dessus ils sont fondez Soubsigne P Miroul



Saisine faicte pardevant la justice de Pietre par jehan Deffontaines procureur de la ville de Lille sur aucunes terres appertenans a Marguerite Bocquette et aultres gens pour estre paie de XIX annees dune rente heritiere de cincq livres par an / et estre remis esdicts heritaiges arrentez / a faultre du paiement de trois termes de laquelle rente ladicte Marguerite disoit nen avoir paie passez trente ans que XLVI solz par an et nen debvoir non plus et quant aux aultres maintenoient navoir passer quarante ans et jamais riens paie desdictes cincq livres par an Dequoy ledict Deffontaines sest contente et a vendu au Seigneur de Pietre aiant hypotecque pour aultres rentes sur lesdictz heritaiges de Marguerite Bocquette ladicte rente de quarante six solz par an

jehan Deffontaines procureur de la ville de Lille bail et mary de Damoiselle Franchoise Segon fille et heritiere de feu Pierre qui fut filz et heritiere de feu Noel et icelluy Noel aiant droict par transport a luy fait par <sup>536</sup>jehan Marmuze dict Hacquare de la rente cy apres declaree exposa que le quatorziesme jour de febvrier quatre

---

<sup>534</sup> Folio 339v°.

<sup>535</sup> Prisonner : prisonnier.

<sup>536</sup> Folio 340r°.

cens quatre vingt huict comparans pardevant les lieutenant du bailly et hommes de feifz et masuriers de la seigneurie de Pietre ledict Hacquars dune part et Guerard Fasse demt audict Pietre daultre part Lequel Hacquars recongnut de son bon gre et liberalle vollunte sans aulcune constraincte pour son prouffict cler evident apparant et pour mieulx faire que laisser avoir vendu audict Guerard Fasse qui de luy le recongnut avoir achete a tiltre darrentement aux conditions cy apres declarees / Tout ung lieu manoir amaze de maison manable et aultres edifices contenant parmy jardin et terre a labour XIII mencaudees dheritz ou environ Cest asscavoir ledict lieu et jardin contenant trois mencaudees dheritaige ou environ tenans dune part a lheritaige Martin Becque daultre part a lheritaiges des hoirs jehan Gawin dict Capitaine et aboutans a front du chemin auquel jardin y a comprins en ladicte masse demy cent dheritz ou environ a le prendre du lez de lheritz dudict Martin Becque depuis le chemin quy est fief et le surplus terre renteuse / Item demy bonnier de terre a labour tenant au chemin quy maisne dudict lieu de Pietre au bos du Biez Daultre part a le terre des hoirs de feu jehan Sanse dict Quenol et du tierch sens tenant a le terre de Pierre du Bos a cause de sa femme Item cinq cens dheritaiges tenant dune part a le terre Willaume le Gillon Daultre part a le terre jehan Brame et du tierch sens a le terre Collart Morel Item six mencaudees de terre tenant a le terre Pierre le Gillon Daultre part a le terre de Locquin Vicart et a le terre demiselle Laden Et la moictie de neuf cens dheritz a le prendre en une pieche allencontre des hoirs jehan Gawin tenant ladicte moictie a le terre dudict Pierre le Gillon et Daultre part aux six mencaudees dessusdidtes Pour desdictz lieu manoir et heritz Ainsy que ilz se comprennent et extendent des quatre corps et du moilon catel et heritz sans riens reserver ne excepter en joyr et possesser par ledict Guerard acheteur ses hoirs et aians cause depuis lors enavant heritablement et a tousiours a la charge de la rente et droitures segneuriaux que doibvent lesdicts heritaiges et aultres charge cy apres declaree sans aultre charge<sup>537</sup> Icelle vente faicte moiennant deux gros de denier a Dieu soixante dix gros de carite autant au couletier et pour le gros du marchie la somme de deux cens vingt livres parisis monnoye de flandres que ledict Guerard estoit tenu paier en la maniere quy sensieult Cest asscavoir vingt livres que ledict Hacquars confessa avoir receu Et le surplus portans deux cens livres ledict Guerard en devoit paier les quarante livres endedens le jour saint jehan decolasse lors prochain Et pour le parfaict portans huict vingtz livres ledict Guerard estoit tenu den rendre et paier audict Hacquars ses hoirs ou aians cause ou au porteur des lettres huict livres monnoie de flandres de rente heritiere par an heritablement et a tousiours a deux termes et paiemens en lan Cest asscavoir moictie au XIII<sup>e</sup> jour de aoust et laultre moictie au XIII<sup>e</sup> jour de febvrier A commenchie pour le premier paiement au XIII<sup>e</sup> jour daoust lors prochain de lan IIII<sup>xx</sup> IX Et ainsy poursieuvamment dans en an et de terme en terme tant et sy longuement que ledict Guerard ses hoirs ou aians cause aueroient rachete ladicte rente comme faire pooient tout a une foys ou a deux en rendant audict rachat faire tout a une foys la somme de huict vingt livres et sil se faisoit a deux foys a chascune foys la moictie en telz deniers dor et dargent et a tel pris quy aueront cours en la chastellenie de Lille a leure que ledict rachat se feroit Et se ledict Guerard ou ses hoirs rachetoient la moictie de ladicte rente et que a lheure dudict rachat il ny eust nulz termes ou annees escheue en ce cas ledict Guerard ou sesdictz hoirs ne paieroient point de racte de temps<sup>538</sup> sinon ce quy seroit escheu Et silz rachetoient tout a une fois que il ny eust point une plaine annee escheue poze que il y eust ung terme escheu aussy ledict Guerard ou sesdictz hoirs ne

---

<sup>537</sup> Folio 340v°.

<sup>538</sup> Racte de temps : au prorata du temps.

paieront poinct ledict terme escheu ne ratte de temps Mais syl y avoit une annee ou plusieurs escheues ils seroient tenus de les paier Et en cas que ledict Guerard ses hoirs ou aians cause fussent en faulte de bien paier ladicte rente et tant attendissent que il y eust trois termes et paiemens escheuz en ce cas ledict Hacquars ses hoirs ou aians cause ou le porteur desdictes lettres se pouroient traire a le justice de ladicte <sup>539</sup>seignourie de Pietre Laquelle seroit tenue de remettre ledict Hacquars ses hoirs ou aians cause ou ledict porteur en la possession et saisine de tous lesdictz lieu manoir et heritaige Ensamble en tous les meubles et cateulx estant sur iceulx jusques a le valleur et extimation de soixante livres dicte monnoye de flandres que ledict Guerard est tenu den autant entretenir sur iceulx heritaiges Et se lesdictz meubles et cateulx estoient lors en plus grande valleur le residu seroit et apperteuroit <sup>540</sup>audict Guerard ou a ses hoirs Et ce a trois XV<sup>nes</sup><sup>541</sup> de sommation en faisant les debvoirs et adjournemens en tel cas pertinens Et pour ladicte vente faire sortir son plain effect Ledict Hacquars vendeur raporta en la main dudict lieutenant comme en la main de Seigneur tous lesdictz lieu manoir et heritaige dessus declarez sen desvesty dessaisy et desherita pour en vestir saisir et adheriter ledict Guerard Fasse Promist et jura ledict vendeur par le foy et serment de son corps que contre ledict marchie et vente Il ne iroit ne feroit aller par luy ne par aultruy ne queroit ne feroit querir art engien cauillation aulcune parquoy ledict Guerard en fust adommagie de quatre deniers ne de neant Mais luy promist conduire et garandir envers et contre tous et ce par lobligation de son corps et tous ses biens quil oblega quant a ce vers tous seigneurs et justices Et tant en fist et dist ledict Hacquars de bouche et de main que il fut dit par lesdits hommes sur ce semons et conjurez dudict lieutenant de bailly que ledict Hacquars navoit mais aucun droit oudict heritaige / et quil baillast la possession et saisine audict Guerard pour en joyr ainsy et en la maniere dicte Que lors ledict lieutenant porta et transporta de ses mains es mains dudict Guerard tous lesdicts lieu manoir et heritaige cy dessus declare et en fust vesty saisy et adherite pour en joyr par luy ses hoirs et aians cause heritablement et a tousiours aux charges devisees et conditions cy dessus declarees a le tenir de Dieu et dudict Seigneur de Pietre a telz uz et coustume que lesdictz lieu et heritaiges doivent a toutes charges et empeschement <sup>542</sup>et saulf tous droix Et apres que ledict lieutenant se fust tenu content des droix deuz audict Seigneur de Pietre de ses droix et lesditz hommes de leurs par Lesdictz hommes a la semonce dudict lieutenant fut dict que ledict Guerard estoit sy souffissamment vesty et adherite desdictz lieu manoir et heritaiges que pour en joyr par luy ses hoirs et aians cause aux charges devisees et conditions dessus declarees et lesquelles ledict Guerard avoit consenty et accorde tant que pour souffir et sortir leur plain effect Sy furent au surplus es choses dessusdictes et des dependences faictes et administrees toutes sollempnitez de loy en tel cas requises et accoustumees selon la coustume de ladicte seignourie de Pietre comme de ces choses et aultres peut apparoir par lettres donnees desdictz lieutenant de bailly hommes de fiezf et masuriers de ladicte seignourie de Pietre Lesquelz heritaiges sont presentement tenans et haboutans Sicomme ledict lieu manoir de trois mencaudees ou environ dun coste a lheritaige dudict Seigneur de Pietre dun bout a lheritaige dicelluy Seigneur daultre a lheritaige Noel Vignoble dict Malamez Et du quart sens au chemin quy maisne du riez de Pietre aux Sablonnieres appartenans a Marguerite Bocquet vefve de jehan Blondel et occupees par Martin

---

<sup>539</sup> Folio 341r°.

<sup>540</sup> Apperteuroit : appertiendroit.

<sup>541</sup> XV<sup>nes</sup> : quinzaines.

<sup>542</sup> Folio 341v°.

Mallebrancque Item ledict demy bonnier de terre tenant au chemin qui maisne dudict riez de Pietre au bois du Biez / dun boult a lheritaige Mathieu de Dours daultre a lheritaige jehan Pecqueur et du quart sens a lheritaige Anthonnette Shryart<sup>543</sup> vefve de jehan aux Esquaches appertenant les trois cens a ladicte Marguerite et occupez par ledict Martin / et le surplus appertenant audict Martin Mallebrancque a Nicollas Pierre et Catherine Malebrancque freres et sœur par eulx occupez Item lesdictz cinq cens dheritz tenans de deux costez aux terres Guillaume le Gillon et daultre a Roland Widebien a cause de jehenne Castricque sa femme appertenant a Mahieu Mortreul demourant pres Hesdin et occupe par Charles Warembourg Item lesdictz six mencaudees de terres en deux pieches tenant ensamble tenans dun coste a lheritaige jehan Pecqueur dun boult a lheritaige Pierre Gillon barbu daultre aux<sup>544</sup> heritaiges Anthoine Fruleux et Nicollas Becque Et du quart sens a lheritaige jacques Laigniel appertenant moictie a ladicte Marguerite Bocquet et occupe par ledict Martin Mallebrancque et laultre moictie appertenant a Mahieu Vignoble et par luy occupe Item ladicte moictie de neuf cens deheritaige tenant a lheritz Pierre Gillon fils de jehan et daultre aux six mencaudees dessusdictes appertenant a ladicte Marguerite Bocquet et occupez par ledict Martin Mallebrancque de laquelle rente et somme dessus declarez rachapt en aueroit este faict de la moictie portant quatre vingtz livres parisis en principal le second jour du mois de decembre mil quatre cens quatre vingtz et dix tellement que icelle rente seroit depuis lors demourer en cours pour quatre livres parisis seulement au rachapt de quatre vingtz livres parisis Et ledixiesme jour de janvier mil quatre cens quatre vingtz treize Comparant ledict jehan Marmuze dit Hacquars pardevant bailly hommes de fiefz et masuriers de ladicte seigneurie de Pietre aueroit vendu cede et transporte a Noel Segon lors vivant demt a Lille Ladicte rente pour par luy pour ce aussy present et acceptant ses hoirs et aians cause en joir et posséder comme de sa chose heritablement et a tousiours auquel transport faire furent toutes sollempnitez de desheritement adheritement et aultres debvoirs fais en la maniere accoustumee selon le stil de ladicte seigneurie apparant aussy par lettres donnees desdicts baillifz et masuriers en datte que dessus infixees parmy lesdictes lettres en premier lieu dessus mentionnees Depuis quoy ledict Noel aueroit joy de ladicte rente et depuis Pierre Segon son filz heritier et depuis le trespas dicelluy ledict jehan Deffontaines en ladicte qualite de bail et mary de ladicte Damoiselle Franchise Segon fille et heritier dudict Pierre Segon Saulf que lon est en faulte paier a icelluy jehan Deffontaines dix huict annees de ladicte rente escheus le XIII<sup>e</sup> jour de febvrier dernier passe quinze cens soixante douze A ceste cause ledict Deffontaines en ladicte qualite se retire par devers<sup>545</sup> Messieurs les bailly hommes de fiefz et masuriers de ladicte seigneurie de Pietre Requerant pour ladicte deffaulte il soit remis en la possessions et saisine de tous lesditz lieu manoir et heritaiges ensamble en tous les meubles et cateulx estant dessus et ce a trois XV<sup>es</sup> de sommation requerant lesdictes sommations estre faictes aux heritiers detempteurs et occupez desdictz heritaiges et les debvoir et adjournemens en tel cas pertinens et requis selon lusaige et coustume de ladicte seigneurie de Pietre estre fays et observez offrant pour ce paier les droix pour ce deulz offrant et despens Faict pardevant Martin le Wattier bailly dudict Pietre es presence de Pierre le Gillon jehan le Turcq jacques Laisniel et Mahieu de Dours hommes de fiefz et masuriers dicelle seigneurie le vingt huictiesme jour de mars quinze cens soixante et treize apres pasques En obtemperant a la requeste dudict jehan Deffontaines et sur la

---

<sup>543</sup> Voir Segar f°31r.

<sup>544</sup> Folio 342r°.

<sup>545</sup> Folio 342v°.

veue par luy a nous faicte des lieu manoir et heritaiges ensamble de tous les meubles et cateulx estans dessus la saisine en a este faicte par ledict le Wattier en la presence que dessus ledict vingthuictiesme de mars soixante et treize pour sceurete des choses dictes faisant les inhibitions et deffences en tel cas requises et pertinentes Soubsignez M le Wattier Mahieu de Dours Noel Vignoble P. Gillon j. le Turcq et jacques Laignel



#### Commission du bailly de Pietre pour signifier la saisine susdicte

Martin le Wattier bailly de la terre et seigneurie de Pietre commis par Guillaume Hangouart escuier Seigneur dudict Pietre des Pummereaulx etc au premier sergent dicelle seigneurie sur ce requis salut Expose nous a jehan Deffontaines procureur de la ville de Lille bail et mary de Damoiselle Franchoise Segon fille et heritiere de feu Pierre qui fut filz et heritier de feu Noel / et icelluy Noel aiant le droict par transport a luy faict par jehan Marmuze dict Hacquars lors demourant audict Pietre de la somme de quatre livres parisis monnoie de flandres de rente par an au rachat de quatre vingtz livres enquoy Grard Fache lors demourant audict Pietre estoit submis et oblige au prouffict dudict Marmuze a raison de la vendition et arrentement a luy faict de tout ung lieu <sup>546</sup>manoir amase de maison manable et aultres ediffices contenant parmy jardin et terres a labour treize mencaudees dheritaige Cest asscavoir ledict lieu manoir et gardin contenant trois mencaudees Item demy bonnier de terre a labour Item cincq cens de terre aussy a labour Item six mencaudees et la moictie de noeuf centz a prendre allencontre des hoirs jehan Gauwin le tout seant au terroir dudict Pietre et et tenus de la seigneurie dudict lieu Soubz conditions que ledict Grard ses hoirs ou aians cause fusent en faulte de paier ladicte rente et quil y eust trois termes escheuz par ledict Marmuze ou le porteur des lettres se polroit faire remectre en la possession et saisine de tous lesdictz manoir et heritz Ensamble sur tous les moeubles et cateulx estans sur iceulx a trois quinziemes de sommation selon que dicelles conditions avecq des haboutz desdictz main et terres comme aultrement se polra plusamment veoyr par les lettres de ce faisant mention pour ce faictes et passees pardevant bailly et hommes de fiezf et masuriers de ladicte seigneurie de Pietre en datte du quatorziesme de febvrier quatre cens quatre vingt huit Lesquelz heritz sont presentement appertenans en propriete Asscavoir ledict mannoir contenant trois mencaudees a Marguerite Bocquet vefve de jehan Blondel et occupe par Martin Mallebrancque Item ledict demy bonnier de terre appertenant les trois cens a ladicte Marguerite et occupez par ledict Martin et le surplus appertenant audict Martin Nicollas Pierre et Catherine Mallebrancque freres et sœur par eulx occupez Item lesdicts cincq cens appertenant a Mahieu Mortreul demourant pres Hesdin et occupez par Charles Warembourg Item lesdictz six mencaudees appertenant la moictie a ladicte Marguerite Bocquet occupee par ledict Martin / et aultre moictie appertenant a Mahieu Vignoble par luy occupe Et ladicte moictie de noeuf centz appertenant a ladicte Marguerite et occupee par ledict Martin Que a bon et juste tiltre ladicte rente de quatre livres par an appertient audict Deffontaines en ladicte quallite et que sieuvant le transport dessusdict Ledict Noel aueroit joy dicelle rente et depuis Pierre Segon son filz et heritier et apres le trespas dicelluy

---

<sup>546</sup> Folio 343r°.

ledict jehan Deffontaines en ladicte quallite de bail et mary de ladicte Damoiselle Franchoise Segon fille et heritiere <sup>547</sup> dudict feu Pierre Saulf que lon est en deffaulte de payer audict jehan Deffontaines dix huict annees de ladicte rente escheues des le quatorsiesme de febvrier dernier passe quinze cens soixante douze requerant pour ladicte deffaulte estre remis en la possession et saisine de tous lesdictz lieu manoir et heritaiges ensamble en tous les meubles et cateulx estant a trois quinziemes de sommation et ad ces fins nostre provision de justice obtemperant a laquelle requeste le vingt huictiesme de mars quinze cens soixante et treize apres pasques par moy bailly dessusnomme en la presence de plusieurs hommes de fiefz et mazuriers dicelle seignourie fut saisy et mis en noz mains pour justice sur la veue a nous faicte par ledict Deffontaines tous lesdictz mannoir et terres a labeur dessus speciffiez et pour les causes dessusdictes faisans deffence en tel cas pertinentes selon lusaige et stil de ladicte seignourie Pourquoy nous vous mandons et commandons que a la requeste dudict expossant signifiez et faictes scavoir aux dessusnommez heritiers detempteurs et occupeurs desdictz mannoir et heritaiges Lesdictes saisines et devoirs susdictz fays et en general a tous ceulx quil appertiendra Et soit quil soppoissent ou nom donnez et assignez jour aux parties a comparoir pardevant nous aux plais ordinaires dudict Pietre pour veoir ledict exposant ou procureur pour luy prendre contre eulx telle conclusion que bon luy samblera et en oultre proceder selon raison Et pour ce que aucuns ausquelz comment ce signififier et faire scavoir sont demourans hors des mectes de nostre jurisdiction requerons en ayde de droict et de justice a tous seigneurs justiciers et officiers soubz lesquelz ilz seront trouvez estre demourans quil leur plaise lesdictes significacions et exploix faire ferre ou souffrir par vous estre faict et en ce tant faire pour nous quilz voldroient que feissions pour eulx en pareil cas que ferions volontiers sy eulx requis en estions pour justice Et de ce que faire leur en plaira leur plaise rescripre ou vous meismes sergeant rescripves ou ce que faict en aurez De ce faire vous donnons pover donner soubz le seel dudict bailly le deuxiesme jour dapvril quinze cens soixante et treize apres pasques

---

<sup>547</sup> Folio 343v°.



<sup>548</sup>Extrait des procedures actes et estat de la cause touchant ladicte saisine

Extrait du registre aux causes de la terre et seigneurie de Pietre des plais tenus par devant bailly hommes de fiefz et mazuriers de ladicte seigneurie le treiziesme jour de juing quinze cens soixante et treize

jacques le Grand procureur especial de jehan Deffontaines procureur de la ville de Lille mary et bail de Mademoiselle Franchoise Segon fille et heritiere de feu Noel demandeur sur redemande et rentree en heritaiges a faulte de rente non paye presente contre Marguerite Bosquet dernièrement vefve de feu jehan Blondel Martin Pierre Nicollas et Catherine Mallebrancque freres et sœur enffans et heritiers de feu jehan Charles Warembourg Mahieu Vignoble tous occupeurs et detempteurs a portion du nombre de treize mencaudees dheritaige ou environ seant en ceste seigneurie Asscavoir ung jardin et lieu mannoir contenant trois mencaudees appertenant a ladicte Marguerite Bosquet Item demy bonnier de terre a labour dons les trois cens appertienent a ladicte Marguerite Bosquet et le surplus ausdictz du surnom Malbrancque Item cincq cens appertenant a Mahieu Mortreul occupez par ledict Charles Warembourg Item six mencaudees de terre en deux pieches tenant ensamble la moictie appertenant a ladicte Marguerite Bocquet et laultre moictie a Mahieu Vignoble Et de la moictie de noeuf cens a le prendre en une pieche de terre allencontre jehan Pesqueur aussy appertenant a ladicte Marguerite Le tout tenu de ceste seigneurie au loing reprins des haboutz et costez es exploix et acte de la plainte et saisine Conclud ledict procureur oudict nom et en ramenant a fait lesdictz oppositions plainte et saisine Affin que en decretant icelles Ledict Deffontaines son Me en ladicte qualite soit a faulte de paye des arrieraiges portant a trente six florins quy seroit pour dix huict annees du cours de la rente pretendue escheu<sup>549</sup> ..... Remis et restably esdicts heritaiges pour par luy ses hoirs ou aians causes joyr user et posséder comme de son propre et vray patrimosne ou tant et sur tout que de raison Offrant proeue icy demandant despens

<sup>550</sup>Absence aux desfendeurs et entant quil touche contre Mahieu Vignoble Fedricq Brunel demourant a Illies ad ce comparant en personne duquel lesdictes trois mencaudees aueroient este acquises a emprins le fait et garand de ceste poursieulte allencontre dudict Mahieu Vignoble promectant icy soubz lobligation La commission et rescripte du sergeant mis a court

Du XXVII<sup>e</sup> de juing oudict an soixante treize

<sup>551</sup>Deffault premier saulf pour Marguerite Bocquet laquelle a requis le delay dadvis Ledict Deffontaines en personne

Du XI<sup>e</sup> de juillet oudict an

---

<sup>548</sup> Folio 344r°.

<sup>549</sup> Blanc dans le texte.

<sup>550</sup> En marge.

<sup>551</sup> Folio 344v°.

Après advis aux deffendeurs en personnes



Collation faict audict registre trouve concorde Ainsy signe M le Wattier

Advis pour lesdictz Marguerite Bocquette et consors deffendeurs Contre jehan Deffontaines Par lequel advis est aussy dict que ceulx qui ont aultres lettres de rente subsecutivement hypotecquies sur les heritz desdicts deffendeurs se peuvent opposer a la rentree requise par ledict Deffontaine Et requerir la cedition leur estre faicte de icelle portion de rente que peult estre due audict Deffontaines

Sur ce que a este dict que ung quidam ayant droict dune rente heritiere constitue par rapport dheritaiges avecq rentree en faulte de paiement aussy que lheritz ainsy affecte est hypotheque a la sceurete daultres rentes constituees par numeration de deniers en dattes posterieures et que cestuy aiant premier droict auroit par faulte de paiement faict saisir portion dudict heritaige pour y estre remis en totallite comme aussy il auroit faict saisir aultres heritaiges declarez es lettres faisans mention de ladicte rente appartenans a aultres heritiers Lesquels touteffois sont este paisibles plus de trente ans de paier portion de ladicte rente Sur ce que a este requis ladvise est que ceulx aians droict desdictes rentes constituees par numeration de deniers pour la conservation de leurs hypotecques se doibvent opposer a ladicte rentree pretendue et soustenir que cestuy aiant droit de la rente premiere sera tenu leur en faire cedition et transport moienmant loffre de faire le remboursement des deniers principaulx et cours de telle portion de rente qui aura parcidevant et continuellement este paiee par lheritier ou heritiers diceulx heritaiges / et en cas de reffus de faire<sup>552</sup> ladicte cedition sera expedient de consigner soubz la court lesdictz deniers principaulx et cours pour empescher le cours dicelle rente au prejudice dudict heritier et rentree et au regard de ceulx non ayans paie ladicte rente ou portion dicelle par tel espace que dessus Il en demeure deschargez a tiltre de prescription tant en cours que principal Neantmoing sy la totallite de ladicte rente auroit tousiours este paier par ung deux ou trois desdictz heritiers tous les heritaiges affectez a ladicte rente premiere demeurent chargez dicelle rente combien que les heritiers ne laient paye / et est lheritier de telle rente fonde de pretendre et avoir rentree sur la totallite des heritaiges y affectez voire de les traictier sur recongnissance siavant que les lettres contiennent promesse de recongnissance autrement convient saddresser aux fons Ainsy advise a Lille le seiziesme jour de may quinze cens soixante treize Ainsy signe C. de Callonne

---

<sup>552</sup> Folio 345r°.

Deffences pour ladicte Marguerite Bocquette et ses consors  
deffendeurs Contre ledict jan Deffontaines demandeur sur saisine  
et rentree dheritaige

Pour Marguerite Bocquet vefve de feu jehan Blondel Martin Pierre Nicollas et Catherine Mallebrancque freres et sœur enfans de feu jehan Charles Warembourg Fredricq Brunel aiant emprins defaict et garand de Mahieu Vignoble Tous deffendeurs sur redemande et rentree es heritaiges au long declarez par la demande et conclusion du demandeur contre jacques le Grand soy disant procureur especial de jehan Deffontaines procureur de la ville de Lille mary et bail de Damoiselle Franchoise Segon fille et heritiere de feu Noel demandeur et pretendant ladicte redemande et rentree en heritz a faulte du paiement de dix huict annees de la rente de quatre livres mentiones es exploictz que ledict demandeur dict luy estre deues et escheues au jour porte par iceulx exploictz

Sera conclud adfin que ledict demandeur soit declare non recepvable en ladicte poursieulte Sy recepvable estoit que non droict preallablement sur<sup>553</sup> ladicte fin et par ordre a tort a intente icelle iront lesdicts deffendeurs quictes delivres et absoubz des fins et conclusions prises par ledict demandeur Signamment lesdicts Martin Pierre Nicollas et Catherine Mallebrancque Charles Warembourg et fredricq Brunel Et quant a ladicte Marguerite Bocquet passera par son offre telle que de paier et furnir audict Deffontaines a cause de sadicte femme pour les deux bonniers de terre quelle occupe tant seulement des terres et heritaiges contenus esdicts exploictz la somme de quarante six gros de rente tant seulement Dont en sont deues trois annees escheues au quinziesme de juillet quinze cens soixante douze quelle offre aussy paier concluant partant passer par les moiens et despens dommaiges et interestz soustenant que plus avant contendre<sup>554</sup> ledict demandeur nest recevable

Pour moiens lesdictz deffendeurs dient que napperera que les terres et heritaiges par eulx possedes et occupez soient chargez de ladicte rente de quatre livres par an vers ledict demandeur dont la necessite de preuve luy incombe

Et ou il en apparoistroit (que non) Sy est ce que ladicte rente de quatre livres na este payee depuis XX . XXX et XL ans enchea allegheans ad ces fins la coustume de prescription Ains au contraire Ont tousiours lesdictz deffendeurs et ceulx dont ilz ont le droit et cause joy de leursdictes terres et heritaiges librement sans pour ce avoir paie aulcune rente audict demandeur au veu et sceu dudict demandeur et de tous aultres qui ce ont voulu veoir et scavoir

Et a supposer que ladicte Marguerite ait parci devant possede de tous les heritaiges contenus esdictz exploictz et a cause diceulx paie lesdictes quatre livres de rente pretendus Sy est ce quel y a plus de cinquante ans passe quy est plus que temps souffissant pour en avoir acquis lexemption par ceulx et celles ausquelz elle en auroit joys y a pareil temps ou environ faicte vendition qui en ont depuis ledict temps joy et possede de bonne foy sans en avoir oncques este inquiete par ledict demandeur ny aultres

---

<sup>553</sup> Folio 345v°.

<sup>554</sup> Contendre : contester

Ny feroit de dire par ledict demandeur que les quarante six gros par luy receuz de ladicte Marguerite aueroient <sup>555</sup>este a bon compte desdictes quatre livres de rente et quil le troueroit ainsy sur son pappier journal parce que au cas de present ledict pappier ne poeult operer comme partie <sup>556</sup>prive, Et ne fut oncques lintention de ladicte Marguerite de paier aultre rente audict demandeur depuis XL ans euecha que lesdicts XLVI gros quelle offre encoire de continuer tant et sy longuement quelle sera occuperesse desdictz deux bonniers dheritaiges par laquelle offre elle doibt passer et les aultres adjournez declarez quicte et absoubz en condempnant ledict demandeur es despens

Lequel debvoit avoir de piecha <sup>557</sup>intenter sa poursieulte et action allencontre desdictz deffendeurs sils entendoit iceulx estre soumis au paiement de sadicte rente de quatre livres sans laisser couller sy long laps de temps Sy comme de quarante a cinquante ans Lesquelz y euissent resiste de telle sorte quilz euissent demonstre (en soustenant leur bon droict et exemption) audict demandeur le peu de fundement quil eust eu en ladicte poursieulte

Au moyen de quoy (comme personnaige quallifie sentremectant du faire de justice) fera bien de soy deporter de ladicte cause affin de non traveillier davantaige lesdicts deffendeurs et eviter a ulterieurs despens



Lettres daquest pour Guillaume Hangouart escuier Seigneur de Pietre des Pummereaux etc touchant le gardin qui fut aux Catricque et Bacquerelot et depuis achete par Charles Mesurolles quil a revendu audict Seigneur de Pietre

A tous ceulx qui ces presentes lettres verront ou orront Charles le Febvre bailly de la terre et seigneurie de Pietre commis par Guillaume Hangouart escuier Seigneur de Pietre Pummereaux etc salut Scavoir fay que pardevant moy bailly dessusnomme Et en la presence de jehan Warembourg Mahieu de Dours jehan le Turcq et Noel Vignoble juges masuriers de ladicte seigneurie de Pietre Comparurent en leurs personnes ledict Seigneur de Pietre dune part Et Charles Mesurolle demourant audict lieu daultre part Lesquelz comparant recongnurent eulx avoir appointier <sup>558</sup>accorde et traicte ensamble touchant certain lieu manoir jardin et heritaige ainsy que il sextend et comprend en ediffice et plantin contenant cinq cens dheritaiges ou environ naguerrres achete par ledict Mesurolle de Chretien du Bacquerot demourant a le Venthie tenant dun sens a lheritaige dudict Seigneur de Pietre et daultre sens a lheritaige Mahieu Carpentier quil a acquis des hoirs le Turcq en la forme et maniere quil sensieut Cest asscavoir que ledict Mesurolle quicte renunche et se depporte des maintenant volluntairement dudict achat au prouffict dudict Seigneur de Pietre Pour par luy ses hoirs et aians cause en joyr prestement proprietairement a tousiours comme de sa chose Et ce par telle voye et maniere que bon luy samblera asscavoir

---

<sup>555</sup> Folio 346r°.

<sup>556</sup> Partie ?

<sup>557</sup> Piecha : depuis longtemps.

<sup>558</sup> Folio 346v°.

en vertu de retraicte par puissance de fief et seignourie et par ce moien le reincorporer au gros et domaine de ladicte seignourie Ou par forme et maniere de nouvel achat et acqueste faicte et traitie avecq luy / en luy transportant ceddant et vendant oudict cas lesdicts lieu jardin et heritaige Accordant par ledict Mesurolle et mettant au chois dudict Seigneur de Pietre de choisir quant bon luy samblera par quelle desdictes deux voies il veulle apprehender ledict lieu et heritaige ou en vertu de ladicte retraicte ou par forme et maniere de nouvel achat Et de lune ou laultre desdictes voyes a son choys et pareillement de cest accord en lever lettres deues et partinentes sellees desdicts bailly et hommes ou telles aultres justices que bon luy samblera Et ce pour les meismes deniers que ledict Charles estoit accorde avecq ledict Chretien du Bacquerot Asscavoir pour la somme de cent huict florins carolus pour le principal marchie tantmoins a laquelle somme ledict Charles retenoit a sa charge cinquante sept florins carolus de principaulx deniers courans en rente au denier seize sur ledict heritz vers les hoirs Maistre jehan de Beauffremez avecq trois ou quatre annees darrieraiges Laquelle rente heritiere tant en principal que arrieraiges et cours sera pareillement a tantmoing de ladicte somme de cent huict florins a la charge dudict Seigneur de Pietre Et sur la reste desdicts cent huict florins des deniers principaulx dudict achat Ledict Mesurolle en avoit paie seulement audict Chretien la somme de noef florins quatorze patars et demy de laquelle somme il a este remply furny et rembourse par ledict Seigneur et luy en passe quittance par ces presentes comme aussy il a este content des denier a Dieu coulletaige carite et tous le aulx coustemens dudict marchie Et quant a la reste des deniers <sup>559</sup>deubz audict Chretien Ledict Seigneur de Pietre les a prins a sa charge Promectans par lesdictz comparans tout ce que dessus tenir entretenir furnir et accomplir sans jamais aller au contraire Soubz lobligation respectivement de tous leurs biens meubles cateulx et heritaiges vers tous seigneurs et justices Renonchantz a toutes choses contraires a ces presentes En tesmoing de ce nous avons seelle ces presentes lettres de noz seaulx desquelz sommes accoustumes user Ce fut ainsy appointie et accorde le premier jour de juillet lan mil cincq cens cinquante noef



---

<sup>559</sup> Folio 347r°.

Lettres dachapt fait par le Seigneur de Pietre aux curateurs de josse le Noir de deux fiez seans audict Pietre contenans trois bonniers dix cens dheritz

A tous ceulx que ces presentes lettres verront ou orront jehan de Montmorenchy Seigneur de Courrieres etc Chevallier de lordre du thoison Conseillier et Chambelain du Roy nostre Sire Gouverneur et capitaine des villes chasteaux et chastellenie de Lille Douay Orchies et des appertance salut Scavoir faisons que pardevant jehan Daudenarde et Michiel du Mares auditeurs commis et deputez ou nom dudict Seigneur Roy A prendre oyr et recepvoir les contractz convenances marchiez et obligations qui se font et passent soubz le seel du souverain bailliage dudict Lille Comparurent en leurs personnes jehan Gherbode Anthoine Derbault et jehan Vrediere curateurs commis par justice aux personne et biens de josse le Noir filz de feu Luc et de Demiselle Anthoinette de Warlin Ledict josse le Noir et Demiselle Marie Gherbode sa femme dune part Et Guillaume Hangouart escuier Seigneur de Pietre des Pummereaux daultre part Lesquelz comparans Ladicte Marie deument auctorizee de sondict mary laquelle auctorization elle olt pour agreable / apres serment par chascun deulx faictes es mains desdictz auditeurs ( la vente enssieuvant touchie sur faire par povrete juree ) Iceulx curateurs en vertu de lettres dintherinement donnees des president et gens du conseil provincial Darthois en datte du premier de juillet quinze cens cinquante sept Desquelles quy<sup>560</sup> estoient saines et entieres en escripture signature et seel La teneur sensieut mot apres aultres Les Gouverneur president et gens du conseil Darthois A tous ceulx qui ces presentes lettres verront salut comme jehan Gherbode et jehan Verdiere curateurs commis par justice avecq Anthoine Dherbault aux personne et biens de josse Le noyr filz de feu Luc et Damoiselle Anthonnette de Warlain ses pere et mere euissent fait remonstrer au Roy nostre sire que par le trespas de ladicte Anthonnette estoient succedez et escheuz audict josse deux fiez seans en la paroisse Dauberch contenant trois bonniers et demy et les deux pas dune mencaudee de terre tenus de la seigneurie de Pietre Lesquelz seroit expedient et aussy utile audict josse de vendre et a demerer pour des deniers en procedans paier et satisfaire les debtes de sadicte feue mere De laquelle il estoit seul porte et declare heritier entant quil ne avoit aucuns deniers pour ce furnir Et la reste des clers deniers employer au plus grand prouffict dudict josse attendu quil estoit marie chergie de femme meismes quil ne scavoit quelque stil ou industrie pour gagner sa vie et que le revenu et rendaige annuel desdicts deux fiez portoit seulement vingt cinq livres par an quy nestoit suffissant pour la nourriture et entretenement dudict josse et sa femme Sur lequel donne a entendre lesdictz currateurs auroient obtenu dudict Seigneur Roy Lettres patentes en forme dauctorization pour pouvoir vendre lesdictz deux fiez par la voie de povrete juree / et convertir les deniers en procedans au paiement desdictes debtes et le surplus employer au plus grand prouffict dudict josse que faire se polroit Pour proceder a linterinement desquelles lettres lesdictz currateurs aueroient en vertu de nostre commission et par certain huissier dudict conseil fait convenir et adjourner en icelluy conseil Laurens Romanand Philipotte le Noir sa femme Allard du Bosquet et Franchoise le Noir sa femme sœurs audict josse /ensamble le procureur general Darthois aux plaix du neufiesme de septembre quinze cens cinquante six auquel jour ou aultre deument coutume Lesdictz impetrans aueroient fait conclure affin delinterinement desdictes lettres selon leur forme et teneur et que en icelles

---

<sup>560</sup> Folio 347v°.

interinant leur fut permis de vendre par ladicte voye de povrete lesdictz deux fiefz pour les deniers en procedans employer selon que dessusdict Surquoy ledict Anthoine Dherbault mary et bail de Damoiselle Yzabeau le Noir sœur dudict josse<sup>561</sup> Receu a opposition aueroit soustenu que lesdictes lettres ne faisoient a interine que a la charge de employer par lesdictz impetrans les deniers procedans de la vendition desdictz fiefz en acquisition de rentes a rachat ou aultrement au plus grand prouffict dudict josse que faire se polroit et que ledict employ tiendroicte et ligne comme euissent faict lesdictz fiefz pareil soustenu aueroit este faict de la part desdictz du Bosquet Romanand et leurs femmes Et pareillement par ledict procureur general accordans au surplus linterinement desdictes lettres a la charge que lesdictz impetrans seroient tenus faire apparoir de lemploy desdictz deniers dedens le jour que leur seroit presigie par la court Ce que jehan Doresmieulx le josne procureur desdictz curateurs aueroit accepte Partant euissions ordonne que les besongnes seroient mises pardevers nous pour sur ce interposer nostre decret selon que es exploix et actes de la court estoit et est plusaplain contenu Scavoir faisons que veues lesdictes lettres accord et acceptation avons a meure deliberation conformement ausdictz accords et acceptation et en interinant lesdictes lettres auctorise et auctorissons lesdictz impetrans de povoir vendre au plus grand prouffict que faire se polra Lesdictes terres et heritaiges pour les deniers en procedans estre employez en aultres heritaiges ou rentes heritiers pour icelles tenir la cotte et ligne dudict josse en la succession dicelluy comme feroient lesdictes terres Et ce par la voye de povrete juree et ensuivie sieuvant la coustume Darthois Condemnant lesdictz impetrans es despens a nostre taxation En temoing de ce nous avons faict mettre le seel dudict conseil a ces presentes quy furent faictes et prononchies en jugement le premier jour de juillet quinze cens cinquante sept Ainsy signe sur le ploy au coste destre hapiot<sup>562</sup> Et sy estoient seellees en double queue de parchemin de chire vermeil Recongnurent avoir bien et leallement vendu audict Seigneur de Pietre pour ce aussy present et comparant qui le congnut avoir achete deux fiefz seans en la paroische Dauberch contenant trois bonniers et demy et les deux pars dune mencaudee de terre tenus de sadicte seignourie de Pietre tenans au fief<sup>563</sup> du mez Cousart Et daultre aux heritaiges du tenement de ladicte seignourie Dauberch Pour desdictz deux fiefz par ledict Seigneur de Pietre ainsy que le tout gist sextend et comprend les quatre corps et le moilon est comme il est plante generalmente et especiallement de tout tel droit grandeur et extendeur et ainsy que ladicte defuncte Anthonnette de Warlain et ses predicesseurs en ont joy sans aultrement livrer par mesure joyr et posséder depuis le my mars dernier en avant heritablement et a tousiours comme de sa chose A la charge de la rente seignourieuse deue chascun an au terme St Remy de quatre vingtz douze garbes et le tierch dune de feurre<sup>564</sup> de bled noeuf havotz et demy davaine six quarignons de bled deux solz parisis en argent ensamble de soixante solz de relief et le tierch de cambrelaige de chascun fief a la mort de lheritier et le cinquiesme denier a la vente Ladicte vente faicte moiennant quatre patars de denier a Dieu quatre florins au mediateur du marchie six florins carolus de carite deux florins carolus a la femme dudict josse Et pour le gros et principal dudict marchie la somme de cinq cens florins carolus du pris de vingt patars le florin francq argent / Dont lesdicts vendeurs se tinrent au convent<sup>565</sup>

<sup>561</sup> Folio 348r°.

<sup>562</sup> Hapiot : ?

<sup>563</sup> Folio 348v°.

<sup>564</sup> Feurre, feune, fuerre : paille, chaume.

<sup>565</sup> ?

dudict acheteur Lequel acheteur sera tenu de nampir lesdictz deniers es mains du depositaire et purgier iceulx selon luy samble endedens quinze jours prochains Promectans lesdictz currateurs et conjointz meismes iceulx Gherbode et Derbault en leurs noms privez Ladikte vente conduire et garandir sans jamais aller au contraire Soubz lobligation tant des biens desdictz conjointz que desdictz jehan Gherbode et Anthoine Derbault vers tous seigneurs et justices Et sy ont pareillement lesdictz Gherbode et Derbault en leursdicts noms privez promis et promectent de acquitier et despeschier ledict Seigneur de Pietre du remploy desdictz cinq cens florins en sorte que ledict acheteur nen aura nulz despens dommaiges ne interestz Lesquelz se aulcuns en advenoient ilz ont promis rendre et restituer jusques au vaillant de une maille et en fin de neant et aussy de reconnoistre et ratiffier le contenu cy dessus pardevant telz seigneurs et justices quil appertiendra et dont requis seront aux despens dudict Seigneur de Pietre Soubz pareille obligation <sup>566</sup>que dessus Accordans iceulx comparans que ledict Seigneur de Pietre acheteur puist apprehender lesdictz deux fiefz par mise de fait ou telle aultre voie judiciaire que bon luy samblera aussy a ses despens Eslisant leur domicile en la maison de Mahieu du Crocq procureur postulant a Arras Consentans que tous exploitz de justice quy illecq seront fays touchant ladikte mise de fait soient daultel effect valleur et vertu comme sy faitz estoient a leurs personnes ou vrais domicilles Apres laquelle vente faicte / Ladikte Marie Gherbode icelle de lauctorite predite a renunchie et renonche a tout teldroit de douaire et afferme quelle peut et polroit demander sur lesdictz deux fiefz Promectant et avecq elle ledict jehan Gherbode son pere en sondict nom prive en acquier et deschergier ledict Seigneur de Pietre Et desirans lesdicts comparans ledict marchie et vente faire sortir effect ilz ont denomme constitue et estably, et par ces presentes denomment contituent et establissement leurs procureurs generaulx et messagiers especiaux dudict Mahieu du Crocq jehan Descamps jehan Buisine jehan Doresmieulx le josne procureur postulans audict Arras Charles le Febvre demourant a Herlies Loys Hennart censier de Pietre Henry du Bacqueleroy censier des Mottes Grand le Roy demourans audict Pietre jehan Pillon et jehan Reubais procureur postulans en la ville de Lille Ausquelz procureurs et a chascun deulx seul et pour le tout portant ces lettres sans aultre charge attendre de bouche ne par escript fors ces presentes Lesdictz comparans ont donne et par cesdictes presentes donnent plain pover auctorite et mandement especial absolut et irrevocable de pour eulx et en leurs noms aller et comparoir pardevant lesdictz president et gens dudict conseil provincial Darthois et illecq consentir le decretement de ladikte mise de fait ou purge se besoing est ensamble pardevant les bailly ou lieutenant hommes de fiefz et juges de ladikte seignourie de Pietre et par tout ailleurs ou il appertiendra Et illecq reconnoistre et ratiffier le contenu cy dessus De rapporter en la main de telle justice que besoing sera lesdictz deux fiefz Meismes de consentir le tout estre revuy et rencorpore au gros table et domaine dicelle seignourie de Pietre pour par ledict Seigneur de Pietre en joyr et posséder comme de sa chose <sup>567</sup>et au surplus y faire et observer les debvoirs de justice en tel cas requis et accoustumez Et generalmente et especiallement de aultant et tellement faire et besongnier en ce que dict est et quy en deppend comme lesdictz comparans feroient sy presens en leurs personnes y estoient ja fust il que le cas requist ou desirast mandement plus especial Promectans avoir pour agreable tenir ferme et estable a tousiours Tout ce que par lesdicts procureurs ou lun deulx sera en ce que dessus et quy en deppend fait et besongnie soubz lobligation des

---

<sup>566</sup> Folio 349r°.

<sup>567</sup> Folio 349v°.



biens dudict josse le Noyr En tesmoing de ce nous a la relation desdictz auditeurs par leurs saingz manuelz mis a cesdictes presentes Avons icelles fait seeller du seel dudict souverain bailliaige Saulf le droict dudict Seigneur Roy et Laultroy en tout Ce fut fait et passe le dernier jour de juillet lan mil cincq cens cinquante sept



Commission de mise de fait pour apprehender lachat susdict par le Seigneur de Pietre

Les Gouverneur President et gens du conseil Dartois gardiens commis aux prevost Doien et chappitre Saint Ame en Douay Au premier huissier dudict conseil sur ce requis salut Expose nous a Guillaume Hangouart escuier Seigneur de Pietre des Pummereaux etc quil a puis nagueres achete de jehan Gherbode Anthoine Derbault et jehan Verdiere curateurs commis par justice aux personne et biens de josse le Noyr filz de deffunct Lucq et de Damoiselle Anthonnette de Warlain trois bonniers et demy et les deux pars prins en une mencaudee de terre tenues en deux fiefz de ladicte seignourie de Pietre / quy auroient este permis vendre par lesdictz curateurs par sentence rendue a ce conseil suivant les lettre pattentes par eulx obtenues a ces fins a la charge de emploier les deniers procedans de ladicte vente en aultres heritaiges ou rentes heritieres pour tenir cotte et ligne dudict josse en la succession dicelluy comme euissent fait les terres vendues Et ce moiennant le pris charge et conditions declarez es lettres de ladicte vendition donnees de jehan de Monmorency Seigneur de Courrieres Chevalier du thoison dor conseiller et chambellin du Roy nostre sire Gouverneur et capitaine des villes chasteaux et chastellenies<sup>568</sup> de Lille Douay Orchies et des appertenances en dacte du dernier jour de juillet dernier passe Pour lesquelz fiefz et terres apprehender et en icelles acquerire droict reel pour en joyr par ledict exposant ses hoirs ou aians cause heritablement et a tousiours Il nous a requis nostre provision Actendu quilz sont tenus de ladicte seignourie de Pietre jurisdiction par indivis entre ledict exposant Seigneur dudict Pietre et lesdictz de Saint Ame en Douay Pourquoi nous vous mandons et commectons que vous mectez de fait de par le Roy nostre sire et nous pour justice Ledict exposant ou procureur pour luy des fiefz et terres dessusdicts, que vous seront bailliez plusaplain par escript se mestier est pour en joyr audict tiltre dachat heritablement et a tousiours Saulf les droix de tous ceulx quy en ce poeuvent avoir droict et ce seigniffiez et faictes scavoir en tout lieux et aux personnes quil appertiendra et dont requis serez et a tous ceulx ausquelz aurez ce seigniffiez soit quilz soppoent ou non Donnez et assignez jour certain et competent a estre et comparoir pardevant nous audict conseil Pour ledict exposant ou procureur pour luy veoir tenir et decreter de droict en ce ou mis laurez de fait Pour en joyr par luy ses hoirs au tiltre et comme dessus ou y contredire et debattre se faire le veullent et receuz y doibvent estre Et oultre respondre et proceder en ladicte matiere et despendence dicelle ainsy que de raison Et pour ce que ceulx ausquelz commendra ce que dessus seigniffier sont demourans hors des mectes de nostre jurisdiction Requerons a tous seigneurs et juges que lesdictes significacions adjournemens et exploictz necessaires vous souffrent faire et que iceulx fachent faire par leurs officiers Et en ce tant faire pour nous quil voldroient

---

<sup>568</sup> Folio 350r°

que feissons pour eulx en pareil cas ce que ferions volontiers nous requis En rescripvant de ce que faict de ce faire vous donnons pouvoir donne soubz le contreseel dudict conseil le quatorziesme jour de septembre quinze cens cinquante sept



Lettres de procuration touchant lapprehension faicte dudict achapt par mise de faict pour accorder le decretement

**A tous ceulx qui ces presentes lettres verront ou** orront eschevins de la ville de Lille en flandres <sup>569</sup>salut Scavoir faisons que au jourdhuy pardevant nous Comparurent en leurs personnes Laurens Romainant et Demiselle Phelippote le Noir sa femme de presentz demourans en ceste ville de Lille Lesquelz comparans ladicte femme souffissamment auctorisee dudict Laurens son mary quant a ce quelle olt en elle pour agreable fisrent ordonnerent constituerent et establirent et par ces presentes font ordonnent constituent et etablissent leurs procureurs generaulx et certains messagiers especiaulx de jehan Doresmieulx le josne et jehan Buisine Ausquelz procureurs dessusnommez et a chascun deulx seul et pour le tout portant ces lettres ilz ont donne et donnent plain pouvoir auctorite et mandement especial absolut et irrevocable de aller et comparoir pardevant messieurs les gouverneur president et gens du conseil provincial ordonne en Arthois et illecq et partout ailleurs ou il appertiendra et mestier sera accorder la mise de faict et tenue de droict obtenue par le Seigneur de Pietre pour estre decrete es fiez et heritaiges par luy achetez de jehan Gherbode et jehan Verdiere tutteurs et currateurs commis par justice aux personne et biens de josse le Noyr Et generalmente et especiallement de aultant faire et dire es choses dessusdictes et ce qui en deppend comme lesdictz constituans meismes feroient faire dire et accorder polroient se presens en leurs personnes y estoient ja fust il que le cas requisist ou desirast mandement plus especial Promectans lesdictz establissans a tenir et avoir pour agreable ferme et estable a tousiours tout ce que par lesdictz procureurs ou lun deulx sera en ce que dict est faict procure et besongnie Soubz et par lobligation de leurs biens et heritaiges vers tous seigneurs et justices En tesmoing de ce nous avons a ces presentes lettres faict mettre le seel aux causes de ladicte ville Ce fut faict le second jour de decembre lan mil cinq cens et cinquante sept

---

<sup>569</sup> Folio 350v<sup>o</sup>.

## Lettres de decretement de la mize de fait susdicte

Les Gouverneur President et gens du conseil <sup>570</sup>Darthis A tous ceulx qui ces presentes lettres verront salut comme Guillaume Hangouart escuier Seigneur de Pietre des Pummereaulx etc se soit en vertu de nostre commission par Franchois le Clercq huissier dudict conseil le vingt septiesme de septembre de cest an cinquante sept fait mettre de fait de par le Roy nostre sire et nous pour justice en deux fiez contenans trois bonniers et demy et les deux pars dune mencaudee de terre Le tout scitue au terroir dudict Pietre tenans au fief du metz Coussart Daultre aux terres de la seigneurie Dauberch et aux terres dudict impetrant Pour en joyr par luy ses hoirs ou aians cause heritablement et a tousiours a tiltre dachapt quil en avoit fait de jehan Gherbode Anthoine Derbault et jehan Verdriere curateurs commis par justice aux personnes et biens de josse le Noyr filz de defunctz Luc et de Damoiselle Anthonnette de Warlin pour ce faire par nous auctorizes et ce moiennant le pris soubz les charges devises et conditions au long declares es lettres de ladicte vendition passees soubz le seel du souverain bailliaige de Lille en datte du dernier de juillet dudict an cinquante sept Laquelle mise de fait icelluy impetrant eust fait signifier et scavoir pour partie directe ausdict curateurs et a Laurens de Romaignant marry et bail de Phelipotte le Noyr sœur dudict josse Ensamble audict Seigneur de Pietre Duquel iceulx fiez sont tenus leur faisant et a chascun deulx assignier jour audict conseil aux plais y tenus le cinquiesme jour doctobre dernier Que lors par Maistre jehan le Mievre advocat pour ledict Seigneur impetrant fut prinse conclusion Affin destre tenu et decrete de droict esdictz fiez et terres Pour en joyr audict tiltre dachapt Surquoy lesdictes parties directes euissent este pourvez du delay dadvis Et quant audict Seigneur de Pietre signifie Mahieu du Crocq son procureur auroit accorde ladicte mise de fait saulx droix seigneuriaux et despens telz que de raison Et le seiziesme de novembre emssievant jehan Doresmieux le josne ou nom et comme procureur diceulx curateurs en vertu du pouvoir especial insere esdictes lettres de <sup>571</sup>vendition aussy le jourdhuy dacte de cestes comme procureur desdicts Romaignant et sa femme fonde daultre pouvoir passe pardevant eschevins de la ville de Lille le second de ce present mois Auroit pareillement consenty et accorde le decret dicelle mise de fait aux despens dudict impetrant le tout sy avant que faire pavoit en vertu desdictz pouvoir parmy lesquelz et desdictes lettres de vendition ces presentes sont infixxes Tous lesquelz accordz ledict du Crocq ou nom dicelluy impetrant eust accepte et consenty lesdictz despens estre taxez Sauf diminutions selon que es exploictz actes et procedures de la court de ce faisans mention estoit et est plusaplain contenu Scavoir faisons que veues lesdictes lettres de vendition pouvoirs especiaux accordz consentementz et acceptation Avons ledict Hangouart impetrant tenu et decrete tenons et decretons de droict de par le Roy nostre Sire et nous pour justice esdictz deux fiez Pour en joyr par luy ses hoirs ou aians cause heritablement et a tousiours audict tiltre dachapt Le condempnant neantmoingz esdictz despens a taxer comme dessus En tesmoing de ce avons fait mettre le seel dudict conseil a ces presentes quy furent faites et donnees en jugement le septiesme jour de decembre quinze cens cinquante sept

---

<sup>570</sup> Folio 351r°.

<sup>571</sup> Folio 351v°.

**A tous ceulx qui ces presentes lettres verront ou orront** Eschevins de la ville de Lille en flandres salut Scavoir faisons que aujourdhuy pardevant nous Comparurent en leurs personnes jehan Hatte messagier de ceste dicte ville eaige de trente six ans Allard du Bosquiel marchant eaige de quarante six ans Guillaume Villain eaige de trente noef ans jehan Descamps sergeant au Roy nostre Sire es termes de sa prevoste dudict Lille eaige de trente quatre ans ou environ Lesquelz apres serment par eulx fait pardevant nous ont dict jure et atteste pour verite avoir bonne congnoissance de josse le Noyr filz de deffunctz Luc le Noyr et Anthonnette de Warlaing demourant audict Lille <sup>572</sup>pareillement des biens et facultez quil peut avoir tant par la succession de sesdictz pere et mere comme aultrement Et par ce scevent en regard a la cherete du temps moderne que ledict josse ne ha biens ne revenues suffissans pour comparer le vivre et entretenement de luy sa femme et mesnaige dumoings ne soit en vendant certain fiezf et heritz a luy escheu par le trespas de sadicte mere ou aultrement gisant en la paroisse Dauberch et mettant largent en acquisition de rente ou aultrement au plus grand gaing et prouffict dudict josse pour contourner a ladicte nourriture et entretenement Disans lesdicts deposans scavoir ce que dessus par estre prochains parens a cause de leurs femmes saulf lesdictz Descamps et Guillaume Villain dudict josse le Noir dont Antoine Derbau et jehan Gherbode currateurs dudict josse le Noir nous ont requis avoir lettres que leur avons accorde Ce fait comparurent en leurs personnes lesdictz Anthoine Derbau et jehan Gherbode currateurs dudictz josse Lesquelz affin de plus facilement pouvoir consequir interinement au conseil Darthois des lettres patentes par eulx obtenues et quilz ont presente pour avoir auctorisation de vendre ledict fief declarerent en eulx deportant de la clause y inseree de faire la vente soubz tiltre de povrete juree quilz estoient contens faire et feroient ladicte vente par voie de remploy asscavoir par remploiant les deniers procedans dudict fief en aquisition de rente au plus grand prouffict dudict josse que faire se polra pour contourner a sondict vivre et entretenement avecq de sa femme et mesnaige Et lesquelles rentes ilz accorderent et accordent sortir pareille nature que feroit ledict fief cessant ladicte vente Et de ce que dessus declarer et accorder audict conseil Darthois Lesdictz currateurs ont donne plain pouvoir auctorite et mandement especial a jehan Doresmieulx leur procureur Promectans tenir et entretenir ce que dessus avecq ce que par ledict procureur sera fait et accorde en ce regard Soubz lobligation des biens de ladicte curatelle vers tous seigneurs et justice En tesmoing de ce nous avons ad ces presentes lettres fait mettre le seel aux causes de ladicte ville Ce fut fait le vendredy Saint seiziesme jour dapvril lan mil cinq cens cinquante et six



<sup>573</sup>Lettres dachapt pour le Seigneur de Pietre dun lieu manoir et heritaige contenant noef bonniers six cens dheritaiges gisans a Pietre paroisse Dauberch avecq procuracion pour ladheritement ou mise de fait acquis de lheritier Grard Duhot

---

<sup>572</sup> Folio 352r°.

<sup>573</sup> Folio 352v°.

A tous ceulx qui ces presentes lettres verront ou orront Jehan de Montmorency Seigneur de Courrieres etc Chevalier de lordre du thoison dor conseiller et chambellain du Roy nostre Sr Gouverneur et Capitaine des villes chasteaulx et chastellenies de Lille Douay Orchies et des appartenance salut Scavoir faisons que pardevant Jehan du Bois Phles Freumault et Michiel du Mares auditeurs commis et deputez par nous ou nom dudict Seigneur Roy a prendre oyr et recepvoir les contractz convenances marchiez et obligations que se font et passent soubz le seel du souverain bailliaige dudict Lille Comparurent en leurs personnes Asscavoir le dixneufiesme jour de febvrier quinze cens soixante pardevant lesdictz du Bois et du Mares Pierre Cuvelier cousin germain et heritier de feu Gard du Hot Et le vingtiesme dudict mois oudict an pardevant lesdicts Freumault et du Mares Loyse Dauchy sa femme demourans a Englos Lesquelz comparans ladicte femme deument auctorisee de sondict mary laquelle auctorisation elle olt pour agreable Recongnurent avoir bien et leallement vendu cede et transporte et par ces presentes vendent cedent et transportent du gre et consentement et franche volonte de Henry et Daniel Cuvelier freres enfans dudict Pierre pour ce presens et aussy comparans ce acceptant entant que besoing seroit A guillaume Hangouart escuier Seigneur de Pietre pour ce pareillement present que le congnut avoir achete tout ung lieu manoir et heritaige amasse de pluisieurs edifices contenant parmy gardins plat bois et terres a labour aucquiez et plantez darbres fruitz portans et aultres bois montans neuf bonnier six cens dheritaige ou environ tout tenant ensamble gisans en la paroische Dauberch le grand chemin menant dudict Pietre au Belloy passant parmy, tenant a lheritaige de Labbaye de Marchiennes tenu en trois fiefz dudict Seigneur de Pietre sans aultrement livrer par mesure Pour par icelluy acheteur ses hoirs ou aians cause joyr user et posséder desdicts lieu manoir et heritaige fief ainsy que le tout gist septend<sup>574</sup> et comprend les quatre corps et le moilon avecq tout ce que tient a claux quevilles chiment et rachine sans riens reserver ne excepter depuis le Noel dernier passe enavant heritablement et a tousiours Sans charge de douaire demy douaire quind demy quind ou portion de quind auquel douaire ou portion dicelluy douaire que polroit pretendre et demander ladicte loyse par le trespas dudict Pierre, Lesdictz comparans ont renonchie et renonchent par ces presentes au droict et prouffict dudict Seigneur acheteur A la charge neantmoins Asscavoir lesdicts deux fiefz de trente solz parisis et tierch de cambrelage chascun de relief a le mort de lheritier Et laultre de soixante solz parisis tierch de cambrelaige de relief et le cincquiesme denier a la vente dont ou transport Et au surplus a telz relief droictures uz et coustumes que lesditz lieu et heritaige peuvent estre chergiez vers ledict acheteur et sans aultre charge Ladicte vente faicte moiennant ung patars de denier a Dieu ung francq du cent de livres de carite dont lesdictz vendeurs ont declare estre contens dicelluy acheteur Item quatorze florins carolus a ladicte Loyse, douze florins aux mediateurs dudict marchie trente huict florins carolus a applicquier a la volonte desdicts vendeurs et desquelz ilz ont passe quictance a icelluy acheteur Et pour le gros et principal dicelluy marchie la somme de sept cens cinquante florins carolus de vingt patars le florin francq argent a paier sicomme cent florins carolus comptant que ledict acheteur a promis fournir ausdictz vendeurs endedens le jour de demain Item trois cens cinquante florins endedens ung mois prochain Et la reste portant a trois cens florins carolus du pris que dessus parfaict dudict marchie lcelluy Seigneur acheteur polra retenir en rente heritiere a ladvenant du denier seize Et a ces fins sera tenu soy obligier pardevant auditeurs du souverain bailliaige dudict Lille cedit

---

<sup>574</sup> Folio 353r°.

jourdhu y au prouffict desdictz vendeurs en la susdicte somme Promectant iceulx vendeurs ladicte vente entretenir et icelle conduire et garandir envers et contre tous soubz loblighacion de tous et quelconques leurs biens meubles et immeubles et ceulx de leurs hoirs presens et advenir vers tous seigneurs et justices Consentant et accordans pour sceurete dudict garandissement main assize et mise de fait a leurs despens et que ledict acheteur puist lesdictz lieu <sup>575</sup>et heritaige apprehender et soy y faire reallisier par mise de fait ou telle aultre voye judiciaire quil appertiendra Et pour icelluy marchie faire sortir son plain et entier effect daultant que lesdicts vendeurs ne peuvent bonnement comparoir pardevant les Seigneur bailly lieutenant hommes de fiefz et juges dont lesdictz lieu et heritaige sont tenus ilz ont denomme constitue et estably et par ces presentes denomment constituent et etablissent leurs procureurs generaulx et messaigiers especiaulx de Mahieu du Crocq jehan Descamps jehan Buisine jehan Doresmieulx le josne Nicollas le Mieuvre procureur postulans au conseil Darthois Oste Havet Simon Cuvillon Denis Froidure jehan le Boucq Robert Desmulliers Noel Waignon procureurs postulans audict Lille Charles le Febvre demourant a Herlies Gard le Roy censier des Mottes audict Pietre Loys Hennart censier illecq jehan le Turcq et Noel Creton huissier dudict conseil Darthois Ausquelz procureurs dessusnommez et a chascun deulx seul et pour le tout portant ces lettres sans avoir aultre charge de bouche ne par escript Lesdictz comparans ont donne et par ces presentes donnent plain pover auctorite mandement especial absolu et irrevocable de pour eulx et en leurs noms aller et comparoir pardevant tous seigneurs et justices dont lesdictz lieu et heritaige vendus sont tenus et partout aillieurs dont requis seront dudict acheteur Et en chascun desdictz lieux reconnoistre le dessusdict marchie et vente le greer ratifier et approuver et entant que mestier seroit le passer de nouvel en la forme icy declaree Se desheriter es noms desdictz vendeur faire en lame diceulx tous sermens pertinens En promectant lesdicts marchie et vente conduire et garandir envers et contre tous Consentir ladheritement en estre baillie audict acheteur pour en joyr par luy ses hoirs et aians cause comme dessus Meismes accepter et recepvoir tous adjournemens necessaires requis estre fais sur ladicte apprehension par mise de fait que voldra faire ledict acheteur desdicts lieu et heritz en vertu dudict marchie et consentir le decretement dicelle mise de fait pardevant tous seigneurs et justices la ou elle se fera Et generalmente <sup>576</sup>et especiallement en tout ce que dessus est dict et ce que en deppend autant faire dire reconnoistre passer promectant obligier pour et es noms desdicts vendeurs comme iceulx faire polroient se presens en leurs personnes y estoient ja fust il que le cas requisist ou desirast mandement plus especial Promectans avoir pour agreable tenir ferme et estable a tousiours tout ce que par lesdictz procureurs ou lun deulx sera en tout ce que dict est dessus et en ce que en deppend fait dict procure besongnie accepte consenty et accorde sans jamais aller au contraire soubz loblighacion de leursdics biens et heritz et ceulx de leurs hoirs presens et futurs vers tous seigneurs et justices Eslisant par lesdictz vendeurs domicile audict lieu vendu gisant audict Auberch Consentant que tous exploictz adjournemens et significacions a ce requis et pertinens de faire que illecq seront faitz soient daultel effect vateur et vertu comme sy fais estoient aux propres personnes et vray domicile diceulx comparans vendeurs Renonchans a toutes choses contraires ad ces presentes En tesmoing de ce nous a la relation desdictz auditeurs par leurs saingz manuelz mis a cesdictes presentes avons icelles fait

---

<sup>575</sup> Folio 353v°.

<sup>576</sup> Folio 354r°.

seeller du seel dudict souverain bailliaige Saulf le droict dudict Seigneur Roy et laltruy en tout Ce fut faict et passe les jour et an dessusdictz



Lettres de ladheritement desdicts lieu et noeuf bonniers six cens dheritaige prins par ledict Seigneur de Pietre pardevant les bailly et hommes de fiefz de sadicte seignourie de Pietre

**A tous ceulx que ces presentes lettres verront ou orront** Charles le Febvre bailly de la terre et seignourie de Pietre commis par Guillaume Hangouart escuier Seigneur dudict Pietre des Pummereaulx etc salut Scavoir fay que pardevant moy bailly dessusnomme et en la presence de Mahieu de Dours jehan jehan le Turcq et Noel Vignoble hommes de fief de ladicte seignourie<sup>577</sup> de Pietre Comparut en sa personne Pierre Cuvellier cousin germain et heritiere de feu Grard du Hot demourant a Englos Lequel comparant recongnut comment le dixnouefsiesme jour de fevrier quinze cens soixante il aueroit comparu avecq Loyse Dauchy sa femme pardevant jehan du Bois Phles Freumault et Michiel du Mares auditeurs commis et depputez par le Roy nostre Sire au souverain bailliaige de Lille Et illecq du gre consentement et franche vollunte de Henry et Daniel Cuvellier freres enfans dudict Pierre Aueroient vendu a Guillaume Hangouart escuier Seigneur de Pietre qui le congnut avoir achete tout ung lieu manoir et heritaige amasse de plusieurs edifices contenans parmy jardins plat bois et terre a labeur aucquiez et plantez darbres fruictz portans et aultres bois montans noeuf bonniers six cens dheritaige ou environ tout tenant ensamble gissant en la paroisse Dauberch Le grand chemin menant dudict Pietre au Belloy passant parmy tenans a lheritaige de Labbeye de Marchiennes tenu en trois fiefz dudict Seigneur de Pietre sans aultrement livrer par mesure Pour en joyr par ledict acheteur ses hoirs ou aians cause depuis le Noel dernier passe en avant heritablement et a tousiours Sans charge de douaire demy douaire quind demy quind ou portion de quind Auquel douaire ou portion dicelluy que polroit pretendre ladicte Loyse par le trespas dudict Pierre Lesdictz comparans il y aueroient renunchie au prouffict dudict Seigneur acheteur Pour le pris des deniers et soubz les charges contenues es lettres dachat passees pardevant lesdictz auditeurs soubz le seel dudict souverain bailliaige Parmy lesquelles ces presentes sont infixees des deniers a quoy a porte ledict marchie tant des carite deniers a Dieu mediation des trente huit florins que des principaulx deniers Ledict vendeur a declare en nos presentes quil se tenoit pour content et bien paye dudict Seigneur acheteur Saulf de trois cens florins carolus quil retient a cours de rente heritiere au prouffict dudict vendeur lequel en decherga la loy Parquoy veullant par ledict Pierre vendeur user de bonne foy vers ledict Seigneur et faire sortir ladicte vente son effect il a ce jourdhuy rapporte en ma main comme es mains de Seigneur tous lesdicts lieu manoir et heritaige dessus declarez Et sen desherita<sup>578</sup> devesty et dessaisy bien et par loy Pour en adheriter vestir et saisir ledict Seigneur acheteur Dont apres de ma main je transportay es mains dudict Seigneur iceulx lieu manoir et heritaiges dessusdicts et len adheritay vesty et saisy en tous prouffictz et revenuz joissance heritiere fonsiere reelle et propriétaire Pour en joyr selon le contenu desdictes lettres dachat Promectant par

---

<sup>577</sup> Folio 354v°.

<sup>578</sup> Folio 355r°.

ledict comparant vendeur ladicte vente et choses dictes tenir entretenir conduire garandir faire souffrir et laisser joyr ledict Seigneur acheteur contre et envers tous Soubz et par lobligation de tous ses biens meubles cateulx et heritaiges envers tous seigneurs et justices Renonchant a toutes choses contraires a ces presentes tellement que lesdictz hommes a ma semonce et conjure ont dict et declare que toutes les sollempnitez de loy avoient a ce que dessus estees sy souffissamment gardees et observees que pour souffrir a loy En tesmoing de ce nous avons seele ces presentes de noz seaulx Ce fut ainsy fait passe et recongnu a loy le vingt septiesme jour daout Lan mil cinq cens soixante et ung



<sup>579</sup> Minute pour la vente de cinq bonniers de fief tenus de la seigneurie de Pietre que Anthoine Fruleux offroit faire au prouffict du Seigneur de Pietre qui na sorty pour lors ains fut par apres ladicte vente faicte pardevant auditeurs du souverain bailliage de Lille

**Nous Anthoine Fruleux** labourier demourant a Pietre et Marguerite Marsy conioinctz auctorisee de moy Anthoine son mary Laquelle auctorization je Marguerite ay prins pour agreable Congnoissons avoir vendu et vendons par cestes de notre franche vollunte pour nostre plus grand prouffict a Guillaume Hangouart escuier Seigneur de Pietre que moy Guillaume Hangouart congnoy avoir achete desdictz Anthoine Fruleux et sa femme par forme de mise a pris et renchieres, tout ung fief contenant cinq bonniers dheritaige partie bois partie terre a labour tout en une masse gisant en ladicte seigneurie de Pietre et tenu dicelle seigneurie de Pietre A soixante solz parisis de vingt sept deniers flandres le solz faisans six livres quinze gros flandres <sup>580</sup> et le tierch cambrelaige de relief / et du cincquiesme denier a la vente don ou transport Tenant dun sens aux terres dudict Seigneur de Pietre daultre sens au bois des enfans de feu Philippe Mascler et daultre au bois du Biez / Pour par icelluy Seigneur de Pietre acheteur ses hoirs et aians cause ou aultre plus offrant et dernier rencherisseur joyr user et posseder desdictz cinq bonniers de fief Ainsy quilz gisent sextendent et comprennent et quilz sont presentement plantez tant de vielz et jeusnes chesnes et aultres sortes de bois montans que a teste et a pied sans riens reserver ne excepter et soit quilz y ait plus ou moins dheritaige depuis le jour du werp que se fera de ce jourdhuy en quarante jours heritablement et a tousiours Sans charge de douaire demy douaire quind demy quind ne aultre empeschement quelconque / La dicte vente faicte moiennant la somme de seize florins carolus de denier a Dieu A distribuer moictie a leglise Dauberch a ladvancement dune orloge lors que icelluy Seigneur sera assis et sonnant Et laultre moictie a estre dictribuee a la discretion dudict acheteur ou dernier rencherisseur / Douze florins audict mecteur a pris Sept florins a ladicte Marguerite Marsy Sept florins de carite autant a jehan le Turcq mediateur dudict marchie pour plusieurs vacations et pour le gros et principal dudict marchie La somme de quatre cens vingt cinq florins carolus de vingt patars le florin francq argent A paier la moictie huit jours apres le jour du Werp et laultre moictie au seiziesme de

---

<sup>579</sup> Folio 374r°.

<sup>580</sup> Folio 374v°.



janvier prochain Lequel marchie et vente lon polra renchierir durant lesdictz quarante jours dune ou plusieurs renchieres vaillable douze florins dix patars chascune Les deux tierch au prouffict dudict marchie et laultre tierch au prouffict de cestuy ou ceulx surquy ledict marchie sera renchieriy Tenant nous vendeurs toutes haulches<sup>581</sup> bonnes et vaillables soit que ledict marchie sortisse ou non Laquelle vente et marchie nous vendeurs promectons entretenir conduire et garandir et ledict fief acquictier et tenir nect de tous troubles cherges et empeschemens quelconque meismement moy Marguerite Marsy de lauctorite predicte ay renonchie et renonche a tout tel droict de douaire assenne<sup>582</sup> joissance et aultre que je polroie demander et<sup>583</sup> avoir soit presentement ou a ladvenir sur ledict fief et cincq bonniers dheritaige Et combien que par les coustumes et privileges de ladicte seignourie de Pietre Il soit loisible a ung chascun de librement vendre chergier et allier ses fiefz et aultres heritaiges patrimonieulx sans gre dhoir ny observer aultres voyes requises par la coustume generale Darthois Neantmoins nous vendeurs avons promis et promectons pour abondante sceurete et sans preiudice de ladicte coustume et privilege de Pietre faire agreer et ratiffier ladicte vente et present marchie par nostre plus prochain et apparant heritier dudict fief incontinent quil sera en eaige competent de ce pover faire Promenctons aussy nous vendeurs nous desheriter dudict fief et heritaige endedens lesdictz quarante jours A paine de cinquante florins carolus au prouffict dudict mecteur a pris ou dernier renchierisseur Promectans davantaige nous vendeurs tout ce que dessus recongnoistre a noz despens pardevant tous Seigneurs et justices toutes foys que requis en serons dudict mecteur a pris ou dernier rencherisseur et illecq et pareillement pardevant les bailly et hommes de ladicte seignourie de Pietre Accorder main assize et mise de faict et aultres sceurete et hypotecques estre faictes sur tous nos biens fiefz et heritaiges touteffois quil leur plaira pour sceurete dudict garandissement et promesse de deschergier et tenir nect et libre dudict fief de douaire demy douaire quindz demy quindz et aultres cherges Renonchiations susdicte de douaire et autres empeschemens quelzconques Meismes a ces fins rapporter et hostigier tous et quelconques noz biens fiefz et heritaiges pardevant les Seigneurs dont ilz sont tenus leurs baillys lieutenantz hommes de loy et officiers Le tout a noz despens tant en droix seignouriaux que autrement Et non obstant droict loy stil ou coustume ad ce contraire A quoy nous avons deroghie et renonchie derogions et renonchons par ces presentes Meismes au droict disant generale renonchiation ne valloir sy lespecialle ne precede Promectant nous vendeurs et acheteur tout ce que dessus chascun en nostre regard entretenir furnir et accomplir Tesmoins nos seingz cy mis avecq les seingz de Gard le Roy Leurens Hennart et jehan le Turcq cy mis aussy a nostre requeste pour plus grande approbation de verite le<sup>584</sup> Ledit marchie a este renchery par ledict mecteur a pris de six renchieres telles que dessus



---

<sup>581</sup> Haulche : hausse.

<sup>582</sup> asseigne.

<sup>583</sup> Folio 375r°.

<sup>584</sup> Blanc dans le texte.

<sup>585</sup>Minute pour faire le desheritement et prendre par procureur adheritement desdictz cinq bonniers de fief

Le jour de <sup>586</sup> an quinze cens soixante treize Lesdictz Anthoine Fruleux et Marguerite Marsy sa femme comparans pardevant moy Laurens Hennart lieutenant de bailly et en presence de jehan le Turcq jacques Laigniel Martin Malbrancque Noel Vignoble et Mahieu Carpentier hommes de fiefz et juges masuriers de la seigneurie de Pietre Ladicte femme deument auctorisee de sondict marry que elle olt pour agreable Se sont tenus aux six renchieres susdictes et sy on recongnut et passe ledict marchie et vendition selon sa forme et teneur en tous ses pointz Promectans lesdictz comparans vendeurs et chascun deulx sans division ladicte vente entretenir conduire et garandir et tenir necte de quindz demy quindz douaire demy douaire presens et futurs et aultres charges quelzconques et icelle vente recongnoistre pardevant messieurs les president et gens du conseil Dartois et par tout ailleurs ou requis seront et illecq accorder les sceuretez mentionnees audict marchie Ce fait veullans lesdictz vendeurs icelle vente sortir son plain et entier effect se sont desheritez desvestis et dessaisy desdictz cinq bonniers de fief par rain et baston<sup>587</sup> en la maniere deue et accoustumee se tenans pour les deniers principaulx et aultres au couvent<sup>588</sup> dudict Seigneur de Pietre acheteur et dernier rencherisseur et en deschargeant la loy pour en adheriter ledict Seigneur de Pietre acheteur Et ledict jour Grand le Roy procureur especial dudict Guillaume Hangouart escuier ~~lieutenant de monsieur le gouverneur de Lille~~ Seigneur de Pietre fonde de lettres procuratoires faictes et passees pardevant jehan Viron escuier lieutenant de monsieur le gouverneur de Lille en datte du vingt septiesme de juing quinze cens soixante dix dont nous a apparu fut adherite et saisy dudict fief contenant cinq bonniers dheritaige ou environ bien deument et par loy par main prestee et au nom dudict Seigneur de Pietre et observant toutes solempnitez et œuvres de loy ad ce requises Surquoy lesdicts hommes de fief et masuriers de moy semonce et conjurez ont dict que lesdictz desheritement et adheritement et aultres œuvres et sollempnitez de loy ont este deument et souffisamment accomplies

---

<sup>585</sup> Folio 375v°.

<sup>586</sup> Le jour et le mois sont en « blanc » dans le texte.

<sup>587</sup> « Par rain et baston » : Symbole et formule d'investiture qui s'employaient dans des actes de vente pour exprimer que la vente était définitive et sans esprit de retour.

<sup>588</sup> Couvent ?

<sup>589</sup> Aultre minute pour les desheritements et adheritement dudict achapt lequel comme dict est ne sorty lors

Ce jourdhuy <sup>590</sup> jour de     an quinze cens soixante treize Comparans pardevant moy Laurens Hennart lieutenant de bailly de la seigneurie de Pietre et en la presence de Gard le Roy jehan le Turcq et Mahieu Carpentier hommes de fief et juges masuriers de ladicte seigneurie Antoine Fruleux et Marguerite Marsy auctorizee dudict Antoine quelle a prins pour agreable Recongnurent avoir vendu audict Seigneur de Pietre lequel pour ce aussy present et comparant le recongnut avoir achete desdictz conjointz vendeurs cincq bonniers de fief tenus de ladicte seigneurie de Pietre gisans empres le Neufve Cappelle pour le pris de mil livres pour le gros et principal marchie compris six renchieres ausquelles ilz se sont tenus et aux denier a Dieu mediation et aultres charges devisees et conditions contenues au passage de ladicte vente icy joint ou contenus es lettres de ladicte vente parmy lesquelles ces presentes sont infixees ou sont attachees Lesquelles lettres de vente lesdictz conjointz vendeurs ont recongnu et reconnoissent selon leur forme et teneur et en tous leurs pointz faisans les meismes promesses de conduire et garandir ladicte vente et tenir nect de tous empeschemens et aultres quelconques contenus esdictes lettres meismes de ballier sceuretes pour toutes lesdictes promesses acquitz garandissement indemnitez et tout le contenu dicelles Et suivant ce lesdictz vendeurs se sont desvesty dessaisy et desherite desdictz cincq bonniers de fief en noz mains quy en auroient du consentement diceulx vendeur adhereite saisy et vesty ledict Seigneur de Pietre le tout en la maniere deue et accoustumee Et pour sceurete desdictes promesse de conduire et garandir ledict marchie et le acquicter tenir nect et indemnir de toutes charges et empeschemens de quindz demy quindz douaire demy douaire hypothecques debtes et aultres charges quelzconques Lesdictz vendeurs ont rapporte et hostige en noz mains certain lieu mannoir jardin contenant huict cens une motte et mollin et cincq cens de terre a labour tout tenant ensamble gisant audict Pietre et en tenus Consentant icy faict les jour et an dessusdictz



<sup>591</sup> Vente et adheritement de huict cens de terre a labour ou environ gisant a Pietre faicte a jehan Herreng par les filles de feu Toussains le Misre en vertu

de lettres procuratoires passees pardevant la justice Desterres Et la vendition dicelle pieche de terre faict par apres par ledict Herreng au Seigneur dudict Pietre dont en a este adhereite au nom dudict Seigneur de Pietre Gard le Roy en vertu de aultre lettre de procuracye passee pardevant le lieutenant de la gouvernance de Lille

**A tous ceulx qui ces presentes lettres verront ou orront Martin le Wattier bailly de la terre et seigneurie de Pietre icy commis par noble homme Guillaume Hangouart escuier Seigneur de Pietre des Pummereaulx etc salut Scavoir**

---

<sup>589</sup> Folio 376r°.

<sup>590</sup> Le jour et le mois sont en « blanc » dans le texte.

<sup>591</sup> Folio 376v°.

fay que pardevant moy et en la presence de jehan le Turcq jacques Laigniel et Mahieu Carpentier juges masuriers de ladicte seigneurie de Pietre Comparut en sa personne Mahieu de Dours procureur especial de joos le Clercq et jehenne le Misre sa femme demourans en la ville Desterres et Anthonnette le Mire dernièrement vefve de feu jacques de le Becque demourante en la paroisse de Fleurebais pays de Laleuwe Souffissament fonde de lettres procuratoires pour ce faictes et passees pardevant advoe et eschevins de ladicte ville Destaires en Flandres sur la Lys en datte du treiziesme doctobre quinze cens soixante et treize sellees en double queuwe de chire verde Desquelles lettres la teneur sensieult A tous ceulx quy ces presentes lettres verront ou orront advoe et eschevins de la ville Desterre en Flandres sur le Lys salut Scavoir faisons que au jourdhuy datte de cestes Comparurent en leurs personnes joos le Clercq et jehenne le Mire sa femme demourant en ceste dicte ville et Antoinette le Mire dernièrement vefve de feu jacques de le Becque demourant en la paroisse de Fleurebais pays de Lalleuwe Ladicte jehenne auctorizee de sondict mary quand ad ce que sensieult Et recongnurent lesdictz comparans que pour leur prouffict apparant mieulx faire que laisser Avoir vendu bien et sans fraulde a jehan Herreng filz de Nicollas demourant a le Venchie audict pays Lequel ad ce present congnut ainsy avoir achete sept quartiers de terre labourable ainsy que se <sup>592</sup>comprend et extend sans aultrement livrer par mesure seantz en la paroisse Dauberch seigneurie de Pietre haboutant de soleil levant a la vefve jehan Toulouze de nommé la ruielle du Breul de soleil couchant jehan Pecqueur Ce parmy et moiennant deux sols a denier a Dieu quatre livres de carite quarante solz au mediateur Et pour les principaux deniers du marchier la somme de cent quatre vingt douze livres parisis monnoie de flandres pour tout lesdicts sept quartiers de terre avecq tous les cateulx dessus et francqz deniers pour les vendeurs A la charge de la rente au Seigneur dung an de cense du my mars prochain en ung an vers la vefve Beltremieu le Roy pour huit livres parisis Le paiement du Noel prochain au prouffict desdits vendeurs encoire de noef ans de cense en apres vers ledict acheteur selon le contenu du bail Et a joyr par lacheteur du my mars en avant aux conditions avant dictes A paier ladicte somme de cent quatre vingtz douze livres la moictie au jour de la chandeler et lautre moictie au jour de Pasques communiaux Le tout prochainement venant Et par dessus et pour chascun ung chapron ausdictes jehenne et Anthonnette le Misre six livres parisis Et pour mieulx ce present marchie sortir son effect et que lacheteur puist acquerir droict reel et propriete En ont lesdictz comparans chascun en leur regard comme dict est denomme et estably leurs procureurs generaulx et messagers especiaux de Mahieu de Dours jan Warembourg et jehan le Turcq Ausquelz et chascun deulx seul et pour le tout ont donne pover et mandement absolu et irrevocable de pour et ou nom desdictz vendeurs aller et comparoir pardevant bailly et hommes mazuriers de la seigneurie de Pietre et par tout ailleurs ou il appertiendra Et illecq ratiffier accorder la vente dessusdicte le faire de nouveau se mestier est et oudict nom dessaisir et desvestir et la saisine et adheritement estre faicte et baillie audict acheteur ou son command comme feroient lesdictz vendeurs estans presens Et ad ce faire et que en deppend y estre faictes toutes sollempnitez de loy requises et accoustumees sans y estre requis mandement plus especial Promectant ce que dessus avoir pour agreable a tousiours Soubz lobligation de tous leurs biens presens et <sup>593</sup>advenir Renonchant a toutes choses contraires En tesmoing de ce nous avons mis le seel aux causes de ladicte ville a ces presentes Qui furent faictes et passees le XIIIe doctobre quinze cens soixante treize Pardevant Pierre de Houplines advoe et Georges Pilliziere eschevins

---

<sup>592</sup> Folio 377r°.

<sup>593</sup> Folio 377v°.

Lequel procureur en vertu du povoir a luy donne par lesdictes lettres sest dessaisy et desherite par rain et baston en la maniere accoustumee es mains de moy bailly desusnomme en la presence desdictz hommes / desdictz sept quartiers de terre labourable ainsy quilz se comprend et extend sans aultrement livrer par mesure seantz en la paroisse Dauberch seignourie dudict Pietre haboutant de soleil levant a la vefve jehan Thoulouze daultre a la ruelle du Breul et de soleil couchant a jehan Pecqueur Et ce suyvant la vente que en aueroient fait sesditz M<sup>es</sup> au prouffict de jehan Herreng filz de Nicollas demeurant a le Venthie moiennant les deniers a Dieu / vin / coultage principaulx deniers / cherges devises et conditions au loing portez esdictes lettres Consentant et accordant la saisine et possession dicelle terre en estre faicte et baillie audict Herreng acheteur Suivant quoy la saisine reel fonsiere et propriétaire desdictz sept quartiers de terre en aueroit este faicte et baillie audict acheteur Pour par luy ses hoirs ou aians cause en joyr audict tiltre dachapt heritablement perpetuellement et a tousiours conformement a la teneur desdictes lettres dachapt dessus reprins Ce faict ledict Herreng apres avoir este adherite dicelle terre comme dict est a declare le avoir vendu et par ces presentes vend audict Seigneur de Pietre pour le meisme pris quil auroit achete desdictz le Misre selon quil est cy dessus reprins Et ad ces fins veullant par ledict Herreng effectuer ladicte vente il sest dicelle pieche de terre dessaisy et desherite es mains de moy bailly dessusnomme en la presence que dessus de tout la dicte pieche de terre au prouffict dudict Seigneur de Pietre Consentant et accordant la saisine et possession estre faicte et baillie audict Seigneur de Pietre ou procureur pour luy Sieuvant quoy<sup>594</sup> la saisine reel et propriétaire dicelle pieche de terre aueroit este faicte et baillie par main prestee a Grand le Roy ce acceptant ou nom et comme procureur especial dudict Seigneur de Pietre fonde par lettres procuratoires faictes et passees pardevant jehan Viron esquier lieutenant de Monsieur le gouverneur de Lille en datte du vingt septiesme de juing quinze cens soixante et dix Pour dicelle pieche de terre joyr user et posséder par ledict Seigneur de Pietre ses hoirs ou aians cause audict tiltre dachapt heritablement perpetuellement et a tousiours toutes lesquelles dessaisine et saisine ont este dictes et jugies par lesdictz hommes a la semonce et conjure dudict bailly estre bien et deuement faictes et les sollempnitez de loy en tel cas requises et accoustumees ont este gardees et observees tant que pour souffrir Sauf tous droix Promectans par lesdictz comparans asscavoir par ledict Mahieu de Dours en ladicte quallite lesdictes dessaisine et saisine tenir et entretenir sans jamais aller au contraire Et par ledict Herreng ladicte vendition dessaisine et saisine par luy faictes et choses dictes aussy tenir et entretenir sans aller au contraire Soubz lobligation asscavoir ledict de Dours de tous les biens et heritaiges de sesditz maistres et maistresses et ledict Herreng de tous ses biens et heritaiges quilz ont respectivement soumis et obligez vers tous Seigneurs et justices Renonchant a toutes choses contraires ad ces presentes En tesmoing de ce nous avons mis a ces presentes chacun notre seel quy furent faictes et passees en la ville de la Bassee lieu par nous emprunte le quatriesme de mars quinze cens soixante et treize

---

<sup>594</sup> Folio 378r°.

<sup>595</sup>Reconnoissance au prouffict du Seigneur de Pietre fait par Charles Mesurolles mosnier touchant la ruyelle et plantins allant au mollin de ladicte seignourie appertenans ladicte ruielle et plantins audict Seigneur

A tous ceulx que ces presentes lettres verront ou orront Adrien vande Heede escuier Seigneur de Flequieres Conseiller du Roy nostre Sire et lieutenant de sa Maieste commis par provision en la gouvernance de Lille et aux appertenances salut Scavoir faisons que le jourdhuy pardevant nous Comparut en sa personne Charles Mesurolle filz de feu Mahieu demourant pour le present a Fournes Lequel recongnut Comment pardevant asscavoir en lan mil cinq cens trente huict il avoit obtenu en don seignourial de feu Maistre Guillaume Hangouart en son vivant Seigneur de Pietre des Pummereaux etc Conseillier de Lempereur nostre Sire et son president Darthois , Le front de chemin estant contre le jardin de la maison appertenant a luy comparant seant empres le mollin de Pietre Asscavoir en longueur de environ cent cinquante cinq piedz et depuis le opposite de la motte dudict mollin en allant contre ledict jardin de long en long la ruielle appelee vulgairement La ruielle du mollin de Pietre jusques au petit chemin menant dicelle ruielle a le maison que fut Henry le Turcq de present a Pierre Toucry En comprehension seulement que pour y pouvoir planter quelque haye au lieu de celle quy y estoit lors appertenant audict feu Seigneur<sup>596</sup> de Pietre Laquelle estoit lors de petite valleur et mal en ordre Et a condition que ladicte haye devoit pour ledict an estre coppee par Anthoine Sanse pour lors censier de Pietre ne fust que ledict Mesurolle en fist le content dicelluy censier A condition aussy que ledict Charles Mesurolle seroit tenu et promist de paier pour ledict front a luy arrente tel et comme dict est de rente seignouriale chascun an audict Seigneur de Pietre ses hoirs ou aians cause ung chapon au terme de Noel Sur lequel front et du long icelluy contre sondict gardin icelluy comparant auroit lors apres ledict octroy et pour joyr dicelluy plante et assis une haye laquelle y est presentement en bon et souffissant estat et par ce moien a joy et proufficte joyst et prouffite dudict front selon loctroy dicelluy Or est il que ledict Charles Mesurolles comparant se est ingere et advanchie depuis trois ou quatre ans encha de planter sur ladicte ruielle du mollin plusieurs plantes de blancqs obeaulx jusques au nombre de vingt trois plantes et plus et ce sur le front de ung bonnier et trente verghes de terre a labour appertenant a Guillaume Hangouart escuier Seigneur de Pietre fils dudict Seigneur president a cause du gros de son fief abordans de front a ladicte ruielle du mollin de Pietre a laultre coste du jardin dudict comparant Ladicte ruielle comme dict est entre deux Combien que ladicte ruielle dit la ruielle du mollin appertient en toute longueur largeur et comprehension audict Seigneur de Pietre sauf le passage que y doibt avoir ledict Mesurolles pour sondict mollin et maison Pour raison desquelz plantains dobeaulx fouynes fossez et emprinses pour ce faictes par ledict comparant Il auroit emprins a tort et indeuement sur les droix dicelluy Seigneur et Pietre et seroit vers luy escheu en plusieurs amendes de soixante solz parisis chascune de XXVII deniers flandres le sol Surquoy ledict comparant veullant en ce user de bonne foy et congnoissant son tort Il a revocque et par ces presentes revocque lesdictz troubles et emprinses promectant ne plus faire le samblable Et sy a recongnu et recongnoist et tout ce que dessus et de tous pointz les droicx possession et saisines dudict Seigneur de Pietre Congnoissant davantage il comparant ne avoir aucun droict en et sur ladicte ruielle du mollin soit a lendroit de sondict heritaige ou autrement ne de pouvoir picquier fouyr

---

<sup>595</sup> Folio 400r°.

<sup>596</sup> Folio 400v°.

hauer planter ne emprendre en sorte que ce soit sur icelle Ains que elle compete et appartient comme dict est audict Seigneur de Pietre Lequel est par tout ruyer en icelle sa seigneurie Sauf comme dict est Le passage que ledict comparant doit avoir sur icelle ruielle pour sesdicts mollin et maison Et partant ledict comparant<sup>597</sup> a renonchie et par ces presentes renonche au prouffict dudict Seigneur de Pietre a toutes lesdictes plantes par luy assizes sur ladicte ruielle Et sy a promis outre ce de satisfaire lesdictes amendes que il congnoit pour ce avoir fourfaictes Promectant ce que dessus entretenir sans y contrevenir soubz lobligation de ses biens meubles cateulx et heritaiges et ceulx de ses hoirs presens et futurs envers tous seigneurs et justices Promectant recongnoistre ratiffier et agreer ce que dessus pardevant messieurs les president et gens du conseil Darthois quant somme et requis en sera a ses despens Renonchant a toutes choses contraires a ces presentes a quoy entretenir avons ledict comparant condempne et condempnons par nostre sentence et de son consentement En tesmoing de ce nous avons ces presentes fait seller de nostre seel Ce fut fait le vingthuitiesme jour de novembre anno quinze cens soixante cinq



Recongnoissance faite par Anthoine Fruleux au prouffict du Seigneur de Pietre des plantins contre ladicte ruielle du mollin et quil na droict de passer de car ny cheval sur les terres ny ruielle du Brusle appartenantz audict Seigneur de Pietre

je Anthoine Fruleux heritier du mollin de Pietre et de la maison jardin et heritaige que jay y appendant scituez contre la ruielle dudict mollin Congnoy que tout le plantin que Charles Mesurolles mon predicesseur mosnier et duquel ay eu le droict par achapt desdicts mollin lieu et heritaige avoit pardevant plante en la ruielle dudict mollin du long le flegard et camp appartenant au Seigneur de Pietre / appartient du tout audict Seigneur de Pietre / tant de son droict que recongnoissance pardevant en faite par ledict Mesurolles Et aussy que je entant que besoing fut je ay renonchie et quictie renonche et quicte ( en considerations de plusieurs plaisirs que jay receu dudict Seigneur ) ausdictz plantins flegard et droict de planter contre ledict camp sy aucuns droictz diceulx me competoit et appartenoit demourant nonobstant ce deues vaillables et courrantes perpetuellement et a tousiours toutes rentes droictz et redevanches payees et accoustumees que moy mes hoirs et aians cause<sup>598</sup> seront tenus paier et entretenir a tousiours Comme aussy je congnoy que tous et quelconque les terres et heritaiges tant de la cense des Mottes que de Pietre ruielle du Brusle et aultres quelzconques que ledict Seigneur de Pietre a en icelle sa seigneurie ne doibvent passage aux chariotz ny chevaulx soit avecq car ou sans car audict mollin mosniers fermiers et heritiers diceulx mollin et heritaiges y appendans Tout ce que dessus je congnoy estre veritable et promais a tousiours entretenir et estre entretenu par mes hoirs et aians cause Meismes de ne point vendre ledict mollin et heritaiges sinon a la charge de lentretienement de tout ce que dessus que je promais en vente faisant declarer expressement / et aussy recongnoistre avecq cestes a mes despens par tout ou requis seray Tesmoing mon saing cy mis avecq les seingz de Laurens Hennart lieutenant de ladicte seigneurie de Pietre Grand le

---

<sup>597</sup> Folio 401r°.

<sup>598</sup> Folio 401v°.

Roy jehan le Turcq Mahieu Carpentier et Anthoine Binault hommes juges mazuriers dicelle seigneurie pardevant lesquelz jay ce que dessus aussy passe recongnu et accorde / et requis le signie avecq moy en approbation de verite Ce que nous lieutenant et hommes masuriers pardevant lesquelz ce que dessus a este faict recongnu passe et accorde Avons signe le treiziesme jour doctobre quinze cens soixante quinze Ainsy signe Laurens Hennart Anthoine Fruleux Anthoine Binault Grard le Roy jan le Turcq et Mahieu Carpentier



Recongnissance Phles le Fer mosnier touchant les passaiges de son cheval sur les terres et ruielle du Brusle appartenans au Seigneur de Pietre dont il a requis grace

Nous Phles le Fer et Franchoise de Beusart femme dudict Phles deuement et agreablement auctorisee mosniers de Pietre et y demourans Congnoissons avoir requis et requerons par cestes grace congie et licence a Guillaume Hangouart escuier Seigneur de Pietre quy le nous a accorde de povoir avecq noz chevaulx servans a nostredict mollin passer sur la ruielle du Brusle et terres que ledict Seigneur de Pietre a a luy appartenans en icelle seigneurie tant <sup>599</sup>de sa cense de Pietre que de sa cense des Mottes et aultres siennes consens tant et sy longuement quil luy plaira et jusques a son rappel et de ses hoirs et aians cause pourveu et a condition que nous nosdicts chevaulx cacheurs<sup>600</sup> serviteurs et maismes ne feront audict Seigneur de Pietre et ses censiers et rentiers aucun dommaige tant en leurs bois plantins advestures labeurs heritaiges et terre ne autrement en fachon quelconcque a peril de paier les amendes quy pour ce seroient deues audict Seigneur par les droictz coustumies et privileges dicelle seigneurie et oultre ce les droictz de prise prison chepaige<sup>601</sup> dommaiges et interestz Aussy a condition que a raison desdictz passaiges de cheval et pied que povons avoir faict et ferons a ladvenir sur lesdites ruelles terres et heritaiges ne polra estre par nous et noz aians cause acquis preiudice au droict dudict Seigneur de Pietre ny de ses hoirs et aians cause Ny par nous et nosdicts hoirs et aians cause estre allegnie acquerir ny pretendre quelque droict de possession saisine propriete prescription ne aultre pour quelque longue joissance et laps de tems que en polrions avoir joy use et possesse joyrons et possederons et fut de dix ans vingt ans trente quarante ou soixante ans et plus voire par temps immemorial Congnoissons que lesdictes ruielle du Brusle appartient audict Seigneur et que icelle et toutes terres et heritaiges que ledict Seigneur de Pietre a gisant en sadicte seigneurie de Pietre ne ont oncques deu et ne doibvent passage aux chariotz ny chevaulx soit avecq car ou sans car au mollin de Pietre heritiers mosniers et occupeurs dicelluy ny a personnes quelzconques Tout ce que dessus nous Phles le Fer et Franchoises de Beusart auctorisee comme dessus heritiers dudict mollin de Pietre et y demourans congnoissons estre veritable et promettons a tousiours entretenir et estre entretenu par nous et nosdicts hoirs et aians cause Promectans et accordans que sy nous ou nosdictz hoirs vendions lesdict mollin et heritaiges cy appendans Nous ne le vendrons sinon a la charge de lentretienement et recongnissance de ce que dessus et que de ce sen fera declaration note et condition expresse es lettres de ventes tant verballes que reelles

---

<sup>599</sup> Folio 402r°.

<sup>600</sup> Cacheurs : chasseurs ?

<sup>601</sup> Chapaige : geôle.



Promectans ceste recongnoistre a noz despens pardevant Messieurs les president et gens du conseil Dartois baillys hommes de fief et masuriers de ladicte seigneurie de Pietre notaires royaulx du conte Dartois et par tout aillieurs ou il appertiendra et requis seront dudict Seigneur de Pietre Renonchant a toutes choses contraires a cestes meismes au droict disant generale Renonchiation ne valloir sy <sup>602</sup>lespeciale ne precede En tesmoing de quoy nous avons ceste signe de noz seingz manuelz avecq les saingz de Laurens Hennart lieutenant de ladicte seigneurie de Pietre Gard le Roy jehan le Turcq et Mahieu Cartpentier juges masuriers dicelle seigneurie pardevant lesquels nous avons ce que dessus aussy passe recongnu et accorde et iceulx requis le signer avecq nous en approbation de verite Ce que nous lieutenant et hommes juges masuriers pardevant lesquels ce que dessus a este faict recongnu passe et accorde Avons aussy signe le dixiesme jour de mars quinze cens soixante dix huit Ainsy signe Laurens Hennart Phles le Fer Gard le Roy jehan le Fer Mahieu Carpentier et Franchoise Debeausars



Requete au Roy pour adjourner au grand conseil a Malines Les lieutenants et officiers d'Auberch et aultres turbateurs touchant les assiettes de tailles qui se font et coeuillent sur tous les bourg et hameaux de la paroisse dudict Auberch

Remonstre en suppliant treshumblement Guillame de Hangouart escuier Seigneur de Pietre des Pummereaulx etc demt en vostre ville de Lille Que a luy entre aultres ses biens fiefz et seignouries competent et appertienent lesdictes terres et seignouries de Pietre et des Pummereaulx gisans en vostre pays et conte Dartois resortissans en premiere instance en vostre conseil provincial dudict Arthois Esquelles seigneurie ledict remonstrant a toute justice haulte moienne et basse avecq tous droix appertenans a icelle Et sy a bailly lieutenant hommes de fiefz juges sergeans et aultres officiers pour exercer la justice dicelles seignouries, se paiant les tailles ordinaires de vostre Majeste Dicelles deux seignouries et hameaux de Pietre et des Pummereaulx en vostredict pays Darthois au recepveur de vostre Majeste illecq / Estans neantmoins lesditz deux hameaux de Pietre et des Pummereaulx de la paroisse du villaige Dauberch scitue en vostre pays et conte de flandres tenu du chasteau de Warneston et resortissant en la chambre legale dudict flandres La quelle paroisse dudict Auberch par dessus ladicte seigneurie et bourg Dauberch se consiste en quatre hameaux Asscavoir lesdicts deux hameaux de Pietre et des Pummereaulx scituez soubz Arthois comme dict est, et les hameaux de le Val et du Ploich gisans en vostre chastellenie de Lille Or est il que de tout temps a este use et observe que pour comprendre et asseoir lesdicts deux hameaux de Pietre et des Pummereaulx en quelque taille ou contribution avecq ceulx dudict Auberch et ceulx desdicts hameaux de le Val et du Ploich il est requis de evocquier en especial les Seigneurs leurs baillys lieutenant censiers et aultres manans desdicts deux hameaux de Pietre et des Pummereaulx affin de avoir sur ce leur avis et consentement et estre presens ausdictes assiettes et contributions Auquel cas de leur consentement donne, a este de tous temps use et accoustume comme il est raisonnable de lever et laisser lever par les manans desdicts hameaux de Pietre et

---

<sup>602</sup> Folio 402v°.

des Pummereaulx leur contingeant par telz moiens que eulx memes trouveroient convenir pour leur milleure commodite selon leur maniere et cotte <sup>603</sup>anchienne comme il sensieult Cest asscavoir que lesdictes tailles et contribution se repartissent et ont tousiours este repartis en trois tierchs, dont le bourg et seignourie Dauberch en paie lung des tierchs / les hameaulx de Pietre et des Pummereaulx le second tierch / Et les hameaulx de le Val et du Ploich le troisieme tierch Suivant laquelle cotisation le tierch assigne sur lesdictz hameaulx de Pietre et des Pummereaulx se coeuille et repartyt entre lesdicts deux hameaulx en trois aultres tierchs / dont ceulz de Pietre en paient lun / et ceulx desdicts Pummereaulx les deux aultres tierchs / Laquelle cotte ainsy par eulx mesme collectee comme dict est se paie par les commis desdictz deux hameaux la ou il appertient Et de ce ainsy joyr user et possesser est ledict remonstrant et sesdicts officiers censiers rentiers subiectz et manans de sadicte seignourie de Pietre en toutes bonnes possessions et saisines affirmatives negatives et mixtes desquelles ilz ont joy use et possesse par tel et sy loing temps quil nest memoire du contraire ny du commencement du moings par temps suffissans pour bon droict et possession avoir acquis garder et retenir paisiblement et publicquement Au veu et sceu des Seigneurs bailly lieutenant / eschevins asseurs et collecteur de taille manans et habitans de la seignourie Dauberch et des hameaulx et seignouries des Pummereaulx, Ploich et de le Val / et de tous aultres qui ce ont vollu veoir et scavoir Ce neantmoing / Pierre Chombart lieutenant de ladicte seignourie Dauberch, jehan de le Barre filz de feu Enguerand / jehan du Mez, Martin de le Barre le jeusne dict Martinot / Guillaume de Lespiere / Eloy du Hamel et Franchois Fascon eschevins de ladicte seignourie Dauberch et y dms (saulf ledict Franchois Fascon quy est demt en la seignourie du Ploich, jehan de le Barre filz de feu Martin, jehan Caron dict Faucquembergue demt audict Auberch, Vaas Hochede demt audict Ploich chastellenie de Lille, Martin Vignoble censier de le Val, Pierre Matelin demtz audict le Val chastellenie de Lille, Mahieu Vignoble, Tomas Bonnel, jehan Hochede, Martin Hennart, Martin Haiart et jehan de Rache dems audict Pummereaulx Se sont ingerez par ladveu lung de laultre tant par eulx mesmes que par aultres dont ilz ont eu le fait pour agreable de leur auctorite privee indeue et desraisonnable et sans le gre congie et licence dudict Seigneur de Pietre Remonstrant de exigier et prendre de ceulx de Pietre declaration de toutes les terres et heritaiges desdictes seignouries de Pietre et des Pummereaulx <sup>604</sup>tant appartenans audict Seigneur dudict Pietre que de tous ses rentiers tant manans sur icelle seignourie de Pietre que demourans en aultres villes et villaiges, et ce fait, asseoir sur toute ladicte paroisse Dauberch de Pietre des Pummereaulx le Val et ploich tous egallement a ladvenant de quatre patars sur chascun bonnier / Comprendant en ladicte assiette tant les terres dudict Seigneur de Pietre que les terres de tous les rentiers dicelluy Seigneur de Pietre , soient manans audict Pietre ou dems aillieurs Et ce fait outennoie <sup>605</sup> ledict jehan du Mez collecteur audict Pietre y exigier et recepvoir ladicte assiette de quatre patars de chascun bonnier Lequel tant par la commission charge et adveu des dessusnommez que de son auctorite se y est trouve et este par noeufz ou dix divers jours et foys pardevers les domicilles et personnes des censiers et de vingt six manans dudict Pietre leur demander et commander de paier et les voullant faire paier ladicte assiette et y a recheu huict patars pour la part de jehenne le Boidin vefve de jehan le Turcq censiere dudict Seigneur de Pietre de ung lieu et deux bonniers ung cent trente sept verghes

---

<sup>603</sup> Folio 404v°.

<sup>604</sup> Folio 405r°.

<sup>605</sup> outennoie : du verbe outrenoer= traverser, parcourir.

dheritaiges Et ainsy de plusieurs aultres tant censiers et heritiers que povres honnestes et simples gens fort timides tous dems audict Pietre En fourfaisans et emprendans sur les droictz et auctorite dudict Seigneur de Pietre et de sa seigneurie et faisant exploictz sur icelle sans requerir congie assistance et gre dudict Seigneur commectant et fourfaisant vers luy plusieurs amendes en nombre de vingt six de soixante solz parisis monnoie Royale Darthois de XXVII deniers flandres le solz chascune desdictes amendes Saulf en toute juste calculation Lesquelles assiettes ont este faictes tant pour faire present dun cheval a Messire Adrien de Noielle Chevalier Seigneur de Marle frere et curateur de noble homme Phles de Noyelle Seigneur dudict Auberch pour subvenir aux despens de bouche que environ trente six ou quarante soldatz avecq leur sieulte de femmes et valletz aueroient faict audict Auberch et audict des Pummereaulx y aians logiez une nuict environ le IIIII novembre XV<sup>c</sup> IIIII<sup>xx</sup> six Aussy pour payer audict jehan de le Barre filz de feu Enguerand et Anthoine de Henin censiers desdicts Seigneurs<sup>606</sup> de Marle et Dauberch pour avoir carie environ le IIIII octobre dernier de leurs cars et chevaulx ledict Seigneur de Marle de Bethune a Auberch pour ses affaires et le ramene Pareillement pour subvenir aux despens de avoir par lesdicts Dauberch traictie le recepveur dudict Seigneur de Marle venu dudict Marle pays Darthois a Auberch pour les affaires desdicts Seigneurs de Marle et de Auberch Et aussy pour satisfaire a plusieurs despens de bouche par aultres foys faictz par lesdicts lieutenant eschevins assoeurs et collecteur de tailles officiers et aucuns manans dicelle seigneurie Dauberch Ces choses considerees et desirant ledict remonstrant soy pourveoir contre telles emprinses et usurpations torchonnières par voye et remede de justice Il se retire pardevers vostre Majeste la suppliant treshumblement luy vouloir accorder vos lettres patentes de commandemens en tel cas pertinentes addressantes au premier vostre huissier sur ce requis en vertu desquelles soient faictz expres commandemens de par vostre Majeste soubz certaines grosses paines applicable au prouffict dicelle ausdicts Pierre Chombart lieutenant de ladicte seigneurie Dauberch, jehan de le Barre filz de feu Enguerand, jehan du Mez, Martin de le Barre le josne dit Martinot, Guillaume de Lespieres, Eloy du Hamel et Franchois Fascon, eschevins de ladicte seigneurie Dauberch et y dems saulf ledict Franchois Fascon quy est demt en la seigneurie du Ploich, jehan de le Barre filz de feu Martin, jehan Caron dict Faucquebercque dems audict Auberch, Vaas Hochede demt audict Ploich chastellenie de Lille Martin Vignoble censier de le Val, Pierre Matelin demtz audict le Val chastellenie de Lille Mahieu Vignoble, Thomas Bonnel, jehan Hochede, Martin Hennart, Martin Haiart et jehan de Rache dems audict Pummereaulx Que incontinent et sans delay ilz aient a casser et mettre a neant lesdictes tailles et impositions par eulx induement faictes comme dict est sur et au prejudice dudict remonstrant de sadicte seigneurie de Pietre de ses<sup>607</sup> censiers rentiers et manans dicelle seigneurie et ses heritaiges et droictz quil a en icelle Et passer condamnation quilz ne pvoient ne debvoient ce faire sans le gre et expres consentement dudict Seigneur de Pietre / et lesquelles tailles et assiettes Il plaisra a vostre Majeste casser et mettre a neant En faisant aussy commandement sur la meisme paine applicable comme dict est aux dessusnommez quilz cessent doresnavant de plus faire le samblable Et ausurplus que lesdicts turbateurs aient et signament ledict jehan du Mez a paier a icelluy Remonstrant le nombre de vingt six amendes chascune de soixante solz parisis monnoy dicte Darthois En adjournant en cas dopposition refuz ou delay les

---

<sup>606</sup> Folio 405v°.

<sup>607</sup> Folio 406r°.

dessusnommez a comparoir pardevant les president et gens de vostre grand conseil a Malines Pour lesdicts commandemens veoir decreter ou y contredire et en oultre proceder comme il appertendra Ausquelz de vostre grand conseil il plaira a vostre Majeste adresser le committimus de vosdictes patentes attendu que les dessus nommez turbateurs sont demourans soubz diverses provinces et jurisdictions sicomme flandres, Arthois et Lille et pour eviter a multiplication de proces / diversite et contrariete de sentences quy se polroient ensuivre pardevant diverses justices pour une mesme matiere du tout connexe Sy ferez bien Ladicte requeste a este accordee par lettres patentes deslivrees le XV<sup>e</sup> dapvril 1587



Relation des lettres patentes obtenues sur la susdicte requeste le quinziesme dapril an XV<sup>c</sup> quatre vingtz sept

A mes treshonorez et doubtez sieurs Messieurs les President et gens du grand conseil du Roy nostre Sire en sa ville de Mallines Franchois de Forcheville huissier darmes dudict sieur Roy en sondict grand conseil audict Mallines de la residence de la ville de la Bassee Vostre humble et obeissant serviteur en tout mesdicts treshonorez et doubtez sieurs Plaise vous scavoit que<sup>608</sup> en vertu des lettres pattentes en forme de commandemens obtenue et a moy presentee par Guillaume de Hangouart escuier Sieur de Pietre et des Pummereaux A sa requeste pour icelles interiner et mettre a execution le vingtiesme jour du mois de juing XV<sup>c</sup> quatre vingt sept me suis transporte es villaiges et paroisse Dauberch et es hameaulx de Pietre des Pummereaux le Ploich le Val Esquelz lieux apres assistance par tout requise ou il appertenoit me suis transporte es domicilles et pardevers les personnes de Pierre Chombart lieutenant dudict Auberch jehan de le Barre filz Dengrand<sup>609</sup>, jehan du Mez, Martin de le Barre le jeusne, Guillaume de Lespierre, Eloy du Hamel, Franchois Fascon eschevins dudict Auberch jehan de le Barre filz de deffunct Martin, jehan Carron dict Faucquenbergh, Martin Vignoble, Mahieu Vignoble, Thomas Bonnel, Martin Hennart, Martin Haiart, jehan du Rache, Ausquelz et a chascun deulx jay fait commandement par le Roy nostre sire sur paine et amende de cent Reaulx dor applicable audict sieur Roy et aultant quil leur touche de incontinent et sans delay casser et mettre au neant les tailles et imposition mentionee esdictes lettres desquelles leur avoie fait lecture sur et au preiudice dudict impetrant et que dorre en avant ilz cessent de plus faire le samblable et signament auroie fait commandement a jehan du Mez collecteur / Payer audict impetrant vingt six amendes de chascune desdictes amendes soixante solz parisis monnoye Darthois aussy pour les causes au loing reprise luy en faisant lecture parlant a sa personne Ausquelz commandemens seroient rendus opposans Pour laquelle opposition leur auroie donnez et assignez jour a estre et comparoir pardevant vous mesdicts treshonnorez sieurs audict grand conseil au plais du vendredy dixiesme jour du mois de juillet audict an ou a lendemain sil y avoit empeschement audict conseil Pour sur tout<sup>610</sup> dire leur cause dopposition Respondre proceder et finalement veoyr ordonner selon droict et raison Certiffiant ce que dessus tesmoing mon seing manuel cy mis Le jour et an dessusdict Leur ayant delivre coppie desdictes lettres patentes Ainsy signe F de Forcheville

---

<sup>608</sup> Folio 406v°.

<sup>609</sup> Enguerand.

<sup>610</sup> Folio 407r°.



Commission de complaincte en cas de novellite pour estre  
paye de rentes seigneurialles

Les president et gens du conseil Darthois Au premier huissier dudict conseil sur ce requis salut / Expose nous a messire Adrien de Noielle Chevalier baron du Rossignol Seigneur de Marles Baiencourt Caurroy etc frere curateur legitimes et aiant ladministration des biens de Phles de Noielle Sieur Dobert / soy complaingnant en cas de novellite que entre aulz<sup>611</sup> aultres ses biens terres seignouries et rentes Luy appertient la seignourie de Cliquetrye seant au pays Dartois A raison de laquelle luy est deubt plusieurs menues censives au villaige Dillies comme argent bled avaine chappons poulles et aultres dont sont chargees plusieurs heritiages et terres / Dont la declaration est icy jointe en certain caiet en papier que les proprietaires possesseurs et occupeurs des terres et manoirs chargees desdictes rentes luy sont tenu paier a ses recepveur ou commis par chascun an au jour des escheances selon la preciation que se fait<sup>612</sup> par chascunes annees par les officiers diceluy exposant De quoy joyr et possesser il est en toutes bonnes possessions et saisines en la qualite cy dessus au veu et sceu de Gerard Billau, jehan Messeant, jacques Gaquier, josse le Febvre, jehan Helbault, Marguerite Lebland vefve de Estienne Lomiau, Guillaume le Plancques filz et heritier de Gilles le Plancque de secondes noepces, jehan de Courcelle tant comme occupeur des terres et manoir de Loy le Roy que ceulx de Me Adrien Morel, Germain de le Ruelle, Martin Pottier, Mahieu Toulouse tous demourans en la paroisse Dillies et Mahieu Vignoble demourans a Pummereaulx, Nonobstant ce depuis an et jour encha se sont ingerez de joyr user et possesser desdictz manoirs et terres sans avoir vollen paier une annee desdictes rentes escheues au jour de Noel dernier En troublant partant ledict exposant en sesdicts droix A tort sans cause requerant sur ce nostre provision Pourquoi nous vous mandons et commectans que a la requeste dudict exposant adjournes a certain brief jour et heure lesdictz turbateurs a comparoir pardevant vous audict lieu desdictz manoirs et terres pour tous lieux contentieux Et illecq tenez maintenez et gardes de par le Roy nostre Sire et nous pour justice Ledict exposant en sesdicts droix, faisant commandemens aususdicts turbateurs de restablir lesdicts troubles Et en cas dopposition / note ostee et la chose contencieuse desdictes parties prinse et mise en la main dudict Sr Roy Adjournes les opposans a jour competent a comparoir audict Conseil pour dire leurs causes dopposition Et silz se laissoient mettre en deffaut a ladicte remise que fait en aurez de ce faire vous<sup>613</sup> donnons pouvoir donne soubz le contre seel dudict conseil le deuxiesme de jullet XV<sup>c</sup> IIII<sup>xx</sup> sept Ainsy signe Barat , pour XII turbateurs seize patars



Aultre commission en cas de simple saisine pour estre paye de  
rentes seigneurialles

---

<sup>611</sup> aulz ?.

<sup>612</sup> Folio 407v°.

<sup>613</sup> Folio 408r°.

Les President et gens du Conseil Dartois Au premier huissier dudit Conseil sur ce requis Salut Expose nous a messire Adrien de Noielle Chevalier baron du Rossignol Sieur de Marles Baiencourt etc soy complainant en cas de simple saisine que entre aultres ses biens luy appartient la seigneurie de Thieulerie a cause de laquelle il a droict de prendre et avoir par chascun an plusieurs menues censives / sy comme dargent bled avaine chappons poulles et autrement Dont sont chargez plusieurs terres et heritaiges cy joint par declaration que les possesseurs et occupeurs sont tenus paier au jour des escheances selon lapreciation que se fait / par chascun an par les officiers dicelluy exposant Dequoy joir et posséder Il est en toutes bonnes possessions et saisines Au veu et sceu de Mathieu <sup>614</sup> demourant a Pummereaulx lequel sest ingere joir user et posséder desdicts manoir et terres declarez au caiet cy joint sans avoir vullu paier trois annees darrieraiges desdictes rente escheues au jour de Noel dernier A tort sans cause requerant sur ce nostre provision Pourquoi nous vous mandons et connectons que a la requeste dudict exposant faictes expres commandement de par le Roy nostre Sire et nous pour justice audict turbateur que incontinent il ait a remectre maintenir et garder ledict exposant en sedictz droix et de reparer les troubles dessusdicts Et en cas <sup>615</sup> dopposition assignez jour competent a loppasant a comparoir audict conseil pour dire ses causes dopposition Et proceder en outre selon raison de ce faire et rescripre vous donnons pouvoir donne soubz le contre seel dudict Conseil le deuxiesme de juillet XV<sup>c</sup> IIII <sup>xx</sup> sept Ainsy signe S Barat



Instruction pour mettre a execution par ung huissier lesdictes deux complaints ascavoir celle de novellite pour les rentes dont on est en possession de ung an den estre paie dicelle de simple saisine pour les rentes de plusieurs annees dont on est en possession de avoir user <sup>616</sup> depuis dix ans

Gerard Billau demourant en la paroisse Dillyes tient cottierement de la seigneurie de la Cliquetrye demy bonnier de terre a labeur / tenant a celles de Hurtevent / du deuxiesme sens a le ruelle et cours de la plancke a le Broille Et du tiers sens a le ruelle qui maisne de Ligny le petit a le croix du Hus

*En marge:* Receu dudict Billau la somme de XIX florins I sol tournois par lhuissier

Item pardessus ce trois cens daultre terre mis es viez pappiers pour Il c seulement venant par succession de jacques Moude prins en ung bonnier contre jan Billau son frere y tenant jenne Desmasieres et Anthoine le Febvre filz josse qui ont la reste Item tient encoires ledict Gerard a cause jenne le Doux sa femme la moictie de six cens de mesure tenant le tout au ponchel du Hus / et a la ruelle qui maisne de Ligny le petit audict ponchel Pour quoy il est defaillant de paier dix noef florins XVIII deniers monnoy Dartois pour lenthierie annee escheu noel XV<sup>c</sup> IIII <sup>xx</sup> six etc lavaine et plume deductes a largent selon la priserie audict an comme lon est accoustume faire – XIX florins I sol VI deniers dargent

---

<sup>614</sup> Blanc dans le texte.

<sup>615</sup> Folio 408v°.

<sup>616</sup> user ?.

<sup>617</sup> Jehan Messeant demourant audict Illies occupeur et censier de Guillaume de Lyot Lequel tient aussy de ladicte seigneurie a cause de sa femme fille de jan du Hot un bonnier de terre tenant a jenne Carpentier / aux povres dudict Illies a Phles Guillebert Et a jan Renuy<sup>618</sup> a cause de sa femme

Item tient encoires trois cens trois quartrons demy de manoir prins en une mencaudee contre Pieronne Pichonniere qui a la reste, tenant de boult au chemin de Ligny le grand audict Illies et a luy mesmes

Item dix cens daultre terre tenant ausdictz povres Dyllies a Ansel Flameng / Et a Anthoine le Febvre

Item ung manoir contenant IX c demy tenant de boult audict chemin de Ligny le grand a Illies / et de plat a Guillaume de le Plancque , a cause de sa femme

Item encoires une mesure de manoir et sept cens de terre mis es papiers en deux articles / quy nest qu'une masse / tenant a le voye quy maisne de Ligny le grand a Ligny le petit Et aux terres de le Cure dudict Illies

Item la VI<sup>e</sup> part dune mencaudee de terre prinse au mez Mauroy Pourquoi doit (le bled avaine et plumez) reduictz a l'argent selon les prisees comme lon est accoustume faire de tout temps pour lannee escheant Noel XV<sup>c</sup> IIII<sup>xx</sup> six la somme de LXXII florins I sol VI deniers

jacques Guesquiere demourant a Illyes tient aussy venant de son pere cincq de terre tenant a le voye de Ligny le grand au mollin Mailly a luy mesmes / Et a la vefve Mathelin Ghesquiere

<sup>619</sup> Item six cens a cause de Valentin<sup>620</sup> Carpentier sa femme / tenant aux povres de Herlies Et aux terres Messieurs de Chapitre Darras

Item aultres VI c tenant a luy mesmes Et a ladicte voye de Ligny le grand au mollin de Mailly

Item encoires aultres six cens tenant au chemin dudict Ligny le grand / a Ligny le petit / aux povres dudict Illyes / et a luy mesmes

Item encoires aultres six cens de terre de pareilz aboutz

Item pour la moictie de six cens venant des enfans josse aux Escaches seant au lieu dict les Fossees de le Bassee prins contre jan de Gruson y tenant Et aux vefve et hoirs Pierre Brunel / Et encoires la moictie de six cens demy prins comme dessus Et tenant a la vefve Gilles Coryon Pourquoi doit les grains et plumes evaluez selon la prisee comme lon est accoustume faire pour lannee escheant Noel XV<sup>c</sup> IIII<sup>xx</sup> six – XI florins III sols X deniers

josse le Febvre demourant a Ligny le grand paroisse dudict Illies / Tient aussy quil a acquis de Pierre de le Grange ung cent / Et le tiers dun cent de terre prins en cincq mencaudees contre Martin Potier a cause de sa femme Marguerite de Courcelles jacques jacquemont Et la vefve Pierre Brunel tenant au chemin du mollin de Mailly a Ligny le grand

*En marge:* Receu de Nicolas le Febvre avecq dudict josse XIII florins XVI solz I deniers paris

---

<sup>617</sup> Folio 409r°.

<sup>618</sup> (?)

<sup>619</sup> Folio 409v°.

<sup>620</sup> Sans doute « Valentine ».

Item cinq cens et une mencaudee prins en XVII c contre les susnommez / tenant dun plat et dun boult au chemin du molin de Mailly a le Pierrette Bataille Pourquoi doibt de reste de lan XV<sup>c</sup> IIII<sup>xx</sup> et cinq / cinq patars VI deniers / Et pour les grains et plumes reduictz comme dict est pour lannee escheant au noel XV<sup>c</sup> IIII<sup>xx</sup> et six la somme de XIII florins XV patars I denier

<sup>621</sup>Jehan Helbault demourant en la paroisse dudict Illyes en tient aussy sept cens demy prins en douze cens contre Phles Guillebert y tenant Et sens aux terres de la cense de Cliquetrie Pourquoi doibt pour lannee escheant au Noel XV<sup>c</sup> IIII<sup>xx</sup> et six les grains et plumes reduictz comme dessus - XIII florins XIII patars IX deniers

*En marge:* Receu dudict Hellebaut les deux parties de rentes par lhuissier

Ledict jan comme occupeur pour deux cens de terre prins en deux bonnier contre Anselot Flameng Marie et Franchoise du Vrelie appertenant a Martine du Vrelie vefve de Thomas Libert tenant du boult a la terre de ladicte Franchoise / Et audict Helbault Est defaillant paier pour lannee escheant au Noel XV<sup>c</sup> IIII<sup>xx</sup> cinq et IIII<sup>xx</sup> six - VI florins X patars

*En marge:* Soit expediee commission de simple saisine pour ceste article

Marguerite le Blancq vefve dEstiene comme occupeesse et censiere de jacques jacquemon lequel tient aussy le tiers du camp Caudrelier contenant en tout six mencaudez tenant aux terres de ladicte cense de Cliquetrie Et a Martin Potier a cause de sa femme Pourquoi doibt pour ledict an XV<sup>c</sup> IIII<sup>xx</sup> et six X florins XI solz VIII deniers

*En marge:* Ladicte Marguerite a paye les X florins XI patars VIII deniers et les enffans Pierre le Blancq a promis paier les XX solz au receveur

Les hoirs Gilles de le Plancque de son deuxiesme mariage Tiennent la moitie dune mencaudee prinse contre les enffans dudict Gilles de son premier mariage pour les arrieraiges y compris lan escheant au Noel XV<sup>c</sup> IIII<sup>xx</sup> six deduction faicte de lavaine et plume a largent selon les prisees de chascune annee – XVI florins XVII patars VI deniers

*En marge:* Guillaume de le Plancq Vas et Franchoise de le Plancque sur partage

jan de Courcelles demourant comme dessus censier et occupeur de une mencaudee de terre appertenant a Loys le Roy a cause de sa femme tenant au chemin du quesnel galien / Et aux terres jan Guilbert Parquoy doibt pour lan XV<sup>c</sup> IIII<sup>xx</sup> et six reduction faicte de grains et plumes comme dessus – VII florins VI patars

*En marge:* Ledict de Courcelles a paie ladicte somme

<sup>622</sup>Germain de le Ruelle demourant comme dessus / censier et occupeur de la moitie dun bonnier de terre appertenant aux enfans Pierre Carlier dict Tronce tenant a la voyette quy maisne de le Pierrette au mont des Pummereaulx et a Mahieu Vinoble doibt pour lan escheant au noel XV<sup>c</sup> IIII<sup>xx</sup> six reduction faicte comme dessus la somme de XIII florins XII sols

*En marge:* Receu de Germain de le Ruelles le XIII florins XII sols par lhuissier

---

<sup>621</sup> Folio 410r°.

<sup>622</sup> Folio 410v°.



Claire Lenglard vefve de Guillaume de le Croix demourant comme dessus tient aussy III c XXXVII verghes et demye de terre / tenant au chemin qui maisne desdictz a Ligny le grand / a Guillaume Delyot Et le Anselot Flameng doit pour lan escheu au Noel IIII xx et cincq six florins IIII patars X deniers ob Et lannee IIII xx et six onze florins XII patars Ob reduction faicte du bled et chapon a l'argent selon les prisees desdictes annees faicte ensamble – XVII florins XVI sols XI deniers

*En marge:* Soit faicte pour ceste article comission de simple saisine veu quelle est refusant de paier les ans IIII<sup>xx</sup> cincq et 86

Martin Potier tient deux mesures de terre tirees de six mesures quil a acquis de jehan Ployart et sa femme prins contre jacques jacquemont et Michiel de le Ruelle / tenant audict Michiel / et doit pour lan escheant au Noel XV<sup>c</sup> IIII<sup>xx</sup> et six reduction faicte comme dessus - IX florins XI sols X deniers ob

*En marge:* Receu dudict Potier les IX florins XI sols X deniers par lhuissier

Mahieu Toulouze a cause de Valentine Potier sa femme tient deux mencaudees de terres seant derriere la motte Bouchain tenant aux terres du Seigneur de Coysnes Doibt pour lannee XV<sup>c</sup> IIII<sup>xx</sup> et six XIII florins XII sols

*En marge:* Receu dudict Mahieu Toulouse ladicte somme de XIII florins XII sols lhuissier

Mahieu Vignoble demourant a Pummereaulx tient aussy une mencaudee venant par achapt de Nicolas Facon prinse en ung bonnier contre Henry Carlier a cause de sa femme / tenant au boult a le voyette que maisne de le Pierrette au mont des Pummereaulx / et a jacques Guesquiere

Item une aultre mencaux seant au Renaussart quil a de Henry du Bacquelerot / tenant a le mencaudee cy dessus

<sup>623</sup>Item six cens seans comme dessus quil a acquis de Mahieu Bonel / tenant de deux sens a Martine de Lattre / Et a luy mesmes

Item une mencaudee prinse en ung bonnier contre Marie De Bas / Et le Seigneur de Marles Tenant ausdictes contreperties Et a luy mesmes

Item pour demy demy bonnier venant de Lambert Vinoble prins en ung bonnier contre le terre Pierre Carlier / Doibt pour lannee escheue Noel XV<sup>c</sup> IIII<sup>xx</sup> et six Reduction faicte de lavaine et poulles a l'argent selon la prisee dudict an La somme LXXI florins XVI sols X deniers

jehan de Courcelles / censier et occupeer de VIIIc de terre appartenant a Me Adrien Morel a cause de sa femme / tenant a jan Billau Et a le ruelle que va au Hus,

*En marge:* Ledict de Courcelles a paye audict huissier

Item six cens tenant aux huict cens cy dessus Et a le ruelle du ponchel au Hus Et pour trois mencaudees derriere son lieu / tenant a le piedsente que vat du Hus a le fontaine du Belloy et a Michiel Potier Doibt pour lan XV<sup>c</sup> IIII<sup>xx</sup> et six a raison de samblable reduction quest dict cy dessus - XXV florins VII sols III deniers



---

<sup>623</sup> Folio 411r°.

<sup>624</sup>Phles par la grace de Dieu Roy de Castille etc au premier nostre huissier denomes sur ce requis salut Comme en vertu daultres noz lettres patentes de nous obtenues par Guillaume de Hangouart escuier Seigneur de Pietre des Pummereaulx etc certain nostre huissier darmes a sa requeste eüst faict expres commandemens de par nous sur certaines grosses paines a nous applicables a Pierre Chombart lieutenant de la seigneurie Dauberch / jehan de le Barre filz de feu Enguerand jehan du Mez Martin de le Barre le jeusne / Guillaume de Lespiere / Eloy du Hamel / Franchois Fascon eschevins dudict Auberch / jehan de le Barre filz de feu Martin jehan Carron dict Faucquenberghes / Martin Vignoble / Thomas Bonnel Martin Haiart et jehan de Rache que incontinent et sans delay ilz aient a casser et mettre a neant les tailles et impositions par eulx indeuement faictes / sur et au preiudice dudict impetrant sadicte seigneurie de Pietre ses censiers rentiers et manans et ses heritaiges / et droictz quil a en icelle, le tout plus amplement mentionne esdictes lettres patentes / Et pour le refus y faict par les dessusnommez les eüst Ledict huissier respectivement adiourne a estre et comparoir a certain et competent jour pardevant noz amez et feaulx les president et gens de nostre grand conseil / pour y dire leurs causes dopposition / respondre proceder et finalement veoir ordonner comme de raison / Auquel jour servant a huy eüst Ledict impetrant comparu en jugement et non les susdicts adjournez ny procureur pour eux<sup>625</sup> suffissamment attenduz et appelez comme il appertient Parquoy par le procureur dudict impetrant eüst este requis avoir deffault allencontre iceulx adjournez / Lequel deffault avecq nouvel exploit deu et privation de declinatoire / veue la non comparition desdictz adjournez luy eüst este accorde / selon et en conformite de lacte cy joint Pour ce est il que nous ces choses considerees vous mandons et commectons par ces presentes que a la requeste dudict impetrant Readiournez tous et chascuns les dessusnommez a estre et comparoir a certain et competent jour pardevant lesdicts de nostre grand conseil / pour y veoir adjurer le prouffict dudict deffault tel que de raison le purger sy bon leur samble proceder et sur tout veoir ordonner comme de raison / En certifiant souffissamment audict jour lesdicts de nostre grand conseil de ce que faict en aurez Ausquelz mandons et commettons que aux parties (Icelles oyes) Ilz facent bon brief droict et expedition de justice / car ainsy nous plaist il Donne en nostre ville de Malines le XVI e jour du mois de juillet lan de grace mil cinq cens quatre vingtz et sept de noz regnes a scavoir de Naples et jherusalem le XXX IIIe de Castille Arragon Seville et aultres le XXXII Et de Portugal le VIIIe Et dessoubz estoit escript Par le Roy a la relation du conseil Et seingne j Buysset

Auiourdhy XVIe jour du mois de juillet quinze cens quatre vingtz et sept / deffault / avecq nouvel exploit deu et privation de declinatoire a este et est accorde et octroie a Guillaume de Hangouart escuier Seigneur de Pietre des Pummereaulx etc impetrant comparant au grand conseil du Roy nostre Sire et ce requerant par Me Bertemieu van Eynde son procureur / Allencontre Pierre Chombart lieutenant de la seigneurie Dauberch, jehan de le Barre filz de feu Enguerand / jehan du Mez<sup>626</sup> Martin de le Barre le jeusne, Guillaume de Lespiere, Eloy du Hamel, Franchois Fascon Eschevins dudict Auberch, jehan de le Barre filz de feu Martin, jehan Carron

---

<sup>624</sup> Folio 414r°.

<sup>625</sup> Folio 414v°.

<sup>626</sup> Folio 415r°.

dict Faucquenberghes, Martin Vignoble, Mahieu Vignoble, Thomas Bonnel, Martin Haiart et Jehan de Rache tous adjournez deffailans et non comparans / ny procureur pour eulx, souffissament attenduz et appelez comme il appertient / faict a Malines les jour et an susdicts Ainsy signe j Buisset



## Relation dudict readiournement

A mes treshonnorez sieurs messieurs les president et gens du grand conseil du Roy nostre Sr en sa ville de Malines, Franchois de Forcheville huissier darmes dudict grand conseil de la residence de le Bassee le bien vostre en tout mesdicts treshonnorez sieurs plaise vous scavoir que en vertu de lettres patentes et acte de deffault y annexe donne dudict conseil obtenu et a moy presente par Guillaume de Hangouart escuier Sieur de Pietre des Pummereaulx etc A sa requeste le vingtneufiesme jour du mois daoust XV c quatre vingtz et sept, me suis transporte au villaige Dauberch hameau de le Val Ploich et desdictz Pietre et Pummereaulx Esquelz lieu apres adsistence requise ou il appartenoit me suis transporte es domicilles de Pierre Chombart, lieutenant dudict Auberch / jehan de le Barre filz d'Engrand / jehan du Metz Martin de le Barre le jeusne Guillaume de Lespierre, Eloy du Hamel / Franchois Fascon eschevins dudict Auberch parlant a la personne de chascun deulx jehan de le Barre filz de Martin, jehan Caron dict Fauquenberghes / Martin Vignoble et Mahieu Vignoble / Thomas Bonnel Martin Hayart et jehan de Rache aussy parlant a leurs personnes Saulf ledict Bonnel parlant a son filz / tous lesquelz jay adjourne a estre et comparoir audict grand<sup>627</sup> conseil a Malines pour veoir adiugier le prouffict dudict deffault tel que de raison le purgier sy bon leur samble en oultre y veoir proceder selon droict et raison Apres leur avoir faict lecture desdictes lettres et acte et leur en delivre coppie aux plaix du joeudy vingtzquatriesme jour du mois de septembre audict an mesdicts Sieurs ce que dessus certiffie estre veritable tesmoing mon seing manuel cy mis les jour et an dessusdicts Ainsy signe F de Forcheville



<sup>628</sup>Procuracion pour recongnoistre par la justice d'Auberch et aultre les droictz du Seigneur de Pietre sur les lettres patentes et proches susdicts intente au grand conseil a Malines cy dessus mentionne

Comparurent en leurs personnes Pierre Chombart bailly de la terre et seigneurie Dauberch / jehan de le Barre filz de feu Engherant / jehan du Mez , Martin de le Barre le jeusne / Guillaume de Lespierre / Eloy du Hamel et Franchois Fascon eschevins de ladicte seigneurie d'Auberch tous demourans audict Auberch sault ledict Franchois Fascon demourant au Ploich paroisse dudict Auberch, jehan de le Barre filz de feu Martin jehan Caron dict Fauquenberghes demourant audict Auberch Vas Hochede demourant audict Ploich Martin Vignoble censier de le Val paroisse dudict Auberch Mahieu Vignoble Thomas Bonnel Martin Hayart et jehan de Rache dems en la terre et seigneurie des Pummereaulx paroisse oudict Auberch / Lesquelz comparans recongnurent comme Guillaume de Hangouart escuier Seigneur de Pietre des Pummereaulx etc les avoit tous adjourne au grand conseil du Roy nostre Sr a Malines en vertu de lettres patentes par luy obtenues dudict grand conseil en datte du quinziesme jour d'apvril XV<sup>C</sup> quatre vingtz sept touchant aucunes assiettes de tailles et aultres emprinses attentatz et poinctz par eulx commis contre et au preiudice des droictz dudict Seigneur de Pietre et de icelle sa seigneurie rentiers

---

<sup>627</sup> Folio 415v°.

<sup>628</sup> Folio 416r°.

manans et habitans dudict Pietre, le tout au loing contenus et reprins esdictes lettres patentes Lesquelles auroient este mise a execution selon leur forme et teneur / par Francois de Forcheville huissier dudict conseil Resident a la Bassee le vingtiesme jour du mois de juing audict an, et assigne iour ausdictz comparans sur et en vertu dicelles lettre a comparoir audict grand conseil aux plais du vendredy dixneufiesme de juillet audict an Auquel jour lesdictz comparans adjournez se seroient laisser couller en default, sur lequel default auroit este decernee commission de readiournement et icelle mise a execution par ledict Forcheville huissier le XXIXe d'aoust audict an et assigne iour a tous lesdicts defaillans au XXIIIe de septembre dudict an XV<sup>c</sup> quatre vingtz et sept<sup>629</sup> Surquoy lesdictz comparans congnoissans leur tort et desirans en et sur ce que dict est et tout le contenu desdictes es lettres patentes / et commandemens defences execution et adiournement en faitz et ensuivis user de bonne foy ilz ont recongneu et recongnoissent par cestes tous et quelconques les droictz possessions et saisines dudict Sr de Pietre par luy baptisees par lesdictes lettres patentes / Et luy accordent ses fins demandes et conclusion contenues et par luy prises par lesdictes lettres patentes et proces susdict sur ce ensuivi passant de tout par eulx condempnation a son prouffict et de sa Sgrie de Pietre ses censiers rentiers manans et habitans dicelle tant en droict et principal que amendes et despens au tax de la court le tout conformement ausdictes lettres patentes et selon leur forme et teneur et en tous leurs pointz et articles

*En marge:* et si ont revocque et revocquent tous troubles commis au contraire et promettans de a ladvenir plus riens faire attenter et entreprendre contre ny entreprendre desdictz droictz possessions et saisines et estans desdictes lettres patentes Tout ce que dessus Lesdictz comparans et chascun de eulx tant conioinctement que divisement ont promis et promettent bien et leallement entretenir furnir et accomplir sans jamais aller au contraire soubz lobligation de leurs corps et tous leurs biens et heritaiges / et ceulx de leur hoirs presens et futurs vers tous seigneurs et justice Et recongnoistre ces presentes a leurs despens pardevant messieurs les president et gens dudict grand conseil a Malines president et gens des consaulx de Flandres et Arthois et par tout aillieurs ou il appertiendra

Et pour effectuer lesdicte recongnoissances lesdictz comparans ont tant conioinctement et par ensamble que divisement fait commis ordonne et estably et par ces presentes commettent ordonnent et etablissent leurs procureurs generaux et messagers especiaux de Me jehan de Clermez licencier es loix Me jehan Noele<sup>630</sup> licencie es loix/ beltremieu van Ynde / jacques le Brun, Francois Lebrun Martin Bultel / jehan Bultel, Francois Wilgiers, Nicaise Walloncapelle, Estienne Bernisse, Gilles van Hulse, jehan Venant, Robert le Mieuve Ausquelz procureurs et a chascun de eulx ou lung de eulx seul et pour le tout lesdicts comparans ont donne et donnent pouvoir mandement et auctorite especial absolut et irrevocable de pouvoir eulx et en leurs noms et a leur<sup>631</sup> aller et comparoir pardevant lesdicts<sup>632</sup> Srs president et gens du grand conseil du Roy nostre Sr a Malines Presidentz et gens de consaulx de Flandres et Artois et par tout ou il appertiendra le tout a leur despens / et illecq et en chascun desdictz lieux par jour du plays ordinaire ou extraordinaire en jugement ou dehors Recongnoistre mesmes passer de nouvel ces presentes et tous

---

<sup>629</sup> Folio 416v°.

<sup>630</sup> Noele ? La première lettre du patronyme est raturée.

<sup>631</sup> Blanc dans le texte.

<sup>632</sup> Folio 417r°.

les droictz possessions et saisines dudict Seigneur de Pietre et dicelle ses rentiers subiectz manans et habitans au loing reprinses esdictes lettres patentes obtenues dudict grand conseil et executees comme dict est allencontre desdicts comparans selon leur forme et teneur / et en tous leurs pointz et articles

Accorder que ledict Seigneur de Pietre censiers rentiers et habitans dicelle sa Sgrie soyent maintenus et gardez en tous leursdicts droictz possessions et saisines baptisees par lesdictes lettres patentes Et icelles lettres patentes commandemens deffence et conclusion y contenus et besongniez judiciaires sur ce faitz et ensuisy estre decretez et adiugie selon leur forme et teneur et en tous leurs pointz et articles et de tout passer condemnation au prouffict dudict Seigneur de Pietre Rentiers et manans dicelle seignourie tant pour le droict et principal que amendes et despens au tax de la court

Mesmes de par lesdictz procureurs ou lung de eulx povoir substituer aultres procureurs ung ou pluisieurs quy aient ou ait tel et samblable povoir que dessus

Et generalmente et especiallement de es choses dictes et les deependences aultant faire accorder dire et aultrement besongnier par leursdicts procureurs et substitutz diceulx et chascune de deulx comme faire et dire polroient lesdictz comparans et constituans sy en leurs personnes mesmes presens y estoient ja fut il que le cas requist mandement plus especial

Promectans tous lesdictz comparans tenir et avoir agreable ferme et stable a tousiours tout ce que<sup>633</sup> par leursdictz procureurs ou lung de eulx et leurs substitutz sera en ce que dist est et qui en depend fait dict accorde et besongnier / Mesmes de paier le juge se mestier est Soubz et par lobligation de tous leurs biens et heritaiges et ceulx de leurs hoirs presens et futurs vers tous seigneurs et justices Renonchant a toutes choses contraires a cestes Mesmes au droict disant generale Renonciation ne valloir sy lespecialle ne precede



Recongnissance a faire au grand conseil de Malines des lettres patentes y obtenus contre les turbateurs Dauberch et la recongnissance diceulx passee par devant notaires royaulx Dartois cy dessus copiez

Les president et gens du grand conseil du roy nostre Sr a Malines A tous ceulx qui ces presentes lettres verront salut Scavoir faisons que le jourdhuy date de cestes pardevant nous audict conseil Comparut en sa personne<sup>634</sup> Au nom et comme procureur especial de Pierre Chombart bailly de la terre et Sgrie Dauberch / jehan de le Barre le jeusne Guillaume de Lespiere, Eloy du Hamel / et Franchois Fascon eschevins de ladicte Sgrie Dauberch tous demourans audict Auberche sault ledict Franchois Fascon demt au Ploich paroisse dudict Auberch jehan de le Barre filz de feu Martin, jehan Caron dict Faucquenberch demt audict Auberch Vas Hochede demt audict Ploich Martin Vignoble censier de le Val paroisse dudict Auberch Mahieu Vignoble, Thomas Bonn, Martin Hayart et jehan de Rache dems en la terre et Sgrie des Pummereaulx paroisse dudict Auberch fonde de procuracion

<sup>633</sup> Folio 417v°.

<sup>634</sup> Blanc dans le texte, le nom n'est pas précisé.

especialle inseree en certaines lettres passee par devant notaires royaulx et sur le seel aux contractz et convenances du pays et conte Dartois en forme de recongnissance faicte par<sup>635</sup> lesdictz dessusnommez au prouffict de Guillaume de Hangouart escuier Sr de Pietre des Pummereaulx etc sadicte Sgrie de Pietre censiers rentiers manans et habitans dicelle en date du ....<sup>636</sup> Lequel comparant en vertu du pouvoir especial a luy donne par lesdictes lettres A recognu et recongnoit par ces presentes tout le contenu esdictes lettres de recongnissance ensamble tout ce contenu es lettres patentes mentionnees en icelles lettres par ledict Sr de Pietre parcydevant obtenues dudict grand conseil en datte du XVe dapvril XV<sup>c</sup> IIII<sup>xx</sup> sept parmy lesquelles deux lettres cy dessus mentionnees ces presentes sont infixees et sy a recongnu et recongnoit par cestes tous et quelconcques les droictz possessions et saisines dudict Sr de Pietre par luy baptisees par lesdictes lettres patentes et lettres de recongnissance Et luy a accorde et accorde ses fins demandes et conclusions contenues et par luy prises par lesdictes lettres patentes et proces susdict sur ce ensuivi audict grand conseil passant de tout condempnation au prouffict dudict Sr de Pietre et de sa Sgrie de Pietre ses censiers rentiers manans et habitans dicelle tant en droict et principal que amendes et despens au tax de la court le tout conformement ausdictes lettres patentes et selon leur forme et teneur et en tous leurs pointz et articles Revoquant tous troubles emprinses et empeschemens faictes et donnees au contraire Comme aussy a accorde et accorde que ledict Sr de Pietre censiers rentiers et habitans dicelle sa Sgrie de Pietre soient maintenus et garde en tous leursdictz droictz possessions et saisines baptisees par lesdictes lettres patentes et les commandemens deffences et conclusions y contenues et besongniez judiciaires sur ce faict et ensuivy estre decretez et adjupees selon leur forme et teneur et en tous leurs pointz et articles et de tout ensamble du contenu esdictes lettres patentes et de recongnissance passee pardevant notaires royaulx Il a passe et passe au prouffict dudict Sr de Pietre censiers rentiers et<sup>637</sup> manans dicelle sa Sgrie tant pour le droict et principal que amende et despens au tax de la court accordant icelles lettres patentes et recongnissance estre demoure declarees et prononchees executoires contre et sur lesdictz turbateurs ses mestres et leurs biens et heritaiges selon leur forme et teneur et par nostre sentence estre condempne au plain furnissement et accomplissement dicelles Le tout si avant que faire pouvoit en vertu dudict pouvoir Ce que Me Beltremieu van Yende procureur dudict Sr de Pietre audict nom a accepte Scavoir faisons que veus lesdictes recongnissances et acceptations avons condempne et condempnons lesdicts turbateurs a lentretenement de ladicte recongnissance et contenu dicelles lettres patentes et celles passee pardevant notaires royaulx cy dessus mentionnees parmy lesquelles ces presentes sont infixees ensamble du contenu de ces presentes declarans le tout executoires sur et allencontre desdictz turbateurs leurs biens et heritaiges adjudant audict Sr de Pietre ses fins demandes et conclusions par luy prises et mentionnees audict proces et tous ses droictz possessions et saisines contenues esdictes deux lettres et ces presentes Le tout selon leur forme et teneur condempnans lesdictz turbateurs en tous despens au tax de la court En tesmoing de ce avons faict mettre a ces presentes lettres le seel dudict grand conseil qui furent faictz et donnees le ..... jour de .....<sup>638</sup>

---

<sup>635</sup> Folio 418r°.

<sup>636</sup> Blanc dans le texte.

<sup>637</sup> Folio 218v°.

<sup>638</sup> Blanc dans le texte.

Me Beltremieu je vous envoie une copie de ladicte recognoissance et sentence que jay minute en haste que polrez corigier selon que scaurez estre besoing et le menvoyer pour visater avecq madicte minute par ce porteur , pour estre par moy visiter / me falez moy renvoyer madicte minute et vostre correction sans le perdre car elle me scert pour instruction daultres affaires



<sup>639</sup>Sentence au prouffict du Sr de Pietres du courant entres les petites Sablonnieres a Pietres et les Sablonnieres Dauberch ././

Les gouverneur President et gens du Conseil d'Arthois / A tous ceulx qui ces presentes lettres<sup>640</sup> veront salut / Comme Guillaume de Hangouart escuier Sieur de Pietres ait piecha obtenu nostre commission en forme de simple saisine narree que entre aultres ses biens et heritaiges Luy compectoit et appertenoit ladicte terre et Sgrie de Pietres ou il avoit toute justice haulte moienne et basse A laquelle estoient appendans certaines Sablonnieres nommees les petites Sablonnieres de Pietres / Entre lesquelles petites Sablonnieres et les grandes estans de la Sgrie Dobers y avoit tousiours eu certain fosse et courant deauwes faisant la separation desdictes Sablonnieres et desdictes Sgries de Pietre et Dobers, contenant ledict courant deauwe en longueur trois a quatre cens piedz ou environ appartenant dumoing pour la moictie audict impetrant , Auquel fosse et courant deauwe nestoit loisible a aucun picquier fouyr ny hauwer icelluy restonper eslargir ny raprofondir sans le gre congie ou licence dudict exposant a paine de soixante solz parisis damende a luy applicable Et de ce ainsy jouyr user et posseder estoit ledict impetrant tant pour luy que ses predicesseurs en toutes bonnes possessions et saisines affirmations negatives et mixtes partout et sy long temps quil nestoit memoire du contraire dumoing par temps suffissant et vaillable pour bonne possession et saisine avoir acquis garder et retenir paisiblement et publicquement et signament depuis dix ans encha au veu et sceu de Michiel <sup>641</sup>Mesurolles et de tous quy ce avoient vollen veoir et scavoir, Ce nonobstant ledict Mesurolles ou aultre a son adveu et dont il avoit eu le fait pour agreable sestoit ingere et advanchie depuis trois a quatre ans aumoing depuis lesdicts dix ans eu regard a lintroduction de ceste poursieulte de son auctorite privee indeue et outre le gre et volente dudict impetrant de restonpper ledict fosse et courant deauwe et ce de quarante a cinquante piedz de longueur, Et la reste dudict fosse et courant raprofondy de environ trois a quatre espois sur et du lez et coste desdictes petites Sablonnieres, ensemble le eslargy de environ quatre a cinq piedz / Sy aueroit aussy emprins quelque portion dudict courant et le adjoinct et applicque a son heritaige, et par ce moien fait que tous chariotz chevaux et passans prennent a present necessairement leur chemin pour aller au pays de lalleue sur lesdictes petites Sablonnieres ou auparavant ilz prendroient tousiours leur dict chemin indifferant aussy bien sur lesdictes grandes Sablonnieres que sur les petites / Sy avoit par ledict restonppement fait divertir sur et a travers a deux divers chemins de ladicte Sgrie de Pietres toutes les eauwes et courans quy solloient passer directement par lesdictes deulx Sablonnieres au ponchel du petit Tricquenel et dillecq audict pays de lalleue au grand degat et empirement desdicts chemins / En

---

<sup>639</sup> Bas du folio 420r°.

<sup>640</sup> Folio 420v°.

<sup>641</sup> Folio 421r°.



troublant et empeschant ledict impetrant en sesdictz droix possessions et saisines Et comectant vers luy amende de soixante solz parisis A tort<sup>642</sup> et sans cause Pour ces causes ledict impetrant aueroit fait mectre a execution ladicte complaincte selon ses termes allencontre dudict Mesurolle turbateur Auquel pour l'opposition par luy cree pour avoir este assigne a comparoir par devant nous audict conseil aux plais y tenus le sieziesme de novembre XV<sup>c</sup> soixante trois / Que lors par Me jacques du Bois advocat pour Mahieu du Crocq procureur dudict impetrant fut conclud Affin destre remis maintenu et garde en sesdicts droix possession et saisines tant pour le droit que amende , et ledict deffendeur condempne reparer les troubles susdicts et tout pertinament en tel cas demandant despens dhomaige et interestz , Surquoy ledict adjourne aueroit fait obtenir quelque delay et depuis soy laisser couler es deffaultz premier et second par vertu desquelz aueroit este ordonne audict demandeur veriffier son intention sur intendit Mais ladicte cause presentee aux plais du jourdhuy dacte de cestes lcelluy deffendeur personnellement comparant audict conseil aueroit reconnu lesdicts droix possessions et saisines consentz et accorde ledict demandeur y estre remis maintenu et garde et luy deffendeur condempne reparer ledict trouble et de paier ladicte amende saulf la grace dicelluy demandeur et les despens de ceste poursieulte quil consentoit taxer saulf diminutions ce que ledict du Crocq oudict nom aueroit accepte selon que es exploix et actes de ce faisant mention estoit et est plusaplain contenu Scavoir faisons que veues lesdictes recognoissances accord et acceptation avons ledict<sup>643</sup> demandeur remis maintenu et garde remectons maintenons et gardons par le Roy nostre Sire et nous pour justice esdicts droix possessions et saisines condempnant ledict deffenseur reparer ledict trouble ensemble en ladicte amende saulf la grace dicelluy demandeur et esdicts despens a taxer comme dessus En tesmoing de ce nous avons fait mectre le seel dudict conseil a ces presentes Quy furent faites et donnees en jugement le vingt ungiesme jour de mars XVc soixante trois



---

<sup>642</sup> Folio 421v°.

<sup>643</sup> Folio 422r°.

Commission pour mettre ladicte sentence du courant a execution

**Les Gouverneur President et gens du conseil Darthois** Au premier huissier dudict conseil sur ce requis salut Nous vous mandons et commectons que les lettres de sentence de nous donnees parmy lesquelles ces presentes sont infixees interineez et mettez a execution deue de point en point selon leur forme et teneur, En contraindant au furnissement dicelles ceulx quy pour ce seront a contraindre par toutes voies et manieres de justice deues et raisonnables ce faictes que deffault ny ait de ce faire Vous donnons pouoir donne soubz le contreseel dudict conseil Le vingtcincquesme jour de may XVc soixante quatre



### Acte delection de domicile faict par Michiel Masurrolles

Des plais tenus au conseil Dartois par nous Gouverneur President et gens dudict conseil le dix huictiesme de janvier XV c soixante trois fut faict<sup>644</sup> ce quy ensuit en la cause estant au conseil dentre Guillaume Hangouart escuier Sr de Pietre demandeur sur simple saisine dune part / Michiel Mesurolle demourant en la paroisse Dobers deffendeur et adjourne a huy sur ung deffault avec juchiation<sup>645</sup> daultre , Audict jourdhuy en jugement apres que ledict deffendeur a este condemne es despens dudict deffault Que Robert de Penin son procureur a accorde taxer icelluy Penin audict nom a este pourveu du delay dabsence et esleu domicile pour icelluy deffendeur au logis Jehan Parquet demt a Pietre / Homme audict conseil les jours et an dessusdictz



### Tax de despens dudict proces du courant deauwes ./.

Les Gouverneur President et gens du conseil Dartois / A tous ceulx quy ces presentes lettres verront salut Scavoir faisons que les despens demandez par Guillaume de Hangouart escuier Sieur de Pietre A Michiel Mesurrolles demt a Oberch sont taxez et moderez sur la declaration diceulx Et apres diminution baillie par ledict Mesurrolles a la somme de Huict livres en ce compris lexecutoire Laquelle se dedaira sy lever ne la convient / De laquelle somme ledict Mesurrolles sera tenu faire paiement et sollution audict Hangouart Et a ce faire constraint et justicie a ses despens en toutes choses se mestier est / En temoing de ce nous avons fait mettre le seel dudict conseil Quy furent faictes et prononchie en jugement le dix huictiesme de may quinze cens soixante quatre ./.

<sup>646</sup>Commission du conseil Dartois pour mettre ladicte sentence du tax des despens touchant ledict courant a execution

---

<sup>644</sup> Folio 422v°.

<sup>645</sup> (?)

<sup>646</sup> Folio 423r°.

avecq auctorisation de le faire par cry publicque en cas que ceulx contre lesquelz il convient adresser soient demeurant hors Darthois

Les gouverneur President et gens du conseil Dartois Au premier huissier dudict conseil sur ce requis salut nous vous mandons et commectons que les lettres de taxe de despens de nous donnees parmy lesquelles ces presentes sont infixees interinees et mectees a execution deue de poinct en poinct selon leur forme et teneur / En constraintant au furnissement dicelles ceulx quy pour ce seront a constraintre par toutes voies et maniere de justice deues et raisonnables, Et ou pour le fait de ladicte execution vous soit besoing exploictee hors des mectes de nostre jurisdiction requierons tous seigneurs et juges que en faveur de droit ilz vous souffrent et permectent ce faire en leurs mectes , Et sy de ce faire sont reffusans faictes les commandemens significacions et exploix en ce regard necessaires parlant a la personne de Michiel Mesurolles condamne sy trouver le poves<sup>647</sup> es mectes de nostre jurisdiction sinon parlant a ses procureur parens amys facteurs negociateurs et entremecteurs de ses besoingnes et affaires, ou par cry publicque a la bretecque de la plus prochaine bonne ville du lieu de sa residence estant de nostre jurisdiction affichant aux pourtaulx de leglise coppie de ceste commission et vostre exploix / Et par-dessus ce luy insignuant par semblable copie de vostre missive affin quil nen pretende cause dignoration Tellement quil soit vray semblable que lesdicts exploix soient venus a sa notice et cognoissance, Lesquelz exploix faictz par la maniere que dict est seront dautel effect et valleur comme se faictz estoient a sa personne ou vray domicile et pour telz ou cas dessusdicts les avons auctorisez et auctorisons en rescripvant de ce que faire en aures de ce faire Vous donnons pover donne soubz le contreseel dudict conseil le vingt cincquiesme jour de may XVc soixante quatre

---

<sup>647</sup> du verbe 'pouvoir' (Pouvoir)

# Annexe

## Coustumes de la terre et seigneurie des Pummereaulx

Scituee en la paroisse Dauberch appartenant à Messieurs doyen provost et chapitre de leglise Saint Ame en Douay et a Mahieu Desplancques leur perchonnier par indivis tenus en francque regalle du Roy.

Et a mesdicts Seigneurs de Saint Ame et a leurdit perchonnier appertienent toutes les revenues de ladicte terre chacun par moitie tant de rentes seigneurialles terraiges droictz seigneuriaux reliefz amendes et toutes les escheanches sans touchier au dismes qui appartiennent a mesdicts Seigneurs seul et sans touchier a aucunes petites portions qui appartiennent audict perchonnier que lon appelle pour son pas ainsi que contiennent les briefz. Et en icelle Seigneurie Mesdictz Seigneurs et perchonnier ont toute justice haulte moyenne et basse mais ledit perchonnier tient sa part de medicts Seigneurs en haulte justice

Item que medicts Seigneurs et ledict perchonnier ont chacun leur bailly ou lieutenant mais les juges sont commis et quant il y a affaire werps transpors visitations calenges celluy des bailly qui vient premier et est requis ou adverty fait lexploict et peult conduire la matiere seul sans ce que luy conviege(?) avoir les deux baillis ensamble et les juges dient loy a la semonce de chacun desdicts baillys

Item que en ladicte Seigneurie les amendes de sang sont de LX sols parisis et autres en desoubz selon la qualité du cas

Item ont mesdicts Seigneurs et leurdict perchonnier droict de confiscation / lavoir espant lavoir de bastard/ et tout tel droict que a haulte justice appartient et sortissent les subjects au baillage Damiens comme gardiens commis a msdicts Seigneurs doyen et chapitre dudict lieu de Saint Ame en Douay

Item que en ladite Seigneurie des Pummereaulx ny a nulz hommes feodaux et ny a que juges cottiers et rentiers qui ont judicature de tout droit cas que a haulte justice appartient a la semonce de lung desdits baillis ou son lieutenant

Item que par coutume locale dudict lieu des Pummereaulx quant deux conjointz sont alliez par mariaige le dernier vivant joyst de tous les biens meubles catelz et heritages dont iceulx conjointz estoient possessans au jour du trespas du premier morant et apres le trespas du dernier vivant les biens meubles et acquestes se partissent aux hoirs desdicts conjointz et les patrimoniaux tiennent coste et ligne dont ilz procedent et y partyssent les enffans et hoirs dalcuns trespassez autant aux filles que aux filz par esgalle portion sauf que le maisme filz a chois davoir lieu et maison si maison y a en recompensant les autres daultres heritages

Item quant deux conjointz sont mariez et que ilz ont enffans si lung va de vie a trespas tous les héritages sont hypothecquiez auxditcs enffans et nen a le survivant que la joyssance la vie durant sans les povoir vendre chergier ne alierer parce que telz heritages viennent du coste du survivant se nest par necessité ou pouvreté en

vendant cent a cent ou du consentement desdicts enffans et si le dernier vivant se remarioit et euist des enffans du second mariaige lesdits enffans dudit second mariaige ne auroient riens es héritages dont lesdits conjointz seroient possessans au jour du trespas du premier morant mais iceulx secondz enffans auroient les acquestes faictes depuis ledit second mariaige

Item quand les heritiers desdits heritaiges tenus de ladicte Seignourie des Pummereaulx vont de vie a trespas mesdicts Seigneurs et leur perchonnier ont douze deniers parisis de chacune mencaudée pour relief et si ilz ne sont relevez endedens sept jours et sept nuictz lon poeult prendre et apprehender lesdits héritaiges et les advestures ainsi quilz sont trouvez / et si on vend lesdits héritaiges mesdicts Seigneurs et leur perchonnier ont pour leurs droicts seignouriaux XII deniers dentrée et XII deniers dyssue de chacune mencaudée

## Coustumes de la seignourie de le Thieullerie seant a espummereaulx

Il y a ung fief voisin a le Seignourie des Pummereaulx appelle le fief de le Thieullerie appartenant aux hoirs Anthoine Bacquero tenu de mesdicts Seigneurs de Saint Ame en Douay et sont les coustumes dudit fief samblables a celles de la Seignourie des Pummereaulx.

## Coustumes de ladicte seigneurie de Piettre

Par cy devant appartenant a Mahieu Desplancques et de present à Maistre Guillaume Hangouart son nepveu en ligne directe

Mahieu Desplancques tient de medicts Seigneurs doyen et chapitre de Saint Ame en Douay de leur Seigneurie quilz tiennent en francque regalle de Roy la terre et Seigneurie de Piettre qui sont deux fiefz remis en ung scitué en la paroisse Dauberch ausquels mesdicts Seigneurs de St Ame est deu deux reliefz chacun de LX sols parisis et le tierch cambellaige a la mort de chacun héritier et le quint denier à la vente quant le cas y escheu. A laquelle Seigneurie de Piettre appartient toute justice haulte, moyenne et basse et tous droictz comme droictz de confiscation / avoir de bastard / avoir espance droictz de confiscation tonlieux afforaiges, amendes et autres droictz telz a haulte justice appartient. Laquelle terre se comprend en lieux manoirs, prez, bois, eaues et terres a labour contenant XXIII bonniers et heritaiges sans les heritaiges tant fief que terres renteuses que ledict Seigneur de Piettre a rebmis avoecq le gros de ladicte terre Et si sont tenus dicelle Seigneurie plusieurs fiefz et terres renteuses lesquelz fiefz luy doibvent aucuns LX sols aucuns XXX sols aucuns VII sols VI deniers tout a monnoye parisis et tous les tierch chambellaige a la mort de chacun heritier et le Ve dennier a la vente Et les terres renteuses sy comme les mesures quatre sols tournois de reliefz Et les terres renteuses qui ne sont point mesures XII deniers de relief pour chacune mencaudee et le double pour entree et yssue a la vente ou transport qui se fait de main à aultre

Et par la coutume de ladite Seigneurie de Piettre le mort saisit le vif son plus prochain heritier habille a succéder ainsy que lon use par tout le royaume de France

Item si deux personnes conjointz par mariage soient héritiers de plusieurs fiefz, les fiefz après leurs trespas succedent a leur aisé filz masles et les filz puisnes et les filles sy aucunes en y a, ont tous ensamble droict de quint autant lung que laultre Et si il ny avait que filles laignée fille aueroit tous lesdits fiefz aussy a la charge de quint mais si lesdits conjointz ne ont nulz enfans lesdits fief succedent a leurs prochains hoirs masles et sil y avait une femelle plus prochaine du lez et costé dont procedent lesdits fief tel aisé hoir masle ou femelle emporteroit lesdits fief sans charge de quint pour ce que droict quint nest point deu en ligne collateralle

Item et si ung homme est héritier de ung ou plusieurs fiefz tant de son patrimoine que de son acqueste si il va de vie a trespas lesdits fiefz tiennent la ligne et coste dudit homme et si la femme est survivant ne y peult demander sy non droict de douaire qui est la moictié des revenus sa vie durant seulement

Item par la coutume de ladicte Seugnourie de Piettre une personne heritiere d'aucun fief de son patrimoine ne le peult vendre sans le gré de son heritier apparant ou pour remployer les deniers en héritaiges suivans la mesme nature ou par necessite deument prouee par gens digne de foy, mais il peult bien vendre et alier les fiefz par luy acquestez sans nulles des trois voyes dessusdictes et peult bien par testament et autrement donner le quint de son fief ou fiefz et les revenus de trois ans sans le gre de son hoir

Item si une personne heritier d'aucun fief le vendoit son parent du lez et costé dont ledict fief procede / le peult ravoir par tiltre de proximité endedens ung an en suivant le desheritement en rendant tous leaux coustumes, mais si endedens ledict an y venoit ung parent plus prochain de celluy qui le averoit reprins tel plus prochain lemporeroit en rendant tous leaulx coustumies Et des terres renteuses endedens quarante jours mais en l'heritage d'acqueste ny a point de proximité.

Item si une personne a vendu son heritage et qu'il le rapporte en la main du Seigneur le Seigneur peult retenir les fiefz en sa main quarante jours et les terres renteuses pareillement sans en baillier la saisine a l'acheteur et peult le Seigneur ravoir y ceulx fiefz et terres pour les deniers mais si le Seigneur ou son bailly en avoit baillie la saisine à l'acheteur icelluy Seigneur ne le pouroit apres ravoir pour les deniers

Si deux conjointz par mariage ont enfans et lung desdicts conjointz va de vie a trespas le survivant joyst de tout tant qu'il se tient a marier en gouvernant sesdicts enfans Et si ledit survivant se remarie il doibt perchon a ses enfans, lesquels enfans emporteront tous les heritaiges du patrimoine du trespasse et la moictié des acquestes et aussy la moictié des meubles saulf que si cest la femme qui soit survivant son mary icelle femme vefve en faisant perchon a ses enfans elle a hors part droit de vefve qui est de chacune pieche de mesnaige une pieche sans touchier au bestial / mais si les conjointz ne ont nulz enfans les parens du premier morant peuvent prendre prestement parchon et avoir les patrimoines ou acquestes du coste de l'homme pour ce que la feme ny a sinon joyssance de la moictié pour son douaire sa vie durant seulement et ont lesditz parens moictié des acquestes et meubles et tousiours une feme vefve a droit de vefve de chacune piece de mesnaige une pieche soit quelle ait enfant ou non ou soit que ladite feme vesve renonce ou non aux biens et debtes de son mary tousiours ledit droit de vefve luy est deu

Item que en ladite Seignourie de Piettre une maison et tous edifices et bois sur une motte qui est fief sortissent nature de fief en partaige en la basse court la porte sur quatre esteulx le porchil et columbier et fournil si il est separe des aultres edifices est repute heritaige et si ce nest point fief le chambre et deux couples en la maison couvrant la cheminée sortissent nature de heritaige – la porte si porte y a le porchil et fournil sortissent aussi nature de heritaige tous quesnes excedant leaige de LX ans arbres portans fruictz que ont este entes que on dit reforchiez hallos a teste estallons despines blancques faisans cloture d'aucuns gardins bois a coppe en desoubz leaige de le copper sortissent nature d'heritaige tout le remanant<sup>648</sup> des edifices et bois montans sortissent nature de meubles

Item que en la Seignourie de Piettre les subjectz sont tenus aller mouldre leur bled aux molins du Seigneur si il sont en estat de mouldre.

Item si ledit Seigneur de Piettre ou sa feme estoient gisans malades en la Seignourie au mois de mai les subgetz sont tenus appaisier les raynes qui crient ou brayent laquelle chose nest point advenue de loing tamps mais la voye et renommee est toute connue que ainsi se doibt faire

---

<sup>648</sup> remenant : reste

Item que les subgetz de la Seignourie qui sont puissans de corps sont tenus de tenir compaignie à leur Seigneur si il vast en ost de son prince en la conte de Flandres ou Darthois en leur baillant raisonnable saudee<sup>649</sup>

Item se aulcun forain vient assaillir aucun subiect de ladite Seignourie les autres le doibvent secourir et ayder a preserves de dangier ou de villennie<sup>650</sup> par voye moderee

Item par la coustume dudict lieu de Piettre se une personne retient a tort lheritaige daultruy ou si aulcun fait poursieulte en justice pour aulcun heritaige celluy qui en dechet est en lamende de 60 sols parisis

Item par ladicte coutume quant une personne blesche aultruy a sang par ire il est en lamende de LX sols parisis et se aultruy est battu a sang se il ne vient denoncher a justice il est en lamende de XX sols parisis

Item que les regetz et flegardz sont au Seigneur reserve les plantins contre les mesures et se aultruy fait fouyne esdicts flegardz et regetz ou quilz coppent ou emportent les bois et haies desdits flegardz ou autres bois du Seigneur il enchiet en lamende de LX sols parisis et repare le dommaige

Item aussy de pesquier le poisson du Seigneur ou aultruy si cest par nuict cest mesme larchin si cest de jour il y a lamende de LX sols parisis et le lieu repare et si aulcun y pesquoit post que il ne prins riens a tout harnas ou il tiroit a tout arcqs et bougons il seroit en lamende de XX sols parisis.

Item que toutes bestes a cornes ou brebis ou autres qui sont trouvees en josnes taillis de bois en desoubz trois ans on peult prendre lesdictes bestes ou le garde dicelles pour lamende de LX sols parisis et en deseurt trois ans et en advestures qui ont este semees en lamende de cinq sols parisis et es pretz et jardins daultruy en lamende de III sols parisis et le dommaige repare

Item que en ladicte Seignourie de Piettre y a plusieurs autres stilz usaiges ou coustumes tant de tenir francques verites comme de faire bans de mars bans daoust faire visitation de chemins cours deaues et plusieurs autres/ samblables a la coutume générale du royaume de Franche ayant ladite Seignourie de Piettre ressort en premiere justance par devant Monseigneur le Bailly et hommes de fiefz de Messieurs de Saint Amé oudict lieu de Douay

---


<sup>649</sup> saudee : solde.

<sup>650</sup> villennie : action de vilain.






# Plan de Pietre et Pommereau (XVIIIème)<sup>652</sup>



<sup>652</sup> ADN Plan Lille 237.

# Plan de Pietre (début XVIIème)<sup>653</sup>



## Notice du plan de Piètre

- 1 Le casteau de Piette.
- 2 Le grand chemin.
- 3 Le rietz des Sablonnières.
- 4 Pont des Sablonnières.
- 5 Ruelle Dubois tenant au cote gauche dudict becquaut et allant au riez du jonquoy.
- 6 La piedsente passant par derrière le bois allant dudict becquaut au riez du jonquoy.
- 7 La piedsente venant des Sablonnières vers la piedsente cy devant.
- 8 Piedsente Dauberch.
- 9 1433 audict Seigneur baron.
- 10 1439 audict Seigneur
- 11 1430 audict Seigneur
- 12 3564 audict Seigneur.
- 13 Bois Dauberch dict Piettre.
- 14 rietz du jonquoy.
- 15 Lhéritage aux hoirs Leroy
- 16 jacques Leclercq.
- 17 Margueritte Leroy
- 18 Pierre Dubau.
- 19 Anthoine Leroy
- 20 Augustin Pollet
- 21 *(Semble avoir été oublié sur l'original.)*
- 22 Masure jan Mesurolle
- 23 Pierre Tibau.
- 24 Charles Le Vesque
- 25 jacqueline de Hennin
- 26 jaspert Boulet
- 27 Anthoine de Hennin
- 28 Pierre Mathelin
- 29 jan de Hennin
- 30 La veuve jan Leleux.
- 31 Pierre Grau.
- 32 La veuve jan Leleux.
- 33 Pierre Grau.
- 34 La veuve jan Leleux.
- 35 Israel Maontaigne.
- 36 Tenement de Pommereau.
- 37 Auberch Chastelenie<sup>654</sup>.
- 38 Bois Dubreucq.
- 39 Auberch Empire.
- 40 Auberch Empire.
- 41 Le chemin Torel.
- 42 Le rietz de Piettre.
- 43 Bois des Brullots.
- 44 Bois du Bietz dict du Bracq.
- 45 Fossé faisant séparation desdicts bois.
- 46 Fossé des Novis ou des Nois.
- 47 Bois de Lannois.
- 48 Chemin venant des Sablonnières vers la cense des Mottes.
- 49 Piedsente venant de ladicte cense au mollin de Piettre.
- 50 Chemin du Mollin dudict Piettre.
- 51 Ruelle du brulle.
- 52 Chemin du becquet Poullin allant à Mauqhissart.
- 53 La voye allant du becquet Poullin audict Mollin.
- 54 La voie allant a Noeuve Capelle.
- 55 Fossé des Layes.
- 56 Terres à laboeur pour le present et cy devant a prairies que le Seigneur baron Davelin soutient provenir de Pierre le Gillon et par la prins en arrentement du chapitre de St Amé , de quoy les Sieurs Souvillon et Deledicque ons déclaré quand a present ne pouvoir convenir.
- 57 Fossé faisans séparation du bois de Piettre davecq les heritages des articles 56 / que les susdicts Sieurs Souvillon et Deledicque soutiennent estre une continuation du fossé des Novis et se .... Le dict Sieur Baron d'Avelin at dict que ledict fossé des Novis ne commenche quau dela du nombre 41 / en allant du cotté du bois du Bietz ou midy.
- 58 Planche de pierre servant de cours deaux pardessous allendroit du chemin marqué 41 sur le fossé des Novis.
- 59 Terres a laboeurs et jardin que le Seigneur baron soutient avoir este prins en arrentement de St Amé par les hoirs Pierre le Gillon du meisme que

<sup>654</sup> Châtellenie de Lille

la party du nombre 56 de quoy les  
Sieurs Souvillon et Deledicque ons  
déclare quant a présent ne pouvoir  
convenir.

**60** Bois et laboeur.

**61** Laboeur.

## Lexique

**Ablais:** blé coupe encore sur le champ.  
**Adhires:** égarées.  
**Adjourner:** ajouter.  
**Ahanner, hanner:** travailler.  
**Ardoir:** brûler  
**Bersault:** terrain sur lequel se pratique le tir à l'arc.  
**Bonnaiges:** Droit sur le placement des bornes.  
**Bougion:** grosse flèche.  
**Bourloire:** terrain sur lequel on pratique le jeu de bourle  
**Bray:** limon.  
**Buisse:** canalisation  
**Burg:** mur qui entoure un puits  
**Calenger:** apprehender au corps (Dictionnaire rouchi-français).  
**Cercquemennaiges:** du verbe cercquemaner = border et mesurer, établir les limites.  
**Chepages:** droit du geolier.  
**Chepaige:** geôle.  
**Clains:** plaintes, et demandes en justice.  
**Clame:** s.f réclamation en justice  
**Compenche, compense:** s.f . compensation.  
**Concluder:** conclure.  
**Contemps:** s.m. mepris.  
**Contendre:** contester  
**Contumation:** non comparution.  
**Coste: coût.**  
**Cui Dieu absolve:** Que Dieu pardonne.  
**Culverine:** couleuvrine.  
**Delaians:** retardant, en retard.  
**Denommez au blancq:** nommés au bas .  
**Deppoter:** renoncer.  
**Despit: s. m. mépris humiliation.**  
**Desreng / Desrenc:** s.m séparation de terre faite par sillon, une raie ou un bornage.  
**Desrigler:** sortir de la règle  
**Dessis:** démolis.  
**Destourbie:** s.m. trouble.  
**Digeaulx:** ensemble de 10 gerbes rassemblées sur le sol et posées à la verticale.  
**Divertir:** tourner, contourner.  
**Dol:** s.m. tromperie ayant pour but de

detourner quelqu'un d'un acte avantageux.  
**Equipolent:** équivalent.  
**Encha:** depuis  
**Esquay, escai:** coin.  
**Essevemens:** écoulements des eaux.  
**Esteulle, esteule:** s.f. paille, chaume.  
**Evocquier, evochier:** appeler, faire venir.  
**Feurre, feune, fuerre:** paille, chaume.  
**Froisser:** terme d'agriculture. Changer l'ordre établi par l'usage ou la condition du bail dans l'espèce de grains qu'on doit semer (Dictionnaire du Rouchi).  
**Fruition:** s.f jouissance des fruits et récoltes.  
**Ghesquier:** jachère.  
**Gluy:** Paille  
**Harnas:** filet de pêche.  
**Haulche:** hausse.  
**Hauwer:** travailler à la houe  
**Havrer:** Piocher.  
**Hostigement:** Déclaration officielle de possession d'un fief.  
**Houllette:** s. f. bâton de berger muni d'un fer en demi cylindre à son extrémité, ce fer servant à prélever et lancer des mottes aux montons qui s'écartent de manière à les ramener vers le troupeau.  
**Ils ne furent oncques:** ils ne le furent jamais depuis.  
**Infixees:** insérées.  
**Intendit:** s.m, Acte de l'ancienne procédure par lequel le demandeur déclarait l'intention qu'il avait de fonder son droit sur faits, causes, raisons et moyens qu'il entendait prouver.  
**Interminer:** interdire, défendre de.  
**Invasif:** offensif.  
**Jus des terre:** en dehors des terres.  
**Keute:** Sorte de bière.  
**Loisiblete:** s.f., permission.  
**March:** céréales de printemps  
**Me esmeu:** à moi estime.  
**Mestier:** service rendu.  
**Mesus:** s.m. mefaits.  
**Meurement:** avec attention.  
**Monchaulx:** meulles.  
**Novist:** Novice en sa profession.  
**Outrenoer:** traverser, parcourir.  
**Par ire, par iray:** par colère.  
**Par rain et baston:** Symbole et formule

d'investiture qui s'employaient dans des actes de vente pour exprimer que la vente était définitive et sans esprit de retour.

**Pauch de la main:** paume de la main

**Pers, pairs:** compagnons.

**Piecha, pieca:** naguère.

**Pleigie:** personne qui se porte caution.

**Plevie:** du verbe plever: garantir, promettre.

**Porsous:** du verbe "porsoldre": payer entièrement..

**Pouvoir:** s.m. pouvoir.

**Preallegnies:** dans les lignes précédentes.

**Preudhommie:** Probité, sagesse, honneur.

**Prisme:** prochaine.

**Proces indecis:** procès en cours.

**Proces widie:** procès terminé.

**Proisime:** prochaine, proche.

**Racte de temps:** au prorata du temps.

**Reaulx:** royaux.

**Recorder:** v. se souvenir.

**Recors:** récit.

**Reffunder:** rembourser.

**Reintegrande:** reintegration.

**Remenant :** reste

**Rendever:** réparer les douves.

**Restoupper:** reboucher.

**Ruffle:** espèce de pelle en fer.

**Ruier:** s.m ; celui qui ses charge des rues et chemins.

**Salvations:** Se dit des dernières ecritures fournies dans un procès pour repondre aux contredits et objections de la partie adverse.

**Sartront:** Defricheront.

**Sceuet:** sus

**Signamment:** notamment.

**Taille à noyr cul:** taille tétard.Cette taille engendre la pousse vigoureuse de nouvelles tiges (futures branches) intéressantes pour le bois de chauffe ainsi que l'élaboration d'un bourrelet de cicatrisation formant ainsi la silhouette dite «en tétard».

**Saudee:** solde

**Solt:** paiement.

**Trois royes:** trois récoltes.

**Turbateur:** fauteur de troubles.

**Viaire:** s.m visage.

**Villennie:** action de vilain.

**Waratz:** mélange de paille et roseaux.

**Waresquaix:** terres destinées à la pâture publique.

**Wason:** motte de terre.

**Yppreaulx:** ypreau, espèce d'orme à feuillage large.

# Table toponymique

- Amiens, 135, 138, 259  
Armentieres, 91  
Arras, 13, 36, 52, 74, 76, 78, 79, 91, 99,  
109, 126, 127, 140, 187, 199, 202, 203,  
223, 246  
Baillieul, 16, 137  
Bataille (la pierrette), 247  
Beaucamp, 152  
Belloy (fontaine du), 248  
Belloy (le), 5, 10, 121, 125, 127, 130, 228,  
230  
Bethune, 14, 47, 91, 242  
Biez (bois du), 14, 15, 33, 119, 121, 123,  
125, 130, 131, 151, 178, 189, 192, 195,  
197, 213, 231  
Biez (le), 119, 130, 131, 132, 211  
Bos (ruelle du), 169  
Bouchain (la motte), 248  
Breul (ruelle du), 236  
Broille (plancque a le), 245  
Brullos (cense des), 6, 19, 20  
Brullos (les), 5, 6, 10, 19, 130  
Brusle (ruelle du), 238, 239  
Brusle, Bruisle, 205, 239  
Clicqueterie, 76, 92, 111, 173, 175, 244,  
245, 247  
Courrieres, 119, 221, 224, 228  
Cousart, Coussart (le metz), 222, 226  
Coysnes (Seigneurie de), 248  
Creux (du), 63, 65, 66, 67, 69, 71, 72, 77,  
78, 79, 81, 90, 172, 176, 177  
Dantigneul, 47, 61  
Douay, 44, 57, 60, 63, 65, 68, 69, 72, 74,  
76, 77, 79, 81, 82, 85, 89, 91, 97, 98,  
102, 119, 135, 137, 144, 145, 168, 169,  
202, 204, 221, 224, 228, 259, 260, 261,  
263  
Englos, 228, 230  
Estaires (Desterres, Destaires), 127, 234,  
235  
Fauquissart, 32, 51, 94, 156, 199  
Flequieres, 237  
Fleurbaix, 235  
Fournes, 2, 91, 130, 237  
Fricquart (la motte), 5, 10  
Fromelles, 19, 91, 129  
Gand, 49  
Gondecourt, 1, 2, 8, 154  
Gorgue (la), 37, 67  
Hantay, 189  
Haulte rue (la), 46  
Hennicquo (ruelle des), 169  
Herlies, 91, 111, 173, 191, 210, 223, 229,  
246  
Hesdin, 213, 214  
Hurtevent, 245  
Hus, 248  
Hus (croix du), 245  
Hus (ponchel du), 245  
Illies, 216, 245, 246, 247  
Izenghien, 202, 204  
Joncquoy (riez du), 63, 65, 68, 69, 71, 72,  
80, 86, 91, 162, 168, 169, 174, 267  
La Bassée, 8, 11, 12, 48, 52, 63, 66, 67, 68,  
69, 72, 74, 76, 79, 84, 90, 99, 101, 108,  
110, 113, 114, 115, 116, 138, 145, 153,  
160, 161, 167, 189, 191, 193, 202, 203,  
236, 243, 246, 251, 252  
Lalloeu (pays de), 26, 32, 38, 40, 132, 235  
Lannoy (bois), 182, 183  
Lannoy (camp), 182  
Laoultre, 46  
Laventie, La Venthie, 30, 32, 34, 35, 37,  
39, 71, 111, 115, 123, 127, 132, 141,  
151, 191, 192, 193, 197, 202, 203, 209,  
219, 235  
Lays (ruisseau des), 5, 10, 14, 15, 92, 121,  
200, 267  
Lens, 91, 144  
Lestrée (cense de), 112, 115, 128, 130  
Lhommelet, 83  
Ligny, 93, 112, 132, 139, 177, 184, 245,  
246, 248  
Ligny le grand, 246, 248  
Ligny le petit, 184  
Lille, 1, 2, 3, 11, 14, 19, 20, 22, 43, 53, 55,  
70, 85, 88, 89, 91, 97, 98, 99, 109, 119,  
135, 145, 148, 156, 157, 158, 171, 180,  
194, 197, 198, 202, 204, 210, 214, 216,  
217, 218, 221, 224, 225, 226, 227, 228,  
230, 231, 233, 234, 236, 237, 240, 265,  
267  
Lobel (fosse), 93  
Lorgies, 63, 71, 91, 114, 132, 177, 184



Louvetz (le pré), 46  
 Mailly, 247  
 Mailly (moulin de), 83, 91, 99, 175, 246  
 Maisnil, 20, 21, 30, 114  
 Maissel, Massel, 47  
 Malines, 42, 106, 138, 240, 243, 249, 250, 251, 252, 253  
 Marchiennes (Abbaye de), 228, 230  
 Mauqhissart, 17, 127, 130, 132, 200, 202, 203, 267  
 Mauroy (le mez), 246  
 Meuzeville, 97  
 Mollinel, 89  
 Mottes (cense des), 47  
 Mottes (cense, ruelle des), 2, 10, 17, 27, 31, 32, 46, 53, 54, 55, 116, 126, 129, 131, 139, 140, 141, 164, 223, 229, 238, 239, 267  
 Neuve Chappelle, 5, 10, 32, 101, 102, 108, 113, 117, 119, 122, 124, 130, 132, 133, 134, 139, 140, 141, 142, 144, 145, 147, 150, 157, 158, 163, 165, 234  
 Orchies, 2, 85, 89, 119, 145, 202, 204, 221, 224, 228  
 Pauvres (ruelle des), 98, 176, 177  
 Pierette (camp de le), 119  
 Pierrart (le trou), 52, 53, 54  
 Pierre au bois (la), 46, 51  
 Pierrette, 247, 248  
 Pietre (bois de), 169, 180, 182, 184, 189, 207  
 Pietre (brasserie de), 25, 194  
 Pietre (moulin de), 12, 205, 237, 238, 239  
 Plouich, Ploich (le), 47, 240, 243, 251, 253  
 Poullain (Becquet/Bocquet), 175, 178, 179  
 Pummereaulx (mont des), 247, 248  
 Pummereaulx (puich), 63, 66, 69, 71, 72, 83, 91, 177, 191  
 Pummereaulx (riez des), 65, 71, 80, 83, 86, 90, 162, 168, 169, 174, 175, 176  
 Rassenghien, 85, 145, 202, 204  
 Renaussart, 248  
 Richebourg, 125  
 Sablonnières, Savelonnières, 1, 17, 25, 27, 30, 31, 32, 34, 35, 36, 37, 39, 40, 42, 43, 49, 50, 51, 52, 55, 163, 180, 181, 189, 212, 255  
 Saint Ame de Douay, 44, 57, 60, 63, 65, 68, 69, 72, 74, 76, 77, 79, 81, 82, 86, 89, 91, 96, 97, 98, 102, 135, 137, 144, 168, 169, 172, 224, 259, 260, 261  
 Saintghin, 130  
 St jansteene, 85, 202, 204  
 Thieulerie (la), 245  
 Thorel, 195  
 Thorel (ponchel), 154, 177, 179, 192, 197  
 Tricquenel, 38, 40, 51, 126, 129, 209, 255  
 Val (le), 240, 243, 251, 253  
 Verlengehem, 96  
 Vignette (Lille), 13  
 Wacquet (Le mont), 46, 51  
 Warneton, 39, 181, 240

# Table onomastique

- Asescaches ,Asechache, Aux Esquaches, 16, 17  
Audenarde (d'), 221  
Bacquelerot, Bacquerot, Bacquerelot (du), 5, 10, 28, 30, 33, 46, 51, 52, 126, 129, 130, 131, 143, 186, 188, 219, 248  
Baillet, 79  
Baillieul, Baillieul, 16, 17, 137  
Ballet, 68  
Barbet, 5, 6, 7, 9, 11, 16, 17, 24, 32, 88, 122, 179  
Barre (de le), 28, 43, 60, 61, 76, 83, 85, 92, 99, 111, 123, 129, 130, 131, 166, 167, 173, 185, 191, 241, 243, 249, 251, 253  
Bauduin, 209  
Bauters, 45  
Bauwens, 45  
Beauffremez (de), 220  
Beaussart, Beausart, Debeausars, 11, 16, 195, 239  
Becq (de le ), 112, 114, 131, 132, 235  
Becque, 5, 6, 7, 14, 15, 16, 17, 120, 126, 127, 131, 132, 153, 182, 211, 235  
Becquet, 68  
Belle, 37, 39, 59, 67  
Belvalet, 87, 170, 206  
Benault, Benaut, 82, 122  
Bernisse, 252  
Bert (de), 43  
Billau, 244, 245, 248  
Binault, 32, 45, 70, 84, 90, 198, 239  
Blancq (le), Lebland, 2, 139, 140, 141, 169, 244, 247  
Blondel, 131, 164, 185, 198, 212, 214, 216, 218  
Bocquet, 111, 151, 198, 212, 214, 216, 218  
Bocquette, Bocqueste, 6, 7, 22, 24, 151, 153, 164, 186, 189, 210, 217, 218  
Boe (de le), 88  
Boedin, 88  
Boidin, Boidyn (le), 6, 112, 131, 139, 141, 142, 200, 204, 241  
Bois (des), 120  
Bois (du), 28, 40, 103, 116, 119, 150, 267  
Bois, Boys (du), 43, 60, 69, 73, 82, 103, 111, 117, 119, 123, 124, 131, 132, 147, 150, 197, 228, 230, 256, 267, 268  
Bonnell, Bonel, 70, 143, 175, 241, 243, 248, 249, 250, 251  
Bonte, 45  
Bos (du), 109, 112, 113, 114, 211  
Bosquet, 128, 131, 216, 221  
Bosquiel (du), 227  
Bouchier, 5, 10  
Boucq (le), 229  
Boucquet, 123, 126  
Boucquiel, 45  
Boulet, Boulet, 93, 184, 206, 267  
Bourel, Bourrel, 30, 32, 110, 121, 122, 124, 125, 184  
Bourgeois, 80, 203  
Boury (de), 45  
Brame, 211  
Bron, Béron (du), 15, 158, 159, 180  
Brougnart, 48  
Broye (de la), 47  
Brun (le), 1, 12, 45, 252  
Bruneau, 206  
Brunel, 23, 101, 216, 218, 246  
Buisine, Buisine, 45, 68, 146, 148, 149, 150, 188, 196, 197, 204, 223, 225, 229  
Bultel, 252  
Buysset, 249  
Caillet, 129  
Callonne (de), 217  
Capitaine (Gawin dit), 211  
Cappellier, 131  
Carlier, 116, 175, 184, 207, 247, 248  
Caron, 241, 251, 253  
Carpentier, 5, 6, 7, 8, 9, 11, 17, 22, 111, 124, 152, 159, 161, 163, 164, 166, 170, 172, 178, 219, 233, 234, 235, 239, 240, 246  
Castricque, Catricque, Castricques, 5, 10, 32, 70, 74, 91, 122, 126, 162, 167, 176, 185, 188, 213, 219  
Cauchie, Caucie (de le), 96  
Caudrelier, 183, 247  
Caudron, 31, 34, 88

Caullier, 160  
 Charlet, 19, 20, 21  
 Chombart, 47, 177, 241, 243, 249, 251, 253  
 Chuine, Chuynes, 45, 87, 206  
 Clercq ((le), 23, 92, 130, 138, 143, 226, 235  
 Clermez (de), 252  
 Cochet, 22, 63, 65, 66, 67, 68, 69, 72  
 Cocq (le), 2, 89, 130, 191  
 Corion Coryon, 115, 128, 246  
 Courcelles (de), 244, 246, 247, 248  
 Cousin, 16, 17, 172, 176, 177, 209, 210  
 Cousturier, 25, 26, 27, 31, 32, 33, 34, 35, 37, 44  
 Couvreur dict Cottin, 118  
 Creton, 30, 31, 34, 37, 39, 59, 67, 69, 88, 94, 118, 119, 191, 229  
 Creux (Preudhomme Sgr du), 63, 65, 66, 67, 69, 71, 72, 77, 78, 79, 81, 90, 172, 176, 177  
 Crocq (du), 28, 40, 60, 69, 73, 89, 103, 223, 226, 229, 256  
 Crocquet (du), 89  
 Croix (de le), 53, 54, 55, 248  
 Cuignet, Cuignets, 119, 124  
 Cuillet, Cuylllet, 119  
 Cuvelier, Cuvelliers, 5, 6, 10, 228, 230  
 Cuvillon, 55, 89, 148, 150, 194, 229  
 Dantignoeul, 47, 61  
 Darras, 79, 109, 127, 140, 199, 202, 203, 246  
 Dauchy, 228, 230  
 Deffontaines, 55, 210, 213, 214, 216, 217, 218  
 Deledicque, 267  
 Demirenault, 52, 74, 76, 99  
 Denglos, 5, 10  
 Derbault, Dherbault, Derbau, 221, 224, 226, 227  
 Desbois, 120  
 Descamps, 27, 46, 52, 223, 227, 229  
 Deslobes, 45  
 Desmasieres, 245  
 Desmulliers, 229  
 Desplancques, 5, 10, 97, 98, 112, 120, 124, 199, 259, 261  
 Despretz, Despres, 47, 199, 202, 203  
 Desruelles, 45  
 Doresmieulx, Doresmieux, 28, 45, 68, 146, 149, 170, 196, 204, 222, 225, 226, 227, 229  
 Doublet, 45  
 Dours (de), 6, 7, 8, 11, 17, 22, 24, 25, 108, 122, 123, 124, 125, 131, 132, 151, 154, 177, 179, 181, 183, 184, 186, 187, 190, 192, 193, 194, 197, 198, 213, 219, 230, 235  
 Doux (le), 245  
 Druchon (de le Marre dit), 157, 183, 187, 188  
 Eynde (Van), 45, 249  
 Fache, Fasse, 211, 214  
 Fascon, Facon, 34, 39, 43, 56, 60, 61, 92, 108, 110, 113, 114, 115, 116, 129, 138, 143, 168, 241, 243, 248, 249, 251, 253  
 Faucompre, Faulcompret (de), 49, 52, 72, 74, 76, 94, 99, 108, 110, 113, 114, 115, 116, 199  
 Faucquenberghe (Caron dit), 243, 249, 250, 251, 253  
 Faulqueberghe, Faucqueberghe, 47  
 Febvre (le), 63, 65, 66, 67, 68, 69, 70, 72, 74, 78, 92, 108, 116, 121, 122, 124, 125, 132, 133, 138, 151, 162, 167, 170, 174, 175, 182, 183, 185, 187, 189, 196, 204, 210, 219, 223, 229, 230, 244, 245, 246  
 Flameng, 246, 247, 248  
 Flocquete, Flocquetel, 123  
 Flye, Flie (de le), 117, 139, 141, 142, 143  
 Follie (de le), 84  
 Forcheville (de), 84, 101, 145, 146, 148, 150, 193, 196, 202, 203, 243, 251, 252  
 Fournier, 5, 10, 89  
 Franchomme, 158, 159  
 Fremault, Freumault, 46, 228, 230  
 Froidure, 229  
 Fruleux, Frulleux, Frusleu, 6, 11, 118, 130, 157, 158, 213, 231, 233, 234, 238  
 Gallant, 200, 203  
 Gaquier, 244  
 Gawin dict Capitaine, 211  
 Gherbode, 221, 224, 225, 226, 227  
 Gherry, Ghery, Guery (de), 17, 24, 32, 111, 122, 128, 179, 186, 187, 189, 198  
 Ghesquiere, Ghuesquier, Guesquiere, 184, 207, 246, 248  
 Gillon (Le), 71, 88, 92, 99, 100, 101, 102, 106, 107, 109, 113, 116, 117, 119, 121,

122, 123, 124, 125, 126, 127, 131, 132,  
 133, 143, 144, 145, 147, 150, 169, 211,  
 213, 267  
 Gosson, 45, 68, 87, 146, 149, 170, 196,  
 204, 206  
 Grand (le), 30, 32, 45, 94, 99, 153, 154,  
 203, 204, 216, 218  
 Grange(de le), 246  
 Grenet, 71, 73, 94  
 Grenu, 18, 19, 20  
 Gris, 98  
 Grugon (de), 184  
 Gruson (de), 246  
 Guilbert, 175, 247  
 Guillebert (le), 145, 246, 247  
 Guillet, 109  
 Hacquart, Hacquars, 211, 214  
 Hamel (du), 5, 10, 14, 52, 138, 241, 243,  
 249, 251, 253  
 Hamel (du),, 243, 249  
 Haneron, 5  
 Hapiot, 58, 59, 222  
 Hardoye, 130  
 Hatte, 227  
 Havet, 229  
 Hayart, Haiar, Haiart, 61, 70, 74, 83, 92,  
 112, 129, 143, 144, 145, 147, 148, 150,  
 155, 167, 168, 174, 182, 241, 243, 249,  
 250, 251, 253  
 Heede (van de), 237  
 Hem (du), 43  
 Hennart, Henniart, 7, 8, 11, 17, 22, 30, 32,  
 63, 65, 66, 67, 68, 69, 70, 72, 74, 91,  
 104, 112, 114, 116, 122, 127, 129, 131,  
 132, 142, 154, 157, 159, 161, 162, 163,  
 164, 166, 167, 171, 172, 173, 174, 176,  
 177, 178, 179, 181, 185, 187, 188, 190,  
 191, 209, 223, 229, 232, 233, 234, 238,  
 240, 241, 243  
 Hennicot, Hennicocq, 53, 55, 151  
 Hennin (de), 183, 267  
 Herebroucq, Herrebroucq, 120  
 Herre (de le), 6, 7, 90, 118, 126, 130, 194  
 Herreng, Hereng, 188, 199, 200, 202, 203,  
 234, 235  
 Hochart, 45, 85, 204  
 Hochede, 241, 251, 253  
 Hot (du), 5, 10, 117, 227, 228, 230, 246  
 Houplines, 235  
 Hulse (van), 45, 98, 99, 252  
 Jacquemon(t), 246, 247, 248  
 Joye, Joie, 24, 151, 153, 154, 184, 206  
 Labbe, 14, 49  
 Lacherie (de le), 24, 114, 157, 202  
 Laden, 109, 111, 123, 126, 127, 211  
 Laignel, Laigniel, Laisniel, 6, 7, 8, 11, 22,  
 154, 164, 178, 181, 189, 194, 199, 213,  
 233, 235  
 Landas (de), 80, 87  
 Langle (de), 209, 210  
 Lattre (de), 248  
 Leroy, 12, 16, 267  
 Lespieres (de), 241, 249, 253  
 Leu(le), 91, 140, 142  
 Leureux, 141  
 Lévesque, 267  
 Libert, 247  
 Lienart, 184  
 Logelin, 123  
 Lombart, 139, 143  
 Louf (le), 154  
 Lucart, 153, 154  
 Lyot (de), 246  
 Macrel, 79  
 Magnel, 168, 180  
 Maieur (le), 67  
 Maistre (le), 154  
 Malbrancque, Mallebrancque, 5, 6, 7, 9,  
 11, 16, 17, 22, 109, 111, 113, 116, 124,  
 164, 181, 213, 214, 216, 218, 233  
 Mares (du), 45, 221, 228, 230  
 Marles (de), 29, 242, 244, 245, 248  
 Marmuze, 210, 214  
 Marotel, 45  
 Marre (de le), 125, 126, 128, 143, 157,  
 179, 184, 187, 188  
 Mars (de), 7, 8, 11, 16, 17, 116, 123, 124,  
 125, 128, 130, 131, 154, 160, 177, 184,  
 187, 195  
 Marsy, 118, 127, 138, 139, 140, 141, 142,  
 143, 144, 145, 147, 150, 231, 233, 234  
 Martin, 45  
 Mascler, 231  
 Masurel, 45  
 Mathelin, Matelin, 241, 246, 267  
 Maumarye, 110  
 Merchier (le), 45  
 Messeant, Massean, 47, 244, 246  
 Mesurolle, Masurolle(s), 34, 37, 38, 39,  
 40, 41, 42, 43, 49, 50, 51, 56, 57, 58, 59,

60, 62, 167, 219, 237, 238, 255, 257,  
 258, 267  
 Meurin, 39, 59  
 Mez (du), 241, 243, 249, 251  
 Mievre, Mieuvre (le), 36, 226, 229, 252  
 Miroul, 210  
 Misre, Mire (le), 205, 234, 235  
 Moncheaulx (de), 133  
 Mont Saint Eloy (du), 61  
 Montaine, 111  
 Montaingne, 33  
 Montmorency (de), 119, 221, 224, 228  
 Morel, 5, 6, 10, 16, 17, 18, 19, 108, 131,  
 163, 164, 165, 166, 211, 244, 248  
 Mortreul, 32, 188, 213, 214, 216  
 Neufglise (de), 32  
 Noielles, Noyelle, Noyelles (de), 27, 43,  
 61, 71, 242, 244, 245  
 Noir, Noyr (le), 5, 10, 164, 221, 225, 227  
 Noue (de), 16, 17  
 Pammart, 16  
 Parcquet, Parquet, 34, 43, 49, 50, 56, 57,  
 58, 59, 60, 62, 92, 127, 167, 185, 204,  
 257  
 Pecqueur, Pesqueur (le), 79, 187, 213, 216,  
 235  
 Penin (de), 28, 36, 61, 257  
 Pers (le), 45, 98, 145, 270  
 Petillon, 127, 178, 187, 194, 195  
 Pichonniere, 16, 17, 246  
 Pilliziere, 235  
 Pillon, 223  
 Pinchon, 14  
 Pipelart, 45  
 Pisson, 103  
 Plancque (de le), 32, 185, 191, 244, 246,  
 247  
 Ployart, 47, 248  
 Poissonniere, 17  
 Pollet, 152, 267  
 Pont (du), 32, 156, 267  
 Pottier, 204, 244, 246, 247, 248  
 Pourcheau, 204  
 Pret (du), 51, 109, 127  
 Preudhomme (Sgr du Creux), 46, 63, 65,  
 66, 67, 69, 71, 72, 77, 78, 79, 81, 83, 90,  
 98, 172, 175, 176, 177  
 Prevost, 33, 37, 39, 171, 184, 195  
 Quenette, 123  
 Quenol (Sanse dit), 211  
 Quesne (du), 47, 110, 125  
 Quillet, 124, 129  
 Rache (de), 241, 249, 250, 251, 253  
 Raie, Raye (de), 7, 8, 16, 17, 24, 114, 132,  
 157, 160, 186  
 Rains, 45  
 Rantere (de), 45  
 Rassel, 45  
 Retz(du), 15, 53, 55, 180, 181  
 Reubais, 223  
 Richardot (de), 199  
 Richardotz, 202  
 Ricquier, 89  
 Rogeau, Rogeault, 23, 116  
 Romanand, Romaignant, 221, 225, 226  
 Roubay (de), 191  
 Roussel, 47, 70, 157, 158, 198  
 Roux (le), 70, 79, 80, 82, 170, 196  
 Roy (du), 5, 10, 16, 27, 42, 54, 56, 78, 82,  
 84, 85, 89, 97, 98, 107, 119, 145, 148,  
 193, 194, 201, 202, 204, 207, 221, 224,  
 228, 237, 243, 249, 251, 252, 259  
 Roy (le), 5, 6, 7, 8, 10, 11, 12, 16, 17, 21,  
 26, 30, 34, 37, 38, 41, 45, 52, 53, 56, 58,  
 59, 61, 70, 74, 76, 78, 79, 83, 84, 90, 99,  
 112, 113, 116, 120, 122, 130, 135, 147,  
 151, 152, 153, 154, 159, 161, 162, 163,  
 164, 166, 172, 173, 174, 175, 177, 178,  
 179, 181, 183, 192, 194, 198, 201, 202,  
 207, 223, 224, 226, 229, 230, 232, 233,  
 234, 235, 239, 240, 243, 244, 245, 247,  
 249, 256, 267  
 Roy (le) Grard, 5, 7, 8, 9, 11, 16, 17, 45,  
 70, 110, 113, 122, 130, 151, 152, 153,  
 154, 159, 161, 162, 163, 164, 166, 172,  
 173, 174, 175, 177, 178, 179, 181, 183,  
 194, 198, 223, 229, 232, 233, 234, 236,  
 239, 240  
 Rozeau, Roseau, 109, 113, 118  
 Ruyelle, Ruielle, Ruelle (de le), 22, 47, 92,  
 174, 186, 244, 247, 248  
 Ruys (de), 51, 168  
 Saillart, 55  
 Saint Aubin (de), 45, 85, 119  
 Saintgier, Saint Gier, 47  
 Saint Léger, 47  
 Salle (de le), 47  
 Sanse, 124, 128, 129, 131, 152, 157, 211,  
 237  
 Sauters (de), 45

Scautdeten, 55  
 Screve, 9, 60, 61, 66, 69, 70, 72, 74, 78,  
 82, 83, 89, 91, 99, 118, 161, 162, 167,  
 174, 175, 176  
 Segar, 16, 17, 213  
 Segon, 5, 10, 210, 214, 216, 218  
 Smid (Van), 47  
 Sohier, 17, 24, 129  
 Soubly, 45  
 Souvillon, 267  
 Thieulaine, 44  
 Thoit (du), 55  
 Toucry, 12, 47, 237  
 Toulouse, Toulouze, Thoullouze,  
 Thoulouse, 15, 31, 112, 122, 130, 131,  
 132, 204, 235, 244, 248  
 Tronce (Carlier dit), 247  
 Turcq (le), 5, 6, 7, 9, 11, 17, 30, 45, 55, 68,  
 70, 90, 109, 110, 114, 121, 122, 124,  
 125, 146, 149, 151, 152, 153, 154, 156,  
 158, 159, 162, 163, 164, 166, 170, 178,  
 179, 183, 184, 186, 188, 196, 198, 202,  
 205, 213, 219, 229, 230, 231, 233, 234,  
 235, 237, 239, 240, 241  
 Vasselin, Wasselin, 119  
 Védie, 45  
 Venant, 45, 70, 79, 80, 82, 87, 88, 147,  
 150, 170, 197, 206, 252  
 Venin, Vennin, 109, 111, 113, 116, 119,  
 123, 125, 126, 127, 134  
 Verdebault, Verdeboult, Verdebout, 47  
 Verdier, Vredier, 221, 224, 225, 226  
 Vignoble, Vingnoble, 7, 16, 17, 23, 60, 61,  
 71, 76, 82, 83, 84, 85, 88, 90, 99, 110,  
 115, 121, 123, 124, 125, 128, 130, 151,  
 152, 153, 156, 164, 175, 182, 183, 184,  
 186, 188, 191, 198, 212, 214, 216, 218,  
 219, 230, 233, 241, 243, 244, 247, 248,  
 249, 250, 251, 253  
 Villain, 85, 145, 202, 204, 227  
 Viron, 19, 20, 233, 236  
 Vrelier (du), 247  
 Waignon, 229  
 Walloncapelle, 252  
 Wancourt, 88  
 Warembourg, 7, 109, 110, 122, 124, 125,  
 151, 183, 184, 186, 188, 199, 213, 214,  
 216, 218, 219, 235  
 Warlaing (de), 227  
 Warlin, Warlain (de), 221, 224, 226  
 Wasselin, Vasselin, 32, 94, 118  
 Wastepatte, Watepaste, 94, 118  
 Wattier, Wathier (le), 8, 17, 45, 68, 72, 74,  
 76, 79, 94, 99, 149, 151, 152, 153, 154,  
 156, 160, 161, 162, 167, 183, 186, 188,  
 196, 199, 213, 214, 217, 234  
 Wicart, Vicart, 122, 154, 204, 211  
 Widdebien, Widebien, Wydebien, 30, 32,  
 52, 108, 109, 110, 113, 116, 121, 122,  
 139, 184, 213  
 Wignacourt (de), 27, 35, 36  
 Wilgiers, 252  
 Willant, 45  
 Wincre, 204  
 Yende (van), 254  
 Zenecote, Zenecotte (van), 45